



Հարգելի՛ ընթերցող.

ԵՊՀ հայագիտական հետազոտությունների ինստիտուտը, չհետապնդելով որևէ եկամուտ, իր կայքերում ներկայացնելով հայագիտական հրատարակություններ, նպատակ ունի հանրությանն ավելի հասանելի դարձնել այդ ուսումնասիրությունները:

Մենք շնորհակալություն ենք հայտնում հայագիտական աշխատասիրությունների հեղինակներին, հրատարակիչներին:

Մեր կոնտակտները՝

Պաշտոնական կայք՝ <http://www.armin.am>

Էլ. փոստ՝ info@armin.am

Ս. ՄԱՐԿՈՍՅԱՆ

ԱՐԵՎՄՏԱԿԱՅՈՒԹՅԱՆ

ՎԻՃԱԿԸ

XIX

ԴԱՐԻ

ՎԵՐՋԵՐԻՆ

«ՀԱՅԱՍՏԱՆ» ՀՐԱՏԱՐԱԿՉՈՒԹՅՈՒՆ
ԵՐԵՎԱՆ
1968

Խմբագրությանը՝
պրոֆ. ԵՐՎԱՆԻ ՍԱՐԳՍՅԱՆԻ

Մեր այս համեստ աշխատությունը
նը ձոնում ենք մարքսիզմ-լենինիզմի
անկյուն անկյուն անկյուն
ՀԱՅԿ ԳՅՈՒԼԻԲԵՎԻՅԱՆԻ
անմոռաց հիշատակին

Ա Ռ Ա Ջ Ա Բ Ա Ն

Ձեռնամուխ լինելով շարադրելու արևմտահայության XIX դարի 90-ական թվականներին ապրած սոսկալի ողբերգության պատմությունը, մեր առաջ մի շարք հարակից հարցեր ծառայան, որոնք շրջանցելը մեզ դժվարացնում էր պարզ ու հստակ պատկերելու այն իրադրությունները, որոնց մեջ տեղի ունեցավ հայ ժողովրդի այդ ողբերգությունը:

Այդ հարցերից մեկը Օսմանյան կայսրության էությունն է, որին անդրադառնալու անհրաժեշտություն զգացվեց առավել ևս այն պատճառով, որ մեր պատմական ու հրապարակախոսական գրականության մեջ անհրաժեշտ չափով դրան չեն անդրադարձել: Մեզանում սովորաբար բավարարվել են ընդհանուր տեղերով, հիշատակումներով, որոնք գոհացնելով նեղ մասնագետներին կամ հարցին լավատեղյակ մարդկանց, ընթերցողներին լայն շրջանների համար հարցը թողել են մշուշի մեջ: Ելնելով մեր նպատակադրումից, որ այս աշխատությունը գրված է հիմնականում բավարարելու ընթերցողների լայն շրջանների հարցասիրությունը, մենք գտնում ենք, որ օսմանյան պետականության սխտեմի գոնե հարևանցիորեն պատկերումը անպայման անհրաժեշտություն է ներկայացնում: Մյուս կողմից, խոսել XIX դարի երկրորդ կեսի

Маркосян Сурен Сисакович
Положение
западных армян в конце XIX века

(На армянском языке)
Издательство „Айастан“
Ереван, 1968

1—6—3—4
79—66

օսմանյան պետության էության մասին, մեր կարծիքով, այդ նշանակում է վեր հանել այդ պետության ներքին բովանդակությունը և նրա տեղը միջազգային հարաբերությունների ոլորտում, իսկ այդ այլ բան չի նշանակում, քան գրել Թուրքիայի պատմությունը, մի բան, որ, հարկավ, մեր նպատակից դուրս է: Այդ պատճառով մենք անհրաժեշտ գտանք զոնե համառոտ ուղվածքով ընդհանուր պատկեր տալ այն պետական օրգանիզմի մասին, ուր դատապարտված էր ապրել արևմտահայությունը:

Կասկածից վեր է, որ արևմտահայության հիմնական զանգվածը և արևմտահայության դեմքը որոշողը աշխատավոր գյուղացիությունն էր, որի համար ամենակենսականը հողային հարաբերություններն էին: Մեզ թվում է, որ հայքդական հարաբերությունների հարցը հիմնականում հենց հողային հարաբերությունների հարցն է, ավելի ճիշտ, հողային հարցի այն սպեցիֆիկ բնույթը, որ դարեր շարունակ իշխում էր Թուրքիայում և XIX դարի քառասնական թվականներին օրենսդրական կարգով վերացված հայտարարվեց, ընդ որում, զոնե հայ իրականության մեջ այդ փոփոխությունը մնաց անվանական, իրականում շարունակելով պահպանել իր վաղեմի բնույթը: Մեր խոսքը քեմառական հողատիրական սիստեմի մասին է: Առանց այդ սիստեմի էությունը զոնե հարևանցիորեն պատկերացնելու դժվար է հասկանալ, թե ինչու հայ գյուղացին պարտավոր էր հարկատու լինել և՛ պետությանը, և՛ քուրդ աշիրեթապետերին: Ընդ որում, մի շարք տեղերում հայ գյուղացիությունն ինքը նորմալ էր համարում աշիրեթապետերին հարկատու լինել, իսկ պետական հարկատվությունը համարում էր ապօրինություն (օրինակ՝ Մոկսում):

Մեր ինչպես նախահեղափոխական, այնպես էլ ժամանակակից պատմաբանները բազմիցս արձանագրել են այն իրողությունը, որ այդ ժամանակ Թուրքիայում տիրապետում էր հողատիրության ֆեոդալական սիստեմ, որ հայ ռայան փաստորեն ճորտական վիճակի մեջ էր գտնվում, այլ կերպ ասած, մեր պատմաբաններն ու հրապարակախոսները արձանագրել են գոյություն ունեցող փաստը, առանց հարկավոր

չափով բացահայտելու հատկապես Թուրքիայում իշխող ֆեոդալական հարաբերությունների սպեցիֆիկ կողմը:

Այս աշխատության մեջ հեղինակը ջանացել է որոշ չափով պարզաբանել հողային հարաբերության այդ սպեցիֆիկ բնույթը և ցույց տալ, որ XIX դարի վերջերին հայ ժողովրդի ապրած ողբերգության մեջ զգալի դեր է խաղացել նաև այդ հարցը:

XIX դարի 90-ական թվականների հայկական կոտորածների հարցը սովորաբար բխեցնում էին հայկական հարցից, ընդ որում հայկական հարց ասելով հասկանում էին ոչ թե Բեռլինի տրակտատի 61-րդ հոդվածից բխող վարչական օրենսդրությունները, այլ արևմտահայ ժողովրդի ազատագրումը թուրքական լծից:

Դիվանագիտական հարաբերությունների մեջ արժարժվող «հայկական հարցը» էպպես եղել է Արևելյան կամ Թուրքական հարցի բաղադրիչ մասը: Անգլիայի համար «հայկական հարցը» միջոցներից մեկն էր անեքսիայի ենթարկելու սկզբում Կիպրոսը, հետո էլ Եգիպտոսը: Ֆրանսիայի համար դա այլ բան չէր, քան Սիրիայի նկատմամբ իր իմպերիալիստական հեռանկարների նախապատրաստման միջոցներից մեկը, իսկ ցարական Ռուսաստանի համար «հայկական հարցն» այլ բան չէր, քան Կ. Պոլսի և նեղուցների հարցն իր օգտին լուծելու նախապատրաստում:

Ուստի մենք գալիս ենք այն եզրակացության, որ հարյուրհազարավոր արևմտյան հայության կոտորածները հետևանք էին սուլթանիզմի և իմպերիալիզմի քաղաքականության:

Այս աշխատության մեջ մենք չենք անդրադարձել այն հեղինակների աշխատություններին, որոնց մեկնաբանություններն այս կամ այն հարցի վերաբերյալ չենք բաժանում: Նպատակահարմար ենք համարել շարադրել մեր անձնական եզրակացությունները, բանավե՛՛ մեջ չմտնելով ինչպես հին, այնպես էլ նոր հեղինակների հետ: Հակառակ դեպքում մեր գրքի ծավալը կրկնակի չափով կաճեր, առանց որևէ չափով ազդելու եզրակացությունների վրա:

Ընթերցողը մեր այս աշխատության մեջ կնկատի փաստական նյութի առատություն, որոնցից մի մասը ժամանակի

ընթացքում հրապարակված նյութեր են: Սակայն մենք այստեղ շրջանառության մեջ ենք դնում նաև զգալի քանակությամբ արխիվային նյութեր, որոնք առաջին անգամն են լույս աշխարհ տեսնում:

Մենք աշխատել ենք, որքան այդ հնարավոր է, մնալ պաղարյուն հետազոտողի գիտական դիրքերում և մեր առաջ քաշած թեզերը հիմնավորել բացարձակապես պաշտոնական վավերագրերով, որոնց մի մասը, ինչպես ասացինք, օգտագործված է եղել այլ հեղինակների կողմից:

Հ Ե Ղ Ի Ն Ա Կ

Ա ռ ա ջ ի ն գ լ ու խ

ՓՈՒՐՔԻԱՆ XIX դԱՐԻ ԵՐԿՐՈՐԴ ԿԵՍԻՆ

Հողի տիրապետման և օգտագործման իրավունքը Քուրքիայում:— Ցանքատարածություններն ավելացնելու վերաբերյալ Քուրքիայի գյուղացիության ինդեֆերենտիզմի պատճառը:— Հողագործական տեխնիկայի ծայրահեղ պրիմիտիվությունը:— Հողագործական արտադրության լճացումը և ցածր մակարդակը XIX դարի վերջերին:— Դուրանի դոգմաները և հայ գյուղացիությունը:— Արհեստավորների ղեկավարության XIX դ. երկրորդ կեսին:— Արհեստների անկման հիմնական պատճառները:— Ինչու՞ Քուրքիայում նախակղզրնական կուտակում տեղի չէր ունենում:— Պանդիտությունը որպես սոցիալական երևույթ:— Քուրքիայի հանքային հարստությունները շահագործելու արգելքները:— Գործարանային արդյունաբերության բացակայությունը Քուրքիայում:— Քուրքիայի արտաքին առևտուրը և պասսիվ բալանսը:— Եվրոպական կապիտալի բնույթը Քուրքիայում:— Բանկային գործը:— Տեղական կոմպրագորային բուրժուազիան:— Կապիտուլյացիոն և օթիմը և անհավասար դաշնագրերը Քուրքիայում:— Արտաքին փոխառությունները և դրանց անդրադարձումը Քուրքիայի ժողովրդական մասսաների վրա:— Օսմանյան պետական պարտքի վարչությունը և նրա դերը պետության մեջ:— Փոխառությունների գումարների անարտադրական վատնումները:— Կոռուպցիան որպես թուրքական կառավարական սխտեմի ատրիբուտ:— Սուլթանի, ֆեոդալական արիստոկրատիայի և Բ. Դուան եմիթասնական իշխանությունը: Դուրանի դոգմաները որպես այդ իշխանության հիմք:— Պալատական և վարչական պարազիտիզմը և ֆավորիտիզմը կառավարական սխտեմի

տեմում:— Թանգիմաթի սկզբունքները որպես «անպտուղ խոստումներ»:— Ի՞նչու հաթթը-շերիֆի և հաթթը-հումայունի սկզբունքները չէին կարող կիրառվել կյանքում:— Միզհաթ փաշայի սահմանադրության նախագծի և Թուրքիայի պետական ու հասարակական կյանքի անհարիրությունը: Արգոս Համիդի կողմից այդ նախագծի ընդունումն իբրև միջոց՝ կանխելու Թուրքիայի շլատումը:

Թուրքիան իր ամբողջությամբ XIX դարի երկրորդ կեսին դեռևս հետամնաց, գերազանցապես գյուղատնտեսական երկիր էր՝ ամբողջովին պարուրված ֆեոդալա-կղերական հարաբերությունների ցանցի մեջ: Հատկապես Անատոլիայի հայկական վիլայեթներում գերակշռում էր քոչվորական ֆեոդալիզմին հատուկ էքստենսիվ խաշնարածական անասնապահությունը, շնայած այդ վիլայեթների հայ իրականության մեջ տնտեսության գլխավոր ճյուղը հողագործությունն էր:

Ամբողջ երկրի մասշտաբով կիսաֆեոդալական, իսկ որոշ տեղերում և հատկապես հայկական վիլայեթներում լիակատար ֆեոդալական հարաբերությունները՝ մի կողմից, օտարերկրյա արդյունաբերական ու դրամական կապիտալի մենաշնորհային դրությունը՝ մյուս կողմից և, վերջապես, պետական սիստեմի թեոկրատական բնույթը՝ երրորդ կողմից, իրենց խոր կնիքն էին դրել Օսմանյան կայսրության բոլոր բնագավառների վրա՝ սկսած կենցաղից, վերջացրած ամենաբարդ հասարակական հարաբերություններով:

Թուրքիայում հողի «տիրումը» (владение)... չի նշանակում սեփականություն,— գրում է Կ. Մարքսը,— որն ըստ Ղուրանի արգելվում էր քրիստոնյաներին, այլ այստեղ նկատի է առնվում օգտագործման իրավունքը»¹:

Խ. Զ. Գաբիդուլլինը բերում է թուրք պատմաբան Ա. Ռեֆիկի հետևյալ վկայությունը՝ «Ռայան կարող էր հողագործությամբ զբաղվել, բայց հողի տեր համարվել չէր կարող»²: Թուրքիայում հողերի մեծագույն մասը տիրույթի իրավուն-

քով գտնվում էր ֆեոդալների և դավանական հաստատությունների ձեռքին: Գյուղացիությունն այդ հողերն օգտագործում էր անժամկետ վարձակալության իրավունքով: Պետությունը, իբրև հողային ֆոնդի գերագույն սեփականատեր, ստանում էր հարկ-ռենտայի որոշակի բաժինը, որ կազմում էր բերքի 12½% -ը: Այդ հողային հարկը (աշարը) պետությունը գանձում էր կապալային սիստեմով: Հարկը աճուրդի էր հանվում: Ռենտայի մյուս մասը, որը մի քանի անգամ գերազանցում էր պետական բաժնից, անցնում էր ֆեոդալներին, կապալառուներին, պետական հարկահաններին, բոլոր կարգի մեծ ու փոքր աստիճանավորներին՝ սկսած վալիններից (նահանգապետներից) մինչև զապթիաները (օստիկանները): Այնպես որ գյուղացին հարկադրված էր տալ ո՛չ միայն իր հավելյալ աշխատանքի արդյունքը, այլ հահախ նաև անհրաժեշտ աշխատանքի արդյունքի մի մասը:

Հայկական վիլայեթների հողագործական աշխատանքը կատարում էին գլխավորապես հայ գյուղացիները: Թուրքերը հիմնականում բնակվում էին քաղաքներում, իսկ գյուղերում շատ շնչին փոքրամասնություն էին կազմում: Քրդերը զբաղվում էին գլխավորապես խաշնարածությամբ, նրանց հիմնական զանգվածը վրանաբնակ քոչվորներ էին: Այնպես որ հայկական վիլայեթներում աշարի ամբողջ ծանրությունը բացառապես ընկած էր հայ գյուղացիության վրա:

Անգլիական հյուպատոսներից մեկի պաշտոնական վկայությամբ, հայ գյուղացիության աշխատանքի արդյունքի միայն 30% -ն էր մնում արտագորողներին:

Կոն Սարգսյանն իր «Այց Թուրքաց Հայաստան» աշխատության մեջ գրում է, որ թուրքահայ գյուղացին հողասակավությունից չի գանգատվում, ինչպես մենք այդ տեսնում ենք Ալեքսանդրապոլի գավառում: Ով ինչքան միջոց ունի, այնքան էլ հող ունի¹: Այս նկատողությունը, իհարկե, արտաքուստ ճիշտ է, բայց ըստ էության դա հեռավոր շփով ցուցանիշ չէ արևմտահայ գյուղացիության կյանքի բարվոք պայմանների: Բանն այն է, որ գյուղացին ոչնչով շահագոր-

¹ К. Маркс и Ф. Энгельс, Сочинения, т. X, стр. 9.

² X. З. Габидуллин, Младотурецкая революция, 1939, стр. 84.

զընված շէր ցանկացած և իր ունեցած հնարավորութեան սահմաններում մշակել երկրի պարապ հողերը, քանի որ թուրքական պետական սիստեմի պայմաններում գյուղացին ինչքան շատ մշակեր, այնքան ավելի պետք է շահագործման ենթարկվեր պետութեան, պորտաբույծ ֆեոդալների և թուրք աստիճանավորների կողմից:

«Թուրքական կառավարութեան անգործունյա վերաբերմունքը, ազգային, քաղաքական և հողային հարաբերութեաների հիման վրա առաջացող ելույթները, անձնական և զուլքային անվտանգութեան ապահովութեան բացակայութեանը, վարչութեան կեղեքումները և քայքայվող ֆեոդալիզմի ճնշումները՝ Թուրքիայի հողագործութեանը լիակատար անկման էին հասցրել,— գրում է նախասովետական ռուս հեղինակ Ի. Ի. Գոլոբորոժկոն:— Գյուղացիները փախչում են վարուցանքից, դաշտերը մնում են խոպան: Կայսրութեան հարմար հողերի մեծ մասն այժմ անմշակ է: Մինչդեռ Թուրքիան տիրապետում է Հին Աշխարհի ամենաաղաքավանը հողերը»¹:

Այս վկայութեանը վերաբերում է Թուրքիային ընդհանրապես, ինչ վերաբերում է զուտ հայկական վիլայեթներին, նույն հեղինակը գրում է՝ «Ռուսաստանին սահմանակից էրզրումի վիլայեթում հարմար հողերի տասներորդ մասը հազիվ է մշակվում, այն էլ շատ վատ: Փոքրասիական վիլայեթներում հողագործութեանը գտնվում է զարգացման շատ ցածր աստիճանի վրա: Հողագործութեան սիստեմները նույնն են, ինչ որ մի քանի հարյուրամյակ սրանից առաջ... Սերմափոխական ցանք այստեղ գոյութեան չունի: Միևնույն արտում բազում տարիներ մշակվում է նույն կուլտուրան, մինչև որ հողի բերքատվութեանը նվազում է: Եվ այդ չարարտացվող, երեք տարին մեկ հանգստացող հողը բերք է տալիս մեկին տասնհինգ, մեկին քսան»:

Թերևս թվա, որ հողագործական աշխատանքների այդ հետամնացութեանը հատուկ էր միայն հայկական վիլայեթ-

ներին, բայց բանն այն է, որ նույնիսկ հայերի նկատմամբ ամենաանբարյացակամ նկարագրողներն անգամ, ինչպիսին ցարական աստիճանավոր Գրյազնովն էր, վկայում են, որ հայ գյուղացիութեանն իր հողագործական կուլտուրայով մի ամբողջ գլխով բարձր էր իր հարևաններից: Նույն Ի. Ի. Գոլոբորոժկոն, անդրադառնալով Իրաքի հողի մշակման եղանակներին, գրում է՝ «Վերևում մենք խոսեցինք անատոլիական գյուղացիութեան կողմից հողի մշակման նախնադարյան եղանակների մասին: Սակայն այդ եղանակները այստեղի երկրագործների գործադրած եղանակների համեմատությամբ կարող են գյուղատնտեսական տեխնիկայի վերջին խոսք համարվել: Արաբական Իրաքի գյուղացիները հողը սովորաբար վարում են հասարակ բահերով, իսկ տափանի և փոցխի փոխարեն գործ են ածում արմավենու ճղած ձողեր, որոնցով հարթում են ակոսները..., կալսում են տնային անասունների կոխրճելու միջոցով. անասուններին ջրում են շրջանաձև թափված հասկերի վրայով մինչև որ անասունների ոտքերի տակ հասկերը մանրանան»¹: Այսինքն, գյուղատնտեսական արտադրութեան մեջ ոչ միայն թեկուզ ամենապրիմիտիվ գործիքներ չէին գործադրվում, այլև գյուղատնտեսութեանն ընթանում էր ճիշտ այնպես, ինչպես այդ նկարագրված է եգիպտական հիբրոգլիֆներում և Միջագետքի սեպագիր արձանագրութեաններում: Եվ այս պատկերը վերաբերում է XX դարի սկզբներին:

Ինքնին հասկանալի է, որ այդպիսի պայմաններում գյուղատնտեսութեան ինտենսիվութեան մասին խոսք անգամ լինել չէր կարող:

Որպեսզի պարզ լինի, թե ամբողջ պետութեան մեջ ինչքան շնչին էր մշակվող հողերի տարածութեանը, բերնեք հետևյալ փաստերը:

Բնակչութեան յուրաքանչյուր շնչի հաշվով XIX դարի վերջերին Հունգարիայում մշակվում էր 3,4 հեկտար, Ռուսաստանում՝ 2,5, իսկ Թուրքիայում՝ 0,6 հեկտար հող: XIX դարի վերջին տասնամյակի տվյալներով հացահատկաբուծութեանը

¹ И. И. Голобородько (Южанин), Старая и новая Турция, 1908, стр. 123.

¹ Նույն տեղում, էջ 124—126:

նը լիովին լճացած վիճակում էր՝ կանգնած էր անշափ ցածր մակարդակի վրա: Այսպես՝ ըստ Ալիմովի բերած տվյալների,

1895 թ. Թուրքիայում արտադրվել է 0,59 մլ. ա հացահատիկ
1897 » » » 0,48 » » »
1900 » » » 0,54 » » »

Հողագործության տեխնիկական հետամնացությունը, ինչպես և գյուղատնտեսական արտադրանքների ցածր մակարդակն ու լճացումը հետևանք էին ո՛չ միայն Թուրքիայում իշխող ֆեոդալա-վաշխառուական անագորույն շահագործման, այլև դրան զուգընթաց սուլթանական Թուրքիայի պետական-հասարակական սիստեմի բնույթի:

Ըստ նույն հեղինակի տվյալների, Թուրքիայում մշակվող հողերից ստացվող արդյունքի 39,30/0-ը գնում էր ֆեոդալներին (որից 12,5% -ը՝ պետությանը), 26,2% -ը՝ գյուղական վերնախավին, պաշտոնական գույումներին և վաշխառուներին, և միայն 34,50/0-ը՝ ամբողջ գյուղացիությանը, այլ կերպ ասած, բնակչության 5% -ին բաժին էր ընկնում գյուղացու աշխատանքի արդյունքի 65,50/0-ը, իսկ 95% կազմող գյուղացիությանը մնում էր իր աշխատանքի արդյունքի ընդամենը 34,50/0-ը¹:

Ալիմովն իր ուրվագծում բազմաթիվ բնորոշ փաստերից բերում է հետևյալը. նա գրում է՝ «Կապալառուն գյուղ էր գալիս «աստիճանավորների» ամբողջ ոհմակով և իր կամայականությամբ գանձում էր բերքի ոչ միայն 1/8 մասը: Նախած կապալառուի ախորժակին, տասանորդը հասնում էր 20—30 և 40% -ի»: Թե ուր էին հասցնում կապալառուի ոտընձրգությունները, մեզ պատկեր է տալիս Բեյրութի նահանգապետն իր զեկուցագրում. «Այդ շրջանի աշարը (տասանորդը) ինչպես և մյուս շրջաններինը աճուրդով վաճառվում է կապալառուներին: Հետևանքը լինում է այն, որ մեկ տասանորդի փոխարեն ժողովուրդը վճարում է մի քանի տասանորդ: Ցույց տալու համար, թե ուր է հասցնում այդպիսի ճնշումը,

ես պետք է բերեմ հետևյալ փաստը: Այդ շրջանում բնակչությունը կապալառուներից խուսափելու համար, այսինքն՝ որպեսզի իր տնկած ծառերի ամբողջ պտուղը կապալառուին տալուց հետո նաև դրամական տուգանք չվճարի, կտրել և ոչնչացրել է առնվազն 15000 ձիթենի»¹:

Չնայած Թուրքիայի գյուղացիական մասսաների ամենադժնդակ պայմաններին, չնայած երկրագործական արտադրանքների լճացած լինելուն, տարեցտարի պետական աշարն ավելանում էր՝ իր ծանրությամբ ավելի ու ավելի ճնշելով գյուղացիությանը: Այսպես, օրինակ, նույն հեղինակի տվյալներով, եթե 1852 թվականին հողային հարկի հողվածով պետական եկամուտը կազմում էր 50 միլիոն ֆրանկ, ապա 1875 թվականին այդ հողվածով գանձվում էր 247 միլիոն ֆրանկ, այլ կերպ ասած, այդ ժամանակամիջոցում հողային հարկը աճել էր հինգ անգամ:

Աներկբայելի իրողություն է, որ Թուրքիայի աշխատավոր գյուղացիության դրությունը հույժ ծանր էր: Սակավապետ և աշխատասեր թուրք գյուղացիները, — գրում է անգլիացի հեղինակ Նայտը, — կառավարման արատներից տառապում էին նույնքան, ինչքան քրիստոնյաները, նրանք վճարում էին նույն ծանր հարկերը, ինչ որ իրենց քրիստոնյա հարևանները; ենթակա էին հարկահանների նույն խարդախություններին... նրանցից գանձվող փողը չէր ծախսվում ոչ իրենց, ոչ էլ երկրի դրությունը բարելավելու համար, այլ գնում էր կառավարող կլիկին հարստացնելու...»²: Բայց, այդուհանդերձ, հատկապես հայկական վիլայեթների հայ գյուղացիության դրությունը ուղղակի անտանելի էր, որովհետև բացի այն բոլոր ընդհանուր կեղեքումներից, որոնց ենթարկվում էր Թուրքիայի գյուղացիությունն ընդհանրապես, հայերը հավելյալ շահագործման էին ենթարկվում որպես քրիստոնյաներ: Եվ այդ հանգամանքը ընդհանուր պետական քաղաքականություն էր, որ բխում էր Ղուրանի սկզբունքներից: «Ղուրանը և նրա

¹ Коммунистическая академия. Очерки по истории Востока в эпоху империализма (сборник), 1934, Аб. Алимов. Турция, стр. 27.

¹ Նույն տեղում, էջ 8:

² Найт, Революционный переворот в Турции, 1914, стр. 44.

վրա հիմնված մահմեդական օրենսդրությունը,— գրում է Մարքսը,— ամբողջ աշխարհի աշխարհագրությունն ու ազգագրությունը վեր են ածում երկու կեսի բաժանվող պարզ ու հարմար ֆորմուլայի՝ ուղղահասկատանների և անհավատների: Անհավատը դա «գյավուր» է, թշնամի է: Իսլամը անիժում է անհավատների ազգությունը և ընդհանուր թշնամության վիճակ է ստեղծում մահմեդականների և անհավատների միջև... «Թուրքիայում նրանց (քրիստոնյանների) հասարակության ամբողջ կառուցվածքը բխում է ռայայի ենթարկվելուց Ղուրանին, որն իր կողմից նրանց վերաբերվում է որպես անհավատների, այսինքն՝ որպես կրոնական առումով ազգություն»¹:

Մարքսի այդ ընդհանրացումներին իլյուստրացիա կարող է ծառայել հայկական վիլայեթների գյուղացիության դրությունը, որի մասին տեղեկությունները քաղում ենք հայկական աղբյուրներից:

«...4. Պոլսի հայոց պատրիարքարանի մի պաշտոնական հրատարակության մեջ, որ վերաբերում է 1876 թվականին («Տեղեկագիր գավառական հարստահարությանց», 4. Պոլիս, 1876 թ., էջ 29—36), հականե հավանե հիշատակված են հայաբնակ նահանգներում գտնված 276 հայ գյուղեր, որոնց հողերը... հափշտակված են եղել քրդերի, շատ քիչ թվով նաև թուրք ազգացիկների ձեռքով: Նույն պատրիարքարանը 1912 թվականին հրատարակած ֆրանսերեն տեղեկագրի մեջ մանրամասն տեղեկություններ է գրել հայերից զանազան ժամանակ խլված հողերի, տների և առհասարակ անշարժ կալվածների մասին... բերում ենք մի քանի ընդհանուր գումար.— հափշտակված են արտեր 26185, տներ՝ 2591, խաղողի և այլ այգիներ՝ 1190, մարգեր՝ 2007, կառուցվածքներ՝ 1066, արոտներ՝ 460: Իսկ մի ուրիշ մասնավոր աղբյուր հափշտակված հողերի ընդհանուր տարածությունը հաշվում է 1030000 օրավար»²:

¹ К. Маркс и Ф. Энгельс, Сочинения, т. X, стр. 6 и 7.

² Ան, Թուրքահայ հեղափոխական գաղափարաբանությունը, հ. 1, Փարիզ, 1934, էջ 51.

Այս բոլոր հափշտակումները, որ կատարվել էին ժամանակի ընթացքում, հափշտակումներ կարող էին համարվել սովորական, մարդկային նորմալ իրավաբանական տեսակետից: Բայց Թուրքիայում իրական կյանքում նորմալ մարդկային իրավաբանական «գյավուրին» վերաբերել չէր կարող: Մահմեդական դոգմաների իրավաբանմամբ, որն ամբողջ պետության իրավական հիմքն էր կազմում, ռայան ո՛չ միայն անշարժ գույքի սեփականության, այլև պարզ տիրակալման (владения) իրավունքից զրկված էր: Իբրև շնորհնա կարող էր սոսկ հողօգտագործող լինել, իսկ տիրակալումը միայն պայմանական էր, որ ամեն մի կոնկրետ դեպքում կարող էր վերանալ առանց դատ ու դատաստանի, պարզ վարչական կարգադրությամբ: Այստեղից էլ հասկանալի է, որ Լեոյի հիշատակած հափշտակումները իրավականացված էին հենց պետության կողմից: Կառավարական օրգանները, եթե մանավանդ նկատի ունենանք կաշառակերության օրինականացված լինելը, կարող էին հայ գյուղացիների կողմից դարերով մշակվող հողը առանց որևէ դժվարության հատկացնել քուրդ կամ շերքեզ «ազդեցիկներին» այն պարզ «օրինական» հիման վրա, որ ըստ Ղուրանի դոգմաների, հայերը իբրև ոչ մահմեդականներ թշնամի էին համարվում և զուրկ էին տիրակալության իրավունքից:

1890-ական թվականների հայկական դեպքերի կապակցությամբ Թուրքիայի առաջարկով ծպտյալ կերպով հայկական վիլայեթներն այցելած ռուսական գերագույն շտաբի գնդապետ Պուտյատան իր զեկուցագրերից մեկում հաղորդում է՝ «Ամենուրեք նկատվում է կեղտ, ամեն մի հարմարության բացակայություն, գյուղական տները քարերի կույտեր են, իսկ գյուղերը հիշեցնում են հնագիտական բլուրների խմբեր, բնակչությունը ցնցոտիների մեջ է և քնում է անասունների հետ միասին: Այստեղ նույնիսկ երկրագործական գործիքները, ծանրություն կրելու սայլերը, կալսելու եղանակը պահպանվել են այնպես, ինչպես դրանք նկարագրված են Աստվածաշնչում»: Այնուհետև Պուտյատան արձանագրում է հաղորդակցության ճանապարհների իսպառ բացակայությունը: «Իմ այցելած շերտում (այսինքն՝ հայ-

կական վիլայիթներում—Ս. Մ.) արդյունաբերությունը սահմանափակվում է կոպիտ քաթանի, բրդե և կիսաբրդե կտորեղենի, գորգերի և կարպետների ձեռքի արտադրությամբ... Եթե զարկ տրվի արդյունաբերությանը, հանքային հարուստությունների շահագործմանը՝ կյանքի հարմարությունները և բարեկեցությունը բազմաթիվ անգամ կբարձրանան: Բայց դրա համար առաջին քայլը պետք է լինի հաղորդակցության ճանապարհների, հեռագրական և փոստային հաղորդակցությունների զարգացումը: Մինչդեռ թուրքական կառավարության կողմից մենք տեսնում ենք ամենաանհրաժեշտ անփութություն: Եթե ճանապարհներին կամուրջներ և աղբյուրներ են հանդիպում, ապա դրանց մեծ մասը պատկանում է անդրջրհեղեղյան ժամանակներին»¹...

Այս ֆեոդալական հետամնացության պատկերը հատուկ էր ո՛չ միայն հայկական վիլայիթների (ինչպես և ամբողջ Թուրքիայի) գյուղերին, այլև քաղաքներին, որոնք ավելի հետամնաց էին, քան միջնադարյան Եվրոպայի քաղաքները: Այդ առթիվ ուս հեղինակ Բ. Ի. Գոլոբորոժկոն, որի «Հին և նոր Թուրքիա» աշխատությունից երևում է, որ քաջատեղյակ է Թուրքիայի առօրյա կյանքին ու կենցաղի նույնիսկ մանրամասնություններին, իր աշխատության մեջ այսպես է նկարագրում XX դարի առաջին տասնամյակի թուրքական քաղաքը. «Քաղաքային շուկաները լեցուն են բազմազան արհեստների տնայնագործներով: Նրանք ըստ իրենց զբաղմունքի և ազգության զբաղեցնում են ամբողջ թաղամասեր... Քանի դեռ Թուրքիան միջազգային փոխանակության մեջ չէր ընդգրկված, տնայնագործական արհեստները դեռ կարող էին ծաղկել: Բայց այժմ (XX դարի առաջին տասնամյակում—Ս. Մ.), երբ եվրոպական կապիտալը ճեղքել է այդ պատնեշը, որը նրան բաժանում էր թուրքական շուկայից, տեղական արտադրությունը նույն վիճակն է ապրում, ինչ որ միջնադարյան տնայնագործությունը Եվրոպայում. նա դատապարտված է դանդաղ և ծանր մահվան: Գործարանային արտադրանքները շատ ավելի էժան և գեղեցիկ

են ձեռքով արտադրվածներից: Օտարերկրյա ֆաբրիկաները, շնայած մաքսերին, տարեցտարի ավելի ու ավելի են շուկայից դուրս մղում տեղական արտադրանքները: Անցյալ դարի (այսինքն՝ XIX դ.—Ս. Մ.) սկզբներին բազում ջուլհակներ զբաղված էին գորգեր և հագուստեղեն արտադրելու գործով: Մետաքսե գործվածքեղենը, գորգերը, հախճապակին Թուրքիայից արտահանվում էին Եվրոպա: Այժմ մարում է հաստոցների լիկլիկոցը, աղբատանում են համբարությունները, քաղցած են մնում և բնաջնջվում են թուրքական արհեստավորները: Եվրոպական մեքենայական արդյունաբերությունը սպանել է արևելյան տնայնագործական արդյունաբերության ճյուղերի մեծ մասը: Բազմադարյան արհեստավորա-տնայնագործական կարգեր ունեցող երկրի համար դա շատ հիվանդագին պրոցես է: Հարյուր-հազարավոր բանվորական ձեռքեր չեն կարող արագորեն հարմարվել այլ աշխատանքի»¹:

Ուշագրավ է, որ մինչև XIX դարի առաջին քառորդը Թուրքիայի արհեստավորական և տնայնագործական արդյունաբերությունը զգալի չափով զարգացած էր: Որոշ արհեստներ իրենց հմայքը պահպանում էին տակավին XX դարի սկզբներին: Այդպիսի արհեստներից էին առաջին հերթին վանի ոսկերչությունն ու արծաթագործությունը, որոնք սահմանագծվում էին գեղարվեստական նրբության հասնող արտադրության հետ: Սակայն նույնիսկ XIX դարի կեսերին այդպիսի հատուկ արհեստները քիչ էին մնացել և դրանք զլխավորապես այն արհեստներն էին, որոնք եվրոպական կապիտալիստական արդյունաբերական ու մեքենայական արտադրության կողմից մրցակից չունեին: Իսկ ընդհանրապես արհեստավորական արտադրությունը զանգվածորեն դեգրադացիայի էր ենթարկվում:

«Առաջներում,— գրում է Ռոզենը,— Եվրոպան խիստ շատ կտորեղեն էր ստանում Թուրքիայից: Այժմ այնտեղ ֆաբրիկատները ոչ միայն իրենց արտաքին գնորդներն են կորցրել, այլև սեփական երկրում հանդիպում են օտար ապ-

¹ АВПР, Политархив, ф. 3439, лл. 30—37.

¹ И. И. Голобородько, Старая и новая Турция, 1908, стр. 148.

րանքների, որոնք և՛ ավելի լավն են, և՛ ավելի էժան»¹։ Ռոզենը առանձնապես հիշատակելով մետաքսեղեն գործվածքները, նշում է՝ «Իրենց մետաքսեղեն ապրանքներով առանձնապես հայտնի են Կ. Պոլիսը, Սկյուֆարին, Բրուսան, Դամասկոսը, Դիարբեքիրը։ Սակայն Կ. Պոլսի 3000 հաստոցից մնացել է միայն 350-ը (XIX դ. կեսին), Բրուսայում դրանց թիվը կրճատվել է մինչև 500-ի. 1831 թվականին Տեռնովոյում 2000-ից մնացել էր 200-ը»²։

Ար. Ալիմովը Թուրքիայի նորագույն պատմությանը նվիրած իր ուրվագծում գրում է՝ «XIX դարի ընթացքում տարեցտարի աճում էր օտարերկրյա ապրանքների ներմուծումը Թուրքիա։ Օտար վաճառականները հմտորեն օգտագործում էին օտարերկրացիներին հատկացված արտոնությունները։ Նրանց չէր դիպչում ո՛չ ֆեոդալա-կղերական պետության գանձահասուլթային սիստեմը, ոչ «սատրապների և փաշաների» կամայականությունները, մինչդեռ այդ ամենը հարվածում էր հայրենական արդյունաբերությանն ու առևտրին։ Եթե երեսնական թվականներին այնպիսի ներքին տոնավաճառների շրջանառությունները, ինչպիսին էին Թոխաթն ու Ջելեն, հասնում էին տասնյակ միլիոնների ուրբու, ապա 70-ական թվականներին ներքին առևտրական այդ կենտրոնները չբացան և առևտուրը տեղափոխվեց նավահանգստային քաղաքները։ Սկյուֆարիում և Տեռնովոյում 1812 թվականին հաշվվում էր մոտավորապես 2000-ական ջուլհակային հաստոցներ, իսկ 1846 թվականին մնացել էր 250։ XIX դարի սկզբին Հալեպը արտադրում էր մինչև 100 միլիոն ֆրանկի գանազան գործվածքեղեն, իսկ հիսուն տարի անց այդ թվանշանն իջավ 7—8 միլիոն ֆրանկի։ 50-ական թվականներին Անգորան ուներ մահուդ արտադրող 300 տնայնագործական ձեռնարկություն, իսկ 1877 թվականին մնացել էր 3—4-ը»³։

Խ. Զ. Գաբիդուլլինը երիտասարդ Թուրքերի հեղափոխու-

թյանը վերաբերող իր աշխատության մեջ բերում է Թաթար ժուռնալիստ Ց. Քյարիմովից մի մեջբերում, որը փայլուն կերպով ցույց է տալիս այն հիմնական պատճառներից մեկը, որ քայքայիչ ազդեցություն էին ունենում Թուրքիայի էկոնոմիկայի վրա։ «Ընդհանուր առմամբ,— գրում է Թաթար ժուռնալիստը,— տեղական բնակչության տնտեսական զարգացման համար շատ խոչընդոտներ կան, որոնցից ամենամեծը կապիտուլյացիոն դաշնագրերն են եվրոպական տերությունների հետ։ Թուրք առևտրական Մուհամմեդ էֆենդին տարեկան մեկ հազար լիրայի շրջանառություն ունի, դրա համար նա պետությունը վճարում է տարեկան 10—15 լիրայի շահույթ։ Իսկ անգլիական «Բեռնեթ» ֆիրման, որը գտնվում է նրա ձեռնարկության դիմաց, 150 հազար լիրայի շրջանառություն ունի, բայց նա պետությանը ոչ մի կոպեկ հարկ չի վճարում, որովհետև ֆիրմայի տերը օտարահպատակ է և օգտվում է կապիտուլյացիայի իրավունքով։ Ամեն մի եվրոպացի, վճարելով ուրբուն 11 կոպեկ մաքս, կարող է Թուրքիա այնքան ապրանք լցնել, ինչքան ցանկանում է։ Բնական է, որ տեղական արտադրության ապրանքները շեն կարող մրցել եվրոպականի հետ»¹։

Արհեստների և արհեստավորների քայքայումը, հարկավ, հատուկ էր ամեն մի կապիտալիստական երկրի։ Կապիտալիզմի զարգացման ամբողջ պատմությունը լեցուն է բազմաթիվ հար և նման փաստերով։ Բայց Բյուրիմացության արդյունք կլինի, եթե այդ նմանությունից ելնելով եզրակացնենք, թե դա ցուցանիչ էր Թուրքիայի ֆեոդալական հարաբերությունների քայքայման, և կապիտալիստական արտադրանքների առաջացման խթան էր հանդիսանում։

Կ. Մարքսը «Կապիտալի» I հատորում գրում է՝ «Կապիտալիստական հարաբերություններ ստեղծող պրոցեսը ուրիշ բան չի կարող լինել, բայց եթե բանվորին իր աշխատանքի պայմանների նկատմամբ սեփականությունից անջատելու պրոցես, — մի պրոցես, որը, մի կողմից, հասարակական արտադրության միջոցները և կենսամիջոցները

¹ Розен. История Турции, 1872, стр. 140.

² Նույն տեղում, էջ 141.

³ Аб. Алимов, Турция. в сбор. Очерки по истории Востока в эпоху империализма, 1934, стр. 9.

դարձնում է կապիտալ, մյուս կողմից, անմիջական արտադրողներին դարձնում է վարձու բանվորներ»¹։ Մարքսի այս կլասիկ ձևակերպման համաձայն, որպեսզի կապիտալիստական արտադրահարաբերություններ առաջանան, անհրաժեշտ է երկու հիմնական պայման. 1) ունեզրկված մարդկանց բազմության առկայություն, որոնք իրավականորեն լինեն ազատ, բայց զրկված լինեն արտադրամիջոցներից և կենսամիջոցներից, այսինքն՝ հարկադրված լինեն վաճառելու իրենց աշխատուժը. 2) կապիտալիստական ձեռնարկություններ ստեղծելու համար անհրաժեշտ է դրամական հարստությունների կուտակում։

Մարքսը ասում է, որ առանց այդ երկու հիմնական պայմանի չեն կարող կապիտալիստական արտադրահարաբերություններ ստեղծվել։ Բայց Մարքսը ոչ մի տեղ չի ասել և չէր կարող ասել, որ եթե այդ երկու հիմնական պայմանները առկա են, ապա անհրաժեշտաբար առաջ կգան կապիտալիստական արտադրահարաբերություններ։ Դրա ամենափայլուն ապացույցը Հին Հռոմի պատմությունն է, որտեղ առկա էին և՛ ունեզրկված մարդկանց բազմությունը, և՛ վիթխարի դրամական հարստություններ, բայց այնուամենայնիվ կապիտալիստական արտադրահարաբերություններ չստեղծվեցին։ Հին Հռոմում գոյություն ունեցող ձրի ստրկական աշխատանքը հիմնական խոչընդոտ էր ծառայում, որ այդ երկու պայմանները հանդես գան որպես միասնություն՝ մեկը մյուսով պայմանավորված։

«Կապիտալ»-ի զանազան տեղերում, — գրում է Մարքսը, — ես հիշատակել եմ Հին Հռոմի պլեբեյների ճակատագրի մասին։ Սկզբնապես նրանք ազատ գյուղացիներ էին, որոնցից յուրաքանչյուրն ինքնին մշակում էր իր սեփական մանր հողակտորները։ Հռոմեական պատմության ընթացքում նրանք էքսպրոպրիացիայի ենթարկվեցին։ Նույն շարժումը, որը նրանց անջատեց արտադրության և գոյության միջոցներից, առաջացրեց ոչ միայն հողային խոշոր սեփականություն, այլև դրամական խոշոր կապիտալներ։ Այդպիսով, մի գեղե-

ցիկ առավուտ առկա եղան, մի կողմում՝ ամեն ինչից, բացի իրենց (անձնական) աշխատուժից, զրկված «ազատ մարդիկ»-իսկ մյուս կողմում՝ նրանց աշխատանքը շահագործելու համար՝ ձեռք բերված բոլոր հարստությունների տերեր։ Իսկ ի՞նչ կատարվեց։ Հռոմեական պրոլետարները դարձան ոչ թե վարձու բանվորներ, այլ պարզապես պորտաբույծներ... իսկ դրա հետ միասին ծավալվեց ոչ թե կապիտալիստական, այլ ստրկատիրական արտադրանակ։

Այսպիսով, ապշեցուցիչ համանման, բայց պատմական տարբեր միջավայրերում տեղի ունեցող իրադրությունները բերում են միանգամայն տարբեր հետևանքներ։ Ուսումնասիրելով այդ էվոլյուցիաներից յուրաքանչյուրն առանձին և այնուհետև դրանք համադրելով, հեշտ է գտնել այդ երեվույթը հասկանալու բանալին. բայց երբեք չի կարելի այդ հասկանալ, օգտվելով որևէ ընդհանուր պատմա-փիլիսոփայական թեորիայի ունիվերսալ բանալիով»²։ Հետևաբար, այդ երկու հիմնական պայմանների առկայությունը, որպես միասնություն, հիմք է ծառայում կապիտալիստական արտադրության առաջացման, եթե դրանք միմյանցով պայմանավորված միասնական պրոցեսի տարբեր կողմերն են։

Թուրքիայի XIX դարի ամբողջ պատմությունը այն բանի ակնառու ապացույցներից մեկն է, որ մի կողմից՝ ունեզրկված մասսաների և մյուս կողմից՝ առևտրա-վաշխառուական կապիտալի առկայությունը չէր վերածվում արդյունաբերական կապիտալի, շնորհիվ մի շարք պայմանների, որոնք խոչընդոտ էին ծառայում դրանց միանալու, որպես մի միասնական երևույթ։

Բավական է նկատի ունենալ թուրքահայ բազմահազար պանդուխտների առկայությունը, որպեսզի պարզ լինի Թուրքիայում գյուղացիության արտադրամիջոցների ունեզրկման և ուրբանիզացիայի փաստը։ Ինչպես Թուրքիայի, այնպես էլ Անդրկովկասի գրեթե բոլոր քաղաքներում կարելի էր հանդիպել մեծ թվով օրավարձով բանվորների և պատահական աշխատանք կատարող մշակների։ Հատկապես ծովափնյա քա-

¹ Կ. Մարքս, Կապիտալ, հ. I, էջ 747.

² К. Маркс и Ф. Энгельс, Сочинения, т. XV, стр. 377—378.

զաքների նավահանգիստներում հայ մշակների բազմաթիվ արտեղներ կային: Դրանք գրեթե բացառապես հայկական վի-
լայիթներից եկած պանդուխտներ էին: Ըստ հյուպատոսա-
կան զեկուցագրերի, Տրապիզոնի և Կոնստանդնուպոլսի հայ-
կական ջարդերի ժամանակ առանձնապես դաժան են եղել
այդ արտելյան անպաշտպան մշակների կոտորածները:
Սովափնյա վերոհիշյալ և այլ քաղաքների նավահանգիստ-
ներում աշխատող այդ մշակների թիվը հասնում էր տաս-
նյակ հազարների: Խրիմյան կաթողիկոսի վկայությամբ, հենց
միայն Կ. Պոլսում աշխատանք որոնող այդ գավառային մը-
շակների թիվը 90-ական թվականներին հասնում էր 80000
մարդու: Հասկանալի է, որ դրանց մեծագույն մասը պատա-
հական աշխատանք կատարողներ էին և միշտ չէ, որ գտնում
էին այդպիսին: Աշխատանքի առաջարկը շատ ավելի մեծ էր,
քան պահանջարկը: Մեր անմահ երգիծաբան Հակոբ Պարոն-
յանն իր «Մեծապատիվ մուրացկաններում» միայն մի քանի
շտրիխով փայլուն կերպով պատկերել է այդ մարդկանց,
երբ նրանք իրար ձեռքից խլում են Աբիսողոմ աղայի իրերը
Մաղկի փողոց փոխադրելու համար: Բազմաթիվ մշակներ, մի
Աբիսողոմ աղա: Այդ զավեշտական փոքրիկ պատկերում ար-
տացողում է գտել հողից կտրված և ուրբանիզացիայի են-
թարկված թուրքահայ պանդուխտ գյուղացու մեծ ողբերգու-
թյունը:

Մեր մի ուրիշ ականավոր գրող, թուրքահայության կյան-
քին բաշատեղյակ Սերենցը, իր հոդվածներից մեկում այսպես
է նկարագրում պանդուխտ գյուղացիությանը՝ «Ով որ մշեցու
հային թշվառ վիճակը կուզե տեսնել՝ թող երթա ոչ թե Մուշ,
շատ հեռու է երկիրը և ճամբան վտանգավոր, այլ հոս, Պո-
լիս, Գասրմ փաշայի խան անվանյալ ուրջերը և տեսնել մշե-
ցի ընտանիք՝ այր, կին, տղա, գրեթե մերկ, հոգնաբեկ, ան-
խոս, անկարասի, հարածամ իր խորին աշխատության և
անոթության, օդի խստության դեմ: Ով որ հայուն թշվառ վի-
ճակը կուզե տեսնել՝ թող երթա Վանանդ, Ախուրյան գետի
ափանց մոտ, տեսնի մշեցին դառնադեմ, տղու ձեռքե մը
բռնած, հալած կին մը՝ գրկի տղեկով, մի հատ կով, գյուղե

գյուղ թափառական, հարմար առիթ մը դիտելով, ուր կարե-
նա զինք գետին ձգել»¹:

Սերենցի պատկերած այս թուրքահայ գյուղացի պան-
դուխտներին մենք հանդիպում ենք ո՛չ միայն Թուրքիայի,
այլև Անդրկովկասի գրեթե բոլոր շատ թե քիչ աչքի ընկնող
քաղաքներում, փալանը մեջքներին մշակութուն անելիս,
հսկայական բեռներ շալակելիս: Այնուամենայնիվ սխալ կլի-
ներ կարծել, որ այդ պանդուխտության ցուպը վերցնելը միայն
կոտորածների հետևանք էր: Կոտորածների հետևանքով, հար-
կավ, մեծ գաղթականություն էր ստեղծվում, բայց հատկա-
պես պանդուխտությունը, ինչպես և մարաբայությունը, թուր-
քահայ գյուղացիության տնտեսական քայքայման հետևանք
էր: Ուշագրավ է, որ հակառակ կապիտալիստական երկրնե-
րի, այդ ընչազուրկ և ուրբանիզացիայի ենթարկված մասսան
աշխատանքային շուկայում պահանջարկ չէր գտնում, ուստի
չէր դառնում արդյունաբերական պրոլետարիատ:

Թուրքիան և հատկապես Անատոլիայի արևելյան վիլա-
յիթները աչքի էին ընկնում իրենց լեռնահանքային հարու-
ստություններով: Բայց ինչպես արդյունաբերական մյուս ճյու-
ղերի, այնպես էլ լեռնային արդյունաբերության զարգացման
համար շատ խոչընդոտներ կային: Ամենից առաջ այն, որ
թուրքական պետությունը իրոք որ անհամատեղելի է կապի-
տալիստական հասարակության հետ՝ կուտակված հավելյալ
արժեքը ապահովված չէ սատրապների և փաշաների ձեռքին-
բուրժուական շահույթի համար պակասում է զխավոր պայ-
մանը՝ վաճառականի և նրա սեփականության ապահովու-
թյունը: Ծիշտ է, XIX դարի վերջերին Թուրքիայում կային մի
քանի տասնյակ լեռնագործական ձեռնարկություններ, ինչ-
պես օրինակ՝ անագի 14, քրոմի 15, զմտոնի 9, պղնձի 3 և
այլն, բայց դրանք աշխատում էին անդրջրհեղեղյան տեսնի-
կայով: Ամբողջ Թուրքիայում չկար թեկուզ մեկ շատ թե
քիչ կանոնավոր մետաղամշակման գործարան. մետաղա-
մշակումը կատարվում էր արհեստագործ-դարբնոցային եղա-
նակով: Տարեկան 3000000 փութ արդյունահանվող մետա-

1 «Արևելյան մամուլ», 1876, էջ 23 (տե՛ս ԱՅՈՒՄ, 1, հիշ. աշխ., էջ 66)»

զահանքից 100000 փթից էլ ավելի պակաս էր մնում տեղական վերամշակման համար: Ուշագրավ է, որ էրզրումի վիլայեթում քարածխի մեծ պաշարներ կային, իսկ երկիրն օգտագործում էր գլխավորապես աթար: Մի քանի տասնյակ մասնավոր ձեռնարկատերեր իզուր էին տասնյակ տարիներով շարձարվում այդ հարստությունները մշակելու իրավունք ստանալու համար: Որովհետև այդ հանքերը Ռուսաստանի սահմաններին մոտ էին, իսկ թուրքական կառավարությունը երկյուղ էր կրում, թե դրանք մշակելու հանգամանքը կգրավի Ռուսաստանի ուշագրությունը և պատերազմի պատճառ կարող է ծառայել:

Կղերա-Ֆեոդալական հիմքի վրա խարսխված սուլթանական պետական սիստեմը կապիտալիստական արդյունաբերության զարգացման մեծ խոչընդոտ էր ծառայում: Ահավասիկ ինչ ենք կարդում այդ առթիվ Ի. Ի. Գոլոբորոդկոյի աշխատության մեջ.

«Նախքան հանքավայրը մշակելու իրավունք ստանալը, ձեռնարկուն ստիպված է այնքան շատ գլխացավանքի, գրասենյակային ձևապաշտությունների ենթարկվել, որ գործը ձեռնարկելու ամեն մի ցանկություն վերանում է: Արդյունաբերական կոնցեսիաներ տրվում են միայն սուլթանի հատուկ հրամանագրով: Նախնական հետախուզումներ կատարելու համար պետք է թույլտվություն ստանալ գեներալ-նահանգապետից, որին հարկավոր է հաղորդել նախատեսվող աշխատանքների ընդարձակ ծրագիրը, հանքի տեսակը, մշակման ձեղանակն ու միջոցները, տեղանքի պլանը... Եթե տեղական իշխանությունները շոշափելի կաշառք ստանալուց հետո տալիս են ցանկացած թույլտվությունը, ապա կոնցեսիայի հարցը անցնում է «հանքերի գլխավոր վարչության» բարեհայեցողությանը: Հարցը այդտեղ մնում է երկար ժամանակ, երբեմն նույնիսկ տարիներ... Հարկավոր է առատորեն կաշառք տալ նրանց, ովքեր առնչություն ունեն գործի հետ, որպեսզի գործը որոշ շափով տեղից շարժվի: Վերջապես գլխավոր վարչությունը ձեռնարկուի համար գալիս է նպաստավոր եզրակացություն: Այստեղից սկսվում են նոր ձգձուգումներ: Զբավարարվելով, որ ձեռնարկուն արդեն ներկա-

յացրել է տեխնիկական աշխատանքի ընդհանուր պլանը և նույնիսկ նախահաշիվը, վարչությունը հանձնարարում է գրեթե խավոր ինժեներին ձեռնարկությունը քննության առնել տեխնիկական տեսակետից (այդ բոլորը, հարկավ, ձեռնարկուի հաշվին — Ս. Մ.): Առաջ են գալիս նոր գլխացավանքներ, ժախսեր, հետաձգումներ և անախորժություններ: Ինժեների կողմից իրեն հանձնարարված գործը կատարվելուց հետո միայն՝ կոնցեսիայի մասին արված խնդրագիրը կարող է գեկուցվել սուլթանին: Ահավասիկ այստեղ են հանդես գալիս գլխավոր կաշառքները: Ձեռնարկուն հարկադրված է գնալ Յելդզ-Քյոշք և տեղեկություններ հավաքել, թե ում և ինչքան կաշառք պետք է տալ, որ ցանկացած արդյունքն ստացվի: Պալատական կապերն ու կաշառքները գործի հաջողության նախապայմանն են: Այսպիսով, սովորական արդյունաբերողը, եթե մեծ միջոցներ և կապեր չունի, իզուր կմտածի հանքերի կոնցեսիա ստանալու մասին... Մի թուրքական ընկերություն 10 տարվա ընթացքում չկարողացավ թույլտրվություն ստանալ Վանի սանջակում նավթաբեր հողեր մշակելու համար... Մի ականավոր փաշա, որը էրզրումի վիլայեթում պղնձահանքեր ուներ, երկար ժամանակ շարձարվում էր, որ իրեն թույլ տրվի արտասահմանից դուրս գրել դինամոմեքենաներ և տեխնիկական այլ հարմարանքներ՝ ձեռնարկությունը ավելի օգտավետ շահագործելու համար: Նրա բոլոր ջանքերն անհետևանք մնացին և մինչև վերջին ժամանակներս նա հարկադրված էր պղնձահանքը հալել անդրբրահեղեղյան եղանակով: Այդ նույն պատճառով դադարել են գործել շատ քարածխահանքեր, մանգանի և այլ հանքեր, որոնք պատկանում են թուրք արդյունաբերողներին...

...Հին ուսուցիչի թուրքական կառավարությունը, որ սարսափում էր հեղափոխության ուրվականից, ամեն մի անձանոթ գործիքի մեջ տեսնում էր գոյություն ունեցող կարգերի թշնամու: Նա արգելել էր արդյունաբերության համար անհրաժեշտ պայթուցիկ նյութերի, էլեկտրական մեքենաների ներմուծումը:

...Ամբողջ երկրում, որը հավասար է Ֆրանսիային, Գերմանիային և Շվեյցարիային միասին վերցրած, կա ծխախո-

տի, չթի, բրդամանվածքի, մետաքսամանվածքի և մահուղի ընդամենը մի քանի գործարան»։ Նույն հեղինակի վկայությամբ, բացի Կ. Պոլսից, Ադրիանապոլսից, Սալոնիկից, Ջմյուռնիայից և Բաղդադից, «մնացած մարզերում ֆաբրիկա-գործարանային արդյունաբերություն գրեթե գոյություն չունի»¹։

Արդյունաբերության այսպիսի ծայրահեղ հետամնացության պայմաններում հողից կտրված գյուղացիությունը և դեզարդացիայի ենթարկվող արհեստավորությունը, հարկավ, չէր կարող վերածվել արդյունաբերական պրոլետարիատի, և առևտրա-կոմպրադորական բուրժուազիան էլ չէր կարող դառնալ արդյունաբերական բուրժուազիա։

1912 թվականին Ռուսաստանի առևտրի և արդյունաբերության մինիստրությունը մի շատ ձեռնհաս էքսպեդիցիա է ձեռնարկում ուսումնասիրելու Մերձավոր Արևելքի շուկաները։ Ըստ այդ էքսպեդիցիայի տվյալների, «Թուրքիայի արդյունաբերությունը բացի մի քանի մեծ քաղաքներից, սահմանափակվում է նրանով, որ գյուղացիական բնակչությունը իրեն հարկավոր առարկաները պատրաստում է տնայնագործական եղանակով»։ «Լեռնային արդյունաբերությունը գտնվում է սաղմնային վիճակում, չնայած կայսրության ամբողջ տարածության վրա կան օգտակար հանածոների հարուստ հանքավայրեր...»։ «Տեխնիկական արդյունաբերությունը շատ թույլ է զարգացած»²։

Իսկ թե ինչ էր ներկայացնում այդ մեծ քաղաքների արդյունաբերությունը, մենք կբերենք Թուրքիայի ամենախոշոր քաղաքի՝ գրեթե մեկ միլիոն բնակչություն ունեցող Կ. Պոլսի արդյունաբերական ձեռնարկությունների վերաբերյալ տվյալները։ Այդ քաղաքի ֆաբրիկա-գործարանային պատկերը հետևյալն էր. 2 ապակու գործարան 600 բանվորով, տարեկան 50000 ֆունտ սոսեոլինգ արժողությամբ արտադրանքով,

1 օձառի գործարան՝ տարեկան 1000 տոննա օձառի արտադրությամբ, 1 աղյուսի գործարան, 1 գարեջրի գործարան, չթի 4 ոչ մեծ ֆաբրիկա, կայսերական մետաքսագործարան, 1 չուգունաձուլական գործարան, 1 վառողի գործարան, 14 շոգեղացի¹։ Ահա ամբողջ ֆաբրիկա-գործարանային արտադրության պատկերը Կ. Պոլսում։

Հաշվետվության մեջ հատկապես հիշատակվում է, որ ապակու և օձառի գործարանները խոշոր գործարաններ են։ Եթե նկատի ունենանք, որ այդ խոշոր կոշված գործարանների արտադրանքը միայն մայրաքաղաքի բնակչության հաշվով կազմում էր անձին տարեկան 1 կգ օձառ և 20 կուպեկի ապակի, ապա պարզ կլինի, թե երկրի մյուս գործարանների արտադրանքը ինչ ողորմելի պատկեր էր ներկայացնում։

Այդ նույն ժամանակ Թուրքիայի արտաքին առևտրի շրջանառությունը հետևյալ պատկերն է ներկայացնում. ներմուծում՝ 42 555 950 թուրքական լիրա (1 լ=8 ո. 40 կ.), կամ մոտավորապես՝ 400 000 000 ռուբլի, արտահանումը՝ 22 079 700 լիրա, կամ մոտավորապես 200 000 000 ռուբլի։ Այսպիսով, առևտրական բալանսը պասսիվ էր, ներմուծումը արտահանմանը գերազանցում էր 100% -ով։

Ռւշագրավ է, որ ներմուծվող ապրանքների մեջ մեքենաների, կառքերի և լողամիջոցների (նշված են մեկ հոդվածով) արժեքի տեսակարար կշիռը կազմում էր ընդամենը 2,5%, իսկ տեքստիլ արդյունաբերության ապրանքներինը՝ 37%, հացամթերքներինը՝ 13%, շաքար, սուրճ, թեյ՝ 11%, մետաղագործական սպառման ապրանքներինը՝ 7%։ Այս տվյալներից կարելի է եզրակացնել, որ նույնիսկ XX դարի առաջին տասնամյակում Թուրքիան մեքենաներ գրեթե չի ներմուծել։

Նույնպիսի պատկեր ունեն արտահանումը։ Արտահանվող ապրանքների տարբեր խմբերի տեսակարար կշիռը հետևյալ պատկերն ունենք.

ամսանապահական արտադրանքներ
(անասուններ, կաշի, բուրդ, մետաքս)

420/0-

1 Նույն տեղում, էջ 171:

¹ И. И. Голобородько, Старая и новая Турция, 1908, стр. 143—146.

² Министерство торговли и промышленности. Ближний Восток, как рынок сбыта русских товаров, 1913, стр. 170.

երկրագործական արտադրանքներ
(ծխախոտ, հացահատիկ...) 13%,
այգեգործական արտադրանքներ
(միրգ, համեմունք, սերմեր...) 240/0:

Այսպիսով, ինչպես ներմուծման, այնպես էլ արտահանման պատկերը պարզ ցուցանիշն է այն բանի, որ Թուրքիան գերազանցապես կիսագաղութային երկիր էր:

Գաբրիելյիներ խոսելով Թուրքիայի արտաքին առևտրի մասին՝ սկսած 1878 թվականից մինչև 1918 թվականը, գրում է՝ «Բավական է նշել, որ 40 տարվա ընթացքում արտաքին առևտրի բալանսի պասսիվությունը արտահայտվել է 345 միլիոն թուրքական լիրայով»¹:

Չնայած Թուրքիայում ներդրված էր վիթխարի եվրոպական կապիտալ, բայց այդ կապիտալը երկրի արտադրողական ուժերի զարգացման համար գրեթե որևէ դեր չէր խաղում:

Թուրքիայում գործող եվրոպական կապիտալը ըստ պաշտոնական տվյալների, որ բերում է Սոկոլսկին², բաշխված էր հետևյալ կերպով.

Ֆրանսիական՝	3. 285 273 317	ոսկի	Ֆրանկ	կամ	60%
գերմանական՝	1 443 186 506	»	»	»	26%
անգլիական՝	813 312 136	»	»	»	14%:

Այսպիսով, Թուրքիայում ներդրված կապիտալների առյուծի բաժինը ֆրանսիականինն էր: Մ. Պավլովիչը, վերլուծելով Թուրքիայում գործող ֆրանսիական կապիտալը, գալիս է հետևյալ եզրակացության.

«Վերլուծելով Օսմանյան կայսրության մեջ ներդրված ֆրանսիական 2¹/₂ միլիարդ ֆրանկ կապիտալի բաշխումը, մենք տեսնում ենք, որ այդ կապիտալի մեծ մասը, այն է՝ 1¹/₂ միլիարդը, դրված է թուրքական պետական արժեթղթերի մեջ, մնացած մեկ միլիարդի գրեթե կեսը, մոտավորապես 400 000 ֆրանկ, դրված է երկաթուղիների մեջ..., 100 միլիոնը՝ անշարժ սեփականության մեջ, 80 միլիոն բանկերը, 60 միլիոն առևտրական գրասենյակները, 50 միլիոն ծովագնա-

ցության գծերը, 60 միլիոն ածխահանքերը, որոնք նույնպես երկաթուղիների սպասարկման համար են ծառայում: Այսպիսով, 2¹/₂ միլիարդ արժողութայամբ կապիտալի միայն մի շնչին մասը՝ 2,4% -ն է գնում երկրի բնական հարստությունները շահագործելու վրա»: Ոչ միայն ֆրանսիական, այլև գերմանական ու անգլիական կապիտալները գործադրվում էին օտարերկրյա ֆարրիկատները Օսմանյան կայսրությունը Թափանցելու համար»¹:

Օտարերկրյա կապիտալն իրեն էր ենթարկել Թուրքիայի նաև ամբողջ ֆինանսական գործը: Այդ տեսակետից կարևոր է նշել զարգացած բանկային կապիտալի առկայությունը: Բանկերի վերաբերյալ մեզ հետաքրքրող տեղեկությունները քաղում ենք նույն առևտրի և արդյունաբերության մինիստրության էքսպեդիցիայի հաշվետվությունից (տե՛ս էջ 181—188): Թուրքիայի հինգ խոշորագույն քաղաքներում (Կ. Պոլիս, Սալոնիկ, Չմյունիա, Բեյրութ, Դամասկոս) կային 35 բանկեր և բանկային բաժանմունքներ, չհաշված այսպես կոչված բանկիրային տները (օրինակ, Սալոնիկում՝ 7, Չմյունիայում՝ 6, Բեյրութում՝ 4 և այլն): Օսմանյան կայսերական բանկի մասին մեր աղբյուրը հաղորդում է, որ այդ բանկը անվանապես էր համարվում Թուրքիայի պետական բանկ, իրականում նա որևէ առնչություն չուներ Թուրքիայի անմիջական շահերի հետ, քանի որ հիմնված էր ֆրանսիական և անգլիական կապիտալներով և ամբողջ վարչությունը կազմված էր օտարերկրացիներից, առավելապես ֆրանսիացիներից: Հետաքրքրական է, որ այդ օտարերկրյա բանկը իրավունք էր ստացել թուրքական թղթադրամ (բանկնոտներ) բաց թողնել, այսինքն՝ Թուրքիայի ամբողջ ֆինանսական քաղաքականությունը գտնվում էր այդ բանկի վերահսկողության տակ: Օսմանյան պետական բանկի բաժանմունքները գործում էին մանյան պետական բանկի բաժանմունքները գործում էին Թուրքիայի գրեթե բոլոր նահանգական քաղաքներում: Մի շարք քաղաքներում, այդ թվում նաև Կ. Պոլսում, բաժանմունքներ ունեին նաև Աթենքի և Սալոնիկի բանկերը (առաջինի հիմնական կապիտալը ֆրանսիական էր, հունականի

¹ X. З. Габидуллин, Младотурецкая революция, 1936, стр. 84.

² Сокольский, Современная Турция, стр. 105.

մատնակցութեամբ, երկրորդինը՝ 2/3-ը ֆրանսիական էր, 1/3-ը՝ ավստրիական)։

Այս շատ համառոտ ակնարկից երևում է, որ Թուրքիան ոչ միայն XIX դարի երկրորդ կեսին, այլև XX դարի առաջին տասնամյակում գյուղատնտեսական երկիր էր, որի էկոնոմիկայի մեջ գերակշռութունը պատկանում էր էքստենսիվ քոչվորական անասնապահութեանը։ Եվ իրավացի էր Ռուսաստանի առևտրի և արդյունաբերության մինիստրութեան էքսպեդիցիան, երբ արձանագրում էր, որ «Նոստրա գործութունը Թուրքիայում գտնվում է զարգացման շատ ցածր մակարդակի վրա։ Մշակվող հողային տարածութունը կազմում է 18 միլիոն հեկտար, որից հացահատիկներին հատկացված է 12 միլիոն» (տե՛ս էջ 169)։ «Եվրոպական և Ասիական Թուրքիայի բնակչության գլխավոր զբաղմունքը անասնապահութունն է» (տե՛ս էջ 168)։ Այդ հետևությունը ճիշտ էր Թուրքիայի վերաբերյալ ընդհանրապես, Անատոլիայի արևելյան վիլայեթներին վերաբերյալ՝ մասնավորապես։

Այսպիսով, Թուրքիան XIX դարի վերջին քառորդում մեր առաջ կանգնում է որպես կիսաքոչվորական և կիսաերկրագործական մի երկիր, միջնադարյան արհեստագործական արտադրութեամբ և եվրոպական իմպերիալիստական երկրներին զարգացած ֆինանսական կապիտալով։ Այդպիսի երկրում տեղական բուրժուազիան, այդ թվում և հայ բուրժուազիան, հիմնականում այլ բան լինել չէր կարող, քան կոմպրադորություն։ Տեղական կապիտալը (զգալիորեն նաև հայկական) հիմնականում կոմպրադորական կապիտալ էր, այսինքն՝ տեղական վաճառականությունը միջնորդ էր հանդիսանում օտարերկրյա արդյունաբերական կապիտալի և տեղական շուկայի միջև։ Ստեղծվել էր ընդհանուր շահեր ունեցող մի հիերարխիկ բուրժուազիա, որի մի ծայրին գտնվում էր օտարերկրյա արդյունաբերական և ֆինանսական կապիտալը, մյուս ծայրին՝ գյուղից գյուղ շրջող փերեզակը, որը բաղմամբով թելերով կապված էր խոշոր քաղաքների մեծատունների՝ ամիրանների և այլ կարգի կեղեքիչների հետ։ Ահա այս մագիլների միջոցով տարեցտարի ծծում էին Թուրքիայի աշխատավորական մասսաների ո՛չ միայն հավելյալ արդյունքը, այլև կենսական

արդյունքի մի զգալի մասը և բաժանում օտարերկրյա արդյունաբերողների, բանկիրների, առևտրական տների և տեղական կոմպրադորների ու վաշխառուների միջև։ Այս ամենը խճճված էր գյուղում և քոչվորների մեջ ամուր հող գտած ֆեոդալական հարաբերությունների հետ, ընդ որում հատկապես հայերին հարևան քրդերի մեջ գերակշռում էին քոչվորական տիպի ֆեոդալական հարաբերությունները։

Այսպիսի պայմաններում տեղական կապիտալը չէր կարող որևէ տեղեկեց հանդես բերել արդյունաբերական կապիտալի վերածվելու ուղղությամբ, քանի որ նա միահյուսված էր օտարերկրյա զորեղ արդյունաբերական կապիտալի հետ։

Հետևաբար, Թուրքական պետությունը սովորական հետամնաց պետություն չէր։ Նրա հետամնացությունը համաձուլված էր եվրոպական կապիտալիզմի հետ, որը ամեն կերպ կաշկանդում էր Թուրքիայի զարգացումը դեպի կապիտալիստական արտադրական հարաբերությունները։

Ղրիմի պատերազմը, իհարկե, հարված էր Ռուսաստանին, բայց նա ավելի մեծ հարված էր հաղթություն տանող կռաւիցիայի հիմնական անդամ Թուրքիային։ Այդ ժամանակից Թուրքիան լիակատար կախման մեջ է ընկնում իր դաշնակից եվրոպական պետություններից և այդ կախումը փաստորեն վերածվում է երկրի իսկական զաղութացման։ Օսմանյան կայսրության ֆինանսական և տնտեսական ինքնուրույնությունը դառնում է ֆիկցիա։ Երկրի փաստական տեր ու տնօրենը բառիս բուն իմաստով դառնում է եվրոպական ֆինանսական կապիտալը։ Այդ գործում հսկայական դեր են խաղում այն անիրավահավասար դաշնագրերը, որ հայտնի են կապիտալիստայացիաներ անունով, որ կնքվում էին եվրոպական մի շարք պետությունների և Թուրքիայի միջև։

Ճիշտ է, կապիտալիստայաները Թուրքիայում գոյություն ունեին շատ վաղուց, բայց սկզբնապես նրանք անիրավահավասար դաշնագրերի բնույթ չէին կրում, այլ միակողմանի, սուլթանական կայսրության կողմից տրվող կամավոր արտոնություններ էին, որ տրվում էին այս կամ այն առևտրական հաստատություններին Թուրքիայում ազատ գործելու համար։ Սուլթանը կամ Բարձրագույն Դուռը կարող էր իր հայեցո-

ղությամբ, ուզած ժամանակ, վերացնել այդ արտոնությունները առանց որևէ համաձայնության շահագրգռված պետության հետ: Կ. Մարքսը այդ առթիվ գրում է. «Քանի որ Ղուրանը ամեն մի օտարականի թշնամի էր հայտարարում, ապա ոչ ոք չէր հանդգնի առանց նախազգուշական միջոցների հանդես գալ մուսուլմանական երկրում:

Առաջին եվրոպական վաճառականները, որոնք իրենց վտանգի էին ենթարկում առևտուր անելու այդպիսի ժողովրդի հետ, աշխատում էին սկզբում առանձնապես իրենց համար բացառիկ պայմաններ և արտոնություններ ապահովել, որոնք, սակայն, հետագայում տարածվում էին ամբողջ ազգի վրա: Այսպես են առաջացել կապիտուլյացիաները»¹: Սակայն սկսած XVIII դարի կեսերից, մանավանդ XIX դարում, կապիտուլյացիաների բնույթը հիմնովին փոխվում և դրանք դառնում են անիրավահավասար պարտավորություններ, օրոնք դաշնագրային կարգով ամրապնդում են օտարերկրացիների արտոնությունները թուրքիայում, առանց նույնպիսի արտոնություններ հատկացնելու թուրքական կայսրության Ապատակներին՝ համապատասխան եվրոպական երկրում: Թուրքիայում կապիտուլյացիոն ռեժիմից օգտվում էին Ֆրանսիան, Անգլիան, Ռուսաստանը, Հոլանդիան, Ավստրիան, Եվելդիան, Դանիան, Գերմանիան, Իտալիան, Բելգիան և ԱՄՆ-ը: Ըստ այդ ռեժիմի, համապատասխան պետության հյուպատոսներին վերապահվում էր վարչական, ոստիկանական և դատական իրավունք՝ իրենց երկրի հպատակների նկատմամբ: Օտարահպատակները չէին ենթարկվում թուրքիայի դատական ու ոստիկանական օրգաններին, ինչ հանցանք էլ որ գործած լինեին, նրանց անձն ու գույքը անձեռնմխելի էին թուրքական վարչությունների կողմից: Բացի այդ, նրանք օգտվում էին հարկային, մաքսային և այլ արտոնություններով, մի խոսքով, թուրքական ոչ մի օրենք ու իրավունք չէր տարածվում այդ պետությունների հպատակների վրա: Հասկանալի է, որ կապիտուլյացիոն ռեժիմը թուրքիան գաղութացնելու հիմնական միջոցներից մեկն էր և նրա շնորհիվ ամբողջ երկիրն

¹ К. Маркс и Ф. Энгельс, Сочинения, т. X, стр. 8.

ընկնում էր եվրոպական պետությունների քաղաքական և տնտեսական ազդեցության տակ:

Տակավին Ղրիմի պատերազմի ժամանակ Կ. Մարքսը գրում է՝ «Թուրքիայի տերիտորիան գրավել են դաշնակիցները, որոնք այնտեղ տեղավորվել են ինչպես իրենց տանը և մտադիր չեն շուտով հեռանալ: Թուրքիան ընկած է տառապած, ուժասպառ, ընդգրկված սոցիալական և քաղաքական քայքայման խոր պրոցեսով, որն արագանում է պատերազմը շարունակելու և իր դաշնակիցների պահանջները բավարարելու նրա հուսահատ ջանքերով: Այդ գինը նա պետք է վճարի եվրոպական բարձր շրջաններն ընդունվելու պատվի համար»¹:

Այդ նույն ժամանակ մի այլ տեղ նա գրում է՝ «Ասիայում Թուրքիան այնպիսին է հանդիսանում, ինչպիսին օր նա է. նրա բանակը լիովին արտացոլում է ամբողջ պետության քայքայված վիճակը»²:

Ղրիմի պատերազմը քայքայված Թուրքիայից պահանջում էր հսկայական ֆինանսական միջոցներ, որ նա չէր կարող ձեռք բերել երկրի ներսում: Գյուղացիությունից միանվագ երկու տարվա հարկերի գանձումը մի պալիտտիվ էր, որը հեռավոր շափով չէր կարող շտկել նրա քայքայված ֆինանսները: Միակ էլքը արտաքին փոխառություններն էին: Թուրքիայի դաշնակից պետություններն ամենայն պատրաստակամությամբ նրան օժանդակում էին արտաքին փոխառություն ստանալու, որով, մի կողմից, նպաստում էին Ռուսաստանի դեմ հաղթանակ տանելուն, մյուս կողմից, շատ նպաստավոր կերպով ապահովում էին իրենց երկրների կապիտալների շահավետ գործադրումը:

Սկսած 1854 թվականից մինչև 1874 թվականը, այսինքն՝ 20 տարվա ընթացքում, Թուրքիան կնքում է 13 փոխառություն, այլ կերպ ասած, միջին հաշվով յուրաքանչյուր 1¹/₂ տարին մեկ փոխառություն՝ մոտ 4 297 676 500 ֆրանկի հասնող մի ահռելի գումարի, ընդ որում այն ժամանակ, երբ

¹ К. Маркс и Ф. Энгельс, Сочинения, т. X, стр. 600:

² նույն տեղում, էջ 525:

հաշվառքային տոկոսը Եվրոպայում կազմում էր 3,88—4,77%, Թուրքիան իր պարտապաններին վճարում էր 7—13%: Բնական է, որ նման պայմաններում Թուրքիայի արտաքին փոխառությունները կրկնակի ու եռակի շահավետ էին Եվրոպայի ֆինանսական կապիտալի համար: Եվ որքան մեծանում էր Թուրքիայի արտաքին պարտքը, այնքան խճրճվում էր նրա ներքին ֆինանսական դրությունը: Փոխառությունների տոկոսների և ամորտիզացիայի գումարը, բնակա-նաբար, տարեցտարի մեծանում էր այնքան, որ պետական բյուջեի մուտքային մասի $\frac{1}{5}$ -ը գնում էր այդ պարտավորու-թյունները ծածկելուն: Այսպես, 1872/73 բյուջետային տա-րում բյուջեի մուտքային մասը կազմում էր 18,5 միլիոն լի-րա, իսկ միայն փոխառության տոկոսներն ու ամորտիզա-ցիան կազմում էին 14 միլիոն լիրա, այլ կերպ ասած, պե-տության բոլոր ծախսերը պետք է ծածկվեին 4,5 միլիոն լի-րայով: Մի բան, որ անհնարին էր, քանի որ այդ մնացորդ-ների առյուծի բաժինը կլանում էին պալատի ծախսերը: Ուս-տի Թուրքիան 1874 թվականին հարկադրված էր դիմել 14-րդ փոխառությանը՝ 1 միլիարդ ֆրանկի: Այդպիսով, նրա պարտ-քը 5 միլիարդից անցավ: Եթե նկատի ունենանք, որ այդ նույն ժամանակ բյուջեի մուտքային մասը ավելանալու տեղ չունեի, ապա պարզ է, որ հետագա 3—4 տարվա ընթացքում ամբողջ պետական մուտքը պետք է կլանեին արտաքին պարտքերի տոկոսները: Ճգնաժամն ակներև էր: Եվ նա իրեն ամբողջովին դրսևորեց հենց հաջորդ տարում: 1875 թվակա-նի հոկտեմբերի 6-ին Կ. Պոլսի թերթերում հաղորդվեց այն գույժը, որ պետական բյուջեի ղեկիցիտը կազմում է 115 մի-լիոն ֆրանկ (5 միլիոն լիրա) և կառավարությունը ի վիճակի չէ փոխառությունների տոկոսների ու ամորտիզացիայի մա-րումն իրագործելու վերաբերյալ իր պարտավորությունը կա-տարել:

Թուրքիայի այդ վիթխարի պետական պարտքը բաշխված էր Եվրոպայի խոշորագույն ֆինանսական հաստատություն-ների միջև: Վարկատուների թիկունքում կանգնած էին Եվ-րոպական մեծ տերությունների, առաջին հերթին Ֆրանսիայի և Անգլիայի զինված ուժերը: Եվ ահա սկսվում են բանակ-

ցություններ, որոնք տևում են վեց տարի: Բայց այդ բա-նակցություններով հարցը չէր լուծվում, քանի որ Թուրքիա-յի պետական գանձարանը դատարկ էր: Մնում էր, որ Եվրո-պական տերությունները զործադրեին իրենց սպառնալիքնե-րը և, զորքեր ու ռազմանավեր մտցնելով Թուրքիա, երկիրը բաժան-բաժան անեին իրենց միջև: Բայց այստեղ նրանց պլաններին խոչընդոտ էր հանդիսանում ահեղ Ռուսաստանը, որը Կ. Պոլսին ու նեղուցները չէր զիջի որևէ երրորդ պետու-թյան: Իսկ եթե Ռուսաստանին բավարարություն տրվեր, այդ նշանակում էր Ռուսաստանին հնարավորություն տալ դուրս գալու Միջկրկրական ծովը և հենց դրանով կտրել ծովային ճանապարհը Անգլիայի և Հնդկաստանի միջև: Այս հեռանկա-րը այնքան վտանգավոր էր, որ Թուրքիան մասնատելը Անգ-լիայի համար միանգամայն բացառված էր: Այդ վտանգավոր էր նաև Միջին Եվրոպայի համար, որովհետև Կ. Պոլսում և նեղուցներում ամրանալով, Ռուսաստանը թելադրող դիրք կգրավեր նաև ամբողջ Բալկաններում, որը միանգամայն հա-կասում էր ինչպես Ավստրիայի, այնպես էլ Գերմանիայի շա-հերին:

Որպեսզի պարզ լինի, թե Արևմտյան Եվրոպան և հատ-կապես Անգլիան ստեղծված միջազգային տնտեսական ու քաղաքական հարաբերությունների հետևանքով չէին կարող լրջությամբ օրակարգի հարց դարձնել Թուրքիայի մասնա-տումը, մենք վկայակոչում ենք Կ. Մարքսի հոդվածներից մեկը, որտեղ գիտական կոմունիզմի հիմնադիրն իրեն հա-տուկ պողպատե տրամաբանությամբ ապացուցում է այդ դրույթը: Մենք նկատի ունենք նրա «Իսկական վիճելի կետե-րը Թուրքիայում» հոդվածը:

«...Անգլիան չի կարող համաձայնել, որ Ռուսաստանը գրավի Դարդանելն ու Բոսֆորը: Այդ դեպքը թե՛ առևտրա-կան, թե՛ քաղաքական տեսակետից խոշոր, եթե ոչ մահացու, հարված կհասցնի բրիտանական հզորությանը... Համար-ձակորեն կարելի է պնդել, որ մինչև Աֆղանական պատերազ-մը և մինչև Սինդն ու Փենջաբը նվաճելը, անգլիական առև-տուրը ներքին Ասիայի հետ հավասար էր գրոյի: Այժմ ուրիշ բան է: Առևտրի անընդհատ լայնացման հրամայողական

անհրաժեշտութիւնը անգլիական առևտրին հարկադրում է ներքին Ասիայի վրա հարձակվել երկու կողմից՝ Ինդոսից և Սև ծովից»։ Այնուհետև Մարքսը ցույց է տալիս, որ ընդամենը մեկ տասնամյակի ընթացքում՝ 1840-ից մինչև 1851 թվականը, Անգլիայի առևտուրը Սև ծովում 1 440 592 ֆունտ ստեռլինգից հասել էր 3 548 595 ֆունտ ստեռլինգի, այսինքն՝ ավելացել էր 2½ անգամ։

«Եվ այս արագորեն աճող առևտուրը, — գրում է Կ. Մարքսը, — կախված է այն վստահութիւնից, որը տածելու է դեպի Բոսֆորին և Դարդանեղիս՝ Սև ծովի այդ բանալիներին տիրապետող տերութիւնը։ Նա, ով իր ձեռքում պահում է դրանք, կարող է ըստ իր կամքի բացել և փակել Միջերկրական ծովի այդ ծայրային անկյունը։ Իսկ ո՞վ կարող է սպասել, որ Ռուսաստանը, եթե նա երբևիցե տիրի Կ. Պոլսին, կրնկի վրա բաց կանի այն նույն դարպասը, որով Անգլիան խուժել է ռուսական առևտրի մարզը...»։

«Այժմ հարցը քննարկենք, — ասում է Կ. Մարքսը, — ռազմական տեսակետից... Դարդանեղի և Բոսֆորի մոտի նեղուցն այնքան նեղ է, որ համապատասխան տեղերում կառուցված և լավ զինված փոքրաթիվ ամրոցները, — ինչպես այդ կանի Ռուսաստանը նեղուցները տիրելուց անմիջապես հետո, — կարող են ծիծաղել ամբողջ աշխարհի միացյալ նավատորմերի վրա, եթե նրանք փորձեն այնտեղ թափանցել։ Սև ծովն այդ դեպքում այլ բան չի կարող դառնալ, քան ռուսական ծով, նույնիսկ ավելի մեծ չափով, քան կաղզայի լիճը...»։ Այդ դեպքում, ասում է Մարքսը, «Մակեդոնիայի, Թեսալիայի, Ալբանիայի գրավումը նվաճողի համար որևէ դրժվարութիւն չի ներկայացնի... Բայց մի՞թե հավանական բան է, որ այդ նվաճումներից հետո վիթխարի չափով աճած ու լայնացած Ռուսաստանը կես-ճանապարհին կանգ առնի, այդքան շատ բանի հասած լինելով աշխարհակալ կայսրութիւն դառնալու ճանապարհին։ Թուրքիայի և Հունաստանի անեքսիայի շնորհիվ նա հիանալի ծովային նավահանգիստներ ձեռք կբերի, և հույներն էլ նավատորմի համար հմուտ ծովագնացներ կմատակարարեն։ Տիրելով Կ. Պոլսին, նա կկանգնի Միջերկրական ծովի շեմքին. Դուրացոյից և Ատի-

վարիից մինչև Արտա Ալբանական ծովափի միջոցով նա կկանգնի Ադրիատիկի սրտում, բրիտանական Հոնիական կղզիների աչքի առաջ և Մալթայից շոգենավային 36 ժամ հեռավորութեան վրա։ Այդ ժամանակ Ավստրիան Ռուսաստանի կողմից շրջապատված կլինի հյուսիսից, արևելքից և հարավից, և Հաբսբուրգները կդառնան Մոսկվայի վասալները։ Մի ուրիշ բան էլ է հնարավոր, նույնիսկ հավանական։ Կայսրութեան խիստ կորցրած արևմտյան սահմանը, չհամապատասխանելով բնական սահմաններին, կպահանջի ճշտում, և այդ դեպքում դուրս կգա, որ Ռուսաստանի բնական սահմանն անցնում է Դանցինգից կամ Շտետտենից մինչև Տրիեստ։ Եվ նման այն բանին, ինչպես մի նվաճումն անխուսափելիորեն առաջ է բերում մի ուրիշ նվաճում, իսկ մի անեքսիան՝ մի ուրիշը, Ռուսաստանի կողմից Թուրքիայի նվաճումը միայն նախերգանքը կլինի Հունգարիայի, Պրուսիայի, Գալիցիայի անեքսիայի և կհանգի սլավոնական այն կայսրութեան վերջնական իրազորմանը, որի մասին արդեն երազում են պանսլավիզմի ֆանատիկ փիլիսոփաներից ոմանք»¹։

Միջազգային այդ ծայրահեղորեն բարդ դրութիւնը փրկելից Թուրքիային։ Թուրքական կառավարութիւնը, օգտագործելով միջազգային այդ հակասութիւնները, 1879 թվականին պաշտոնապես իրեն սնանկ հայտարարեց և այդ մասին հաղորդեց տերութիւնների դիվանագիտական ներկայացուցիչներին։

Ինչպե՞ս դուրս գալ այդ փակուղուց։ Անգլո-ֆրանսիական դիվանագիտութիւնը հնարը գտավ արևելյան հայտնի ֆորմուլայում՝ «Ո՛չ շամփուրն այրվի, ո՛չ խորովածը»։ Հարցը լուծվում է «կոմպրոմիսի» ճանապարհով։ Եվրոպական ֆինանսական կապիտալը պետք է հրաժարվեր Թուրքիայից ստանալիք պարտքերի մի մասից. իսկ Թուրքիան պետք է երաշխիք ստեղծեր հետագայում այդ դրութիւնը չկրկնելու համար։ Այդ երաշխիքը համարվեց այն, որ օսմանյան պետական եկամուտների կարևորագույն հոգվածներով կատար-

¹ К. Маркс и Ф. Энгельс, Сочинения, т. IX, стр. 382—386.

վող գանձումները հանձնվեն անմիջականորեն պարտատերերին, առանց դրանք մտցնելու պետական գանձարան: Դրա համար շահագրգռված ֆինանսական միավորումներից կազմվեց մի մարմին, որը կոչվեց «Օսմանյան պետական պարտքի վարչություն»: Այդ վարչության վրա էր դրվում համապատասխան հողվածներով, առանց թուրքական իշխանությունների մասնակցության, գումարների գանձումը և դրանցով թե՛ պարտքի տոկոսների վճարումը, թե՛ պարտքի աստիճանաբար մարումը: 1881 թվականի դեկտեմբերի 20-ին հրապարակվեց սուլթանական հրովարտակը, որով պաշտոնապես հաստատվեց «Օսմանյան պետական պարտքի վարչությունը»: Այդ փաստաթուղթը պատմության մեջ հայտնի է «Մուհառամյան դեկրետ» անունով:

Զնայած այդ ակտը համարվում էր երկկողմանի զիջումների արդյունք, բայց փաստորեն Թուրքիան իր վրա վերցրեց մոտավորապես այն գումարը, որ իսկապես ստացել էր: Ըստ վերոհիշյալ Մուհառամյան դեկրետի, Թուրքիայի արտաքին փոխառությունների պարտքը սահմանվեց $2\frac{1}{2}$ միլիարդ ֆրանկ, մինչդեռ թողարկման նոմինալը կազմում էր ավելի քան 5 միլիարդ ֆրանկ, իսկ Թուրքիան փաստորեն ստացել էր 3 միլիարդ: Հետևապես, եթե նկատի ունենանք, որ այդ գրեթե 20 տարվա ընթացքում որոշ գումար վճարվել էր որպես ամորտիզացիա, և տոկոսները վճարվել էին ըստ նոմինալի, ապա դուրս կգա, որ Թուրքիան այդ դեկրետով իր վրա վերցրեց այն պարտքը, որ փաստորեն ստացել էր: Այնպես որ եվրոպական ֆինանսական կապիտալը ըստ էության ոչինչ չկորցրեց, բայց ձեռք գցեց մի այնպիսի վարչության, որը Թուրքիայի ամբողջ տնտեսական ու ֆինանսական կյանքը իր ճիրանների մեջ առավ և մագիլները մխրճեց երկրի կենտրոնից մինչև ամենախուլ անկյունները: Պետության մեջ ստեղծվեց նոր պետություն. առաջինը անվանական, երկրորդը իրական:

«Օսմանյան պետական պարտքի վարչության» խորհուրդը կազմված էր հինգ մարդուց, որոնց ընտրում էին հինգ մեծ տերությունների՝ Ֆրանսիայի, Անգլիայի, Իտալիայի, Գերմանիայի և Ավստրո-Հունգարիայի, ֆինանսիստները (Ռու-

աստանը հրաժարվեց մասնակցել «պարտքերի վարչությանը»)՝ հինգ տարի ժամանակով և վերընտրվելու իրավունքով: Անգլիայի և Ֆրանսիայի ներկայացուցիչները հանդիսանում էին խորհրդի հերթական նախագահներ, քանի որ պարտքերի արժեթղթերի մեծ մասը իրացված էր այդ երկրներում:

Տոկոսները վճարելու և պարտքերը աստիճանաբար մարելու համար սուլթանական կառավարության իրավասությունից հանվեց մի շարք պետական եկամուտների գանձման իրավունքը և հանձնվեց վարչությանը. դրանցից ամենագլխավորներն էին աղի և ծխախոտի մենաշնորհը, դրոշմատուրքը, ձկնորսության մենաշնորհը, մետաքսի տասանորդը, խմիչքեղենի աքցիզը: Այդ մուտքերի 80% -ով պետք է վճարվեին տոկոսները, իսկ 20% -ով մարվեին պարտքերը:

Վարչության աշխատողների հաստիքը հասնում էր 5000 մարդու. դրանց ճնշող մասը (4,5 հազար) մահմեդականներ էին, մնացածը քրիստոնյաներ, որոնցից եվրոպացիներ էին միայն 55 հոգի՝ ղեկավար աշխատողները: Ամբողջ երկիրը բաժանված էր 26 գործակալությունների, մոտավորապես վիլայեթներին համապատասխան, դրանք էլ իրենց հերթին ստորաբաժանվում էին սանջակային և տեղական գործակալությունների: Այսպիսով, ամբողջ երկիրը պատած էր «Օսմանյան պետական պարտքի վարչության» գործակալություններով, որոնք շատ ավելի հզոր ու ազդեցիկ էին, քան պետական ֆինանսական հաստատությունները:

Թե ինչքան հաջող էր ընթանում «պարտքերի վարչության» գործունեությունը, հրևում է նրանից, որ վերոհիշյալ եկամուտների աղբյուրներից գանձված գումարը 1881 թվականից մինչև 1891 թվականը 26,5 միլիոն ֆրանկից բարձրացավ մինչև 45 միլիոն ֆրանկի, այսինքն՝ աճեց 410% -ով:

Այստեղ, իհարկե, մեր խնդիրը չէ որևէ շափով կանգ առնել «վարչության» գործունեության պատմության վրա, բայց անհրաժեշտ ենք համարում հիշատակել, որ «վարչությունը», որպես պարտքերի երաշխավորություն, աստիճանաբար իր ձեռքն էր առնում պետական եկամուտների նաև այլ աղբյուրներ: Տասնհինգ տարվա ընթացքում «վարչությունը» ո՛չ

միայն ապահովեց տոկոսների վճարումը, այլև պարտքից մարեց 15 միլիոն լիրա:

Այդ ամենը արվում էր, իհարկե, երկրի աշխատավոր ժողովրդի կեղեքման հաշվին: «Վարչությունը» հաշվում էր, որ 40 տարվա ընթացքում տոկոսները վճարելուց զատ, կմարի ամբողջ պարտքը: Բայց այդ սոսկ տեսական հաշվում էր: Չէ որ թուրքական կառավարությունը ո՛չ միայն արտակարգ ծախսերը, այլև սովորական ծախսերը ծածկելու համար հարկադրված էր դիմել արտաքին փոխառությունների, որոնցից ոչ մի կոպեկ արտադրականորեն չէր ծախսվում և երկրի արտադրողական ուժերը զարգացնելու ուղղությամբ որևէ նշանակություն չունեին: Հետևաբար, գոյություն ունեցող պետական սիստեմի պայմաններում պարտքերի վերացումը գործնականորեն անհնարին էր:

Ի. Ի. Գոլոբորոդկոն այդ առնչությամբ գրում է՝ «Բերենք մի հատված վերջին փոխառություններից մեկի բաշխման մասին. 41 միլիոն ֆրանկ ընդհանուր գումարից 10 100 000 վճարվել է կոնարդո բանկիրական տան պարտքը, 6 միլիոն՝ Արմատրոնգի գինագործարանին, 1/2 միլիոն՝ բանակի կապալառուներին, 400 000 օտարերկրացի աստիճանավորների ոռճիկը, 3 700 000 Սեն-ժան—Ակրա—Դամասկոս երկաթուղային ընկերության երաշխավորված մուտքերին, 15 միլիոն՝ տոնի առթիվ աստիճանավորներին ոռճիկ և 5 միլիոն՝ վարչությանը և Մակեդոնիան խաղաղացնելու համար»¹: Այսպիսով, փոխառությունների գումարները ծախսվում էին ո՛չ միայն անարտադրողականորեն, այլև դրանցով էին ծածկվում ամենասովորական պետական ծախսերը:

Արտաքին փոխառությունների պարտքերի կանոնավոր մարումը, որին հասավ «պարտքերի վարչությունը», հարկավ, բոլորովին էլ ֆինանսական կայունացման ցուցանիշ չէր: Այդ միայն ցույց էր տալիս ժողովրդական մասսաների կեղեքման աստիճանի բարձրացումը: Ուշագրավ է, որ այդ նույն ժամանակ կառավարության տրամադրության տակ գտնվող հողվածների եկամուտները ավելի շուտ պակասում էին: Այս-

¹ И. И. Голобородько, Старая и новая Турция, 1908, стр. 172.

պես, եթե 1875 թվականին այդ աղբյուրների եկամուտները կազմում էին 550 միլիոն ֆրանկ, ապա 1898 թվականին իշնում են մինչև 410 միլիոնի:

Ծախսերը գնում էին գլխավորապես արքունիքի, ժանդարմերիայի և բանակի վրա: Երկրի ամենակենսական կարիքները տասնյակ տարիներով մնում էին չբավարարված: Այն ժամանակ, երբ արքունիքի վրա ծախսվում էր տարեկան 100 միլիոն ֆրանկից ավելի, իսկ ժանդարմերիայի վրա՝ մինչև 25 միլիոն ֆրանկ, այնպիսի կարևոր մինիստրությունների գծով, ինչպիսին էին հողագործության, հանրային աշխատանքների, առևտրի, փոստ-հեռագրական և լուսավորության մինիստրությունները, միասին վերցրած, ծախսվում էր ընդամենը 38 միլիոն ֆրանկ, այսինքն՝ յուրաքանչյուրի գծով միջին հաշվով 7—8 միլիոն ֆրանկ:

«Աբդուլ Համիդը, — գրում է Գոլոբորոդկոն, — պետական գանձարանից ազատ կանխիկը պարզապես վերցնում և տնօրինում էր իր հայեցողությամբ: Սուլթանը, դրանով չբավարարվելով, բանակի և նավատորմի համար ամեն պատվեր կնքելիս, կապալառուներից պահանջում և ստանում էր սուլիդ գումար: Եթե այդպես էր վարվում Ալլահի փոխանորդը, էլ ինչ պետք է սպասել հասարակ մահկանացուներից»¹:

Իսկ «հասարակ մահկանացուները» հար և նման էին «ալլահի փոխանորդին» կամ, ավելի ճիշտ, այս վերջինը առաջինների թագադրված պատճենն էր: Կաշառակերությունը ոչ միայն ապօրինի գործողություն չէր համարվում, այլև կառավարական սիստեմի անկապտելի ատրիբուտն էր կազմում: Թուրքական կառավարություն, կաշառակերություն, յուրացումներ և վատնումներ հասկացողությունները նույնանիշ էին: Կ. Մարքսի «Նվրոպայի բանակները» հողվածում կարգում ենք՝ «...վատնումների և անբարեխղճության թուրքական հին սիստեմը առաջվա պես շարունակում էր ծաղկել... Պարսի և էրզրումի օտարերկրացի սպաներից և թղթակիցներից անընդհատ լսվում էին զանգատներ զենք, հագուստ, հանդերձանք, սննդամթերք չլինելու մասին, և նրանք բոլո-

¹ И. И. Голобородько, Старая и новая Турция, 1908, стр. 174.

ըը պնդում էին, որ դրանում հանցավոր են փաշաների անգործունեությունը, անընդունակությունը և ագահությունը: Նրանց կանոնավոր կերպով փող էին ուղարկում, բայց ամեն անգամ իրենց գրպանն էին դնում... սովորաբար սպաները յուրացնում էին նոր հագուստեղենի համար ուղարկված դրամը»¹:

Եթե սեփական զինվորներին կողոպտելը կատարվում էր պետության համար կյանքի ու մահվան հարց հանդիսացող պատերազմի ժամանակ, այն էլ փաշաների և բարձր հրամանատարության կողմից, ապա պետք է ենթադրել, թե ինչ էր կատարվում սովորական պայմաններում: «Ամեն մի միևնիստը, պալատական և վարչական անձնավորություն իր պարտքն էր համարում կողոպտել պետական գանձարանը: Ոչ մի կապալ, ոչ մի կոնցեսիա չկար, որից առյուծի բաժինը թուրքական բարձրագույն պաշտոնյաներին չհասներ»²:

Այնուհետև Ի. Ի. Գոլոբորոդկոն ամենաբարձր պաշտոնյաների կաշառակերություն վերաբերյալ բերում է բազմաթիվ փաստեր, որոնցից մենք կհիշատակենք մի քանիսը:

Գերմանական մի ընկերություն մի շատ խոշոր գործի վերաբերյալ պայմանագիր է կնքում սուլթանական կառավարության հետ: Պայմանագիրը խախտող կողմի համար նախատեսված էր 2 միլիոն ֆրանկ տույժ: Հետագայում պարզվում է, որ այդ գործը կարող է ընկերությանը մեծ վնասներ բերել: Ընկերությունը տույժից խուսափելու համար մեջ է գցում սուլթանի անձնական քարտուղար Իամեթ փաշային, որը պալատի ամենաաչքի ընկնող դեմքն էր: Համաձայնությունը տեղի է ունենում 450 000 ֆրանկ կաշառքի պայմանով: Իամեթ փաշան սուլթանին համոզում է գործը թուրքիայի համար վնասակար լինելու մեջ և հանձն է առնում տույժի գումարի 10%/օ-ով, այսինքն՝ 200 000 ֆրանկ վճարելով, պայմանագիրը շեղյալ հայտարարել: Այդպիսով նա միաժամանակ 450 000 ֆրանկ կաշառք է վերցնում ընկերությունից և յուրացնում է պետական 200 000 ֆրանկը, պետությանը վնաս

հասցնելով 2 200 000 ֆրանկ: Հետագայում այդ գործը բացվում է: «Երբ սուլթանն այդ իմացավ,—ասում է Գոլոբորոդկոն,—զվարճանում էր իր քարտուղարի ճարպկության վրա: Հեղաշրջումից հետո (1908 թ.) այդ ճարպիկ բարձր աստիճանավորը թուրքիայից փախավ՝ հետը տանելով իր ժողովրդից կողոպտած 15 միլիոն ուրլի»: Նույնպիսի ճանապարհով տասը միլիոն ուրլի գանձարանից կողոպտել էր պետական գույքերի մինիստր Մելհամեն: Իսկ ռազմական և ծովային մինիստր Ռահմի փաշան կողոպտել էր այդ երկուսի չափ: Նավերը վերանորոգելու համար նրա ստացած վիթխարի գումարների 10%/օ-ն անգամ չէր ծառայում իր նպատակին: Որպես ռազմական մինիստր, բանակի ծախսերի համար մի անգամ ստացած 6 միլիոն ուրլին նա ամբողջությամբ յուրացրել էր: Ի միջի այլոց նա իր հաշվետվության մեջ ցույց էր տվել, որ Եվրոպայում գնված են 1 000 000 ուրլու հրանոթներ, մինչդեռ իրականում այդպիսի պատվեր բոլորովին չէր էլ տրվել:

Այդ մինիստրն իր որդիներին տեղավորել էր ինտենդանտություններում և նրանց միջոցով կողոպտել 17 միլիոն ուրլի: Դժվար է պատկերացնել, թե ինչ էր կատարվում ինտենդանտությունում: Ռազմական հանդերձանքի հսկայական պարտիաները, գումակները և սննդամթերքները մի քանի անգամ վերավաճառվում և գնվում էին, դուրս չգալով պահեստներից: Ինտենդանտական պահեստները սխտեմատիկաբար հրդեհվում էին, ընդ որում հրդեհի վայրը պահպանվում էր հատուկ ընտրած պահակային ջոկատներով, որպեսզի ոչ ոք ներս չմտնի:

Այդպիսի հափշտակումները շատ սովորական էին և կատարվում էին պետական սխտեմի անխտիր բոլոր օղակներում: Գործը հասնում էր նրան, որ պետական երկաթուղիների վրա ոչ միայն ամբողջ գնացքներ էին կորչում, այլև մի անգամ կորավ հենց ինքը՝ երկաթուղին, որը բազմաթիվ վերստերով երկարություն և մի շարք կայարաններ ուներ: Թղթի վրա այդ գիծը համարվում էր կառուցված և լիովին

¹ К. Маркс и Ф. Энгельс, Сочинения, т. X, стр. 659.

² И. И. Голобородько, Старая и новая Турция, 1908, стр. 174.

վճարված: Մինչդեռ իրականում երկաթուղու տեղում սովորական միջգյուղային ճանապարհ էր¹:

Միջազգային իրավունքի իր ժամանակի հայտնի մասնագետ Ռոլեն-Փեկմենը «Հայաստանը, հայերը և տրակտատները» վերնագրով իր աշխատության մեջ, հենվելով անգլիական հյուպատոսական զեկուցագրերից վերցրած բազմաթիվ փաստերի վրա, գրում է՝ «Արբունիքի և կենտրոնական վարչության հովանավորությունները, որոնցով սքողում էին պրովինցիաների որոշ բարձրագույն աստիճանավորների կաշառակերություններն ու կորզումները, պարզապես խայտառակության են հասնում: Եթե նրանց հանցապարտությունը նույնիսկ ապացուցված է, ապա եթե նրանք արբունիքում օգտվում են հովանավորությամբ, պատժի փոխարեն նրանց սպասում է պաշտոնի նոր բարձրացումներ: Իսկ եթե փաստը չափազանց աղաղակող է, ապա բարձր աստիճանավորների կատարած հանցանքի համար պատասխանատվության են ենթարկվում ստորադաս աստիճանավորները: «Կապույտ գրքերը» բերում են այդպիսի բազմաթիվ օրինակներ, որոնցից կսահմանափակվեմ երկուսով:

Մի զինվորական պետի մեղադրում են պետական գումարների յուրացնելու մեջ: Քննությունը պարզում է, որ նա իսկապես մի շարք խոշոր կեղծիքներ է կատարել... Քննությունը վճռում է փաստերը ցուցադրել իրենց ամբողջ մերկությունը: Կ. Պոլսից ստացված նոր հրամանների հիման վրա հանձնաժողովը բանտարկում է այդ պետին ենթակա աստիճանավորներին, որոնք նույնպես խառն էին այդ յուրացումներին: Այն ժամանակ, երբ այդ աստիճանավորներին որպես կալանավորներ ուղարկում էին մայրաքաղաք, սուլթանի զբոսանավը կանգնում է Տրապիզոնի նավահանգրստում և վերոհիշյալ զինվորական պետին հրավիրում է էլ ավելի բարձր պաշտոն գրավել հենց պալատում»:

Այնուհետև Ռոլեն-Փեկմենը գրում է, որ 1879 թվականին Ջեյթունի հայերի նկատմամբ իր դաժանություններով աչքի

էր ընկնում Հալեպի նահանգապետ Քյամիլ փաշան: «Ք. Դոան ամենաանտանելի պաշտոնյաների շարքում նա վատթարագույնն էր»: Բացի դաժանություններից, «Քյամիլ փաշան մեղադրվում էր նաև կաշառակերության մեջ»: Վերջապես, անգլիական դեսպանության պահանջով նա հեռացվում է պաշտոնից: Բայց կարճ ժամանակից հետո նշանակվում է ավելի բարձր պաշտոնի, իսկ մի քանի ամիս հետո նշանակվում է մինիստր և նրան շնորհվում է 2-րդ աստիճանի Մեջիդիեի շքանշան¹:

Օսմանյան կայսրությունը քաղաքականապես ըստ էության թեոկրատական բռնապետություն էր, որի օրենսդրության և կառավարական գործունեության հիմքում ընկած էին Ղուրանի դոգմաները: Այդ տեսակետից այդ պետության մեջ միաժամանակ հանդես էին գալիս երեք գործոն՝ սուլթանը, արբունիքը և Բարձրագույն Դուռը:

Սուլթանը տեսականորեն համարվում էր իր հպատակների անսահմանափակ քաղաքական տիրակալը և միաժամանակ մահմեդականության կրոնապետը. այս վերջին առումով նա իր վրա էր վերցրել Մուհամմեդի փոխանորդի կոչումը: Չնայած տեսականորեն սուլթանը երկրի անսահմանափակ տերն ու տիրակալն էր համարվում, բայց գործնականորեն նա շարժվում էր պալատական արիստոկրատիայի, այլ կերպ ասած, ֆեոդալական ամենաբարձր վերնախավի թելադրանքով:

Բանն այն է, որ Թուրքիայում գահաժառանգությունը նույնպես հիմնված էր Ղուրանի դոգմաների վրա. գահաժառանգ համարվում էր ո՛չ թե սուլթանի անմիջական ժառանգը, այլ Օսմանի տոհմի արժանավորագույնը, իսկ արժանավորագույնը որոշողը պալատական արիստոկրատիան և բարձր հոգևորականությունն էին. վերջինիս մեջ մեծ կշիռ ունեւր շեյխ-ուլ-իսլամը, որը համարվում էր Ղուրանի ամենագիտակ անձնավորությունը և մեծ ազդեցություն ունեւր սուլթանի վրա: Սուլթանները, բնակա-

¹ Տե՛ս Ի. Ի. Голобородько, Старая и новая Турция, 1908, стр. 175.

¹ М. Г. Ролен-Жекмен, Армения, армяне и трактаты. (См. «Положение армян в Турции», 1896), стр. 88—89.

նաբար, շէին համարձակվում փոխել գահաժառանգման սիստեմը, բայց պալատական ինտրիգների, գահի հավակնորդներին ոչնչացնելու և այլ միջոցներով ջանում էին գահն ապահովել իրենց ժառանգների համար: Այս հանգամանքը շատ լուրջ հիմք էր ծառայում սուլթանի քաղաքականությունը գամված պահելու պալատական արխատկրատիային:

Պալատական խարդավանքները մեծ մտահոգություն էին պատճառում սուլթաններին, բայց դրանք առանձնապես սարսափի մեջ էին պահում Աբդուլ Համիդին, որի մասին տարածված կարծիքն այն էր, որ նա խիստ կրոնամուլ, համառ, մտավոր զարգացմամբ սահմանափակ, կասկածամիտ և ծայրահեղորեն վախկոտ անձնավորություն էր, որը ամբողջովին զբաղված էր իր անձը անվտանգ պահելու հարցով: Բացի մի քանի մտերիմներից, ոչ մի պալատական չպետք է գիտենար, թե Յելդզ-Քյոշքի բազմաթիվ սենյակներից որտեղ է նա քնած: Սուլթան Համիդի յուրաքանչյուր գիշերը պահպանելու համար միայն պահակախմբի վրա օրական ծախսվում էր 5 000 ֆրանկ:

Սուլթանի արքունիքի ծախսերը պատկերացնելու համար կարելի է դատել հետևյալ պաշտոնական տվյալներով: Արքունիքում կային 1000 մատուցող, 800 խոհարար և խոհանոցային ծառայող, 400 երաժիշտ, ծաղրածու, երգիչ, լարախաղաց, 300 ներքինի հարեմի համար, ընդ որում ներքինապետն ավելի մեծ կշիռ ուներ, քան մինիստրներից որևէ մեկը, 50 վարսավիր, 50 դեկորատոր, 50 գրադարանապետ, 50 արարողապետ, 60 բժիշկ, 30 դեղագործ, 20 թարգման, 50 որսորդ խոշոր կենդանիների համար, 50 թռչնորս, 30 զվարճութան աստիճանավոր, որոնց պարտականությունը սուլթանին զվարճացնելն էր նրա տխրության պահին:

Բացի բազմաթիվ արխատկրատներից, մշտապես սուլթանի արքունիքումն էին գտնվում 54 գեներալ-համհարզներ, որոնք որևէ պաշտոն չունեին, բայց տարեկան ստանում էին 60—120 հազար ուրլի ոտճիկ, չհաշված պարզեններն ու նվերները:

Աբդուլ Համիդը սկսած 1880 թվականից Բ. Դոան, այսինքն՝ պետության գործադիր իշխանության, նշանակությունը

ծայրահեղորեն նսեմացրել էր: Բոլոր հարցերը պետք է լուծեր ինքը՝ սուլթանը: Բայց որովհետև մի մարդու համար անհնարին էր լուծել հսկայական պետության բազմապիսի հարցերը, ուստի Բ. Դոան ֆունկցիաներն իրենց վրա էին վերցրել պալատում խարդավանքներով զբաղված գանազան խմբավորումներ, որոնք իրենց գործակալների միջոցով հետևում էին ամբողջ Թուրքիայի պաշտոնյաներին, այդ թվում նաև մինիստրներին: Սուլթանի պալատական հովանավորյալները, անմիջական կապի մեջ լինելով սուլթանի հետ, ավելի հեշտ էին լուծում հարցերը, քան մինիստրները, նույնիսկ մեծ վեզիրը:

Այստեղից էլ հասկանալի է դառնում, որ նույնիսկ ակընհայտ ոճրագործը, պետական եկամուտները թալանողը, նույնիսկ պետական դավաճանը կարող էր չվախենալ պատժից, եթե պալատում ուներ իր հովանավորը: Թուրքիայի բարձրագույն աստիճանավորի մասին Կ. Մարքսը գրել է՝ «Ինչ վերաբերում է է՛լ ավելի բարձր աստիճանավորներին, ապա այդտեղ թագավորում է ֆավորիտիզմի մի այնպիսի սիստեմ, որի մասին արևմուտքի ժողովուրդները ոչ մի գաղափար չունեն: Գեներալների մեծամասնությունը իրենց ծագումով չերբեզ ստրուկներ են՝ այս կամ այն անձնավորության երիտասարդ ժամանակվա սիրեկանները (mignons): Անարգել կերպով թագավորում են ծայրահեղ սոցիալիզմը, անընդունակությունը և ինքնահավանությունը և առաջ գնալու զխավոր ճանապարհները պալատական խարդավանքներն են»¹:

Թուրքիան գերազանցորեն գիտցող և այնտեղ առաջնակարգ դեր խաղացած անգլիական դիվանագետ լորդ Ստրատֆորդ Ռեդկլիֆն ասել է. «Կ. Պոլսում իմ ամբողջ միսիայի ընթացքում ես միշտ ձգտում էի պաշտպանել անգլիական առևտուրը և օժանդակել թուրքական կառավարությանը նրա ձեռնարկած ռեֆորմների դժվարին գործում: Մի ժամանակ ես հույս ունեի հաջողության վրա: Այժմ ես հարկադրված եմ խոստովանել, որ շնայած սուլթանի բարի մտադրություն-

¹ К. Маркс и Ф. Энгельс, Сочинения, т. X, стр. 660.

ներին, չնայած նրա օգնականներից մի քանիսի տաղանդին և իրենց հայրենիքին նվիրված լինելուն, անհնարին է հաջողության հասնել: Բնակչության մասսան խորապես այլասերված է. ամենուրեք տիրում են վատնումներ, գողություն, ծախվածություն, ընդհանուր քայքայում: Իմ կարծիքով, այդ շարիքն այսուհետև անուղղելի է»¹:

Այստեղ մի սրբազրույթուն պետք է անել. «բնակչության մասսա» ասելով պետք է հասկանալ պալատական արիստոկրատիան և բարձր աստիճանավորներին:

Մենք վերը նշեցինք այն վիթխարի ծախսերը, որ կատարում էր թուրքական արքունիքը: Այդ ծախսերն արտահայտվում էին 100 000 000 ֆրանկ գումարով: Մինչդեռ, ինչպես երևում է հյուպատոսական զեկուցագրերից և հենց թուրքական աղբյուրներից, հիմնարկների աստիճանավորները և գավառական պետական պաշտոնյաները հաճախ 7—8 ամսով բռնակ չէին ստանում: Բնական է, որ նրանք իրենց ապրուստն ապահովելու համար պետք է դիմեին այն միջոցներին, որոնք սովորական պայմաններում արգահատելի են համարվում:

Վիլայեթների, սանջակների, կազաների և նույնիսկ նահիենների գլխավոր պաշտոնյաները բոլոր մինիստրությունների և վարչությունների գծով նշանակվում էին կենտրոնից: Պաշտոն ստանալու համար տրվող կաշառքները ո՛չ միայն օրինականացված էին, այլև շատ հաճախ ավելի մեծ գումար էին կազմում, քան պաշտոնյայի տարեկան բուժիկը: Այնպես որ պաշտոնը փաստորեն զնովի էր: Ուստի հատկապես գավառական բարձր պաշտոնյաները՝ սկսած վալիներից ու դատավորներից մինչև մուղիրներն ու մուխտարները, իրենց պաշտոնավարության ընթացքում ժողովրդին կողոպտում էին այնպիսի մեծ շահերով, որ բավարարեին իրենց բուժիկը, տված կաշառքը և նվերներ ուղարկեին Կ. Պոլսի իրենց հովանավորին, և այնքան գումար տնտեսեին, որ այլ պաշտոնի փոխադրվելիս բավարարեին կաշառքի և պաշտոն

ատանալու հետ կապված այլ ծախսերը: Եվ ինչքան մեծ լիներ այդ վերջին բաժինը, այնքան ավելի եկամտավոր պաշտոն էր սպասվում այդ անմիջական հարստահարողներին:

Ահավասիկ, ամենահամառոտ գծերով այս էր այն երկիրը, որտեղ դատապարտված էր ապրել արևմտահայությունը:



1863 թվականին, այսպես կոչված «Հայոց ազգային սահմանադրության» հարցը քննելիս, Ալի փաշան հետևյալ արտահայտությունն է արել. «Ի՞նչ են ուզում հայերը: Իրենց համար սահմանադրություն: Շատ լավ, տվեք այն, ինչ ուզում են, և մի վախենաք նրա գործադրումից, որովհետև նրանց սահմանադրությունը մի սայլակ է, որը շատ առաջ շարժվել չի կարող՝ նրա անիվները քառակուսի են»:

Այսպես էր ասում մեռելածին հաթիթ-հումայունի հեղինակ, Փարիզի կոնգրեսում թուրքական կառավարությունը ներկայացնող, երեք անգամ արտաքին գործերի մինիստրի և մեկ անգամ էլ մեծ վեզիրի պաշտոն գրաված, դիվանագիտական խարդախությունների հմուտ վարպետ Մուհամմեդ-էմին Ալի փաշան: Նրա այդ պատկերավոր արտահայտությունը ցայտուն ապացույց է XIX դարի ընթացքում թուրքիայում հանդես եկած բոլոր մեռելածին ռեֆորմների համար:

«Երբ մենք տեսնում ենք, թե ինչպիսի ողորմելի փլուզում են կրում քաղաքակրթության ուղու վրա կանգնելու թուրքական կառավարության բոլոր փորձերը, թե ինչպես իսլամական ֆանատիզմը... ոչնչացնում է առաջադիմության ամեն մի փորձ, երբ մենք տեսնում ենք, թե ինչպես կենտրոնական, այսինքն՝ թուրքական, կառավարությունը տարեցտարի թուլանում է քրիստոնեական պրովինցիաներում..., երբ մենք, վերջապես, տեսնում ենք, որ Հունաստանը ձգտում է իր ինքնուրույնությանը, Հայաստանի մասերն ընկնում են Ռուսաստանի իշխանության տակ, իսկ Մոլդավիան, Վալախիան և Սերբիան հաջորդաբար ընկնում են Ռուսաստանի պրոտեկտորատի տակ, այդ ժամանակ մենք պետք է համաձայնենք,

¹ «Братская помощь пострадавшим в Турции армянам», 1897, II, стр. 5—6.

որ Եվրոպայում թուրքերի ներկայությունը լուրջ խոչընդոտ է ծառայում թրակիական-իլիրիական թերակղզու բնական հարստությունները զարգացնելու գործում»¹։

Քանի որ հայերի նկատմամբ թուրքերի քաղաքականությունը թերևս ավելի դժնդակ էր, քան թուրքիայի եվրոպական պրովինցիաներում, ուստի Մարքսի վերոհիշյալ բնորոշումն ամբողջությամբ վերաբերում էր նաև թուրքիայի սահմաններում գտնված Հայաստանին։

Ոչ մի երկրում օրենքն ու ապօրինությունը, իրավունքն ու անիրավությունը այնպիսի մի խառնաշփոթություն չէին կազմում, ինչպես թուրքիայում։ Այդ բանն ամենից առաջ արտահայտվում էր «Թանգիմաթ» ընդհանուր անունը կրող օրենսդրական ակտերի և այդ ակտերը կյանքում չկենսագործելու հակասության մեջ։

Սկսած 1839 թվականի Գյուլիսանեի «Հաթթը-շերիֆ» («Սրբազան գիր») կոչվող օրենսդրության ակտից թուրքիայում հրապարակվեցին մի քանի ակտեր, որոնք խոստանում էին կարգավորել երկրի կյանքը, բայց հազիվ թե հնարավոր լինի դրանք օրենմեք համարել, որովհետև պետական օրենքի, ինչպիսին էլ այն լինի, առաջին պայմանն այն է, որ կյանքում պետք է կիրառվի, մինչդեռ և՛ սուլթանը՝ այդ օրենքները հաստատողը, և՛ պետական օրգանները՝ այդ օրենքները գործադրողները՝ շատ հեռու էին այն մտքից, որ դրանք կյանքում կիրառվելու համար են։ Չնայած այդ ակտերի օրենսդրական ձևին, շնայած դրանցում արտահայտված «բարի նպատակներին», դրանք մնում էին սոսկ որպես տեսական սկզբունքներ, սոսկ մտքի մարզանքներ, իսկ կյանքը, հատկապես հայկական վիլայեթներում, ընթանում էր իր հինավուրց հունով, միանգամայն հակառակ այդ «բարի նպատակների»։

Որպեսզի երկրի կյանքը կանոնավոր հունի մեջ դրվի և «հպատակների կյանքն ու պատիվն ապահով լինի», — ասված է Գյուլիսանեի «Հաթթը-շերիֆում», — խիստ անհրաժեշտ է

ճշտորեն կանոնավորել պետական հարկերը, որովհետև կառավարությունը, պարտավոր լինելով հոգալու երկրի պաշտպանության մասին, զորքի և այլ ծախսերի համար, բացի հարկման ենթարկվող իր հպատակներից, ոչ մի տեղից փող վերցնելու հնարավորություն չունի։ Թեև, շնորհիվ աստծու, մեր հպատակներն արդեն ազատ են մենաշնորհներից, որոնք առաջ սխալ կերպով համարվում էին պետական եկամուտների աղբյուր, սակայն դեռևս գոյություն ունի վատ և իր հետևանքներով վնասակար սովորույթ՝ իլթագամը, այն է՝ հարկերը կապալով տալը նրանց, ովքեր ավելի մեծ գումար կառաջարկեին։ Այդ սխտեմը քաղաքացիական և ֆինանսական վարչություններին դնում է մեկ մարդու քմահաճույթի տակ... Այդպիսի կապալառուն նկատի կունենա միայն իր շահը։ Ուստի Օսմանյան կայսրության ամեն մի մասը պետք է հարկման ենթարկվի որոշակի հարկերով՝ համապատասխան նրա կարողությանը և ուժին. որից ավելին ոչ ոք չպետք է պահանջի»։

Այնուհետև այդ սուլթանական բարձրագույն հրովարտակում ասվում է՝ «Քանի որ պետական հաստատությունների ծառայողներն այժմ բավարար ուձիկ են ստանում, իսկ նրանց, որոնց ուձիկը բավարար չէ, պետք է ավելացվի, ուստի պետք է խիստ օրենմ հրատարակել կաշառակերության, շահամոլության դեմ, որոնք մեր կայսրության անկման պատճառներն են»։

«...Պետությունը կորցնում է իր ուժը, եթե օրենքները չեն պահպանվում։ Ուստի այսուհետև ամեն մի հանցագործություն պետք է դատվի հրապարակորեն՝ քննություն կատարելուց և ապացույցներին ծանոթանալուց հետո։ Ոչ ոք մահապատժի չպետք է ենթարկվի ոչ զաղտնի, ոչ բացահայտ, ոչ թունավորման, ոչ էլ այլ միջոցներով, մինչև որ օրինական վճիռ չկայացվի։ Ոչ ոք իրավունք չունի վիրավորել ուրեմ մեկի պատիվը։ Յուրաքանչյուր մարդ կարող է ազատ կերպով օգտագործել և անարգել տնօրինել իր ամբողջ ունեցվածքը»։

«Բարձրագույն ողորմածության այս սրբազան օրենքը վերաբերում է մեր բոլոր հպատակներին, ինչ կրոնի և ազանդի նրանք պատկանելիս լինեն՝ բոլորը պետք է դրանցից

¹ К. Маркс и Ф. Энгельс, Сочинения, т. IX, стр. 373—374.

օգտվեն հավասարաշափ: Պետութեան բոլոր բնակիչներին անխտիր, համաձայն այս սրբազան օրենքի, մենք շնորհում ենք կյանքի, պատվի և գույքի լիակատար երաշխավորություն»¹ (ընդգծումները մերն են.— Ս. Մ.):

Ամբողջ «Հաթթը-շերիֆը» եվրոպական այսպես կոչված բուրժուական «ազատությունների» գաղափարախոսության արտացոլումն էր: Բայց բուրժուական ազատությունները բըխում էին Եվրոպայի կապիտալիստական արտադրահարաբերություններից, մինչդեռ Թուրքիայում, ինչպես ասել ենք, տիրում էին ֆեոդալական արտադրահարաբերություններ և այդ օրենսդրական ակտը չէր բխում երկրում իշխող տնտեսական ու սոցիալական հարաբերություններից: Կ. Մարքսը գրում է՝ «Թուրքերի տիրապետության տակ արևելյան բարբարոսությունը և արևմտյան քաղաքակրթությունը այնպես սերտ կերպով են միահյուսվել, որ թեոկրատական կայսրության այդ կենտրոնը (Կ. Պոլիսը) եվրոպական քաղաքակրթության տարածման համար իսկական պատենչ է դարձել»²: Եթե Կ. Պոլիսը պատենչ էր հանդիսանում բուրժուական քաղաքակրթության համար, ապա դրանից պետք է եզրակացնել, թե Թուրքիան ամբողջությամբ առած ինչպիսի պատենչ կծառայեր բուրժուական ազատությունների համար: Թուրքիայում «հասարակության տարբեր դասակարգերի փոխհարաբերություններն աչքի են ընկնում նույնպիսի խճճվածությունամբ, ինչպես և ռասաների հարաբերությունները: Թուրքը, նայած հանգամանքներին և տեղին, լինում է բանվոր, ազատ հողագործ, մանր վարձակալ, առևտրական, ֆեոդալիզմի ամենաստորին և բարբարոսական փուլում գտնվող ֆեոդալական կալվածատեր, աստիճանավոր կամ զինվոր, բայց այդ բոլոր տարբեր սոցիալական դրություններում նա պատկանում է տիրապետող կրոնին և ազգությանը, միայն նա իրավունք ունի զինք կրել...»³: (Ընդգծումը մերն է.— Ս. Մ.):

¹ Տես Կ. Ռումեան, Պատմութիւն Արևելեան խնդրոյ, Լոնդոն, 1906, էջ 264:

² К. Маркс и Ф. Энгельс, Сочинения, т. IX, стр. 440.

³ Նույն տեղում, էջ 374:

Հատկապես հայկական վիլայեթներում իշխում էր, Մարքսսի խոսքերով ասած, «ֆեոդալիզմի ամենաստորին և բարբարոսական փուլում գտնվող ֆեոդալական կալվածատիրություն»: Ինքնին հասկանալի է, որ բուրժուական «ազատությունների» վերաբերյալ ամեն մի օրենսդրություն այդպիսի պայմաններում կիրառվել չէր կարող: Այդպիսի օրենսդրությունը ինքնըստինքյան կարող էր միայն մեղեցածին լինել: Այդ մասին մենք մանրամասն կխոսենք հաջորդ գլուխներում: Այստեղ առայժմ մեզ հետաքրքրում է այն, որ Թուրքիայի կառավարական շրջաններում, սկսած սուլթանից և վերջացրած պետական պաշտոնյաներով, ոչ ոք այդ ակտերը կյանքում կիրառելիք օրենքներ չէր համարում: Որ այդ այդպես էր, ցայտուն ապացույց կարող է ծառայել նույն սուլթան Աբդուլ Մեջիդի մի բանի տարի անց հրապարակած հրովարտակը, որտեղ ասվում է՝ «Մեզ տեղեկություն է հասել, որ որոշ մարդիկ, չհասկանալով մեր ցանկությունների իմաստը, երևակայում են, որ իբր թե մեր պետության ներքին կարգը և քաղաքական դրությունը պետք է փոխվի: Նման սխալ կարծիքներն օժանդակում են հասարակական գիտակցությունը միայն մթազնելուն»¹: Այսպիսով, «Հաթթը-շերիֆի» մեջ արտահայտված մտքերը սոսկ «ցանկություններ» էին և նպատակ չունեին փոփոխելու գոյություն ունեցող ֆեոդալական-թեոկրատական պետական նորմաները: Բուրժուական ազատությունների ցանկությունը և ամենաբարբարոս ֆեոդալական իրականությունը, չնայած նրանց միջև եղած աղաղակող հակասությանը, կարող էին գոյություն ունենալ կողք-կողքի առանց միմյանց խանգարելու:

Երբ Ղրիմի պատերազմից հետո, 1856 թվականին, Թուրքիան եվրոպական «կոնցերտի» մեջ մտավ, անհրաժեշտություն զգացվեց հրապարակել մի նոր հրովարտակ, որ հայտնի է «Հաթթը-հումայուն» անունով: Այդ ըստ էության մի նոր փաստաթուղթ չէր, այլ դրանից 17 տարի առաջ հրապարակված Գյուլխանեի «Հաթթը-շերիֆի» կրկնությունն էր միայն ավելի մանրամասնված ձևով: Օրինակ, հարկերի

¹ И. И. Голобородько, Старая и новая Турция, 1908, стр. 196.

վերաբերյալ այդ փաստաթղթում գրված է՝ «Իմ կայսրության բոլոր հպատակները առանց դասակարգերի և կրոնի խըտրության, հարկման են ենթարկվելու միևնույն հիմունքներով: Ամենաշտապ միջոցներ են ձեռք առնվելու հարկերը և առանձնապես տասանորդը գանձելու գծով շարաշահութուններն ուղղելու համար: Հարկերը կապալով տալու փոխարեն հետևողականորեն և ամենակարճ ժամկետում կիրառվելու է անմիջականորեն գանձման սիստեմ»: Այնուհետև՝ «Կաշառակերության, վաճառվողության և վաշխառության դեմ օրենքները անխնա կերպով պետք է կիրառվեն բոլոր հպատակների նկատմամբ, ինչ դասի էլ պատկանելիս և ինչ պաշտոն էլ վարելիս լինեն»¹:

Ինչպես հարկերի կանոնավորման, կապալային սիստեմի ու կաշառակերությունների վերացման վերաբերյալ, այնպես էլ անձնական ու գույքային ապահովության, օրենքի առաջ անխտիր բոլոր հպատակների հավասարության մասին դրույթները կրկնված ենք տեսնում նաև այս պետական ակտում: Հետևաբար, այդ սկզբունքները երկու հաթթրների միջև ընկած 17 տարվա ընթացքում կյանքում չէին կիրառվում, հակառակ դեպքում իմաստ չէր լինի հին օրենքը կրկնել նոր օրենքում: Ուշագրավ է, որ մեծ վեզիր Տուադ փաշայի հայտարարությամբ ևս «Հաթթր-շերիֆի» «բարի ցանկությունները» լոկ խոստում էին, բայց ոչ որպես կյանքում կիրառելու համար օրենքներ: Նա, այդ երկու սուլթանական փաստաթղթերը միմյանց հետ համեմատելով, գրում է՝ «1856 թվականի փետրվարի 18-ի կայսերական ֆերմանը լոկ հաստատումն ու զարգացումն է Գյուլիսանեի ակտի, որով Օսմանյան կայսրության մեջ սահմանվում էր հավասարության ուժիմ և բացվում էր բարենորոգությունների դարագլուխ: Բայց Գյուլիսանեի ակտը ինֆրատիմֆյան պարզապես իրավունքի ճանաչումը և բարենորոգությունների խոստումն էր, որ կարող էր անպատու մնալ: Հասել է խոստումը կատարելու, այլ խոս-

տով ասած, դրանք երկրի հիմնարկները մտցնելու ժամանակը»¹:

Այսպիսով, օսմանյան պետության ամենաբարձր անձնավորության խոստովանությամբ «Հաթթր-շերիֆը», մի կողմից, «սահմանում էր հավասարության ուժիմ», մյուս կողմից՝ դատարկ «խոստում էր, որ կարող էր մնալ անպատու»: Հարկավոր է հատուկ տրամաբանություն հասկանալու համար մի այնպիսի հավասարության ուժիմ, որը կյանքում կիրառելու համար չէր:

Միանգամայն իրավացի է պատմաբան Լեոն, երբ գրում է՝ «Իսկ Թուրքիայում ամենադժվարը, նույնիսկ անհնարինը, հենց թղթից կյանքի մեջ անցնելն էր: Թանգիմաթը մնաց իբրև եվրոպականացման արտաքին կեղև, որ հարկավոր եղավ թուրք պետական մարդկանց՝ եվրոպայի վստահությունը գրավելու և նրանից պարտք վերցնելու համար»²:

Թուրքական պետական սիստեմի պայմաններում «եվրոպականացման արտաքին կեղևը» չէր կարող «անպատու» չմնալ այն պատճառով, որ բուրժուական ազատությունների կիրառումը չէր կարող այլ բան նշանակել, քան ֆեոդալական սիստեմի վերացում: Սուլթանիզմն իր գոյությունը պահպանում էր միայն նրանով, որ «ինչպես ռազմական, այնպես էլ քաղաքացիական ու դատական ֆունկցիաները պահում էր իր ձեռքում և իր գոյության համար սոցիալ-տնտեսական ուրիշ հիմք չունեի, բացի ամենաբարբարոսական ձևի ֆեոդալական հարաբերությունները»:

Իսկ ահա թե ինչ է ասում Կ. Մարքսը. «Թուրքիայում սլավոնները (մենք կավելացնենք նաև հայերը.— Ս. Մ.) առանձնապես ուժեղ տառապում են մահմեդականների՝ ռազմական օկուպանտների ճնշման տակ, որոնց նրանք պետք է կերակրեն: Ռազմական օկուպանտների այդ դասակարգն իր ձեռքում միացնում է բոլոր հասարակական ֆունկցիաները՝ ինչպես ռազմական, այնպես էլ քաղաքացիական ու դատական...»³:

1 «Положение армян в Турции», 1896, стр. 192.

2 Ան, Թուրքահայ հեղափոխության գաղափարաբանությունը, հ. 1, էջ 39:

3 К. Маркс и Ф. Энгельс, Сочинения, т. IX, стр. 396—397.

¹ Империя турецкая, СПб, 1869, стр. 240—241. Տես նաև՝ Կ. Թուրքահայ հեղափոխության Արևելյան խնդրոյ, էջ 613:

Այսպիսին էր սուլթանիզմի հենարանը: Բուրժուական ազատությունների կիրառումը հիմնովին կխաբխլեր այդ հենարանի հիմքերը, քանի որ Թուրքիայի առևտրա-կոմպարզորական բուրժուազիան մի օտար հավելուկ էր նրա ֆեոդալա-թեոկրատական մարմնի վրա: «Ո՞վ է Թուրքիայում առևտրա-կանը: Համենայն դեպս ոչ թուրքը: Երբ նրանք դեռևս նոմադների նախնադարյան վիճակումն էին գտնվում, նրանց առևտուր կատարելու մեթոդը քարավաններ կողոպտելն էր. այժմ, երբ նրանք մի քիչ ավելի են քաղաքակրթվել, դա հանդիսանում է ամեն տեսակի կամայական և ճնշիչ կորզումները: Հույները, հայերը, սլավոնները և ֆրանկները, որոնք տեղավորվել են ծովափնյա մեծ նավահանգիստներում, իրենց ձեռքում են պահում ամբողջ առևտուրը և վճռականորեն որևէ հիմք չունեն շնորհակալ լինելու թուրք բեյերից ու փաշաներից, որ նրանց տրված է այդ հնարավորությունը: Թող բոլոր թուրքերին հեռացնեն Եվրոպայից, առևտուրը գրանից չի տուժի:

Եթե նրանք քաղաքացիական ու զինվորական պաշտոնների մենաշնորհ չունենային, շուտով իսպառ կըքանային»¹:

Ահա ինչու միանգամայն իրավացի է սովետական պատմաբան Խ. Զ. Գաբիդուլլինը, երբ գրում է՝ «Հաթթը-հումայունին» և իբրև նրա զարգացում օրենքների հրապարակմանը խիստ թշնամությամբ դիմավորեցին երկրի ֆեոդալական տարրերը, այդ թվում նաև հոգևորականությունը, որը կապված էր վակուֆների հետ: Ֆեոդալները հասկանում էին, որ ռեֆորմները կհանգեցնեն իրենց դիրքերի թուլացման և առևտրա-կապիտալիստական տարրերի ուժեղացման: Բուրժուազիան չբավարարվեց այդ ակտերով, որոնք մնում էին որպես թղթի պատառիկներ»²:

Հատկապես պալատական արիստոկրատիան, բարձր հոգևորականության հետ միասին, այդ օրենքներում տեսնում էր պետական սիստեմի աշխարհականացումը, որը հակառակ էր Ղուրանի դոգմաներին: Ինչպես «Հաթթը-շերիֆից»,

այնպես էլ «Հաթթը-հումայունից» բխում է, որ քրիստոնյա-հպատակներն սկզբունքորեն հավասարեցվում են մահմեդականներին: Հենց միայն այս հանգամանքը բավական էր, որ այդ ակտերը մնային որպես մեռած տառ: Մարքսը իր հոդվածներից մեկում գրում է՝ «Մեզ հաղորդում են, որ սուլյան մասի 12-ին Ֆրանսիայի, Անգլիայի և Թուրքիայի միջև կրնքված է եռյակ դաշնակցություն, բայց որ մեծ մուֆթին (շեյխուլ-իսլամը.— Ս. Մ.), շնայած սուլթանի անձնական դիմումին, հենվելով ուլեմաների (մուսուլմանական գիտնականների) կորպորացիայի վրա, հրաժարվել է տալ իր եզրակացությունը, որը վավերացնեի թուրքական քրիստոնյաների վիճակի փոփոխության մասին որոշումները, որովհետև այդ որոշումները հակասում են Ղուրանի սկզբունքներին»³:

Եթե առանց շեյխուլ-իսլամի սանկցիայի չէր կարելի փոփոխել քրիստոնյաների վիճակը, ապա ինչպե՞ս կարող էին հաթթըներն օրենք դառնալ և կյանքում կիրառվել, երբ այստեղ քրիստոնյաները հավասարեցվում էին մահմեդականներին:

Այդ կենսագործել՝ նշանակում էր փոխել Թուրքիայի ո՛չ միայն ներքին քաղաքական դրությունը, այլև Ղուրանի դոգմաները: Մի բան, որ անհնարին էր գոյություն ունեցող և արմատավորված թեոկրատական պետական սիստեմի պայմաններում: Ուստի, մենք կարծում ենք, որ Թանզիմաթը օրենքների չվերածվելը կախում չունեի ո՛չ սուլթանի, ո՛չ էլ մինիստրների կամքից ու ցանկություններից, այլ պարզապես բխում էր պետական սիստեմի էությունից. այդ ակտերը կմնային մեռելածին, քանի դեռ կանգուն էր Ղուրանի դոգմաների վրա հիմնված պետական սիստեմը:

4. Մարքսը, խոսելով թուրքահպատակ հունական համայնքների և կառավարության հարաբերությունների մասին, գրում է՝ «Թուրքիայում հույն քրիստոնյաների վրա հոգևորականության տիրապետության ամբողջ սիստեմը և նրանց հասարակական ամբողջ կառուցվածքը բխում է ռայայի ենթարկվելուց Ղուրանին, որն իր կողմից նրանց վերաբերվում:

¹ К. Маркс и Ф. Энгельс, Сочинения, т. IX, стр. 391—392.

² X. 3, Габидуллин, Младотурецкая революция, 1936, стр. 51.

¹ К. Маркс и Ф. Энгельс, Сочинения, т. X, стр. 6.

է որպես անհավատների, այսինքն՝ որպես լոկ կրոնական իմաստով ազգութեան, հոգևոր և աշխարհիկ իշխանութեան միացումը վավերացնում է նրանց հոգևորականութեան ձեռքին: Ուստի նրանց ենթարկումը Ղուրանին փոխել՝ այդ կնը-շանակի միաժամանակ փոխել նրանց ենթարկումը հոգևորականութեանը, և նրանց սոցիալական, քաղաքական ու կրոնական պայմաններում առաջացնել հեղափոխութիւն...: Ով ցանկանում է Ղուրանի փոխարեն դնել Code civil (քաղաքացիական կոդեքս), նա պետք է բուզանդական հասարակության ամբողջ շենքը վերակառուցի արևմտաեվրոպական օրինակով»¹:

Եթե նկատի ունենանք, որ թուրքահայատակ հայութիւնը հար և նման վիճակում էր գտնվում, ինչ որ թուրքահայատակ հույները, ապա պետք է ընդունել, որ Մարքսի այդ եզրակացութիւնը մեծապես վերաբերում է նաև թուրքահայ հասարակութեանը:

Այսպիսով, ըստ մեծ վեզիր Ֆուադ փաշայի հայտարարութեան, «Հաթթը-հումայունը»՝ կյանքում գործադրելու համար օրենսդրական ակտ էր: Մինչդեռ թուրքիայի հետագա պետական գործիչները նույն բանն ասում են նաև «Հաթթը-շերիֆի» մասին: Նույնիսկ ինքը՝ սուլթան Աբդուլ Համիդը իր 1876 թվականի սեպտեմբերի 10-ի հրովարտական խոստովանում է. «Թուրքական կայսրութեան ճգնաժամի և՛ ծագումը, և՛ պատճառները հանգում են օրենքների ոչ ճիշտ կիրառմանը և այն կամայականութիւններին, որ գործը վարելու ասպարեզում բոլորը կանոն են համարում»²: Եթե այս արտահայտութեան փակագծերը բանանք, ապա պետք է արձանագրենք, որ թուրքական պետութեան որդեգրած երկզիմի քաղաքականութիւնը մնում էր իր ուժի մեջ նաև XIX դարի վերջին քառորդում: Մի կողմից՝ առանց ազգի ու դավանանքի խտրութեան հպատակների բուրժուական հավասարեցման դեկլարացիաներ, մյուս կողմից՝ հայ գյուղացիութեան կյանքի համար «ամենաբարբարոս ֆեոդալիզմի» դժնդակ պայ-

մաններ: Մի կողմից՝ թղթի վրա օրենքով կյանքի, գույքի, պատվի լիակատար ապահովում, մյուս կողմից՝ իրականում՝ հենց կառավարութեան հորդորանքներով կազմակերպված հայ գյուղացիութեան կոտորածներ, գույքի հափշտակում և պատվի ու սրբութիւնների ամենաբիրտ ոտնահարում: Մի կողմից՝ օրենքով իրավահավասարութեան դեկլարացիա, մյուս կողմից՝ ստրկութեան հետ սահմանագծվող հայերի իրավազրկութիւն: Աբդուլ Համիդի վերոհիշյալ հայտարարութիւնը այլ բան չէր նշանակում, քան այն, որ օրենքները միևնույն էին, վալիների, մուտեսարիֆների, կայմակամների, կադիների և մյուս մեծ ու փոքր աստիճանավորների կամայականութիւնն էր: Եթե նոր սուլթանը այդ բոլորը խոցելի, պարսավելի և պետութեան համար կորստաբեր էր համարում, ապա դրանից ինքնին բխում է, որ նոր կառավարութեան օրոք անկարգութիւնները տեղի էին տալու կարգ ու կանոնի և օրենքները իսկապես օրենք էին դառնալու կյանքում կիրառելու համար:

Եվ Բ. Գուռը այդ առումով եվրոպական տերութիւններին պաշտոնապես հանդիսավոր խոստում է տալիս վերացնելու պետութեան ներքին և միջազգային հարաբերութիւնների տեսակետից այդ աննորմալ և վտանգավոր դրութիւնը: Արտաքին գործերի մինիստր Սեֆեր փաշայի հայտարարութեամբ՝ «նոր հաստատութիւններն սկիզբ կծառայեն ազատութեան, արդարութեան և հավասարութեան, այսինքն՝ քաղաքակրթութեան հաղթանակին» (ընդգծումը մերն է.—Ս. Մ.),

Հետևաբար, ինչպես սուլթանը, այնպես էլ կառավարութիւնը ընդունում էին այն իրողութիւնը, որ մինչ այդ գոյութիւն ունեցող հաստատութիւնները չեն ծառայել «ազատութեան, արդարութեան և հավասարութեան» գործին: Բայց չէ՞ որ նախորդ պետական փաստաթղթերում ևս «քաղաքակրթութեան» այդ սկզբունքները նույնպես ուղեկց արտահայտութիւն էին գտել: Ուրեմն ոչ մի երաշխիք չկար, թե «նոր հաստատութիւնները» ևս մեռելածին չեն լինի:

Թուրքական կառավարութիւնը հասկանում էր, որ եվրոպական տերութիւնների կառավարութիւնները թուրքիային կառաջադրեն այդ բանական հարցը: Ուստի Սեֆեր փաշան

¹ К. Маркс и Ф. Энгельс, Сочинения, т. X, стр. 7—8.

² Положение армян в Турции, 1896, стр. 34.

հատուկ շրջաբերական-նամակով օտար պետություններում գործող թուրքական դիվանագիտական ներկայացուցիչներին տալիս է հետևյալ հրահանգը.

«Բոլորովին բացառված չէ, որ սիստեմատիկ անվստահության ոգին, որը Եվրոպայի աչքում մեզ այնքան վնաս է հասցնում, քննադատության այլ տարրերի բացակայության պատճառով, կառչում է կատարման վերաբերյալ հարցին և որ այդ բնագավառում աշխատում են կասկածի տակ առնել մեր հաստատությունների (իմա՝ օրենքների.—Ս. Մ.) արագ և ճշգրիտ կիրառումը: Նրանց, ովքեր կկասկածեն գործի այդ կողմի բարեխղճության վերաբերյալ, դուք կարող եք համարձակորեն ասել, որ «կատարումը անհապաղ կհետևի պարտավորությանը»: Իսկ այն դեպքում, եթե համեմատություն կարվի կայսերական նախկին հաթթըների խոստումների և ներկա սահմանադրության կարգադրությունների հետ, դուք, պարոն դեսպան, բարի եղեք ուշադրություն հրավիրել և համապատասխան ուժով ու պարզությամբ ընդգծել այդ երկու կարգի փաստերի միջև արմատական տարբերությունը, որն այնքան նշանակալից է, որ դրանք իրար հետ համեմատելու հնարավորության մասին մտածել իսկ չի կարելի: Այս սահմանադրությունը խոստում չէ, այլ ձևական և իրական միակտ, որը դարձել է բոլոր օսմանյաև հպատակների սեփականությունը, և նրա զարգացումը կարող է կանգ առնել կամ կասեցվել միայն ամբողջ ազգի կամքով՝ կապված թագավորի կամքի հետ» (ընդգծումը մերն է.—Ս. Մ.):

Այն «պարտավորությունները, որոնց անհապաղ հետևելու էր կատարումը», հետևյալներն էին:

Թուր հպատակների անձնական ազատությունը անձեռնմխելի է և ապահովվում է օրենքով: Չնայած իսլամը պետական կրոն է, բայց բոլոր դավանություններն ազատ են համարվում, պահպանվում են բոլոր եկեղեցական հաստատությունների արտոնությունները: Օրենքի սահմաններում ձևականորեն հայտարարվում է մամուլի, ժողովների, պետիցիաների ազատություն, պարտադիր տարրական կրթություն, աշխարհիկ կրթության ազատություն, բոլոր հպատակների իրավահավասարություն, երկրի առաջ իրավունքների և

պարտավորությունների հավասարություն, բոլորին առանց դավանանքի խտրության ամեն մի պետական պաշտոնի իրավունք, հարկերի հավասարաչափ բաշխում, սեփականության և պատվի ապահովություն, պաշտոնյաների պատասխանատվություն ապօրինի գործողությունների համար, եթե նույնիսկ ապօրինիությունը հետևանք է վերադաս մարմինների կարգադրության, դոնբաց դատարան, առանց դավանանքի խտրության դատական պաշտպանության և վկայության ազատություն և այլն:

Մի խոսքով, այդ սահմանադրությունը գրեթե ոչ մի բանով չէր զիջում եվրոպական սահմանադրական միապետությունների օրենքներին և փաստորեն ձևաված էր հենց դրանց վրա: Ուշագրավ է, որ համաձայն այդ ակտի իսպառ բացառվում է թուրքական պետության ֆեոդալական և թեոկրատական բնույթը:

Հարց է առաջանում, ինչպե՞ս հաշտեցնել այդպիսի համեմատաբար լայն բուրժուական սկզբունքները այն իրողության հետ, որ սուլթանի պալատական արիստոկրատիան ամբողջովին կազմված էր մահմեդական ֆանատիկոս հոգևորականներից և ֆեոդալների վերնախավից, որոնց համար այդ սկզբունքներից նույնիսկ մեկը անհանդուրժելի էր համարվում Ղուրանի դոգմաների տեսակետից, մանավանդ, եթե այդ վերաբերում էր այլադավաններին, իսկ այդ սկզբունքների ամբողջությունն այլ բան չէր նշանակում, քան ուայայի ինստիտուտի և գյավուր հասկացության վերացում, որ յուրաքանչյուր ուղղադավան մահմեդականի համար, որոնց մեջ ամենաուղղադավանը հենց ինքը՝ սուլթանն էր, ամենասուսկալի սրբապղծություն էր համարվում:

Այդ հարցը հասկանալու համար հարկավոր է գոնե հարեվանցիորեն ծանոթանալ սահմանադրության ծագման հետ:

Մենք իր տեղում տեսանք, որ Թուրքիայի պետական բյուրջի մուտքային մասը հազիվ էր ծածկում փոխառության առկոսների մարումը: Պետությունն իրեն սնանկ հայտարարեց: Այդ ժամանակ բռնությունները և ծայրահեղության հասած արտակարգ տուրքերը ապստամբություններ առաջացրին Թուրքիայի եվրոպական մասում: Սուսկալի արյունահեղու-

թյունների և կոտորածների միջոցով բնակչության խաղաղացնելը ցնցում առաջացրեց եվրոպական մամուլում: Թերթերը լի էին Թուրքիայի գազանությունները մերկացնող թրդթակցություններով ու հողվածներով: Եվրոպական մեծ ահարությունների դիվանագիտական մեքենան աշխատում էր տենդային կերպով: Սուլթան Աբդուլ Ազիզը, Բ. Գուռը, արքունիքը տազնապի մեջ էին: Ռուսաստանում գործող սլավոնական կոմիտեները աղմուկ էին բարձրացրել և ցարից պահանջում էին «ազատագրական» պատերազմ սկսել Թուրքիայի դեմ: Ստեղծված պայմաններում դժվար էր Անգլիայի և Ֆրանսիայի համար բացել բաց օգնության ձեռք մեկնել Թուրքիային, ինչպես այդ արվեց 50-ական թվականներին: Ռուսաստանի, իբրև բալկանյան ժողովուրդների հովանավորի, բարոյական տեսակարար կշիռը օրավուր մեծանում էր Եվրոպայի հասարակական կարծիքի աչքում: Ռուսաստանին հաջողվեց ազդել սուլթանի վրա և մեծ վեզիրի պաշտոնը հանձնվեց ռուսական օրինակաբանի կողմնակից Մահմուդ Նեջիբ փաշային: Անհրաժեշտ էր ամենանուրբ դիվանագիտական միջոցներով կանխել Արևմուտքի համար վտանգավոր այդ սոսկալի ճգնաժամը: Ուստի նորից առաջ է բաշվում «status quo»-ն պահպանելու մասին դատարկ և գործնականում երբեք չկիրառվող տեսությունը, որը «Բ. Գուռն քրիստոնյա հպատակների համար նշանակում է միայն Թուրքիայի կողմից նրանց ճնշման հավերժացում»¹:

Ռուսաստանի համար նպաստավոր դրությունը վիժեցնելու համար արևմտյան դիվանագիտությունը, և հատկապես Անգլիան, առաջ է բաշում Թուրքիայի վարչական ռեֆորմների հարցը, որի իրագործման համար օգտագործում է թուրք վտարանդիներին: Անգլիայի դիվանագիտության ջանքերով հաջողվում է այդ վտարանդիներին թուլատրել վերագառնալու Թուրքիա: Այս վերջինների մեջ ուժեղ էր անգլիական օրինակաբան: Նրանցից շատերը Եվրոպայում որդեգրել էին բուրժուական գաղափարախոսություններ և իրենց հայրենիքի միակ փրկությունը գտնում էին բուրժուական ռեֆորմներ

մեջ: Կ. Պոլսում և ծովափնյա մյուս քաղաքներում հուզումները, նույն Անգլիայի սադրանքներով, քանի գնում, այնքան ավելի էին սաստկանում: Կառավարության դեմ օպոզիցիան օրավուր աճում էր: Հնդհանուր դժգոհությունը միացնում էր քաղաքական միանգամայն տարբեր պլատֆորմ ունեցող խմբավորումների: 1876 թվականի մայիսի 18-ին Կ. Պոլսում կազմակերպվեց մի մեծ ցույց: Ցուցարարները, շրջապատելով սուլթանի պալատը՝ պահանջեցին հեռացնել մինիստրներին: Աբդուլ Ազիզը անհապաղ բավարարեց ցուցարարների ցանկությունը և կազմեց նոր կառավարություն, որի անդամների մեծամասնությունը, էմիրադիայից վերագարձած Միդհատ փաշայի զխավորությամբ, պատկանում էր անգլոֆիլ խմբին:

Պետական գանձարանը կողոպտված էր բառիս բուն իմաստով: Կառավարության ֆինանսական դրությունը աղետալի էր: Օրավուր սպասվում էր իմպերիալիստական պետությունների ակտիվ միջամտություն: Նոր մինիստրությունը վճռեց պետական հեղաշրջում կատարել, բայց որպեսզի մոլեռանդ ամբոխը չհուզվի, քանի որ սուլթանը համարվում էր մարգարեի փոխանորդ և մահմեդականության կրոնապետ, ուստի նախապես հրապարակվեց շեյխ ուլ-խսլամի ֆեթվան, որտեղ ասված էր՝ «Եթե սուլթանը ապացուցում է իր խելագարությունը, եթե պետությունը կառավարելու համար նա համապատասխան քաղաքական իմաստություն չունի, եթե նա այնպիսի անբնական ծախսեր է անում, որոնք պետությունը ի վիճակի չէ տանել, եթե գահի վրա նրա մնալը կործանարար հետևանք է սպառնում, նրան պետք է գահընկեց անել, թե ոչ: Օրենքն ասում է՝ այո»: Այս ֆեթվան անմիջապես հրապարակվեց բոլոր մզկիթներում:

Շեյխ-ուլ-խսլամի այդ ֆեթվայի հիման վրա Աբդուլ Ազիզը 1876 թվականի մայիսի 30-ին գահընկեց արվեց: Այդ նույն դիշերը ռազմական մինիստր Հուսեյն փաշայի ատորձանակի սպանալիքի տակ Աբդուլ Մեջիդի որդի, խելքից պակաս Մուրադը գահ բարձրացվեց, իսկ պալատական զբլխավոր բժիշկը, մի շարք մեծամեծների ներկայությամբ, բացեց Աբդուլ Ազիզի ձեռքի երակը և նա արյունաքամ լինելով

¹ К. Маркс и Ф. Энгельс, Сочинения, т. IX, стр. 393.

մահացավ: Երկու և կես ամիս անց թ. Գոան անունով սուլթանի առաջին կինը ստորագրեց հետևյալ հրովարտակը. «Նկատի ունենալով Մուրադ 5-րդի հոգեկան վիճակը, նրա խնամակալ նշանակել Համիդ էֆենդուն»: Առեղծվածային պայմաններում մահացավ նաև Մուրադ 5-րդը և գահն անցավ Աբդուլ Համիդ 2-րդին, որի օրոք պետական տեռորն իր գազաթնակետին հասավ: Նրա թագավորության շրջանը թուրքիայի պատմության մեջ հայտնի է «զուլումի շրջան» անունով:

Հետաքրքրական է, որ այդ «զուլումի շրջանի» սուլթանին գահ բարձրացնելու գործում ամենամեծ դերը խաղաց անգլիական դիվանագիտությունը՝ Միդհաթ փաշայի և նրա համախոհների միջոցով:

Միդհաթը նախօրոք համաձայնության էր եկել Աբդուլ Համիդի հետ նոր կարգեր հաստատելու վերաբերյալ: Սակայն Աբդուլ Համիդն իր նպատակին հասնելուց հետո, հենվելով պալատական արիստոկրատիայի և հոգևորականության վրա, բռնեց նահանջի ուղին, պատրվակ բերելով այն, որ սահմանադրության նախագիծը շատ կողմերով անհարթ է երկրի առանձնահատկություններին: Միդհաթ փաշայի նախագծի դեմ հիմնական առարկությունը կառավարման սխտեմի աշխարհականացումն էր: Ուշագրավ է, որ օպոզիցիայի մի մասը ևս կողմնակից էր այդ առարկությանը:

Անգլիական դիվանագիտությանը հետաքրքրողը, հարկավ, ինքը սահմանադրությունը չէր, այլ այն, որ այդ փաստաթուղթը վահան դարձնի status quo-ն թուրքիայում անխախտ պահելու համար:

Եվ ահա, երբ Կ. Պոլսում հավաքված մեծ տերությունների ներկայացուցիչները պետք է քննության առնեին թուրքիայի վրա խնամակալություն հաստատելու հարցը, 1876 թվականի դեկտեմբերի 23-ին, առաջին նիստն սկսվելու պահին, հանկարծ լսվեցին թնդանոթների համազարկեր: Ամբիոն քարձրացավ թուրքիայի արտաքին գործերի մինիստր Սեֆեր փաշան և միջազգային կոնֆերանսին հայտարարեց. «Այդ համազարկերը ազդարարում են սահմանադրության հրապարակումը, սահմանադրություն, որ սուլթանը շնորհում է իր

կայսրությունը: Այդ ակտը փոխում է արդեն 600 տարի գոյություն ունեցող կառավարման ձևը և Օսմանյան կայսրության ժողովուրդների համար նշանակում է ծաղկման նոր դարագլուխ»:

Այսպիսով, Միդհաթ փաշայի սահմանադրության նախագիծը այդպես էլ կմնար որպես սոսկ նախագիծ, եթե թուրքիայի գլխին կախված չլինեիր իմպերիալիստական պետությունների, առաջին հերթին, Ռուսաստանի դամոկլյան սուրը: «Եվրոպական մայրցամաքում գոյություն ունեն փաստորեն միայն երկու ուժ՝ Ռուսաստանը իր արսուլյուտիզմով և ռեպուբլիկան իր դեմոկրատիայով,— ասում է Կ. Մարքսը...— Եթե Ռուսաստանը տիրանա թուրքիային, նրա ուժերը կմեծանան գրեթե երկու անգամ, և նա մնացած Եվրոպայից, միասին վերցրած, ավելի ուժեղ կլինի»¹:

Ահավասիկ այս վտանգը կանխելու համար էր, որ անգլիական դիվանագիտությունը, լարելով իր բոլոր ուժերը, հանդես բերեց այդ սահմանադրությունը՝ իր և Եվրոպայի մյուս պետությունների համար բարոյական հիմք ստեղծելու թուրքիայի «նոր և առաջադիմական» կարգերը պաշտպանելու գործում: Մենք լիովին բաժանում ենք մեր պատմաբան Լեոյի այն կարծիքը, ըստ որի «Ինչքան էլ Միդհաթը սահմանադրության մուծումով քաղաքական նպատակներ էր հետապնդում, բայց և այնպես անկեղծ հավատացող էր սահմանադրական իրավակարգի բարիքներին ժողովուրդների տրնտեսական, կուլտուրական առաջադիմության համար. մինչդեռ էլլիոտը (անգլիական դեսպանը.— Ս. Մ.), ներքուստ թըշնամի լինելով թուրքիայի առաջադիմությանը, խրախուսում էր Միդհաթի գործը, սահմանադրության վրա նայելով իբրև մի ժամանակավոր պատրանքի: Նոր առաջադիմական խոստումներով, բարեփոխությունների տեղատարափով անշատման ձգտող ժողովուրդները կզսպվեին, կխաղաղվեին՝ նրանց մեջ գտնելով իրենց տենչանքների իրականացումը առանց արյունահեղությունների, որով և ռուսական սպառնալից մի-

¹ К. Маркс и Ф. Энгельс, Сочинения, т. IX, стр. 386.

չամտութեան առիթները կշնջվին և, ուրեմն, Ռուսաստանի առաջխաղացումը կանգ կառնեք»¹։

Թուրքիայի համար փրկութեան վահան հանդիսացող այդ սահմանադրութեան հեղինակ Միդհաթ փաշան, երբ իր դերն արդեն խաղացել էր և նրա ներկայությունը հետագա քաղաքականության համար կարող էր լուրջ խոչընդոտ ծառայել, սկզբում աքսորվեց, իսկ հետագայում սուլթանի գաղտնի կարգադրությամբ բանտում մորթվեց և գլուխն ուղարկվեց Աբդուլ Համիդին հետևյալ մակագրությամբ՝ «Ճապոնական զեղարվեստական արտադրանքներ»։

1877 թվականի մարտի 6-ին բացվեց Թուրքիայի առաջին պառլամենտը, որի կազմը շատ խնամքով ջոկված էր սուլթանի գործակալների կողմից։ Որպեսզի պարզ լինի այդ պառլամենտի դեմքը, բերենք երկու օրինակ։

Մեզամպո սանջակի մուտեսարիֆն ընտրողներին ուղղում է հետևյալ հրամանը՝ «Մեզամպոյի բնակիչներ, իհարկե, դուք հիշում եք, որ ես մի քանի ժամանակ առաջ ձեզ տվի կարգալու սուլթանի ֆերմանը՝ յուրաքանչյուր սանջակից 4. Պոլիս ազնիվ մարդ ուղարկելու մասին։ Ուստի սույն գրությունն ստանալուն պես անհապաղ պետք է ընտրեք Ջորջիո Մարգորիտտիին։ Միաժամանակ հայտնում եմ, որ ոչ մի առարկություն չեմ հանդուրժի։ Եթե չենթարկվեք, ձեր գլուղների հետ այնպես կվարվեմ, ինչպես վարվել եմ մյուսների հետ»։

4. Պոլսում Ջիա բեյի թեկնածության առթիվ մեծ վեճերը հայտարարում է բնակչությանը՝ «Նորին մեծությունը հրամայեց, որ այդ թեկնածությունը շառաջադրվի։ Այդ անհանգուրժելի է, որովհետև Ջիա բեյը թշնամաբար է տրամադրված սուլթանի հանդեպ, իսկ սահմանադրությունը թույլ չի տալիս, որ վարկաբեկված անձնավորությունները պառլամենտի անդամ ընտրվեն»²։

Այս եղանակով ընտրված պառլամենտը, իր 69 մահմե-

դական, 42 քրիստոնյա և 2 հրեա դեպուտատներով, հարկավ, սուլթան Աբդուլ Համիդի դրածոների ժողով կարող էր միայն լինել։

Ռուս-թուրքական պատերազմի կապակցությամբ պառլամենտը ցրվեց և այլևս երբեք չգումարվեց։ Այդպիսով, «եվրոպականացման» այդ հանդերձանքը իսպառ վերացավ և Թուրքիան մնաց իր վաղեմի «ամենաբարբարոս ֆեոդալիզմի» սովորական զգեստում։ Պառլամենտի այլևս երբեք չգումարվելու հանգամանքը բոլորովին աննկատ անցավ Թուրքիայում։ Այլ կերպ լինել չէր կարող, քանի որ սահմանադրությունը ոչ թե ժողովրդական զանգվածների պահանջների արդյունք էր, այլ ծնունդ էր առել բուրժուական հովերով տարված սոսկ մի բուռ մարդկանց իդձերի հետևանքով և անգլիական դիվանագիտության քաղաքական նպատակների համար։ Միանգամայն իրավացի էր պրոֆեսոր Լ. Ա. Կոմարովսկին, երբ գրում էր՝ «Երբ որևէ ոեֆորմների փորձեր էին կատարվում, մզկիթներում և դպրոցներում իսկույն սկսում էին բարձրաձայն պարսավել դրանք և քարոզել իսլամի անձեռնմխելիության և քրիստոնյաների վրա նրա տիրապետության մասին... Այդ ճանապարհով ոչնչացվում էին նորությունների հեղինակների մտադրությունները և ցրվում էին Թուրքիայի բարեկամների բոլոր հույսերն ու պատրանքները»։ «Ինչ որ էլ ինքը խոստանա, ինչ որ էլ վճռեն եվրոպական տերությունները, սուլթանը անկարող է գործնականում իրագործել»։ «Դրա պատճառը միջին դասակարգի բացակայությունն է, դասակարգ, որ ունենա դրա համար անհրաժեշտ գիտելիքներ և այն պրոֆեսիոնալ դաստիարակությունը, որի հետևանքով կրթված երկրներում միջին դասակարգի շարքերից հավաքագրվում են մարդիկ պետական ծառայության, ինչպես և՛ առևտրական, և՛ արդյունաբերական գործունեության համար»¹։ Այսպիսով, Թուրք առևտրա-արդյունաբերական բուրժուազիայի գրեթե բացակայության և ֆեոդալական տարրերի խիստ զարգացած լինելու պայմաններում՝ բուր-

¹ Առ, Թուրքահայ հեղափոխության գաղափարաբանությունը, հ. 1, էջ 57—58։

² И. И. Голобородько, Старая и новая Турция, 1908, стр. 208.

¹ Л. А. Комаровский, О реформах в Турции (Сб. «Братская помощь», от. д. II), стр. 6—7.

ժուական բովանդակություն ունեցող սահմանադրության իրագործումը լուկ պատրանք կարող էր լինել:

Այսպիսով, վերևում հիշատակված «Հայոց ազգային սահմանադրության» մասին, որպես քառակուսի անիվներով սայլակ, Ալի փաշայի պատկերավոր արտահայտությունը ըստ ամենայնի վերաբերում էր նաև Քուրքիայի պետական սահմանադրությանը: Սահմանադրությունը մնաց որպես որոշ մարդկանց մտքի մարզանք հար և նման սուլթանական հաթթըններին, իսկ ւլյանքը լնթանում էր իսլամի սկզբունքներով սրբագործված ֆեոդալական հունով:

Երկրորդ գլուխ

ՀՈՂԱՅԻՆ ՀԱՐԱԲԵՐՈՒԹՅՈՒՆԸ ԹՈՒՐԻՔԻԱՅՈՒՄ ԵՎ ՀԱՅ ԳՅՈՒՂԱՅԻՈՒԹՅԱՆ ՏՆՏԵՍԱԿԱՆ ՎԻՃԱԿԸ

Ֆեոդալական հողատիրության պետական ընույթը Թանգիմաթից առաջ և հետո:—Մուլքային հողատիրության էությունը:— Թեմարները որպես ռազմա-հարկային հողային տարածություններ:— Կենտրոնախույս տենդենցների ուժեղացումը թեմարներում:— Թեմարական հողատիրության փաստական շարունակումը հայկական վիլայիթներում XIX դարի երկրորդ կեսին:— Թափուի հողօգտագործական իրավունքը:— Հայ գյուղացիության արտատնտեսական շահագործումը:— Մարաբալությունը հայկական վիլայիթներում:— Վաշխառուական կապիտալի և ֆեոդալական ինստիտուտների սերտաճումը:— Այդ երևույթի ազդեցությունն աշխատավոր գյուղացիության վրա:— Պալատական արխտոկրատիայի, գավառական բարձր աստիճանավորների և վաշխառուական կապիտալի համապարտ երաշխավորությունը:— Հարկազանձման կապալային սխտեմը և նրա ազդեցությունը գյուղացիության վրա:— Արտակարգ հարկերը:— Հարկազանձման հետևանքով առաջացած գյուղացիական հուզումները:— Թուրք-քրդական անտագոնիզմը հարկազանձման շուրջը 60—70 թվականներին:— Քուրդ աշիրեթապետներին սիրաշահելու և միմյանց դեմ լարելու քաղաքականությունը:— Կառավարության կողմից քրդներին հայերի դեմ զրգոելու քաղաքականության իմաստը:— Թուրք-քրդական անտագոնիզմի մեղմացումը 80-ական թվականներին և դրա հետևանքները:— Կառավարության թիլազըբանքով հայ գյուղերի կողպատման ու ավերումը քուրդ աշիրեթապետների կողմից:

Արևմտահայ գյուղացիութեան տնտեսական հարստահարումներն ամենից առաջ հիմնված էին այն յուրահատուկ հողային հարաբերութիւնների վրա, որ գոյութիւն ունեին հայկական վիլայեթներում սկսած առնվազն XVII դարից և Թուրքիայում հայտնի էին թեմարական սիստեմ անունով: Այդ սիստեմն օրենքով վերացված հայտարարվեց 1844 թվականին:

Պատմական գրականութեան մեջ գոյութիւն ունի այն կարծիքը, թե հին թեմարական հողատիրութեան վերացումը նշանակում էր Թուրքիայի ֆեոդալական հարաբերութիւնների վերացում և փոխարինում պետական հողատիրութեամբ: Այդ տեսակետին որոշ չափով տուրք է տվել նաև մեր անվանի պատմաբան Լեոն: Նա իր «Թուրքահայ հեղափոխութեան գաղափարաբանութիւնը» աշխատութեան մեջ այդ առթիվ գրում է՝ «Ճորտատիրական դրութիւնը Թուրքիայում վերացվեց այն ռեֆորմների հետևանքով, որոնք կյանք ստացան թղթի վրա 1840-ական թվականներին «Թանզիմաթ» անվան տակ: Ստեղծված էր նոր կալվածատիրական կարգ: Ավատական տերերն իրենց հողերի արժեքն ստանում էին պետական գանձարանից, հողերը դառնում էին պետական սեփականութիւն և տրվում էին ցանկացողներին, առանց խտրութեան, երկարատե վարձակալութեան իրավունքով: Ամեն մի գյուղացի կարող էր իր կտոր հողի համար նշանակված վարձագինը մտցնել պետական գանձարան և ստանալ թուղթ (որ կոչվում էր թափալ), որով և ազատ փրավունք էր տալիս նրան ինքնազուրի մշակելու իր դաշտը»¹:

Այսպիսով, այդ հեղինակները, նրանց թվում և Լեոն, մի կողմից, արձանագրում են, որ «Թանզիմաթը», ի. Զ. Գարբիդուլիևի բառերով ասած, «թղթի պատառիկ էր» և կյանքում չկիրառվեց, մյուս կողմից՝ նրանց կարծիքով, այդ օրենքներով վերացվեց ճորտատիրական հողատիրութիւնը և ստեղծվեց կենտրոնացած հողային պետական սեփականութեան

սիստեմ, գյուղացիութեան համար հողն ազատ վարձակալութեան՝ «թափուր» իրավունքով:

Հարկավ, Լեոն շատ գիտակ պատմաբան էր և չէր կարող չգիտենալ այն հանրահայտ փաստը, որ այդ, այսպես կոչված, «ռեֆորմները» ոչնչով չթեթեացրին հայ գյուղացու տնտեսական ծանր վիճակը: «Թանզիմաթը», այսպիսով, — գրում է նա, — գալիս էր Արևմուտքի հետ միասին՝ ազատելու և հայ գյուղացուն ճորտային դրութիւնից, դարձնելու նրան ազատ հողագործ, իր սեփական աշխատանքի տեր: «...Բայց այս բոլորը, տարաբախտաբար, միայն... թղթի վրա»¹: Հետևաբար, նույնիսկ Թանզիմաթի առկայութեան պայմաններում ֆեոդալական հողային հարաբերութիւնները Թուրքիայում չվերացան, այլ լոկ ձևափոխվեցին: Այդ դեպքում մեր առաջ ծառանում է մի շատ էական հակասութիւն, այն է՝ ինչպե՞ս հասկանալ այն տարածված կարծիքը, որ «ավատական տերերն իրենց հողերի արժեքն ստանում էին պետական գանձարանից և հողը դառնում էր պետական սեփականութիւն», ինչպես ասում է Լեոն: Մեր կարծիքով, այդ տեսակետը արևելյան ֆեոդալական հողային հարաբերութիւնների ոչ ճիշտ մեկնաբանութեան արդյունք է: Դրանից էլ առաջանում են մի շարք անհարիր եզրակացութիւններ, որոնց բացատրութիւնները, մեր կարծիքով, մնում են մակերեսային, գիտականորեն անհամոզեցուցիչ: Դրանցից մեզ համար կարևորագույնը հայ-քրդական հողային հարաբերութիւններն են: Ինչո՞վ բացատրել, որ հայ գյուղացիութիւնը դարեր շարունակ տնտեսապես ենթակա էր քուրդ աշիրեթապետներին և ոչ թե սուլթանական իշխանութեանը: Այս հարցին պատասխանելու համար անհրաժեշտ է գոնե ընդհանուր պատկեր կազմել թեմարական հողային հարաբերութիւնների մասին:

Թանզիմաթից առաջ Թուրքիայում գոյութիւն ունեցող հողատիրութիւնը մասնագետները սովորաբար ստորաբաժանում են հետևյալ երեք կատեգորիաներին՝ «խասսայի հումայուն», «վակուֆային» և «մուլքային», այսինքն՝ արքունա-

¹ Լեո, Թուրքահայ հեղափոխութեան գաղափարաբանութիւնը, Փարիզ, 1934, հ. 1, էջ 38—39:

¹ Լեո, նույն տեղում, էջ 39:

կան, նվիրաբերական և մասնավոր-սեփականատիրական: Մեր այս աշխատության կապակցությամբ առաջին երկու կատեգորիայի հողատիրությունը մեզ չի հետաքրքրում, մեզ համար կարևորը երրորդ կատեգորիայի հողատիրության ինստիտուտն է:

Պրոֆեսոր Սոկոլովն այդ առթիվ գրում է՝ «Մասնատիրական հողերը բաժանվում էին երկու խմբի՝ 1) լիակատար տիրապետման հողեր և 2) կիսարքունական կամ թեմարի, այլ կերպ՝ ֆեոդալական հողեր»: Ինչ վերաբերում է առաջին խմբի հողերին, ապա դրանք, նրա ասելով, այն հողերն էին, որ թողնվել էին հպատակների տիրող դասի ներկայացուցիչների տրամադրության տակ՝ սուլթանի հաստատմամբ, ընդ որում հողը տիրակալել կարող էին նաև քրիստոնյաները: Սակայն քրիստոնյաների և մահմեդականների տիրակալումներն իրարից էապես տարբերվում էին: Քրիստոնյաները, բացի գլխահարկից (խարաջից), պարտավոր էին վճարել նաև կրկնակի հողային հարկ, մեկը որոշակի, որ կառավարությունը նշանակում էր ըստ տիրույթի տարածության, մյուսն անորոշ, որպես, այսպես կոչված, տասանորդ, մինչդեռ մահմեդականները վճարում էին միայն տասանորդ: Տասանորդը սովորաբար կազմում էր տարեկան բերքի $\frac{1}{10}$ մասը, բայց նայած տարբեր շրջանների բերքատվությանը, կարող էր արտահայտվել բերքի $\frac{1}{8}$ մասով, նույնիսկ մինչև $\frac{1}{2}$ -ով: Այդ հողերի վրա տիրույթի իրավունքը հաստատվում էին սուլթանական հրովարտակներով և հողերը գրանցվում էին կառավարական հատուկ մատյաններում՝ պետությանը հասանելիք հարկերի նշումով¹:

Այն հանգամանքը, որ այդ հողերը կարող էին ժառանգվել, վաճառվել և նվիրաբերվել, ինչպես պրոֆեսոր Սոկոլովին, այնպես էլ շատ ուրիշ պատմաբանների, բերում է այն եզրակացության, որ այդ դեպքում առկա էր հողի անպայման մասնավոր սեփականություն:

Այդ իրավաբանական մենք շենք բաժանում այն պատճառով, որ ֆեոդալական արտադրահարաբերությունների պայմաններում հողի անպայման սեփականության իրավունքը խաբսխվում է ո՛չ թե հողի օտարման սկզբունքի, այլ ֆեոդալական ռենտան յուրացնելու վրա: Այդ դեպքում սեփականությունը ռենտան յուրացնելու իրավական արտահայտությունն է: «Գերիշխանությունն այստեղ ազգային մասշտաբով համակենտրոնացած հողային սեփականությունն է: Բայց այս դեպքում ոչ մի մասնավոր հողային սեփականություն չկա, կա հողի ինչպես մասնավոր, այնպես էլ համայնական տիրապետում և օգտագործում»¹: Որ այդ կարգի մուլքային հողերը պայմանական տիրակալություններ էին և «ազգային մասշտաբով համակենտրոնացած հողային սեփականություն» մի մասն էին կազմում, պարզ կերպով բխում է պրոֆեսոր Սոկոլովի բերած փաստական տվյալներից, որ քրիստոնյա տիրակալները, որոնց տրամադրության տակ այդ հողերը թողնված էին սուլթանական կարգադրություններով, պարտավոր էին պետությանը կրկնակի հողային հարկ վճարել, այսինքն՝ ռենտան հարկի բնույթ ունենալ:

Ավելին, հենց ինքը՝ հեղինակն արձանագրում է, որ «այդ հողերը հետագայում վաճառքի միջոցով անցան մահմեդականներին, ընդ որում թուրքերի տիրապետության ներքո ևս դրանք չէին ազատվում կրկնակի հողային հարկից»: Ուստի հողի օտարումը, թեկուզ քրիստոնյաներից մահմեդականներին անցնելով, հողատիրությունը չէր ազատում այդ պայմանից: Հետևաբար, մենք գործ ունենք պայմանական հողատիրության հետ: Հեղինակի բերած այլ կարգի տվյալներից երևում է, որ այդ մուլքային հողերը սոսկ անժամկետ վարձակալություններ էին: Այսպես, օրինակ, Սոկոլովը, խոսելով այնպիսի մուլքերի մասին, ինչպիսիք էին այգիները, պարտեզները կամ իրենց վրա շինություններ ունեցող հողերը, գրում է, որ այգիները, պարտեզները, շենքերը վերանալու դեպքում «հողերը որպես սեփականություն անցնում էին կամ գանձարանին, կամ սպահիներին, որպես գանձարանի

¹ И Соколов, Земельные отношения в Турции до Танзимата. «Новый Восток», № 6, 1924, стр. 93—112.

¹ Կ. Մարքս, Կապիտալ, հ. III, մ. 2, էջ 329:

լիազորներին: Սպահիններն իրավունք ունեին տասանորդ գանձել, երբ այդպիսի մուլքերի (այգի, պուրակ) տարածության վրա ցանք էր կատարվում, հավասարապես՝ այդպիսի ցանքադաշտ օտարելու դեպքում՝ հողի վաճառքի հարկ գանձել»¹:

Այնուամենայնիվ, ինչպես գրում է Գաբրիելուլինը, այդպիսի մուլքային հողերի տեսակարար կշիռը կայսրության մեջ աննշան էր²: Հիմնականը, այսպես կոչված, թեմարական հողերն էին, որոնց նշանակությունը թե՛ տարածությամբ, թե՛ սոցիալական նշանակալիցությունը շատ մեծ էր:

Թեմարական հողատիրությունն սկսում է մեծ շափերով զարգանալ սկսած դեռևս XVI դարից, երբ Թուրքիան հզոր ուզմա-ֆեոդալական տերություն էր դարձել և այդ հզորության հիմքը կազմում էին թեմարները՝ ուզմա-հարկային տերիտորիաները, որոնք հատկացված էին ուզմա-ֆեոդալական ավագանու ներկայացուցիչներին: Թեմարի պետական հարկերը հատկացված էին թեմարիոթներին (ֆեոդալներին), որոնք պարտավոր էին իրենց հատկացված թեմարին համապատասխան հեծելազոր պահել, որը պահանջված ժամանակ պարտավոր էր ուզմաճակատ դուրս գալ կազմ ու պատրաստ՝ ֆեոդալի անձնական առաջնորդությամբ: «Փոքր Ասիան և Հայաստանը,—ասում է Կ. Մարքսը,—այն ռեզերվուարն էին, որոնք մշտապես նյութ էին մատակարարում թուրքական բանակներին, սկսած նրանցից, որոնք կանգնած էին Վիեննայի պարիսպների տակ, և վերջացրած նրանցով, որոնք ջախջախվեցին Կոլչեի մոտ»³: Հատկապես Հայաստանում այդպիսի ռեզերվուարներ էին քրդական ցեղերը, որոնց աշիրեթապետները մեծամեծ տերիտորիաներ էին ստացել իրենց քոչվորական աշիրեթների (ցեղերի) համար և հայ ուսյան տրվել էր նրանց տրամադրության տակ որպես հողօգտագործող:

Ռուսական հյուպատոսական ղեկուցագրերից մեկում, որ

վերաբերվում է 1860-ական թվականներին, մենք հետևյալ տեղեկությունն ենք կարդում Բայազետի բուրդ աշիրեթապետներից մեկի տոհմաբանության մասին.

«Փեյլուլ փաշայի ընտանեկան ավանդությունը նրա տոհմը դուրս է բերում Արաբստանից և Բայազետում նրա բնակություն հաստատելը վերագրում է Մուրադ III-ի ժամանակներին (1574—1595): Փեյլուլ փաշայի նախորդներից մեկը՝ Մուհամմեդ բեյը եղել է շուլ-փադիշահ (անապատի արքա) և իր Փիսիանլի ցեղի հետ ներկայացել է Մուրադ III-ին և նրան առաջարկել իր ծառայությունը նրա Պարսկաստան արշավելու ժամանակ: Ի հաճույս սուլթանի, իրագործելով իր վրա դրված բոլոր հանձնարարությունները, նա արժանացել է ստանալ Բայազետը՝ նրան կից լայնածավալ դաշտերով ու ամենահարուստ շիֆլիկներով՝ իբրև տոհմական տիրույթ»⁴:

Այսպիսով, Փեյլուլ փաշայի նախորդները Բայազետի շրջանն ստացել էին որպես թեմար: Հայաստանում թեմարներ ստացել էին նաև շատ ուրիշ քրդական ցեղապետներ, որոնք իրենց ցեղերով քոչում էին նրանց հատկացված թեմարների սահմաններում և գանձում էին նստակյաց բնակչության հարկերը, պարտավոր լինելով պատերազմների ժամանակ հանդես գալ համապատասխան հեծելազորով:

Թեմարակալ-ֆեոդալները, անձնապես տնօրինելով իրենց հատկացված թեմարների բնակչությունից գանձվող բոլոր հարկերն ու տուրքերը, հողի նկատմամբ որևէ կարգադրություն անելու իրավունք չունեին, բացի այն դեպքերից, երբ հողը այս կամ այն պատճառով մի օգտագործողից անցնում էր մի ուրիշին: Հողի շարժումը կարող էր տեղի ունենալ միայն ֆեոդալի գիտությունով, դրա համար սահմանված էր որոշ տուրքավճար և տրվում էր հատուկ փաստաթուղթ նոր տիրոջ անունով: Թեմարակալ-ֆեոդալները պարտավոր էին ապրել իրենց հատկացված թեմարում և պատերազմի ժամանակ անձնապես առաջնորդել իրենց հեծելազորը, որին ինչպես խաղաղ, այնպես էլ պատերազմի ժամանակ պարտավոր էին պահել թեմարի եկամուտների հաշվին:

¹ «Новый Восток», № 6, стр. 106.

² Տե՛ս Գабидуллин, նշված աշխ., էջ 29:

³ К. Маркс и Ф. Энгельс, Сочинения, т. IX, стр. 373.

Հասկանալի է, որ սուլթաններն այդ միջոցով որոշ կենտրոնաձիգ սիստեմ էին ստեղծել: Բայց այդ սիստեմի մեջ թաքնված էր նաև նրա հակառակ կողմը, որը նպաստավոր պայմաններում կարող էր վերածվել կենտրոնախույս տենդենցների: Թեմարները կայսրության համար հենարան էին՝ քանի դեռ հզոր էր կայսրությունը և նվաճողական քաղաքականություն էր վարում: Ըստ XVI—XVII դարերի տվյալների, թուրքական հեծելազորը կազմված էր 150 000 հեծյալներից: Այն ժամանակ դա մի ահռելի ուժ էր: Իսկ հետագայում, երբ թուրքական կայսրությունն սկսեց թուլանալ, հատկապես սկսած XVIII դարից, թեմարները հետզհետե կորցնում էին իրենց վաղեմի ռազմական նշանակությունը, հիմնականում մնալով որպես հարկային միավորներ: Այդ պայմաններում, բնականաբար, սկսում էին իրենց ավելի ու ավելի զգացնել տալ կենտրոնախույս տենդենցները: Այսպես, օրինակ, 1774 թվականի ռուս-թուրքական պատերազմի ժամանակ Թուրքիան կարողացավ ռազմաբեմ դուրս բերել ընդամենը 20 000 ֆեոդալական հեծյալ: Այս արդեն պարզ ցուցանիշ էր ֆեոդալական կենտրոնախույս տենդենցների ուժեղացման:

Հենց XVIII դարից էլ հայկական վիլայեթներում կենտրոնացած քուրդ աշխրեթապետները փաստորեն կտրվում են սուլթանական կառավարության ընդհանուր ղեկավարությունից և դառնում տեղական գրեթե ինքնուրույն իշխանիկներ: Իսկ հայ ռայան մնում է նրանց ենթակա, առաջվա պես իր հարկերը տալով նրանց և նրանցից էլ պաշտպանություն ստանալով այլ ցեղերի հարձակումներից և ավարառություններից:

XVIII դարի վերջերին և XIX դարի սկզբներին կենտրոնախույս տենդենցներն այնքան էին ուժեղացել, որ կայսրության տարբեր շրջաններում հաճախ տեղի էին ունենում սուլթանական իշխանության դեմ ուղղված ապստամբություններ: 1804 թվականին ռուսական հյուպատոսը հաղորդում էր՝ «Վալախիան շրջապատել են երեք ապստամբներ՝ Փազվան-օղլուն, Թերանեբլի-օղլուն և Հելլիք-օղլուն: Նրանք հարկեր են հավաքում և ունեն իրենց զորքերը... Փազվան-օղլուն անկախության է ձգտում... Իբրահիմ փաշան 10 000

զորքով Ադրիանապոլիս է եկել ապստամբներին խաղաղեցնելու համար»¹: Ռոզենն իր «Թուրքիայի պատմություն» աշխատության մեջ գրում է՝ «Առանձին մարզերի (Ուռհայի, Դիարբեքի, Մարդինի, Մոսուլի, Բաղդադի) մի շարք կուսակալներ, որոնք հրաժարվել էին հնազանդվել, խաղաղեցվեցին մասամբ խորամանկությամբ, մասամբ էլ նրանց դեմ ուղարկված զավառական զորքերի միջոցով... Կարա-Օսման-օղլուն Ջմյուռնիայում և Չոբան-օղլուն Անգորայում բազմաթիվ մանր դինաստիաների հետ հնազանդության բերվեցին...»²:

Ահավասիկ թեմարական սիստեմը վերացնելու գործում սուլթանական կառավարության քաղաքականությունն ուղղված էր այդ անշատողական տենդենցների դեմ և բուրժուական չէր նշանակում ֆեոդալական հարաբերությունների վերացում: Լոկ կենտրոնաձիգ և կենտրոնախույս տենդենցների պայքարով չի կարելի հիմնավորել այն, որ թեմարական հողային ֆոնդը պետականորեն կենտրոնացնելով իբր «ֆեոդալական-ճորտատիրական դրությունը Թուրքիայում վերացավ» եթե ոչ իրական կյանքում, գոնե օրենսդրությամբ:

Ճիշտ է, այստեղ գոյություն ունեւր նաև մի ուրիշ ծանրակշիռ հանգամանք, որը կարող է կովան ծառայեցվել մեր տեսակետի դեմ, դա այն է, որ թեմարային սիստեմը լիկվիդացնելու գործում կառավարությանը զորավիգ էր կանգնած Թուրքիայի առևտրա-վաշխառուական կապիտալը, որի մեջ զգալի դեր կատարողները քրիստոնյաներ էին, առաջին հերթին հույն և հայ խոշոր վաշխառու դրամատերերը: Այդ, հարկավ, ճիշտ է: Բայց դրանից չի կարելի հետևեցնել, թե վաշխառու-կապալառուական դասի իղձերը տանում էին դեպի ֆեոդալական հարաբերությունների վերացում: Կ. Մարքսը մեզ ուսուցանում է՝ «Լոկ այնտեղ ու այն ժամանակ միայն, որտեղ և երբ առկա են արտադրության կապիտալիստական եղանակի մնացած պայմանները, վաշխառությունը հանդես է գալիս իբրև արտադրության նոր եղանակի կազ-

¹ X. Յ. Գաժմյալլահ, նշված աշխատությունը, էջ 40:

² Նույն տեղում, էջ 42:

միշ միշուց, մի կողմից՝ ֆեոդալներին և մանր արտադրողներին ավերածության ենթարկելով, մյուս կողմից՝ աշխատանքի պայմանները կենտրոնացնելով և դրանք կապիտալի վերածելով»:

Հենց բանն այն է, որ Թուրքիայում բացակայում էին «կապիտալիստական արտադրանքային մնացած պայմանները», իսկ այդպիսի պայմանների համար Կ. Մարքսն ասում է՝ «Ասիական ձևերի ժամանակ վաղխառությունը կարող է շատ երկար հարատևել՝ առանց որևէ ուրիշ բան առաջ բերելու, բացի տնտեսական անկումից և քաղաքական ապականությունից»¹:

Սուլթանական կառավարությունը տևական պայքարից հետո կարողացավ որոշ առումով ճնշել այդ սեպարատիզմը և, թեմարները վերացնելով, հողերը կենտրոնացնել պետության ձեռքում: Դրանից հետո ահռելի չափերի հասան կաշառակերությունը, հարկազանձման կապալային սիստեմը, փողով պաշտոններ գնելը, գանձերի կողոպուտները և առանձնապես քրիստոնյա գյուղացիության, այդ թվում նաև հայ գյուղացիության դաժան կեղեքումները:

Հատկապես հայկական վիլայեթներում թեմարների լիկվիդացումը դեռ երկար ժամանակ անվանական մնաց, և հայ գյուղացիության տնտեսական դրությունը կրկնապատիկ անգամ վատթարացավ: Հին հարաբերությունների հիման վրա հայ գյուղացիությունը շարունակում էր հարկատու մնալ քուրդ աշիրեթապետներին, իսկ նոր հարաբերությունների հիման վրա նա հարկատու է դառնում նաև պետությանը, որի աստիճանավորների կամ կապալառուների անխնա կեղեքմանն էր ենթարկվում: Միայն անառիկ լեռնային շրջաններում այդ գյուղացիությանը որոշ ժամանակ հաջողվում էր քուրդ աշխատավորների հետ միասին ընդդիմանալ կառավարության հարստահարումներին: Մոկսի և Սասունի հայերն ընդհուպ մինչև 90-ական թվականներն իրենց հարկերը առաջվա պես վճարում էին միայն քուրդ աշիրեթապետներին:

Չի կարելի չհամաձայնվել ընդհանրություն ստացած այն կարծիքի հետ, ըստ որի Թանզիմաթը և թուրքական մյուս պետական ակտերը միայն սին խոսքեր են, որոնք «չարժեն այն թղթին, որի վրա գրված են»: Բայց այդ ակտերը դատարկ թղթի կտորների էին վերածվում ոչ թե սուլթանի ու նրա կառավարության սուբյեկտիվ անկամեցողության հետևանքով, ոչ էլ դիտավորյալ կեղծիքներ էին կամ «եվրոպականացման արտաքին կեղև, որ հարկավոր եղավ թուրք պետական մարդկանց՝ Եվրոպայի վստահությունը գրավելու և նրանից պարտք վերցնելու համար», ինչպես կարծում է Լեոն, հենվելով Գուրկո-Կրյաժինի կարծիքի վրա, ոչ էլ թուրքերի ինչ-որ ցեղային անկարողության հետևանք էր, ինչպես կարծում էին շատերը, այլ դրանք պարզապես մեռելածին վիժվածք էին, քանի որ դրանց հեղինակները ձգտում էին եվրոպական բուրժուական օրենքներ մտցնել Թուրքիայում այն ժամանակ, երբ ամենաբարբարոս ֆեոդալական հարաբերությունները, առաջին հերթին հողային հարաբերությունները, թողնում էին անսասան: Անհնարին էր պահպանել Ղուրանի դոգմաների վրա հիմնված պետական սիստեմ և այդ սիստեմում կիրառել բուրժուական օրենքներ: Ապակենտրոնացած թեմարական հողատիրությունը փոխարինելով կենտրոնացված պետական հողատիրությամբ, դրանով հարցի էությունը չէր փոխվում, քանի դեռ գյուղացու և հողի սեփականատիրոջ (պետության) հարաբերությունը մնում էր զուտ ֆեոդալական:

Թյուրիմացության արդյունք է այն կարծիքը, ըստ որի թեմարական հողատիրության հիմքը կազմում էր մասնավոր սեփականության սկզբունքը, որի համաձայն էլ այդ մասնավոր-սեփականատիրական հողերը պետականացվեցին: Այդ թյուրըմբռնումը փարատելու համար մենք այստեղ բերում ենք նույն պրոֆեսոր Սոկոլովի կարծիքը: Նա, քննության առնելով թեմարական կալվածների մի շարք առանձնահատկությունները, եզրակացնում է. «Թեմարական սիստեմը, ճիշտ է, վերացվեց դեռևս 1844 թվականին, բայց իր շատ կողմերով այժմ ևս նա ապրում է 1858 և 1868 թվականների թուրքական հողային օրենքներում: Այդ սիստեմի առանձնահատ-

¹ Կ. Մարքս, Կապիտալ, հատ. III, մաս, 2, էջ 139:

կությունը, մասնավորապես, պետք է համարել այն, որ թե-
մարակալ-ֆեոդալները՝ գաիմները և սպահիները, ժամանա-
կավոր տիրակալների և վարձակալների համար անհաղթա-
հարելի սահմանափակումներ ստեղծելով, գյուղացիներից
անողոք կերպով հողային հարկեր գանձելով և հողային
բահրային հողվածներով կայսրության համար անհաղթ ուղ-
մական կազմակերպություն ստեղծելով հանդերձ, իրենց կա-
ռավարմանը և հսկողությանը ենթակա թեմարական հողերի
վրա իրենք սեփականության ունեւ իրավունք չունեին (ընդ-
գծումը հեղինակինն է.—Ս. Մ.): Նրանք չէին կարող կամա-
յականորեն ո՛չ խլել վարձակալներից, ո՛չ հանձնել ուրիշ-
ներին, ո՛չ յուրացնել իրենց կամ ազգականների համար, ո՛չ
հանձնել իրենց որդիներին, ո՛չ էլ նվիրաբերել դավանական
հաստատություններին: Նրանցից վեր կանգնած էր պետու-
թյունը, որին նրանք ծառայում էին և որը դատարանի մի-
ջոցով նրանց հարկադրում էր պաշտպանել օրենքները»¹:

Այսպիսով, թեմարական հողերը ո՛չ թե թանգիմաթի հի-
ման վրա դարձան պետական սեփականություն, այլ դրանից
առաջ էլ նրանք պետական սեփականություն էին համարվում.
բացի այդ, թեմարային հողերում կիրառվող սկզբունքները
ոչ թե վերացան, այլ ընդգրկվեցին հողային նոր օրենքների
մեջ: Այդ տեսակետից հետաքրքրական է քննության առնել
թափուի ինստիտուտի հարցը:

Ինչպես այս գլխի սկզբում տեսանք, լեռյի կարծիքով,
Թանգիմաթի օրենքներով ստեղծվել էին նոր կալվածատիրա-
կան կարգեր, որ հողերը երկարատև վարձակալության իրա-
վունքով կառավարության կողմից տրվում էին ցանկացողնե-
րին: Այս էր թափուի ինստիտուտի էությունը:

Քյուրիմացության արդյունք կլինի թափուի իրավունքը
ինչ-որ նոր բան համարելը: Ընդհակառակը, դա նույնքան հին
էր, ինչքան և թեմարային հողատիրությունը, թերևս է՛լ ավելի
հին: Բանն այն է, որ թեմարությունը որոշում էր սուվերեն
իշխանության և ֆեոդալների հարաբերությունը, իսկ «թա-

փուն»՝ հողի տիրակալի և հողօգտագործողի: Այնպես որ
դրանք մեկը մյուսով փոխարինվել չէին կարող:

Թափու կոչվում էր այն պաշտոնական փաստաթուղթը, որ
հողը տնօրինողը (ներկա դեպքում թեմարակալը որպես կա-
ռավարությունն անձնավորող) իր կնիքով և ստորագրու-
թյամբ վարձակալողին տալիս էր տվյալ հողային տարածու-
թյունն իր հայեցողությամբ օգտագործելու համար: Վարձա-
կալողը, այդ փաստաթղթերով անժամկետ տիրելով հողին,
պարտավորվում էր միանվագ վճարել սահմանված գումարը
և տարեցտարի մուծել սահմանված ռենտան: Թափուի իրա-
վունքով անմիջական վարձակալող կարող էր լինել և՛ գյու-
ղացին, ինչպես և կողմնակի անձնավորություն: Վերջին
դեպքում նրան իրավունք էր վերապահվում իր վարձակա-
լած հողը ինչպես ամբողջությամբ, այնպես էլ մասերով ու-
րիշներին տալ օգտագործելու: Վարձակալած հողը ժառան-
գաբար անցնում էր վարձակալողի սերնդին, միայն թե, ինչ-
պես օգտագործման տալու, այնպես էլ ժառանգելու կամ ու-
րիշին զիջելու դեպքում, ամեն անգամ պարտադիր կարգով
նոր թափու պետք է տրվեր նոր տիրապետողի անունով: Գրա
համար նա պարտավոր էր իր վրա վերցնել սահմանված
ռենտայի և նախնական գումարի վճարումը, այնպես որ տըվ-
յալ հողը ինչքան ձեռքից ձեռք անցներ, թեկուզ նույն ըն-
տանիքի սահմաններում, այնքան անգամ նախնական վճար
պետք է մուծվեր: Եթե երեք տարվա ըթացքում անհարգելի
պատճառով հողն անընդհատ անմշակ էր լինում, ապա թա-
փուի իրավունքը կորցնում էր իր ուժը և այդ հողը կարող էր
վարձակալության տրվել ուրիշի: Ուշագրավ է, որ պատճառի
հարգելի կամ ոչ-հարգելի լինելը որոշում էր շարիաթի դա-
տարանը, իսկ թեմարակալը հանդես էր գալիս որպես պե-
տական շահերի պաշտպան: Այն դեպքերում, երբ վարձակա-
լողը իր վարձակալած հողը օգտագործման էր տալիս երրորդ
անձնավորության, ապա գլխից վճարում էր սահման-
ված ռենտան, այնուհետև, սերմը դուրս գալուց հետո, բեր-
քը կիսվում էր վարձակալողի և հողօգտագործողի միջև:

Թափուի այս իրավունքն անաղարտ կերպով կիրառվում

¹ И. Соколов, Земельные отношения в Турции до Танзимата, «Новый Восток», № 6, 1924, стр. 112.

էր նաև Թանգիմաթից հետո: Նոր օրենքով ևս թափուի իրավունքը կորցնում էր իր ուժը, եթե հողը անմշակ էր մնում:

Որոշ հեղինակներ, օրինակ, պրոֆեսոր Սոկոլովը, կարծում են, որ այդ ձևի վարձակալութչյան իրավունքը Թուրքիան ժառանգել է Բյուզանդիայից:

Հայ-քրդական հողային հարաբերութչյունները հիմնականում խարսխված էին հողօգտագործման այդ սխտեմի վրա, այսինքն՝ հարկ-ռենտան վճարելուց և սերմացուն առանձնացնելուց հետո բերքը կիսվում էր քուրդ աշիրեթապետների և հողօգտագործող հայ գյուղացիների միջև: Ի միջի այլոց այդ էր այն սուլիդ պատճառներից մեկը, որ քուրդ աշխատավորական զանգվածը դժվարութչամբ և շատ դանդաղ էր անցնում նստակեցութչյան:

Իսկ թե ինչ էր նշանակում հողի տիրակալութչյան իրավունքից զուրկ, սոսկ հողօգտագործող և միաժամանակ ուսյա լինելու վիճակը, այդ մասին մեզ լիակատար պատկեր է տալիս 1872 թվականին Կ. Պոլսի պատրիարքարանին ուղղված Մուշի առաջնորդական տեղապահի զեկուցագրի հետևյալ հատվածը. «Մերազնյա (մեր ազգի=հայերի) դաս մը ժողովուրդ, որ է ի Բոնաշեն, ի Խուսթ, ի Սասուն և ի Շատախ գավառներ, քյուրդերու հետ խառն կրնակին: Նոցա գլխավորներուն, որ խաֆիր կըսվին, ճորտ լինելով, ամենադառն կենաց վիճակված են: Դաս-դաս նոցա բաժին եղած, յուրաքանչյուրն իբրև հպատակ և սեփականութչուն համարված, տարեկան տուրք կուտան խաֆիրներուն, և երեք կարգի բաժանված են: Առաջին կարգը, որ համբա կըսվի, տուն զուլխ յոթ բեռ ցորեն կուտա, մեկ պաճար (արջար), հինգ ոչխար, երկու լիտր յուղ, երկու օխա ծխախոտ, մեկ լիտր շորթան, շորս լիտր աղ, մեկ շալվար, մեկ զույգ զանկապան, մեկ զույգ գուլպա, մեկ զույգ խոնձան, մեկ զույգ գոգնոցի ժպավեն, երկու ունկի վառօդ, երկու ունկի կապար, երկու ունկի կանեփ, հինգ ունկի ձեթ, հինգ հատ պուտուկ, երկու շերեփ, երեսուն գդալ, շորս թի, երկու կողով, վեց ցախավել, մեկ դանակ, շորս հավ, երկու աքաղաղ, տասը սարակ (աշխատանքային օր), վեց արոր, 1242 դուրուշ ստակ (մոտավորապես 96 ուրլի) և տարեկան երկու անգամ ունքցած

ոչխարաց կաթ՝ զարնան պանիր շինելու և աշնան մածուն բռնելու համար: Երկրորդ կարգը, որ կիսահամբա կըսվի, վերոհիշյալ տրոց $\frac{2}{3}$ մասը, իսկ երրորդը, որ պճեղ կըսվի, $\frac{1}{3}$ մասը կվճարեն»¹:

Այսպիսով, արևմտահայ գյուղացին Թուրքիայում, մի կողմից՝ պետական համարվող հողն անժամկետ օգտագործելու համար պարտավոր էր վճարել պետական հարկ, ենթարկվել հարկահանների, կապալառուների և զանազան աստիճանավորների պաշտոնական կեղեքումներին, իսկ մյուս կողմից՝ որպես ուսյա, համարվելով գյավուր, Ղուրանի սկզբբունքների համաձայն, պետք է հատուկ տուրք վճարեր քուրդ բեյին, ըստ էութչյան, ոչ միայն շունենալով իր սեփականութչյունը, այլ ինքն իր ընտանիքով լինելով բեյի սեփականութչուն:

Բյուզանդ Քեչյանը 1880 թվականին գրում էր՝ «Հայաստանի հայ գյուղացվոց մի փոքր և երջանիկ մասն է, որ յուր հնձոց հասութչեն ամեն տարի քիչ մը բան մի կողմ րնելով, խնայողական դրամ մը կկազմե, որով յուր արտաքո կարգի դրամական պետքերը կարողանա հոգալ, իսկ մեծագույն մասը իրմեն ավելի հարուստ մը դրամական փոխառութչյուններ ընելու անխուսափելի հարկի մեջ կգտնվի, որովհետև դրամով վճարելիք տուրքեր ունի, դրամով հոգալիք երկրագործական այլևայլ պետքեր ունի, զորս գոհացնելու համար շի կրնար հնձոց ժամանակին սպասել, կհարկադրվի ուրեմն վաշխառուին դիմել, որ սովորաբար այլազգ բեյ մը կամ աղա մը է: Սա է ահա հայ երկրագործաց ամենամեծ դժբախտութչյանց մին... վաշխառուն խեղճ գյուղացու հունձքն արգելքի տակ կդնե և եթե մեծ գումար մը փոխառած է, անոր արտը գրավ կառնու...»²:

Քնական է, որ այդպիսի պայմաններում արևմտահայ գյուղը ո՛չ միայն տնտեսապես շէր առաջադիմում, այլև գյուղացիական մասսան աստիճանաբար նվազում էր: Հայ ուս-

1 Տես Առ, Թուրքահայ հեղափոխութչյան գաղափարաբանութչունը, Ե. 1, էջ 41—42:

2 Նույն տեղում, էջ 46:

յան հարկադրված էր կամ պանդխտութեան ցուպը ձեռքն առնել, կամ դառնալ գյուղական ընչազուրկ օրավարձու՝ մաւրաբ:

1880 թվականին Մուշի շրջանի հայերը մի հանրագիր են ներկայացնում Կ. Պոլսի պատրիարքարանին, խնդրելով կազմակերպել վարկային դրամատուն: Այդ ձեռնարկությունն իրենց համար փրկարար միջոց համարելով, նրանք գրում են՝ «Տխուր է, Ս. Հայր, հայուն վիճակը Հայաստանում, ամեն տեղ կտեսնվին թշվառություն, զրկանք, աղքատություն: Հայն իր ընտանիքեն տարիներով հեռու ապրելու, կամ լավ ևս է ըսել՝ փտելու դատապարտված, յուր սեփական արտն և ուրիշ հողերը թուրքին, քրդին կամ անխիղճ վաշխառուին զիջանելու ստիպված, ծանր պարտուց ներքև ընկճվելով, զանոնք վճարելու համար պանդխտության դիմած է:

Հայ գյուղացին վարուցանքի ժամանակ շունենալով սերմ, ուստի սերմացու գնելու և արքունի ծանր պարտքերը վճարելու համար, ի սկզբանե կսկսի անիրավ վաշխառուե մը փոխառություն մը ընել 100-ին 100 և շատ ժամանակ ալ ավելի տոկոսով: Գյուղացին կողոզ, կսոսկա մինչև իսկ փոքրիկ փոխառության մը ժամանակ, զի կզգա թե պիտի կործանի ապագային, բայց յուր արտն անմշակ չթողելու հոգն ու հարկահան ոստիկանին... ստիպումները կմղեն զանի անգութ դահիճին՝ այսինքն՝ վաշխառուին առջև, որում խեղճ գյուղացին «մերաբա» պիտի դառնա հավիտյանս հավիտենից յուր ամբողջ ընտանիքով, արտերով, եզներով, և այլն, և այլն»¹:

Հայկական վիլայեթներում զգալի տոկոս էին կազմում այսպիսի կոշված մաւրաբաները, որոնք անձնապես «ազատ» գյուղացիներ էին, բայց ժամանակի ընթացքում ընչազրկվել էին և այս կամ այն պատճառով նրանց օգտագործման տակ գտնվող հողերն անցել էին ֆեոդալներին: Դրանց մեծ մասը զուրկ էր նաև գյուղատնտեսական ինվենտարից: Որոշ մասը գաղթում էր քաղաքները և ստվարացնում հայ պանդխտների շարքերը, իսկ մյուս մասն էլ մնում էր որպես գյուղա-

կան ընչազուրկ մշակ: Ի. Ի. Գոլոբորոդկոյի մեր հիշատակած աշխատությունից քաղած հետևյալ տողերն ամբողջությամբ վերաբերում են մաւրաբաներին:

«Կալվածատերերի բոլոր դաշտային և տնտեսական աշխատանքները կատարում են մշակները, որոնք համապատասխան ժամանակ գալիս են անբերրի շրջաններից: Նրանք գալիս են արտելներով, ընտրովի ավազներով, որոնք իրենց արտելով վարձվում են կալվածատերերի մոտ կանխիկ դրամով կամ բերքի հաշվին: Կալվածատերերից շատերը սեփական ինվենտար չունեն, ինվենտարը բերում են արտելները: Գալիս են հնձվորներ, վար անողներ, հող փորողներ — զրանք հողագործների ամենաչքավոր խմբերն են, որոնք գտնվում են գոյության ամենախղճուկ վիճակում: Գալիս են ավելի ունևոր մշակներ՝ իրենց անասուններով՝ կալսելու գութանով և արորով վարուցանք կատարելու: Մշակների բանակը լցվում է երկիրը և դիմում է աշխատանքի: Այնուհետև այդ մշակները վերադառնում են իրենց խղճուկ գետնափորները, հետները տանելով կալվածատիրոջ բերքից շնչին փշրանքներ և կիսաքաղց ապրում են մինչև հաջորդ տարին»¹:

Հայ հեղինակ Ա. Գոլոբորովի բերած տվյալներից երևում է, որ մաւրաբայությունը որոշ շրջաններում խիստ զարգացած էր: Նա արձանագրում է, որ քուրդ աղաներին պատկանող 77 գյուղերից 62-ը եղել է մաւրաբայական, ընդ որում մաւրաբ էին նաև քուրդ գյուղացիներ:

Թուրքիայի աշխատավորական մասսաների, այդ թվում, հարկավ, նաև հայերի վրա առանձնապես ծանր էր անդրադառնում ֆեոդալական քաղաքական ինստիտուտների և վաշխառուական կապիտալի սերտաճումը: Այդ մի ընդհանուր տնտեսական օրենք էր, որի շարիքից զերծ մնալ ու խուսափել չէր կարող թուրքահայ աշխատավորությունը: «Քանի դեռ ստրկությունն է տիրում, կամ քանի դեռ ֆեոդալն ու նրա ծառայախումբն է ուտում հավելյալ արդյունքը, — ասում է Կ. Մարքսը, — և վաշխառության ցանցն է ընկնում ստրկատերը կամ ֆեոդալը, արտադրության եղանակն էլ նույնն է մնում,

¹ Նույն տեղում, էջ 48—49:

¹ И. И. Голобородько, Старая и новая Турция, 1908, стр. 137.

միայն թե արտադրութեան եղանակն ավելի ծանր է ճնշում քան վորնեքին: Պարտքերով ծանրաբեռնված ստրկատերը կամ ֆեոդալական փինյորը ավելի է դուրս ծծում, որովհետև հենց նրանից էլ շատ են դուրս ծծում: Կամ վերջ ի վերջո նա իր տեղը գիշում է վաշխառուին, որն ինքը դառնում է հողատեր և ստրկատեր, ինչպես հեծյալները հին Հռոմում: Հին շահագործողի տեղը, որի շահագործումն ավելի կամ պակաս շահով նահապետական էր..., հանդես է գալիս մի խստասիրտ, փողատենչ նորելուկ: Բայց ինքը՝ արտադրութեան եղանակը չի փոխվում»¹:

Չնայած գիտական կոմունիզմի հիմնադիրն այստեղ նկատի ունի հնադարյան Հռոմի ստրկատիրոջը և միջնադարյան Եվրոպայի ֆեոդալին, բայց հազիվ թե մենք սխալված լինենք, եթե այդ վերագրենք նաև XIX դարի երկրորդ կեսի թուրք փաշաներին և էֆենդիներին:

«Մեծ վեզիրը, մինիստրներից յուրաքանչյուրն ունին սառաֆներ: Սրանք են, որ հետևում են իրենց տերերին պատկանող գումարների գանձման, կանխիկ տալիս են այն գումարները, որոնց պետք ունեն սրանք, հոգում են նրանց տան ծախսերը, փաշան կամ էֆենդին չէր մտածեր երբեք ստուգել նրանց հաշիվները, մինչև իսկ ընկալագիր ստանալ նրանցից այն գումարների մասին, որոնք գտնվում են նրանց ձեռքին:

Դարձյալ այս սառաֆներին էին դիմում թուրքերի միջից այն սոսկական անհատներն ամեն անգամ, երբ փողի կարոտություն ունեին: Եթե այսպիսիները չունեն անշարժ կալվածներ գրավ րնելու համար, այդ դեպքում նրանց ձեռքն են տալիս արժեքավոր իրեր, որոնք սառաֆների կողմից գերադասելի են համարվում անշարժ կալքերից, որովհետև այդ իրերին նրանք տիրանում են չորս-հինգ տարվա ընթացքում՝ անշափ տեղուներ բարդելու միջոցով:

Այն վարկը, որ վայելում են սառաֆներն իրենց հովանավորների մոտ, նրանց համար շահի մի առատ աղբյուր է: Ամեն անգամ, երբ մի անհատ, լինի նա օտարերկրացի, լի-

նի տեղացի, մի շնորհ է աղերսում մի մինիստրից կամ Բ. Դռան մի մեծավորից, սա դիմում է իր (մինիստրի.—Ս. Մ.) սառաֆին, որի միջնորդությունը, նման դեպքերում, ինչպես նաև այն վճարը, որ նա ստանում է դրա համար, նվիրագործել է սովորույթը: Հաճախ նույնիսկ բախշիչի գումարը, որ փոփոխվում է գործի կարևորությունը նայելով, բաժանվում է այդ միջնորդի և նրա հովանավորի մեջ»¹:

Կետյի կողմից բերված Եվրոպացու (A. Ubicini) այս վկայությունը պարզ կերպով ցույց է տալիս այն խոշոր դերը, որ վաշխառուական կապիտալը խաղում էր թուրքիայի կառավարության բարձր շրջաններում: Ավելին, այդ վկայությունից ինքնին բխում է, որ կաշառակերությունը թուրքիայում հասցված էր կառավարական սխտեմի աստիճանի, որին անուղղակիորեն մասնակցում էր վաշխառուական կապիտալը:

Թե ինչպես և ինչ ճանապարհներով էր վիսյեթների վարչական ապարատը համաձուլվում պետական հաստատությունների և վաշխառուական կապիտալի միասնության հետ, այդ մասին շատ ցայտուն պատկերացում մեզ տալիս է հետևյալ նկարագրությունը.

«Հայերը (խոսքը վաշխառուների մասին է.—Ս. Մ.) էին և են թուրքիայի ամենավաճառ և ամենահարուստ ժողովուրդը, որով և լավագույն երաշխավորությունները եղած են առաջի Բ. Դռան, ըլլալով ներհուն թուրք լեզվին, ըլլալով նաև հավատարիմ ուսանիչ՝ կմատուցանեն պաշտոնատար փաշաներու բոլոր այն պետքերը, որ հանձնարարելի կրնեն իրենք թուրք վարչապետի մը հանդեպ: ...Հարկերը գանձվելով, բնական նյութերու ձևին տակ, հայերուն տաղանդը, իբրև վաճառական և սեղանավոր, կրկնապես օգտակար կդարձունեն անոնք և կընծայեն անոնց շատ առիթներ արագ-արագ դիզելու մեծ հարստություններ: Ինք վեհափառ սուլթանն ալ հաշտաչքով կնկատեն անոնց բարեբաստ հաջողությունները, այնու մանավանդ, որ անոնց հարստությունները այլ հոգածությունով կպահվին կմնան իրենց դրամարկղներուն մեջ, մինչև

¹ Կ. Մարքս, Կապիտալ, հ. III, մ. 2, էջ 139:

¹ Լեո, Նոշայական կապիտալ, 4. 1, Երևան, 1934, էջ 251—252:

որ կառավարական կամք մը կամ պետք մը դուրս բերի անոնք աճեցնելու համար միջին հասույթները... Եթե իրենք (սառաֆները) մերժեն երաշխավոր ըլլալ թուրք կառավարիչի մը համար, այդ կառավարիչն արժեք չունենար հաշտ կառավարութեան պարզ անհատն մը ավելի, որով այդ սառաֆներն են իրապես գավառներու վարիչներն...»:

«Ենթադրենք որ փաշային վճարելիք գումարն առ կառավարութեան (պաշտոն՝ գնելու համար.— Ս. Մ.) ըլլա 500 000 դրուշ (5 000 ոսկի) վճարյալ քառորդ մասամբ, սեղանավորը նույնհետ այն մեկ անգամեն պարգևատրութեամբ մը կառնեն փաշայեն ընկալագիր մը ամբողջ այդ գումարին համար, և այս ընկալագիրն կրբրե իրեն առնվազն երկու առ հարյուր (ամսեամիս) տոկոսիք մը: Ապա պետք է հայթայթել փաշային գննք, շալեր, զիպուքներ, ձիեր, որոնց համար սեղանավորը կառնեն 10 տոկոս հանձնարարագին մըն ալ: Փոխարեն ստակները պետք է վճարվեն 2, 4 և 6 ամսվա միջոցներուն. բայց ինք անմիջապես կառնեն փաշայեն ընկալագիր մը ամբողջ գումարին համար, մյուս ընկալագրին նման տոկոսիքի ենթարկյալ: Երբ քիչ ատենեն փաշան հասնի նշանակյալ գավառը՝ պարտի ղրկել սեղանավորին նվեր մը հասարակաց հասնն... երբ սեղանավորն իմանա իր գործակատարեն, թե փաշան դրամ կղիղե՝ անմիջապես կղրկե անոր ծանուցագիր մը սա ձևով. «Դժբախտաբար ձեր բարձրութեան դեմ տրտունջներ հասած են հոս, բայց ես լռեցուցի անոնք ճարտարամտութեամբ: Այս գործ 10 000 դրուշի մի ծախք պատճառեց ինձի, զոր անցուցի ձեր հաշվին, խնդրեմ հաճեցեք անցունել զայն պահանջիս կողմը»: Կրնա ըլլալ, որ այս ծախքն իրավ եղած ալ ըլլա, բայց և իբրև հաճախ շինծու վրլա: Թերևս կարծիք ալ, եթե երբեք այսպիսի փաշա սատրազամ ըլլա՝ պիտի ջանա վրեժ առնել այսպիսի անիրավութեան մը, բայց բնավ այդպես չէ... գործի վրա գտնվող թուրքերը կհամարին սեղանավորին հարստութեաններն իբրև հարկավոր շարիֆ, որ և աղբյուրն են իրենց ալ հարստութեան: Սատրազամ ընտրյալն ալ ունի ուրիշ շահ մը ևս խնայելու իր սեղանավորին. նա կընդունի անկե իր պարտքերուն շնորհմը ի վարձ պաշտպանութեանը, զոր կընձեռնեն սեղանա-

վորին ընդդեմ ներհակ ազդեցութեանց մյուս փաշաներու: Ամենին հարուստ սեղանավորին ունեցածը կրնանք ենթադրել մեկ միլիոն լիրա սթեռլին մը. բայց և այսպես՝ իրենք միշտ անակնկալով մը ամեն բան կորստնցունելու վտանգի մեջ են»¹:

Հասկանալի է, որ վիլայեթների արդյունավետ պաշտոնները գնելու և այդ վիթխարի ծախսերը ծածկելու համար փաշաները ծծում էին աշխատավոր ժողովրդի արջան վերջին կաթիլը: Դրանով դիզում էին հսկայական հարստութեաններ, որոնցից համապատասխանորեն բաժին էին ստանում ո՛չ միայն վաշխառուական կապիտալի ներկայացուցիչները, այլև պետական պաշտոնյաների և տեղական աղաների մի ամբողջ լեգեոն, սկսած մինիստրներից, վերջացրած գավառական պաշտոնյաների վերնախավով: Այդ չգրված օրենք էր թուրքիայում: Այդ պատճառով էլ անգլիական հյուպատոսներից մեկը իր պաշտոնական զեկուցագրում հայտնում է, որ «ժողովրդին բացեիբաց կողոպտելն այստեղ հանցանք չի համարվում», ճիշտ այնպես, ինչպես կապիտալիստական աշխարհում արդյունաբերութեան կազմակերպման և առևտրի միջոցով ժողովրդին կողոպտելը: Բնական է, որ այդպիսի պայմաններում պաշտոնական օրենքով սահմանված ամեն մի վերահսկողութուն լոկ սին ձևականութուն էր և որևէ արդյունք տալ չէր կարող: Որոշիչը չգրված և ոչ թե պաշտոնական օրենքն էր: Սառաֆների, փաշաների ու աղաների կուռ կռալիցիայի առաջ փոշիանում էին բոլոր տեսակի օրենքներն ու վերահսկողութունները: Իսկ եթե շատ եղակի դեպքերում այս կամ այն աստիճանավորը, այս կամ այն պատճառով ցանկանում էր կիրառել պետական գրավոր օրենքները, այնպիսի պատենջի էր հանդիպում, որը ճեղքելը նրա համեստ ուժերից շատ վեր էր լինում:

Այդ առումով շատ ուշագրավ է հետևյալ փաստը:

Անգլիական փոխ-հյուպատոս Բիլիոտին իր զեկուցագրերից մեկում գրում է.

«Բ. Դուռը իբրև հատուկ քննիչ այստեղ էր գործուղել ոմն

¹ Առ, Խոջայական կապիտալ, Երևան, 1934, էջ 250—251:

Մոսհամեդ էֆենդու: Աղաները մտածեցին նրան կաշատել, առաջարկելով 400 ոսկի, որը նա հրաժարվեց ընդունել: Այդ ժամանակ աղաները գյուղացիներին արգելեցին գանգատի գնալ քաղաք: Իսկ երբ Մուհամմեդ էֆենդին վճռեց, որ ինքն այցելի գյուղերը, այդ աղաները նրան այն օրը հասցրին, որ հուսահատված վերադարձավ Կ. Պոլիս, շկատարելով հանձնարարությունը»¹: Մի առանձին հատուկ ճարտարական վարչությունները խրախուսում էին տեղական վարչությունները, որոնց հետ բաժանում էին իրենց կողոպտած հարստությունները:

Վաշխատուկան կապիտալի և պետական հաստատությունների ու բարձրաստիճան պաշտոնեությունների սերտաճումը կատարվում է ո՛չ միայն սառաֆների միջոցով: Այն աշխատության առաջին գլխում մենք տեսանք, որ սուլթանական հատկությունները երկրի համար վատ և վնասակար էին համարում հարկերը կապալով տալու պրակտիկան և անհրաժեշտ էին համարում անցնել ուղղակի հարկազանձման սխեմայի: Մինչդեռ այդ պրակտիկան XIX դարի երկրորդ կեսին ևս շարունակվում էր այնպես, ինչպես առաջ և վաշխատուկան կապիտալի ու թուրքական պետական հաստատությունների սերտաճման միջոցներից մեկն էր ծառայում: Հարկերի կապալների անագորյուն ծանրությունը, քայքայելով աշխատավորական զանգվածներին, վիթխարի հարստությունների աղբյուր էր ծառայում ո՛չ միայն վաշխատու կապալառուների, այլև պետական պաշտոնյաների ու պալատական արիստոկրատիայի համար:

Թուրքիայում ամենաշնչին պաշտոնական գործ գյուլս բերելու իրավունք ստանալը հնարավոր էր միայն կաշառք տալով, ուր մնաց այնպիսի եկամտաբեր գործ, ինչպիսին ամբողջ շրջանների հարկազանձման կապալը: Այստեղ հարկավոր էր մեծ կաշառքներ այդ կապալների իրավունքը ձեռք բերելու համար: Բայց կապալի իրավունք ստանալը հարցի մի կողմն էր, մյուս կողմն այն էր, որ այդ հարկերը պետք էր գանձել: Հարկերը գանձելու գործում տեղական պետական

օրգանները պարտավոր էին օժանդակել կապալառուին ու նրա ապարատին: Բայց այդ օժանդակությունն իրական և շոշափելի էր լինում լոկ այն դեպքում, երբ տեղական իշխանությունները դրանում անձնապես շահագրգռված էին, այլ կերպ ասած՝ վալիները, մուտեսարիֆները, մուդիրները, ոստիկանապետները, դատավորները իրենց արբանյակներով բաժին էին ստանում այդ հարկերից: Եթե շլինեին վարչական ու դատական հաստատությունների ճնշումները, ոչ մի կապալառու ի վիճակի չէր լինի գյուղացիներից քամել այդ կրկնակի ու եռակի աճած հարկերը: Ուստի տեղական վարչությունների ու կապալառու-վաշխատուկան կապիտալի սերտաճումը դառնում էր անխուսափելի: Հարկերի գումարները հաճախ այնքան էին աճում, որ գյուղացիների կողմից դրանք մարել անհնարին էր լինում, շնայած ձեռք առնված ամենադաժան միջոցներին և տեղի էին ունենում հուզումներ ու խռովություններ: Էրզրումի ուսական հյուպատոսի գեկուցագրերից մեկում, որ վերաբերում է 1870-ական թվականներին, կարդում ենք.

«Խաշիկյան խոջա-Կարապետ աղան կապալով վերցրել է էրզրումի, Բաբերդի (Բայբուրդի) և Թերջանի տասանորդը: Նորբրս նա Բաբերդ ուղարկեց իր մուբաշիրին՝ դրամը հավաքելու և օգնելու այնտեղի իր հայ լիազոր Փիլիպոսին, որն անընդհատ գանգատվում էր, որ գյուղացիները չեն ուզում ոչինչ վճարել: Մուբաշիրը, գալով Բաբերդ, ներկայանում է մուդիր էմիր փաշային և գյուղացիներից պահանջում է վճարել հարկերը: Գյուղացիները կտրականապես հրաժարվում են իրենց պարտքը վճարել և մուդիրի սպառնալիքին՝ թե չվճարողներին բանտ կնստեցնի, պատասխանում են նրանով, որ երեկոյան հավաքվում են ավելի քան 200 մարդ և պահանջում են իրենց հանձնել գյուլուրի արբանյակ մուբաշիրին, որ կտոր-կտոր անեն նրան:

Պետք է նշել, որ Մուհամմեդ բեյ անունով այդ մուբաշիրը Մուհամմեդ-Ռաշիդ փաշայի (էրզրումի վալու.—Ս. Մ.) ամենամերձավոր սիրելիներից մեկն է: Նա հագիվ է կարողացել գաղտագողի փախել էրզրում և գանգատվել գեներալ-նահանգապետին: Նորին գերազանցությունը խոստացել է այն-

¹ «Положение армян в Турции», 1896, стр. 65.

տեղ գործ ուղարկել: Այդպիսի պատմություն կրկնվել է Թեր-
զանում և կարող է տեղի ունենալ նաև մյուս վայրերում»¹:

Մի առանձին խորաթափանցություն հարկավոր չէ կոահե-
լու համար, որ 1) կապալառու խաչիկյանը, էրզրումի վալի
Մուհամմեդ փաշան և նրանց բազմաթիվ մեծ ու փոքր ար-
քանյակներն իրենց բաժինն ունեին այդ կապալի հավելյալ
մասից. 2) անհավանական է, որ գյուղացիությունը մի մար-
դու պես հրաժարվեր դարերով արմատավորված հարկերը
վճարելուց, իսկ եթե հրաժարվում և խռովության էր դիմում,
ապա այդ կարող էր լինել միայն այն դեպքում, եթե պա-
հանջի ապօրինությունն իր գազաթնակետին էր հասնում և
գյուղացիությունն ի վիճակի չէր կատարելու նրան առաջա-
դրվող պահանջները. 3) ինչքան էլ դժնդակ էր վաշխառու-
կան կապիտալի և պետական հաստատությունների սերտաճ-
ման հետևանքով առաջացած գյուղացիության ծանր տնտե-
սական վիճակը, այնուամենայնիվ, նա սպեցիֆիկ հայկական
երևույթ չէր: Հայկական վիլայեթների քուրդ և թուրք աշ-
խատավորությունը ևս հաճախ ենթարկվում էր նույնպի-
սի հարստահարությունների, ինչ որ հայ գյուղացիու-
թյունը:

Սկսած XIX դարի կեսերից և հատկապես վերջին քառոր-
դում Թուրքիայի բոլոր ժողովուրդների և առանձնապես հայ
գյուղացիության կեղեքումն ահռելի շափերի էր հասել և տա-
րեցտարի ավելի սոսկալի էր դառնում: Դրա հիմնական
պատճառը, մի կողմից, Թուրքիայի ներքին կյանքի ֆեոդալա-
կան հարաբերությունների և արտաքին կապիտալիստական
հարաբերությունների, մյուս կողմից, վաշխառուական կա-
պիտալի և ֆեոդալական հաստատությունների յուրահատուկ
սերտաճումն էր: Արտաքին փոխառությունների վիթխարի աճը
պետությունը գամել էր եվրոպական ֆինանսական կապիտա-
լին, իսկ այդ պարտքերի տոկոսները մարելու և պետական
դեֆիցիտը ծածկելու համար ժողովրդից միջոցներ քամելու
մեթոդները պահպանվել էին անաղարտ ֆեոդալական: Այս-
տեղից էլ առաջանում էր Թուրքիայի աշխատավոր գյուղա-

ցիություն տնտեսական ու արտատնտեսական կեղեքման յու-
րահատուկ սիստեմը:

Այդ սիստեմը նկարագրված է բազմաթիվ փաստաթղթե-
րում: Դրանցից մեկը էրզրումի վիլայեթի անգլիական հյու-
պատոս էվերստի զեկուցագիրն է, որից քաղում ենք ստորև
բերվող հատվածը.

«Միայն համբերությամբ, սարսափով և բնակչության
տարբեր խավերի (իմա՝ ազգությունների, ցեղերի) սերտ
կապերի բացակայությամբ կարելի է բացատրել այն հան-
գամանքը, որ արևելյան սանջակներն անցյալ տարի հարկե-
րը գանձելիս մի մարդու պես չապստամբեցին կառավարու-
թյան դեմ: Պատերազմի պատճառով կիսով չափ ավերված
լինելով, գյուղացիները սովի և շքավորության մատնվեցին
վատ բերքի հետևանքով: Այդ դժբախտներին ամենաանգուլ-
կերպով հետապնդում էին հարկահանները՝ նրանց բանտ էին
նետում, երբ նրանք ի վիճակի չէին լինում հարկերը վճարելու
մինչդեռ կառավարությունը բնակչության մեծամասնության
նկատմամբ ինքը պարտապան էր այն մթերքների համար, որ
վերջին պատերազմի ժամանակ վերցրել էր նրանցից: Անց-
յալ, ինչպես և այս տարի Թորթումի, Գիզկինի և Իսպիրի
կազանների տասանորդի գանձման իրավունքը գնել է մի ըն-
կերություն, որը կազմված էր էրզրումի վարչության սնդամ-
ներից: Այդ ընկերությունը մտադիր է այս տարի ևս, անցյալ
տարվա պես, հացահատիկը ձմռանը վաճառել աներևակա-
յելի բարձր գներով... Անասնակերի բացակայության պատ-
ճառով մեծ քանակությամբ ոչխարներ սատկեցին: Չնայած
դրան, սատկած ոչխարների առաջիկա տարվա հարկը ան-
խնայորեն գանձվում է:

Հարկերի այդպիսի անարդար գանձման մեղքն ընկնում է
գլխավորապես բարձրագույն կառավարության վրա: Դուռը
անընդհատ փող է պահանջում վալիներից, սրանք էլ իրենց
հերթին՝ մուտեսարիֆներից, իսկ մուտեսարիֆները՝ կայ-
մակամներից: Այդպիսի պահանջները սովորաբար ուղեկցը-
վում են պաշտոնանկ անելու սպառնալիքներով, փողը ժա-
մանակին չհայթայթելու դեպքում: Աստիճանավորները,
որոնց հայտնի են այդ գործի ամենախոր գաղտնիքները, բո-

¹ АВПР, ф. Политархив, 1—9, 1866—70 гг., д. № 4, л. 69.

լոր հնարավորութիւններն ունեն հարստանալու ինչպես ժողովրդի, այնպես էլ կառավարութեան հաշվին: Այստեղ ժողովրդին կողոպտելը հանցանք չի համարվում, իսկ կառավարութիւնից գողանալու համար հարկավոր է փող ունենալ և գիտենալ, թե որտեղ և ում պետք է կաշառել, որպէսզի որևէ խոշընդոտ շառաշանա: Աստիճանավորը այդ կարգի գործերում երբեմն շատ հեռու է գնում, եթե նա բավականաչափ խելացի է, ժամանակին հրաժարական է տալիս և կողոպտած գումարից ուր հարկն է «բախշիլ» է տալիս, որպէսզի իրեն նշանակեն որևէ հարևան վիլայեթում, որտեղ նրա համար գործունեութեան նոր ասպարեզ է բացվում»¹:

Այս վկայութեան մեջ ցայտուն կերպով արտացոլում է գտել պետական հարկագանձման և գյուղացիութեանը պաշտոնապէս կողոպտելու միասնական սիստեմը: Կապալառուն, լինի նա պետական պաշտոնյաներից կազմված մի ընկերութիւն, ինչպէս վերոհիշյալ դեպքում, թե առևտրա-վաշխառուական կապիտալի ներկայացուցիչ, ինչպիսին էր Խաշիկյան Կարապետ աղան, պետութեան նկատմամբ նա հանդես է գալիս կապալառուի դերում, իսկ գյուղացիութեան նկատմամբ՝ ֆեոդալի, քանի որ պետութեանը նա մուծում է ըստ աճուրդի, իսկ գյուղացիութիւնից գանձելը բացարձակապէս թողնված է կապալառուի քմահաճույքին:

Թուրքիայում գյուղացիութեան վրա ընկնող հարկերը չէին սահմանափակվում տասանորդով. գոյութիւն ունեին բազմապիսի սովորական և արտակարգ հարկեր: XIX դարի երկրորդ կեսի թուրքական գյուղի բերքի զլխին կանգնած էին մի շարք կապալառուներ ու պետական պաշտոնյաներ: Առանց վերջինների աջակցութեան ոչ մի կապալառու չէր կարող ոչ միայն հարստութիւններ դիզել, այլև դժվար կլինէր պետութեանը մուծած գումարը վերականգնել: Ուստի, բնականաբար, հանդես էր գալիս կապալառուների և պետական պաշտոնյաների փոխադարձ երաշխիքի սկզբունքը, մեկը՝ իր ձեռքում եղած վարչական միջոցներով՝ ուստիկաններով, զինվորներով, աստիճանավորներով, քանտերով, պետք է աջակ-

ցեր, իսկ մյուսը այդ աջակցութեան համար պետք է վճարեր: Եվ այդ բոլորը, իհարկե, գյուղացիութեան հաշվին: Այդ փոխադարձ երաշխիքը ուղիղ համեմատական էր, այսինքն՝ ինչքան մեծ էր վճարը, այնքան ուժեղ էր աջակցութիւնը: Եվ այս մի ինչ-որ ծածուկ գործունեութիւն չէր, այլ հատուկ սրբագործված սիստեմ: Ահա թե ինչու «ժողովրդին, մանավանդ հայկական պրովինցիաներում, ամենից շատ ճնշում է ո՛չ թե հարկերի ծանրութիւնը, այլ զանազան տեսակի կողմնակի կորզումները, որոնց մեղքն ընկնում է կառավարութեան և նրա գործակալների վրա, — գրում է հյուպատոսներից մեկը: — Այսպէս, օրինակ, զինվորները, զապթիաները, շրջիկ աստիճանավորները, առանձնապէս էրզրումի վիլայեթում, կերակրվում, բնակարան են զբաղեցնում գյուղացիների հաշվին. նրանցից վերցնում են այն ամենը, ինչ իրենց հարկավոր է առանց որևէ ստացականի, իսկ եթե ստացական տրվում է, ապա ոչ ճիշտ ձևով, օրինակ, առանց ստորագրութեան կամ գումարը նշանակելով ստացածից շատ պակաս... Բացի այդ, հարկերը ստանալու վերաբերյալ ստացական չեն տալիս և հարկերը գանձում են երկրորդ անգամ»¹:

Ի. Ի. Գոլբորոդկոն իր ձեռքի տակ ունեցած նյութերի հիման վրա վկայում է՝ «Նահանգապետը պարբերաբար շրջում է իր մարզը և վերադառնում է ավարով բեռնված, որ հավաքում է իր խնամքին հանձնված բնակչութեանից: Մեկ ճանապարհորդութեանից նա բերում է 30—40 ձի, 20—30 հազար ռուբլի, զանազան գանձեր, որ մտնում են նրա սեփական գրպանը: Նույն բանն անում են նաև երկրորդական իշխանավորները: Նրանցից ոչ մեկը պաշտոնից չի հեռանում, մինչև որ մի քանի անգամ ծայրից-ծայր շրջի իր տեղամասը, ամեն միջոցներով բնակչութեանից դրամ չկորզի: Սուլթանական կառավարութեան կողմից աստիճանավորներին և դատավորներին պարբերաբար ոռճիկ չվճարելը այդ կեղեքումներն օրինականացրել են»²:

Պարբերաբար ոռճիկ չվճարելը Թուրքիայում դարձել էր

¹ «Положение армян в Турции», 1896, стр. 72.

¹ Նույն տեղում, էջ 73:

² Голобородько, Старая и новая Турция, 1908, стр. 223.

խրոնիկական երևույթ: Նույն հեղինակը գրում է՝ «Մանր աստիճանավորներն ամիսներով, երբեմն 7—8 ամսով, չէին ստանում իրենց ուժիկը: Բ. Դուռը աստիճանավորներին ուժիկի կեսը վճարելը, իսկ մյուս կեսի վճարումը ձգձգելը սխտեմ էր փարձրել»¹: Պրոֆեսոր Լ. Ա. Կոմավորսկին, հիմնվելով ֆրանսիական աղբյուրների վրա, գրում է. «Արդեն վաղուց է, որ օսմանյան աստիճանավորներն իրենց ուժիկներն ստանում են կրճատումներով և ձգձգումներով: Շաքիր փաշան, որը Հայաստանի գլխավոր կոմիսարն էր, հրաժարական տվեց, որովհետև ուժիկ չէր ստանում: Կրեստի նահանգապետը պաշտոնից հրաժարվեց, որպեսզի ազատվի իր աստիճանավորների ձանձրացուցիչ խնդիրքներից, քանի որ նրանք անցյալ ժառանգության համար իրենց ուժիկի քսաներորդ մասն էին միայն ստանում»²: Ինքնին հասկանալի է, որ պետական ծառայողներին ուժիկ վճարելու այդպիսի սխտեմը՝ սխտեմ էր դարձրել այդ ծառայողների կողմից գյուղացիությանը պաշտոնապես և անպաշտոն կերպով կողոպտելը:

1879—1880 թվականի ձմեռը թուրքահայ գյուղացիության կյանքում ամենաողբալի ժամանակներից մեկն էր: Սոսկալի երաշտի և դրա հետ միասին մորեխի պատճառած ավերածության հետևանքով գյուղացիությունը նույնիսկ ցանած սերմը շատացավ: Ամբողջ ժողովուրդը բացարձակապես քաղցի էր մատնվել: Քուրդ ավազակապետերի սովորական ավարառություններն այդ տարին ավելի սաստկացան: Վրա հասավ համաճարակը, որը անխնա հնձում էր սովահար ժողովրդին: Ըստ հյուպատոսական տվյալների, միայն Բայազետի և Ալաշկերտի շրջաններում սովամահ են եղել 3000 մարդ:

Նույնիսկ համատարած սովի ու համաճարակի այս դժընդակ պայմաններում թուրքական կառավարությունը մազաչափ անգամ չթուլացրեց սովորական հարկազանձումը:

¹ Նույն տեղում, էջ 176:

² Л. А. Комаровский, О реформах в Турции, «Братская помощь», II, стр. 5.

Որովհետև բերք բուրրովին չէր ստացվել, աշարը հաշվում էին ելնելով նախորդ տարիների բերքից:

Շատ տեղերում օգնության կոմիտեներ կազմվեցին: Հանգանակության և այլ միջոցներով փող էր հավաքվում Կովկասում, Կ. Պոլսում, Թուրքիայի հայաբնակ քաղաքներում, Ռուսաստանում, Եվրոպայում և ուղարկվում էր սովյալներին օգնություն ցույց տալու համար: Միայն էրզրումի կոմիտեն սովյալներին բաժանել էր 1/2 միլիոն ֆրանկ:

Իսկ թուրքական կառավարությունը սովորական հարկազանձման միջոցով կողոպտում էր սովյալների այդ գրոշները: Հյուպատոսական զեկուցագրերում այդ առթիվ կարդում ենք՝ «Ամենուրեք զապթիաները կորզում են յուրաքանչյուր պիսատրը, որը ընկնում է գյուղացիների ձեռքը: Բաշկալայում կառավարությունը ցանկանում էր գանձել նույնիսկ հաջորդ տարվա հարկը: Նա հայ գյուղացիներից պահանջում է այն ոչխարների հարկը, որ քրդերը քշել-տարել են, ինչպես նաև այն հողերի հարկը, որ հենց կառավարությունն ինքը հատկացրել է շերքեզներին: Հարկերի գանձումը շտապեցնելու համար հարկահաններն այն բանին են հասել, որ գյուղացիներից խլում են սովի դեմ պայքարելու համար նրանց ստացած դրամները»¹:

Ռուլեն-ժեկմենը, այս փաստերը համադրելով քրդերի և շերքեզների նկատմամբ թուրքական կառավարության հովանավորող քաղաքականության հետ, գրում է՝ «Եթե այժմ այս ամենը համեմատենք այն հովանավորության հետ, որ ցույց է տրվում կիսավայրենի շերքեզների կործանիչ ասպատակությունների և քրդերի թալանների նկատմամբ տարօրինակ հանդուրժողականության հետ, ապա կամա թե ակամա այդ ամենում կտեսնես ո՛չ միայն բթություն և անհոգություն: Արդյոք այս դեպքում համոզմունք չի՞ առաջանում մահմեդականությունից օգտին քրիստոնեական տարրի ոչնչացման պլանի գոյության մասին»² (ընդգծումը հեղինակինն է.—Ս. Մ.): Թուրքիայում գոյություն ունեցող սովորական հարկերը,

¹ «Положение армян в Турции», 1896, стр. 75—76.

² Նույն տեղում:

գուգակցված այս հարկերը գանձելու սխտեմի հետ, ինքնին ծանր էին թուրքիայի ամբողջ գյուղացիության համար: Բայց հատկապես քրիստոնյաների, այդ թվում նաև հայերի վրա դրվող արտակարգ հարկերն է՛լ ավելի էին անտանելի դարձնում այդ ժողովուրդների առանց այդ էլ ծանր դրությունը:

Ըստ անգլիական հյուպատոսական հաղորդման, «1880 թվականին, մի գեղեցիկ օր, էրզրումում հրաման է ստացվում՝ որքան կարելի է շուտ գտնել 15 000 թուրքական ֆունտ (337 000 ֆրանկ), որն իբր թե անհրաժեշտ էր գորթի պետքերի համար: Բայց երբ այդ գումարը հավաքվեց, նոր հրամանով վալուն կարգադրվեց՝ փողը փոխադրել ուղղակի արքունիք: Այդ նույն ժամանակ Տրապիզոնից հրամանով պահանջվեց 10 000 ֆունտ (222 500 ֆրանկ) արքունիքի համար, իսկ 5 000 ֆունտ (11 250 ֆրանկ)՝ ներքինապետի»¹: Նման հրամաններ, հավանաբար, ուղարկվել էին նաև մյուս հայկական վիլայեթների վալիներին: Նկատի ունենալով թուրքիայում կիրառվող հարկահանման այն պրակտիկան, որ կառավարությունը փողը պահանջում էր վալիներից, վալիները՝ մուտեսարիֆներից, մուտեսարիֆները՝ կայմաևաններից, այս վերջիններս էլ՝ մուդիրներից, պետք է կարծել, որ հավաքված այդ արտակարգ հարկի գումարը կենտրոնից պահանջածի համեմատությամբ կրկնակի ու եռակի ավելի պետք է լիներ, քանի որ այդ աստիճանավորներն իրենք իրենց մուտանալ չէին կարող. նրանք բնակչությանը կողոպտելով սուլթանի և ներքինապետի համար, բնականորեն, կկողոպտեին և իրենց համար, քանի որ թուրքիայում «ժողովրդին կողոպտելը հանցանք չէր համարվում և դրանով զբաղվում էր ամբողջ վարչությունը», ինչպես վկայում էր անգլիական հյուպատոսը:

Արտակարգ հարկերի ծանրությունը հաճախ մեծ հուզումներ էր առաջացնում, մանավանդ, երբ դրանց ենթարկվում էին նաև մահմեդականները: Այդ կապակցությամբ ուշագրավ են էրզրումի ռուսական հյուպատոս Իվանովի զեկուցագրի հետևյալ տեղեկությունները.

«Ամենուրեք հուզումներ են: Կառավարությունից դժգոհությունները բողոքներից մասամբ իրականության են վերածվում: Օլթիի փաշալըղում, առանձնապես նրա հյուսիսային շրջաններում, բնակիչները կտրականապես հրաժարվել են վճարել ապառքները: Այնտեղ ուղարկված հեծելազորը, չհամարձակվելով զենքի ուժի դիմել, ոչ մի ազդեցություն չի թողել: Այնտեղի մահմեդականները, շտապելով արդեն քրիստոնյաների մասին, «ուշտան դոխկուզա շերթ օլսուն»-ի երդում են տվել «բաքիբ» և «թեմեթու» արտակարգ հարկերի վերաբերյալ չենթարկվել կառավարության պահանջներին: Այնտեղ ուղարկված հատուկ աստիճանավոր Ալի էֆենդին ոչինչ չի կարողացել անել և ստիպված է եղել գաղտնի փախչել Արդանուշից, իր կյանքը փրկելով գրգռված ժողովրդի ցասումից: Այնտեղի մուդիր Սուլեյման բեյին փոխելը և նրա տեղը մի ուրիշին նշանակելը գործի դրությունը չփոխեց: Ալի էֆենդին վերադարձավ էրզրում, և գեներալ-նահանգապետն Օլթի ուղարկեց մի այլ աստիճանավորի՝ Օսման բեյին:

Օսման բեյը, չնայած իր ամբողջ փորձառությանը և երկրում ունեցած ազդեցությանը, կարծես թե ոչինչ չի կարողացել անել և օգնություն է պահանջում: Այնուամենայնիվ պետք է նկատել, որ կառավարությունը ոչ մի միջոցի չի կարող դիմել այնպիսի երդման դեմ, ինչպիսին «ուշտան դոխկուզա շերթ օլսուն» երդումն է, որ տվել են ֆանատիկոս մահմեդականները: Ավելացնում են, նույնիսկ չբավարարվելով այդ երդումով, արդանուշցիները, շեվշեղցիները և Օլթիի շրջանի մյուս բնակիչները սրերի և թրերի վրա տվել են մի այլ երդում՝ գործել մի մարդու պես և չզիջել:

«Թեմեթու»-ն և «բաքիբը» շատ մեծ տահնությունների տեղիք են տվել նաև հնուսում, Վանում և այլ վայրերում: Մուհամմեդ Ռաշիդ փաշան այդ տեղերը ևս հատուկ աստիճանավորներ է ուղարկել, բայց ոչ ոք հաջողության հույս չունի»¹:

Զեկուցագրի հեղինակը նկարագրելով առաջացած համընդհանուր դժգոհությունները, ավելացնում է. «Այսպիսի դրու-

¹ Նույն տեղում, էջ 78»

թյան ժամանակ գործն ավելի ծանրացել է նոր արտակարգ հարկերի, ավազակութունների և կողոպուտների սաստկանալու, ինչպես և այն գուհումների պատճառով, որ կատարում են կրճատված ոռճիկ ստացող աստիճանավորները: Այստեղից հասկանալի է, թե ինչու ամբողջ բնակչության, այդ թվում Հաջի բեյի, Մոսամմեդ փաշայի, Սելիմ բեյի և մյուս քուրդ բեյերի ուշադրությունը կենտրոնացած է մի բանի վրա՝ ազատագրվել թուրքական կառավարությունից»¹:

Թեմարական սիստեմը, ինչպես գիտենք, օրինադրական ճանապարհով վաղուց էր վերացված հայտարարվել, բայց կառավարությանը, հատկապես հայկական վիլայեթներում, նույնիսկ 60—70-ական թվականներին չէր հաջողվել կյանքում այդ կիրառել: Այդ ուղղությամբ կառավարության միջոցառումները խիստ դիմադրության էին հանդիպում աշիրեթապետների կողմից: Հայ ռայայի դրությունն ավելի էր վատթարացել: Մի կողմից՝ կառավարությունն էր նրան ճնշում իր օրինական ու ապօրինի հարկերով, պաշտոնյաների և կապալառուների շահագործումով, մյուս կողմից՝ քուրդ աշիրեթապետները շարունակում էին հարկեր պահանջել այդ նույն ռայայից: Իսկ երբ գյուղացիները ի վիճակի չէին լինում երկուսին էլ բավարարել, գյուղերի ավերումները դառնում էին անխուսափելի: «Բոլոր վերոհիշյալներին պետք է ավելացնել,— գրում է ռուսական հյուպատոսը,— որ Բայազետի, Մուշի, Բիթլիսի, Վանի, Բուլանըղի, Մանադկերտի և ընդհանրապես ամբողջ Անատոլիայի տարածության վրա քրդերն իրենց գծտություններով, քրիստոնյաների գյուղերի վրա հաճախակի հարձակումներով և տեղական իշխանությունների օրինական պահանջներին ընդդիմանալով, կառավարությանը մեծամեծ հոգսեր են պատճառում»: Զինված ուժով քրդերին հարկադրել ենթարկվել իշխանություններին, սուլթանական կառավարությունը ո՛չ միայն չէր կարող, այլև չէր ցանկանում: Այդպիսի դեպքերում այդ քուլժոր ցեղերը, եթե չէին կարողանում դիմադրել կառավարական զինված ուժին, ապա պարզապես քոչում էին Պարսկաստան կամ Ռու-

¹ Նույն տեղում, թԲ. 100—101:

սաստան: Ուստի, իր նպատակներին հասնելու համար կառավարությունը ձեռնարկում էր ավելի անվտանգ միջոցառումներ, այն է՝ մի կողմից սիրաշահել աշիրեթապետներին, մյուս կողմից՝ նրանց գրգռել միմյանց դեմ և, վերջապես, նրանց ուշադրությունը դարձնել դեպի հայերին կողոպտելու: Այդպիսով, քրդական շարժումը ջլատելու և հայերի ու քրդերի մեջ թշնամություն ստեղծելու միջոցով՝ պղտոր ջրում ձուկ որսալու:

Իվանովը, խոսելով զինված ուժի միջոցով քրդական շարժումները կասեցնելու մասին, խիստ սկիստիկ եզրակացության է հանգում. «Զորք ուղարկել, բայց ո՛ւր: Մի կողմի վրա ուղարկելով, կառավարությունը չի կարող հնազանդության բերել մյուս վայրերը և միայն ավելի կգրգռի: Իսկ եթե բոլոր տեղերն ուղարկի, նշանակում է էրզրումը թողնի առանց զինվորական պաշտպանության, և մեկ շոկատի երևալը ոչ թե սարսափ կազդի, այլ գրգռված ժողովրդի մեջ ծաղր կառաջացնի: Բացի այդ, կարելի՞ է արդյոք հույս դնել զորքի վրա: Շատ փաստեր պայացուցում են միանգամայն հակառակը... Գործերի դրության այսպիսի պայմաններում գեներալ-նահանգապետը, ինչպես ինքը ինձ բազմիցս ասել է, պահանջել է զորք ուղարկել Կ. Պոլսից և չի կարողացել ոչ մի գումարտակ ստանալ»: Այնուհետև նույն աղբյուրից մենք տեղեկանում ենք, որ էրզրումի վալին, ցանկանալով չերկրում շատ խոշոր ազդեցություն ունեցող աշիրեթապետներին մեկուսացնել, կառավարությունից հատուկ հրամանագիր (էմիրնամե) է պահանջում Գերսիմի Հաջի-Ալի բեյին, Ալաշկերտի Մահմուդ փաշային և Շելվեղի Սուլեյման բեյին աքսորելու¹:

Այսպիսով, քրդերն այս վայրերում ըստ ամենայնի ընդդիմանում էին կառավարության հարկային պահանջներին, կովում էին կառավարության թույլ ջոկատների դեմ: Վալին կենտրոնից զորք է պահանջում, բայց չի ստանում, հրովարտակ է խնդրում գլխավոր ցեղերի աշիրեթապետներին աքսորելու, արդյունքը այն է լինում, որ «Կ. Պոլսից սուրհանդակի միջոցով հրաման է ստացվել քրդերի դեմ գործել ոչ թե գեներ-

¹ АВІР. ф. Политархив, 1866—1870 гг., д. № 4, лл. 96—97.

քով, այլ համոզելու ճանապարհով և ոչ մի դեպքում նրանց չզրգռել: Միայն դրանով կարելի է արդարացնել շեյխ Մուսա-օղլի Հուսեինի վարքագիծը: Նա, վերջապես, գերի է վերցրել իր ախոյան Կուռոյին և բալաբանլի ցեղի գլխավոր աղաներին, բայց հրաժարվում է նրանց հանձնել կառավարութայնը: Վերջինս բոլոր հիմունքներն ունի պահանջելու նրանց, որպես օրինական կառավարութայն դեմ ապստամբողներին և նրանց դեմ ուղարկած զինվորական ջոկատների դեմ կընվողներին»¹:

Ուշագրավ պատկեր է ստացվում. բալաբանլի ցեղը կընվում է կառավարական զորքերի դեմ, միևնույն ժամանակ մի այլ ցեղի ցեղապետ գերի է վերցնում բալաբանլի ցեղի առաջնորդներին: Կարծես թե ավելի պարզ բան չի կարող լինել, քան այն, որ շեյխ Հուսեինն իր ախոյաններին հանձնի կառավարութայնը: Մինչդեռ մենք հակառակն ենք տեսնում: Այդ կարող էր լինել լոկ այն դեպքում, եթե ցեղերի միջև ներքին ներհակությունն ավելի պակաս նշանակութուն ունենար, քան ընդհանուր թշնամանքը կառավարութայն դեմ:

Թուրքիայում և Պարսկաստանում հաշվվում էին մինչև 70 քրդական առանձին ցեղեր, որոնք ոչ միայն մի միասնություն չէին կազմում, այլ միանգամայն անջատված էին իրարից: Յուրաքանչյուր ցեղին զբաղեցնողը իր ներքին ցեղային հարցերն էին, մյուս ցեղերը նրանցից յուրաքանչյուրին նույնքան օտար էին, ինչքան ոչ-քուրդ ժողովուրդները: Ցեղերն իրենց հերթին կազմված էին զանազան տոհմերից: Տոհմերի միջև որոշ կապ պահպանվում էր, մասնավոր միջցեղային պատերազմների ժամանակ: Միջցեղային հակասությունները հաջող կերպով օգտագործում էր սուլթանական կառավարությունը և նրանց միջև առաջ էր բերում միջնադարյան ֆեոդալական մասնավոր պատերազմները հիշեցնող կոիվներ:

XIX դարի 70-ական թվականներին քրդերի համեմատաբար փոքր մասն էր անցել նստակեցութայն: Նրանք հիմնականում դեռ վերաբնակ քոչվորներ էին, որոնց հիմնական հարստությունը ոչխարների հսկայական հոտերն էին: Աշի-

րեթը թափառում էր ո՛չ միայն մի շրջանում, այլ հաճախ այնքան հեռու էր գնում, որ տարիներ հետո էր վերադառնում իր հիմնական ապրելավայրը: Հազվադեպ չէին այնպիսի դեպքերը, երբ թուրքական կառավարությունից դժգոհ ցեղը երկար տարիներով քոչում էր Պարսկաստան, և ընդհակառակը: Այնուհանդերձ աշիրեթապետները որոշ արտավայրեր համարում էին իրենց տիրակալությունը, իսկ դրանց շուրջն ապրող նստակյաց գյուղացիութայնը՝ իրենց հպատակներ:

Պարսիկ հեղինակ Լահութին գրում է՝ «Ընդհանրապես քրդական ցեղերի կյանքն իրենից ներկայացնում է զինված ճամբարի կյանք: Նրանք շափազանց տոկուն են, հեշտությամբ տանում են զրկանքներն ու քաղցը, այդ պատճառով կարողանում են ամբողջ տարիներով անընդհատ պայքարել և դիմադրել կառավարութայնը... Բոլոր աշխատանքներն ընկած են կանանց վրա: Տղամարդիկ զբաղվում են միայն պատերազմներով, սրսորդությամբ և կողոպուտներով»¹:

Ահա «պատերազմներով և կողոպուտներով» զբաղվող այդ ցեղերը միատարր չէին: Բուն մասսան շահագործման էր ենթարկվում ավագանու կողմից, որը կազմված էր հոգևորականներից՝ շեյխերից, ախունդներից, սեյիդներից, մուլանաներից, որոնց ազդեցությունը աշիրեթի ներսում հսկայական էր: Նրանք սովորաբար հենց աշիրեթապետի ազգակիցներ ու տոհմակիցներ էին: Շարքային քրդերի ենթարկվելը ավագանուն հասնում էր լուռ ու հլու հպատակութայն: Ըստ հայ հեղինակ Ա. Դո-ի սովյալների, քրդերի մեջ կային նաև ընչազուրկ մարաբաներ: Բայց քուրդը, լինել նա ավագանի թե շահագործվող մարաբա, միևնույն է, նա պետք է լինել ոտից գլուխ զինված:

Թեմարական սիստեմի ժամանակ քրդական ցեղերն իրրև ռազմական ուժ շարունակ զինված վիճակում էին գտնվում և ներկայացնում էին զինվորական ճամբար: Հետագայում, երբ օրենսդրական կարգով այդ սիստեմը վերացավ, ցեղերի ճամբարային վիճակը մնաց անխախտ: Ուստի կենցաղ էր

¹ Նույն տեղում:

դարձել. քուրդը, լինե՞ր քուշվոր թե՛ նստակյաց, միշտ զինված էր:

Հազվադեպ չէր, երբ քրդական տարբեր ցեղեր ընդհանուր ճակատ էին կազմում կառավարական զորքերի դեմ: Հատկապես անառիկ լեռնային շրջաններում քրդերի հետ համատեղ հանդես էին գալիս նաև հայերը: Էրզրումի ռուսական հյուպատոսի ղեկուցագրերից մեկում կարդում ենք՝ «...Մոկսի երկրամասը հազիվ թե շատերին հայտնի լինի: Նա ընկած է Մուշի և Բիթլիսի արանքում, որտեղ բնակվում են հայեր և քրդեր... Հայերը և քրդերը միաշափ ուզմատենչ ու քաջ են և ապրում են համերաշխ ատելություն մեր կառավարության նկատմամբ, որը փորձ է անում նրանց ենթարկել սուլթանական իշխանությանը: Այդ երկու ժողովուրդներն էլ իրենց անկախ են համարում թուրքական կառավարությունից, մասնավոր հայերը: Նրանք իրենց դարավոր համոզմունքով օրինական հարկը վճարում են իրենց քրդերին, նրանց բեյերին ու աղաներին ընդունում են որպես իրենց պետեր... Դժվար է որոշել բնակչության ընդհանուր քանակը, կարելի է միայն ասել, որ 40 000-ից ավելի է...»

Կանգ չեմ առնում քրդերի երկրորդական ցեղերի վրա, կհիշատակեմ միայն գլխավոր ցեղերի անունները, որոնցից առաջինները կախման մեջ են: Քերթյանլի, Իսիանլի, Շամդիլի, Քշուրի, Ռժքոթանլի, Հասարլի, Փիրոզլի, Փենգենարլի. սրանք գլխավոր ցեղերի անուններն են, որոնք միայն իրենց անունով սարսափ են տարածում Դիարբեքիրում, Ջանբաշչուրում, Բիթլիսում և Մուշում: Նրանք բոլորը իբրև իրենց գլխավոր պետ ճանաչում են Թամո աղային, հայտնի խոզաղայի եղբորը:

Մոկսի անկախ դրությունը, շարագործությունների մասին անընդհատ զանգատները և այդ երկրում արծաթի և երկաթի հանքեր լինելու մասին լուրերը կառավարությանը բազմիցս հարկադրել են նրանց դեմ արշավախմբեր ուղարկել, բայց այդ միջոցառումները վերջանում էին ապարդյուն: 1863 թ. Իսմայիլ փաշան, փր տրամադրության տակ ունենալով հրաձիգներ, հեծելազոր և լեռնային հրետանի, կարողացավ Մոկսը շրջապատել միայն հյուսիսային սահմանի կող-

մից: Նրա բոլոր գործողությունները սահմանափակվեցին վերոհիշյալ խազո աղայի հետ լուր մեկ ճակատամարտով, որի ժամանակ վերջինս սպանվեց և Քերթյանլի ցեղից մի քանի քուրդ գերի վերցվեցին: Դրա հետևանքով նա ղեկուցեց Կ. Պոլիս, որ Մոկսը նվաճված և հարկման է ենթարկված...»:

Այս վկայությունից ևս պարզ հետևում է, որ սուլթանական իշխանությանն զբաղեցնողը հարկերն են եղել: Չնայած քրդերի առաջնորդը ճակատամարտում ընկավ, չնայած Իսմայիլ փաշան ղեկուցում էր, որ «Մոկսը նվաճված և հարկման է ենթարկված», բայց իրերի հետագա դրությունը ցույց է տալիս հակառակը՝ այն, որ Թամո աղան, փոխարինելով փր եղբորը, ինքն է շարունակում գանձել հարկերը և դրանից մաս չհանել կառավարությանը: Այդ արշավանքից 6—7 տարի անց թուրքական կառավարությունը ստիպված է լինում նորից արշավել Մոկս «ապառները» գանձելու համար: Այդ ապառները հենց այդ ժամանակաշրջանում կառավարության կողմից չգանձված հարկն էր, որը քուրդ աշխրեթապետները բոլորովին էլ մտադրություն չունեին հայերից «դարավոր սովորություն» գանձվող հարկը զիջել կառավարությանը, չնայած թեմարական սիստեմի օրենսդրական կարգով վերացումից անցել էր ավելի քան 3 տասնամյակ:

Այդ բանը պարզ հետևում է մեր նշած աղբյուրի հաջորդ հատվածից. «Բ. Դոան ամենախիստ և կրկնվող սպառնալիքներով հրամանները, որոնցով պահանջվում էր ամբողջ վիլայեթում անպայման հավաքել և մուծել բոլոր հարկային ապառները, Գոնդլիսի մուդիրին ստիպեցին անցած աշնանը Մոկս ուղարկել փր տրամադրության տակ եղած զորքը: 200 հոգուց կազմված հետևազորը բինբաշի խալի բեյի հրամանատարությամբ շարժվեց դեպի սահմանը և հայտարարեց կառավարության պահանջը: Քրդերն անհապաղ հանդես եկան, ջարդեցին խալի բեյին, տեղնուտեղը սպանեցին մի քանի զինվորների, իսկ մնացածին փախուստի մատնեցին: Դրանով չբավարարվելով կամ ավելի շուտ այդ հաջողությամբ քաջալիբված, նրանք, թվով 200 մարդ, քիչ ժամանակ

անց հանդես եկան Բիթլիսում և թալանեցին շրջակայքի գյուղերը և բաղաքի արվարձանները...»¹։

Կառավարութեան դեմ քրդական նույնիսկ մի քանի ցեղերի միասնական գործողութիւնները խիստ տազնապ էին առաջացնում վիլայեթներին դեկավար շրջաններում։ Ուստի քրդերի դեմ պայքարի ամենաարմատական միջոցը հենց իրենք՝ քրդերն էին։ Կառավարութիւնն ամեն ջանք գործադրում էր, որպեսզի ավելի խորացնի նրանց միջև գծտութիւնները, ուստի աշխատում էր սիրաշահել նրանց աշիրեթապետներին, նշանակել պետական վարչական պաշտոններին։ Այդպիսով, նա ջանում էր կոմպենսացիայի ենթարկել նրանցից վերցվող թեմարական հողատիրական իրավունքները։ Բայց այդ միշտ չէ որ նրան հաջողվում էր։ Հազվադեպ չէին դեպքեր, երբ նման սիրաշահված աշիրեթապետները կորցնում էին իրենց հեղինակութիւնը քուրդ մասսայի աչքում։

էրզրումի ուսական հյուպատոսը Կ. Պոլսի ցարական դեսպան Իգնատևին ուղղված իր զեկուցագրերից մեկում բավական մանրամասն նկարագրում է Բայազետի սանջակում կատարվող դեպքերը։ Մեզ այստեղ հետաքրքրող հարցի կապակցութեամբ նա գրում է՝ «Բայազետի սանջակում խլրտումներ են սկսվել, բայց դրանք մեծ հետևանքներ, հավանաբար, չեն ունենա...»

Մահմեդական բնակչութիւնը կազմված է բացառապես քրդերից, որոնցից ամենազխավորները համարվում են հասարանլիները և ջալալիները։ Վերջինները մի քանի տարի առաջ տասանորդի փոխարեն պարտավորվել են վճարել 40 000 պիաստր (400 լիրա)։

Քրիստոնյա բնակչութիւնը կազմված է բացառապես հայերից։ Դրանց հետևում են եզդիները, որ նույնպես քրդեր են։ Երկրում ամենաազդեցիկը և ուժեղը, իհարկե, պետք է համարել սիպիկ ցեղից քուրդ Մուհամմեդ փաշային։

Նա երկար ժամանակ թշնամի էր թուրքական կառավարութեանը, բազմաթիվ անգամ խուսափելով օրինական հե-

տապնդումից, նա փրկվում էր Երևանի նահանգում՝ Զաֆար աղայի մոտ։ Քրդերն ապստամբելով պահանջում էին վերադարձնել նրան, և կառավարութիւնը հարկադրված եղավ նույնիսկ նշանակել Ալաշկերտի մուդիր։ Երկիրը նա կառավարում է ինքնակամ։ Բայազետի կայմակամի կողմից որևէ անախորժութիւն լինելու դեպքում սպառնում էր փախչել Ռուսաստան և այնտեղ տեղափոխել սիպիկի ամբողջ ցեղը. նախանցյալ տարի այստեղից մուդիր Դերվիշ փաշան նրան համոզեց գնալ Խոզան-դադ։ Մեկ տարուց ավելի այնտեղ մնալով, նա վերադարձավ փաշայի տիտղոսով և հույս ունեւր Բայազետի կայմակամ դառնալ։ Մուհամմեդ փաշան, շոյվելով Կ. Պոլսում, այժմ ամեն միջոցներով աշխատում է արժանանալ կառավարութեան վստահութեանը, որպեսզի հասնի նրան խոստացած կայմակամութեանը։ Ամենալավ և ամենաիրական ծառայութիւնը, որով կարելի է հավատարիմ հպատակութիւն ցույց տալ, ինչպես այստեղ ասում են, արտահայտվում է փողի միջոցով։ Մուհամմեդ փաշան, Բայազետի կայմակամ Ալի-Քեմալ փաշայի հորդորանքով մատնեց եզդիներին հասնող 8 տարվա ապառքները։

Ալի-Քեմալ փաշան հրաման տվեց Խալլազի¹ մուդիր Մուհամմեդ բեյ Փեհլու-փաշա-զադեին այդ ապառքներն անպայման գանձել։ Եզդիները հրաժարվեցին մուծել և ապառքների հենց առաջին պահանջի ժամանակ սաստիկ ծեծեցին և գլխից վիրավորեցին Մուհամմեդ բեյին, այնուհետև նրանք զինվեցին։ Եզդիներին Ուլո աղան հարաբերութիւնների մեջ մտավ հասարանլի ցեղի հետ և կազմեց 2000 մարդուց ավելի մի ուժ։

Ալի-Քեմալ փաշան հավաքեց Բայազետում գտնվող ամբողջ նիզամը (կանոնավոր զորքը.—Ս. Մ.), 200 հոգուց ոչ ավելի, իր հետ վերցրեց երկու թնդանոթ և Մուհամմեդ փաշային՝ նրան հավատարիմ մնացած քրդերով, և արշավեց Խալլազի վրա։ Այժմ գտնվում է այնտեղ։ Սպասվում են արյունահեղութիւններ։

¹ АВПР. Ф. Политархив, 1862—70 гг., д. № 8, лл. 2—5.

¹ Խալլազը և Ալաշկերտը այդ ժամանակ կազմում էին Բայազետի կազաներից մեկը, որը կոչվում էր նաև էյնթարի կազա.—Ս. Մ.։

Այս դեպքերի մեջ, — ընդգծում է հյուպատոսը, — հատուկ ուշադրություն պետք է դարձնել այն հանգամանքի վրա, որ Բայազետի քրդերը փորձում էին ապստամբել հենց Մուհամմեդ փաշայի դեմ և ավելի վերքեր հասցնել Մուհամմեդ բեյ Փեհլու-փաշա-զադեին»:

Այս վերջին տողերը մեզ համար կարևոր են այն տեսակետից, որ ցույց են տալիս, թե Բայազետի սանշակի քուրդ բնակչությունն ինչ աստիճան էր զրգուված այդ աշիրեթապետների դեմ՝ նրանց ունեցատուության և թուրքական կառավարության շահերը պաշտպանելու համար: Մինչդեռ նրանք երկուսն էլ քրդական աշխարհում մեծ կշիռ ունեցող դեմքեր էին:

Այդ առնչությամբ մեր աղբյուրը հաղորդում է. «Մուհամմեդ փաշան Բայազետի քրդերի նկատմամբ անսահմանափակ բռնապետ էր: Նրա խոսքն օրենք էր. սրանից երկու տարի առաջ ոչ ոք չէր համարձակվի ոչ միայն դիմադրել նրան, այլև նրա խոսքը դրժել: Այն շոյանքն ու պատիվները, որոնց նա արժանացավ կառավարության կողմից, այժմ նրան կասկածի տակ են դրել, և քրդերը սուլթանի նկատմամբ իրենց ատելությունը, հարկավ, է՛լ ավելի սաստիկ փոխանցել են նրա արբանյակին: Հազիվ թե Մուհամմեդ փաշային հաջողվի վերականգնել իր նկատմամբ տաժած վստահությունը, և քանի դեռ նրա տոհմը ապրում է Բայազետում, այստեղ քրդերը մշտապես կմնան միջցեղային գժտությունների մեջ: Միասնությունը վերականգնելու միակ միջոցը Մուհամմեդ փաշային իր ամբողջ տոհմով այստեղից հեռացնելն է: Ք. Դուռն առաջնորդում շատ անգամ է դիմել այդպիսի միջոցի: Իսկ այժմ հազիվ թե դրան համաձայնի, գիտակցելով, որ նրա ներկայությունն այդ երկրում ջլատում է քրդերի ուժերը և դրանով իսկ գյուրացնում երկրի կառավարումը:

Մուհամմեդ փաշային կարելի էր համարել այդ երկրի դիկտատորը: Նրա փառքը խիստ մեծացավ անցած պատերազմից հետո, երբ նա ազգակցությունը կապվեց Փեհլու փաշայի տոհմի հետ: Եթե Բայազետում նա այդպիսի դեր էր խաղում և այդուհանդերձ քրդերը թուրքական կառավարության հանդեպ տաժած ատելության պատճառով վճռեցին

ապստամբել նրա դեմ, ապա ինչպե՞ս նայել այն վերքերին, որոնք արժանացավ Մուհամմեդ բեյ Փեհլու-փաշա-զադեին..., որի հորը՝ Փեհլու փաշային ոչ միայն Բայազետի, այլև Ղարսի, Վանի, Մուշի քրդերը համարում էին իրենց զխավորը, իրենց սուլթանը: Ք. Դուռը լավ էր հասկանում Փեհլու փաշայի նշանակությունը և 1858 թվականին, նրա մահվանից հետո, նրա ընտանիքին զրկեց բոլոր գույքերից և ուղարկեց Բասենի շրջանի Օգլումի գյուղը, նշանակելով մի շնչին կենսաթոշակ»: Այլ կերպ ասած՝ իրագործվում էր 1844 թվականի օրենքով նախատեսված թեմարի իրավունքի վերացումը: Բայց միաժամանակ այդպիսի ազդեցիկ տոհմի օգտագործումը սուլթանական շահերի համար կարևոր նշանակություն ուներ, ուստի «կառավարությունը անցյալ տարի նրա ավագ որդի Մուհամմեդ բեյ Փեհլու-փաշա-զադեին նշանակեց էյնթափի (խայազդի) մոսդիր»:

Փեհլու փաշայի տոհմի մասին այս համառոտ ակնարկից երևում է, թե ինչպիսի իրավունքներ ուներ նա ընդհանուր հարգանքի համար և ինչքան մեծ պետք է լիներ այդ տոհմի ներկայացուցիչներից մեկին այդպիսի վերավորանք հասցրնելը: Այդ վերավորանքով կարելի է դատել, թե ինչքան մեծ է քրդերի ատելությունը թուրքերի և այն անձնավորությունների նկատմամբ, որոնք գործում են կառավարության շահերի համար»¹:

Պետության նկատմամբ քրդերի ցասումը սանձահարելու համար, միջբրդական գժտություններ և ընդհարումներ կազմակերպելուց բացի, սուլթանական կառավարությունը նաև դիմում էր շերքեզներին նրանց դեմ հանելու քաղաքականությունը: Չերքեզները հատկապես հայ գյուղերի համար մի իսկական պատուհաս էին: Հայկական գյուղերից շատերի հողերն ու արոտավայրերը թափուի իրավունքով հատկացվել էին շերքեզ առաջնորդներին, որոնք իրենք չէին մշակում այդ հողերը, այլ գանձում էին բերքի կեսը և անխնա կողոպտում գյուղացու գույքը: «Չերքեզները, — հաղորդում է մեր աղբյուրը, — իրենց հետ թուրքիա բերին ոչ թե ուժեղացնող, այլ

¹ АВПР, ф. Политархив, 1862—1870 гг., д. № 8, стр. 6—10.

Թուլացնող և քայքայիչ տարր: Նրանք ոչ մի հակում չեն ցուցաբերում ձուլվելու տեղական մահմեդական բնակչության հետ, որին իրենց դեմ զինել են այնչափ, որչափ քրիստոնյաներին: Հայկական գյուղերում տներ, հողեր ու արոտներ են հատկացվել նրանց: Չերքեզների մասին գանգատներ լրսվում են ամենուրեք... Չերքեզների գործողությունները Շեյրանում, Հերջենիսում, Բայբուրդում, Թերջանում կարող են առաջ բերել այդ վայրերի հայերի և հույների ընդհանուր գաղթ... Այս տարի նրանք քրդական աննեզի ցեղի հետ միացած հարձակվեցին կողոպտելու Սենջար լեռների եզրիական գյուղերը: Եզդիիների բազմամարդ այդ ցեղը հրաժարվել էր հարկ վճարել թուրքական կառավարությանը և նրա սպառնալիքներին պատասխանել էր ընդհանուր ապստամբությունամբ: Կառավարությունը նրանց դեմ գրգռել էր աննեզ ցեղի քրդերին, իսկ չերքեզները առաջնորդվելով իրենց ագահությունամբ և սանձարձակությունամբ, միացան վերջիններին ու կրակի մատնեցին եզդիական գյուղերը, հետո էլ հարձակվեցին հենց իրենց՝ աննեզների վրա»¹:

Քրդերի զանազան ցեղապետներին և չերքեզներին միմյանց դեմ լարելու և արյունալի ընդհարումներ ստեղծելու հիմնական նպատակն այն էր, որ նրանց սանձահարված պահի կառավարության դեմ ելույթներից: Բայց քրդերի նկատմամբ այդ սանձահարման քաղաքականությունը հայերի նկատմամբ ընդունում էր նրանց աշխրեթապետների սանձարձակությունը քաջալերելու, նրանց կողոպուտները, սպանությունները, նույնիսկ ամբողջ գյուղեր ոչնչացնելու գործողությունները կառավարության հովանավորության տակ առնելու բնույթ: Բարձր պատիվների, շքանշանների և պարգևատրումների էին արժանանում հայերի նկատմամբ այնպիսի անողոր ռճրագործություններ կատարող ցեղապետները, ովքեր ըստ հյուսիսայտոսական կարծիքների, հենց այդ գործողությունների համար կախաղանի էին արժանի: Թուրքական կառավարության այդ քաղաքականությունն

առանձնապես բացարձակ բնույթ ընդունեց 90-ական թվականներին:

Էրզրումի անգլիական հյուսիսայտոս Համպտեր 1891 թվականի հունվարի 16-ի իր հատուկ զեկուցագրում¹ մանրամասն նկարագրում է մի աշխրեթապետի արարքները, որը միաժամանակ և Կ. Պոլսի կողմից հաստատված պետական պաշտոնյա էր, և բառիս իսկական իմաստով ավագակապետ: Օրը ցերեկով, բոլորի աչքի առաջ, հայերից թալանած հարստություններից իրենց բաժինն էին ստանում վալին, դատարանի նախագահը և մյուս բարձրաստիճան պաշտոնյաները: Ավելին. վանի և Բիթլիսի վալիները ցանկանում էին նրան պատժել ո՛չ թե նրա շարագործությունների պատճառով, այլ այն պատճառով, որ իրենք անմասն էին մնացել այդ ավագակապետ մուղիի կողոպտած հարստություններից: Ուշագրավ է, որ այդ հայտնի էր երկրի ամենաբարձր պաշտոնյային՝ մեծ վեզիրին, կամ, այլ կերպ ասած, մինիստրների խորհրդի նախագահին: Ընդ որում այստեղ բերվող փաստերը, ինչպես ցույց են տալիս պաշտոնական փաստաթղթերը, ո՛չ թե ինչ-որ արտաքու կարգի երևույթ էին, այլ հայկական վիլայեթներում ապրող հայության դժնդակ պայմանների առօրյա պատկերը:

Համպտերի այդ ուշագրավ նկարագրությունից մենք կբերենք մի քանի հատված, նախապես ընդգծելով, որ Համպտերն իր տեղեկությունները քաղել է մահմեդական աղբյուրներից, հետևաբար հայերի վերաբերյալ տվյալները չափազանցված լինելը միանգամայն բացառվում էր:

«Իր մուղիություն 5—6 տարվա ընթացքում Հուսեին աղան սարսափի առարկա էր Ալաշկերտի ինչպես քրիստոնյա, այնպես էլ մահմեդական բնակչության համար: Նախանցյալ ձմռանը Պատնոսի քրիստոնյաները (հայերը.—Ս. Մ.) նրա հարստահարումներից այնքան անապահով էին, որ բոլորը գաղթեցին Ղարաբաղի սիս: Այդ ժամանակ Հուսեինը և նրա քրդերը շրջապատեցին տեղական քրիստոնյա եպիսկոպոսի

¹ Նույն տեղում, թթ. 9—11.

¹ Համպտերի զեկուցագիրը զետեղված է «Положение армян в Турции» ժողովածուում, էջ 165—167, տե՛ս նաև 145, 167—168:

տունը. բայց երբ նա խոստացավ զանգատ շահրուցել, նրանք հեռացան, իսկ գյուղացիները վերադարձան Պատնոս: Սակայն Պատնոսի մահմեղականների իմամ շեյխ Նուրին Հուսեյնի վարքի մասին գանգատ տվեց էրզրումի վալուն և Բայազետի մուտեսարիֆին: Հուսեյն աղան, իմանալով այդ մասին, ուղարկեց իր քրոքերին, որոնք Նուրիին սպանեցին, իսկ նրա հարսին այնպես վախեցրին, որ նա մահացավ: Այդ ժամանակ վերջինիս եղբայրը՝ շեյխ Աբդուլլան, գանգատվեց էյնթաբի կալիֆախանին, որը ձեռքառեց Հուսեյնի մարդկանցից 14 հոգու, բայց Հուսեյնը կաշառքի միջոցով երեք ամսում կարողացավ նրանց ազատել»:

«Վանի բանտում Հուսեյնին բանտարկելու վերաբերյալ հայտնի է, որ նա զբաղվելով ավագակուսթյամբ և թալանով, հրդեհել էր 9 գյուղ, սպանել էր 10 մարդ և բացի այդ, կտրել էր 11 մարդու աչքերը, քիթը կամ ականջը. այդ մարդկանցից շատերը կարող են վկայել այդ փաստերի մասին: Նա հափշտակել էր ավելի քան 2600 ոչխար, 9 ձի, բազմաթիվ խոշոր եղջերավոր անասուններ և թալանել էր ամեն տեսակի բարձր: Ավանիի եղբոր տնից հափշտակել էր 500 ֆունտ ստեռլինգի զանազան իրեր և հրացանի կրակոցով կուրացրել էր նրա մորը: Հուսեյնը բանտարկության ենթարկվեց Վանում, բայց մի քանի ամիս անց հիվանդության պատրվակով ազատվեց. ասում են, որ այդ կատարվեց էրզրումի վալու հորդորանքով, որն այն ժամանակ Վանում մասնակցում էր հետաքննչական հանձնաժողովում»:

Ուշագրավ է, որ այդ հրդեհումները, կողոպուտները և սպանությունները նա կատարել էր ո՛չ թե այնտեղ, որտեղ ինքը պետական պաշտոնյա՝ մուդիր էր, այսինքն՝ ոչ թե էրզրումի վիլայեթի Բայազետի սանջակում, այլ Վանի վիլայեթում:

«Վանից վերադառնալուց հետո նա սկսեց ապրել առաջվա պես և սեպտեմբեր-հոկտեմբեր ամիսներին Պատնոսի շրջանում (իր պաշտոնավարության շրջանում.—Ս. Մ.) սպանունալիքների միջոցով գանձեց 30 ֆ. ստեռլինգ իր անձնական կարիքների համար»:

«Անցյալ նոյեմբերի սկզբին վալին Հուսեյնին իր քրոհ-

րի հետ կանչեց էրզրում: Բուլոն էլ ազատ արձակվեցին բացի Հուսեյնից, որն այստեղ պահվեց նրա վրա բազմաթիվ գանգատներ լինելու պատճառով՝ ինչպես ասում է ինքը՝ վալին, կամ որպեսզի ազատվի պատժից՝ ինչպես ասում են Վանի և Բիթլիսի վալիները»:

«Հուսեյն աղան մինչև այժմ այստեղ է (էրզրումում) և ազատ է, բայց առանց այստեղից հեռանալու իրավունքի: Սակայն ստորև բերվող փաստերը ցույց են տալիս, որ այժմ ևս նա կարողանում է ոճիրներ գործել իր մերձավորների միջոցով: Մոտավորապես նոյեմբերի վերջին Հուսեյնի եղբայրն ու որդին, մյուս տոհմակիցների հետ միասին, 100 ձիավոր հրոսակախմբով հարձակվեցին էյնթաբի նահիբի երեք գյուղի վրա, որտեղ մնացին ամբողջ երեք օր և զքեցին տարան 300 ոչխար, 150 գլուխ խոշոր եղջերավոր անասուն, 5 ձի, բազմաթիվ գորգեր և այլ իրեր: Դրանից մեկ շաբաթ անց Հուսեյնը իր եղբորը հրաման է ուղարկել իր համար փող գտնել: Վերջինս հարձակվել է էյնթաբի շրջանի 21 գյուղերի վրա, քրիստոնյա (այսինքն՝ հայ.—Ս. Մ.) բնակչությանից գանձել է 350 ֆունտ ստեռլինգ դրամով և 200 բաթման յուղ և ուղարկել է էրզրում՝ Հուսեյնին: Պատնոսցի մի հայ՝ Խաչուն, հրաժարվել է վճարել իրենից պահանջվող 5 ոսկին: Հուսեյնի ծառայներից չորս հոգի գիշերը մտել են Խաչոյի տունը: Որովհետև վերջինս տնից բացակայելիս է եղել, նրանք մահացու կերպով վիրավորել են նրա հարսին և մորթել են 6 և 7 տարեկան որդիներին»:

Այսպիսով, այդ անձնավորությունը, որը պետական պաշտոնյա էր և միաժամանակ կազմակերպված ավազակախումբի պետ, որն ահ ու սարսափ էր տարածել երեք վիլայեթների հայ ազգաբնակչության վրա, հունվարի 16-ին գտնվում էր էրզրումում, իբր թե հսկողության տակ: Մինչդեռ էրզրումի անգլիական նույն հյուպատոսը իր մարտի 7-ի նամակում հաղորդում է. «Արժանահավատ աղբյուրներից ես իմացա, որ Պատնոսի մուդիր Հուսեյն աղան այդ շրջանը վերադառնալու հետևանքով (նույն պաշտոնով) սպասվող խառնակությունները միանգամայն հնարավոր են... Հուսեյնը, որպես մուդիր, 20-ից ավելի հայերի քանտարկել է առանց որևէ

հանցանքի»... «Իր վերադառնալուց հետո շրջակայքի գյուղերից ուժով հափշտակել է մոտավորապես 1000 ոչխար, իսկ Պատնոսից և Կզլկալայից՝ 7 զույգ գոմեշ: Հուսեհինն արդեն բանակցութուններ է վարում այստեղի մի վաճառականի հետ դրանք վաճառելու համար: Նա խլել է կզլկալեցի Մանուկի շատ արժեքավոր ձին՝ բողոքարկման դատարանի նախագահ Իսմայիլ էֆենդու որդուն նվիրելու համար»:

Այն, ինչ որ մենք նկարագրեցինք մուղիր-աշիրեթապետ Հուսեհին աղայի մասին, որը լոկ մի տիպիկ օրինակ էր, գեռ ծաղիկներն են, որոնցից առաջացած պտուղը կտեսնենք ստորև:

Բանն այն է, որ նրա արարքները քաջ հայտնի էին ոչ միայն տեղական իշխանություններին, որոնց հետ նա բաժանում էր կողոպուտների արդյունքը, այլև Կ. Պոլսի կառավարական շրջաններին և հատկապես մեծ վեզիրին: Համասոնի վերոհիշյալ զեկուցագրերի մասին անգլիական պրեմիեր-մինիստր Սուաբերին գեկուցել էր ոչ միայն մինիստրների խորհրդին, այլև Վիկտորիա թագուհուն: Անգլիական կառավարությունը հատուկ հեռագրով հանձնարարել էր Կ. Պոլսի իր դիվանագիտական ներկայացուցչին «համոզել մեծ վեզիրին միջոցներ ձեռք առնել պաշտոնից հեռացնելու այդ սրիկային»: Ուրեմն երեք վիլայեթի հայության կողոպուտի համար պահանջվում էր նրան հեռացնել պաշտոնից: Անգլիական ներկայացուցչին այդ առթիվ պաշտոնական զրույց է ունենում մեծ վեզիրի հետ, որը խոստանում է իրագործել այդ խորհուրդը, միայն թե նա «մտադիր է նախապես հարցնել էրզրումի, Վանի և Բիթլիսի վալիների կարծիքը, որոնցից վերջին երկուսը ցանկություն են հայտնում, որ Հուսեհինին դատեն իրենց վիլայեթում»: Այսպես թե այնպես, այդ ավագակապետ-մուղիրը, ըստ կառավարության նախագահի հավաստիացման, պետք է դատվեր և համապատասխան պատժի ենթարկվեր: Այդ խոստումը պաշտոնապես տրվում է 1897 թվականի մարտի 14-ին: Իսկ դրանից ընդամենը 10 օր անց էրզրումի հյուպատոսը նորից զեկուցում է՝ «Պատնոսի մուղիր Հուսեհին աղան, որի ոճրագործությունների մասին մի քանի անգամ գրել եմ ձեր գերազանցությունը, շուտով հետևելու

է մյուսներին», այսինքն՝ այն քուրդ աշիրեթապետներին, որոնց Աբդուլ Համիդը մեծ փառքով ու պատվով հրավիրել էր Կ. Պոլիս, պարզեատրել էր շքանշաններով և նշանակել էր Համիդի հեծելազորի հրամանատարներ:

Ավագակուսությունը, ժողովրդի ունեցվածքը կողոպուտելը, մարդկանց կոտորելը թուրքական պետական սխտեմում ցուցանիչ էին ծառայում պատվի արժանանալու, մեծամեծ պաշտոններ ստանալու համար, եթե այդ վերաբերում էր հայ ռայայի հարստահարմանը կամ քրդական ցեղերի շլատմանը: Ահավասիկ, այս էլ պտուղն էր:

«Մշակին» ուղղված մի նամակում մենք կարդում ենք. «Հայտարարելի Ալի աղայի մանչ Մուսա աղան, որ 35 գյուղ հրկեզ անելով և անթիվ կողոպուտներով ձգեր Պարսկաստան փախեր էր, փոխանակ պատժելու զայն, դարձյալ կանչեց և յուր հոր տեղ էլաղասի կարգեց՝ ամսական 2000 դրուշ ոսկի գրամ հատկացնելով»:

Որ հայդարանլի ցեղի այդ աշիրեթապետի կողմից Բիթլիսի ու Վանի վիլայեթների հայ գյուղացիության անընդհատ կողոպուտներն ու սպանություններն իր հովանավորության տակ էր առել սուլթանական կառավարությունը, այդ բխում է այն իրողությունից, որ նա իր գործելակերպն անպատիժ շարունակում էր նույնիսկ 90-ական թվականներին և իր շարագործություններով համակվորպական հռչակ էր ստացել: Մուսա բեյն այն ժամանակ շնորհիվ իր կողոպուտած հարըստությունների, դարձել էր սուլթանական պալատին մոտ կանգնած ազդեցիկ անձնավորություններից մեկը:

Անգլիական ներկայացուցչիը Հուսեհին աղայի մասին մեծ վեզիրի հետ զրույցի ժամանակ ի միջի այլոց ասում է՝ «Ըստ մեր ստացած տեղեկությունների, այդ սուլթանկուր նույնպիսի հրեշավոր ճիվաղ է, ինչպիսին Մուսա բեյն է»¹:

Ահավասիկ, այդ «հրեշավոր ճիվաղի» մասին ցարական արխիվներում պահվող մի փաստաթղթում կարդում ենք՝

«Դժվար է ասել, թե հայկական հարցն իսկապես երբևից է սուր բնույթ ստացել: Նա զարգանում էր աստիճանա-

¹ «Положение армян в Турции», 1896, стр. 164.

բար և արդեն 80-ական թվականների վերջերին հայերի նկատմամբ քրդերի և թուրքերի ճնշումները և որոշ քրդերի, հատկապես Մուսա բեյի, շարազործությունները արդվալի հռչակ ստացան»:

Անգլիական դիվանագիտությունը, երևելով իր բաղաբազան նպատակներից, կառչել էր հայկական հարցին և որոշ ճնշում էր գործադրում թուրքական կառավարության վրա: Եվ ահա, մի կողմից՝ եվրոպական մամուլի աղմուկը, մյուս կողմից՝ այդ դիվանագիտական ճնշումը սուլթան Աբդուլ Համիդին հարկադրում են հատուկ լիազորված ներկայացուցիչ ուղարկել Կ. Պոլսի ուսական դեսպանի մոտ «խորհրդակցելու» ստեղծված դժվարին կացության շուրջը, իրականում՝ պարզելու ցարական կառավարության դիրքը հայկական հարցում: Այդ խորհրդակցության ժամանակ սուլթանի ներկայացուցիչը, ինչպես հաղորդում է մեր աղբյուրը, «ամեն կերպ աշխատում էր համոզել, թե հայերը սուլթանի մյուս հպատակների հետ օգտվում են լիակատար իրավահավասարությանը, նա հիշատակեց, որ ամենահարուստ բանկիրները և բարձրագույն աստիճանավորներից շատերը հայեր են, որ Աբդուլ Համիդը այդ ժողովրդի ներկայացուցիչներից միջաջերմագին հասցեներ և շնորհակալական հեռագրեր է ստանում: Նա ավելացրեց, որ հայերի իրավազրկության և քրդերի շարագործությունների մասին լուրերը խիստ չափազանցված են և Կ. Պոլիս կանչած Մուսա բեյին նույնիսկ որևէ բանում չի կարելի մեղադրել» (ընդգծ. մերն է.—Ս. Մ.):

Չնայած ցարական դիվանագիտը իր կառավարությունից հրահանգ ուներ թուրքիային պաշտպանելու անգլիական ոտնձգություններից, այդ հարցի կապակցությամբ ասում է՝ «Իսկապես քիչ չեն փարձր աստիճանավոր հայ պաշտոնյաները և ունեոր մարդիկ, բայց այնուամենայնիվ Հայաստանի հասարակ բնակչության դրությունը ծայրահեղորեն անբավարար է — նա ամենադաժան կերպով տառապում է քրդերի սանձարձակությունից, ինչպես և վատ կառավարումից կամ անփուլթ ընտրված վարչական աշխատողների գործունեությունից, որոնք հաճախ գործակցում են քրդերի հետ: Իսկ ինչ վերաբերում է Մուսա բեյին, ապա վկաները սարսափի

մեջ են նրա կապերի և անձեռնմխելի լինելու պատճառով» (ընդգծ. մերն է.—Ս. Մ.):

Այնուհետև մեր աղբյուրը հաղորդում է. «Թուրք կողմերից նման ներշնչումներ ստանալով և իմանալով, որ Անգլիան նորից պահանջում է 61-րդ հոդվածի իրագործումը, սուլթանը հրաման տվեց ձերբակալել Յեղդում ազատ ապրող Մուսա բեյին և նրա նկատմամբ դատավարություն սկսել»:

«Չնայած, վերջապես, Հայաստանից եկած վկաների ցուցմունքներին, դատարանը, քննելով գործը, Մուսա բեյին անմեղ ճանաչեց, և այդ վճիռը շատ տհաճ տպավորություն թողեց ինչպես Կ. Պոլսում, այնպես էլ ընդհանրապես եվրոպայում: Անգլիական, գերմանական, ավստրիական դեսպանները, որոնց միացավ նաև իտալականը, Բարձր Դռանը դժգոհություն ներկայացրին Մուսա բեյին արդարացնելու առթիվ, նշելով գործի աշուու վարումը»¹:

Այսպիսով, բազմաթիվ հայկական գյուղերի ավերողը և այդ ավերումներից վիթխարի հարստություններ դիզողը, չնայած եվրոպայի ամբողջ առաջադեմ մամուլի բարձրացրած աղմուկին, չնայած բազմաթիվ միտինգների բողոքին, վերջապես, չնայած դիվանագիտական կորպուսի միջամտությանը, ոչ թե պատժվում, այլ սուլթանական կառավարությունը դատական մի խեղկատակություն է կազմակերպում և, հաշվի չառնելով Հայաստանից եկած բազմաթիվ վկաների անառարկելի ցուցմունքները, արդարացնում է իր հովանավորյալ «հրեշավոր ճիվաղի» կատարած ոճրագործությունները: Մի մեծ հմտություն հարկավոր չէ եզրակացնելու, որ հովանավորողը և հովանավորյալը հար և նման էին իրար, նրանք թիված էին միևնույն խմորից:

Ամփոփելով այս գլխում մեր բերած փաստական տվյալները, որոնք ծագում են ոչ-հայկական աղբյուրներից, մենք գալիս ենք այն եզրակացության, որ թեմարական ֆեոդալական հողատիրության սիստեմը չնայած պաշտոնապես վերացել էր XIX դարի 40-ական թվականներին, սակայն հատկապես հայկական վիլայեթներում դեռ փաստորեն կի-

¹ АВПР, ф. Политархив, д. № 3447, лл. 53—75.

բառվում էր նույնիսկ 90-ական թվականներին: Քուրդ աշիրեթապետները հինավուրց ձևով հայ աշխատավորության աշխատանքի արդյունքի զգալի մասի տերոստնօրեն էին համարվում: Մյուս կողմից, հայ աշխատավորությունը հարկման էր ենթարկվում պետության կողմից և գոյություն ունեցող պաշտոնական կապալառու-վաշխառուական հարկազանձման սխտեմի հետևանքով անագորույն կեղեքման էր ենթարկվում ոչ միայն կապալառու-վաշխառուական կապիտալի ներկայացուցիչների, այլև նրանց հետ սերտաճած բարձր աստիճանավորների կողմից: Այդ էր պատճառը, որ շնայած երկրում վիթխարի հողային տարածությունների առկայությանը և հողի արգավանդությանը, երկրի հողօգտագործող գյուղացիությունը տնտեսապես հիմնականում անճարակ դրության էր հասել: Վերջապես, արևմտահայ գյուղացիության տնտեսական քայքայման գործում շատ մեծ դեր սկսեցին խաղալ առանձնապես 80—90-ական թվականներին ահռելի չափերի հասած կողոպուտներն ու ավերումները, որ սուլթանական կառավարության դրդամամբ ու հովանավորությամբ կատարում էին քրդական աշիրեթապետները:

Ե Ր Ր Ր Ր Ղ Գ Լ Ո Խ

ՎԱՅԵՐԻ ԻՐԱՎԱՉՈՒՐԿ ՎԻՃԱԿԸ ԹՈՒՐԻԱՅՈՒՆԻՄ

Քուրդական պետության պարտավորությունները հայերի անվտանգությունն ապահովելու վերաբերյալ:— Քուրդիա գաղթեցված մահմեդականների տնտեսական վիճակը:— Կենսամիջոցներից զուրկ գաղթականներին հայկական միջավայրում բնակեցնելը:— Ստրկավաճառությունը շերքեզների մոտ:— Հայ գյուղացիության հարստահարումները շերքեզների կողմից:— Այդ հարստահարումները որպես հայ տարրի ընաշնչման միջոց:— Հայկական գյուղերի քրդականացումը:— Հայերի տնտեսական դրության խեղաթյուրված պատկերումը ցարական արքունական խորհրդական Գրյազնովի զեկուցագրում:— Հայերի ծայրահեղ շքավորության հասնելու պատճառն ըստ հյուպատոսական զեկուցագրերի և Իզաբելա Բիշոպի:— Մահմեդական գյուղացիության տնտեսական ճնշված դրությունը որպես հայ ռայայի իդեալ:— Կ. Պոլսի պատրիարքարանի խնդրագիրը՝ պետական մի քանի սկզբունքներ հայերի վրա տարածելու վերաբերյալ:— Հայերի իրավագրկությունը դատական գործում և դրա հիմնական պատճառը:— Դատական իրավահավասարության մասին օրենքների և դատական պրոցեսի միջև գոյություն ունեցող հակասությունը:— Օթևանի իրավունքը Քուրդիայում:— Օթևանի իրավունքի կիրառումը Հայաստանում:— Զենքով ինքնապաշտպանության հայերի իրավագրկությունը:— Քրդերին զինելը և հայերին զենք կրելու իրավունքից զրկելը որպես հայերի ընաշնչման քաղաքականություն:

«Թուրքերին հարստահարում էին փաղիշահն ու նրա կուսակալները, — գրում է Ի. Ի. Գուրբորոզկոն, — բայց թուրքերի անձը, սեփականությունը և կյանքը անձնումխելի էին բոլոր կողմնակի ոտնձգություններից: Դատարանը վերականգնում էր նրանց իրավունքները և խախտողներին բոլոր դեպքերում խիստ պատժի էր ենթարկում, եթե հանցավորները կառավարության բարձր անձնավորություններ չէին: Իսկ հայերին կարող էին ճնշել ու կողոպտել բոլոր նրանք, ովքեր դրա համար բավականին ուժ ունեին»¹ (ընդգծ. մերն է. — Ս. Մ.):

Հայերը Թուրքիայի հպատակներ էին: Չերքեզներն ու քրդները նույնպես Թուրքիայի հպատակներ էին: Այսուհանդերձ, սուլթանի այս վերջին հպատակները կարող էին առաջինների՝ հայերի հետ վարվել այնպես, ինչպես իրենք ցանկանում էին և դրա համար որևէ պատասխանատվության ենթակա չէին: Հայերի այդ տարրական իրավունքները պաշտպանելու համար ինչպես Սան-Ստեֆանոյի, այնպես էլ Բեռլինի տրակտատներում արձանագրվել էր, որ «Բ. Գուրբորոզկոնը պարտավորվում է... ապահովել նրանց (հայերի) անվտանգությունը քրդերից և շերքեզներից»: Այսպիսի տարրական պարտավորությունը, որն իր նմանը չունի միջազգային հարաբերությունների պատմության մեջ, միայն ծայրահեղորեն բարոյալքված պետության նկատմամբ կարող էր միջազգային ակտի նյութ ծառայել: Մինչև իննսուսուական թվականները եթե օտար քրդները հարձակվում էին քուրդ աշիրեթապետներին հարկատու հայերի վրա, նրանց պաշտպանում էին իրենց աշիրեթապետները: Մինչդեռ եվրոպական կոնցերտի անդամ թուրքական պետության համար անհրաժեշտություն էր համարվում միջազգային տրակտատով պարտավորություն ստանձնել իր հպատակների անվտանգությունն ապահովելու վերաբերյալ այն ժամանակ, երբ կառավարությունը մի շարք օրենսդրական ակտերով բազմիցս ազդարարել էր առանց ազգի ու կրոնի խտրության բոլոր հպատակների իրավահավասարություն և անվտանգություն:

Նախ կանգ առնենք այն հարցի վրա, թե Թուրքիան, այդ ազգային ու միջազգային ակտերի առկայության պայմաններում, ինչպես էր հայերին ապահովում շերքեզներից:

Չերքեզ ասելով չպետք է հասկանալ մի ինչ-որ ազգություն: Փաստաթղթերում այդ անվան տակ հաճախ նկատի էին առնվում Թուրքիա գաղթած մահմեդականները՝ շերքեզները, շեչենները, լազերը, աջարացիները և այլն:

Այդ գաղթումները «առաջին հայացքից կարող են թվալ, — ասում է Ռոլեն-Շեկլմենը, — որպես թուրքական կայսրության աստիճանական ջլատման և ուսական կայսրության կամ Բուլղարիայի հպատակության տակ կյանքի նկատմամբ զրգվանքի հետևանք: Նույնիսկ այդպես լինելու դեպքում թուրքական իշխանությունները հանցավոր կլինեին այն բանում, որ այդպիսի գաղթումներից առաջացած անկարգություններին վերջ չեն տալիս: Բազմաթիվ վկայությունները ապացուցում են, որ այդ անկարգությունները, գոնե դեպքերի մեծ մասում, ատեղծում է ինքը՝ Թուրքիան»¹:

Բազմաթիվ փաստերն ու գործին քաջատեղյակ մարդկանց վկայությունները հաստատում են, որ իրոք այդ, այսպես կոչված, անկարգությունները թուրքական վարչությունների սոսկ անկարողության հետևանք չէին, այլ դա Թուրքիայի կառավարության կիրառած մի խորամանկ, նախօրոք ծրագրված ու մտածված ճիվաղային քաղաքականություն էր:

Անգլիական փոխ-հյուպատոս Ստեվարտը 1880 թվականի օգոստոսի 18-ի զեկուցագրում պատմում է իր հանդիպած 240 ընտանիք մահմեդական գաղթականների մասին: Նրա պատմելով, այդ դժբախտները ցնցոտիների մեջ էին. 70 հոգի տառապում էր շերմախտով, զրկված մարդկային ամեն մի հարմարությունից: Նրանցից 8 հոգի մահացել էին սովից: Ստեվարտի այն հարցին, թե «ինչու՞ եք թողել ձեր երկիրը և եկել այստեղ», գաղթականները պատասխանում են՝ «Իսկ ինչպե՞ս մենք կարող էինք ապրել քրիստոնյաների հպատակության տակ»: Բայց ավելի մանրամասն հարցուփորձից

¹ И. И. Голобородько, Старая и новая Турция, 1908, стр. 222.

¹ М. Г. Ролен-Жекмен, Армения, армяне и трактаты, Сборник: «Положение армян в Турции», 1896, стр. 69.

հետո ասում են. «Մեզ բերել են պետական աստիճանավորները»:

Փոխ-հյուպատոսի կարծիքով, «ավելի հավանական է, որ այս վերջին պատասխանը ճիշտ լինի, որովհետև թուրքական կառավարությունը, ցանկանալով բազմացնել մահմեդական քնակչությունը, չի կարողանում հաշտվել այն մտքի հետ, որ մահմեդականներն ապրեն քրիստոնյաների հպատակության տակ»¹:

Անգլիական փոխ-հյուպատոսի այդ եզրակացությունը շատ մակերեսային է: Եթե թուրքական կառավարությունը չէր կարողանում հանդուրժել, որ իր դավանակիցներն ապրեն քրիստոնեական պետությունների հպատակության տակ, ապա նա պետք է գոյություն գտնե նվազագույն պայմաններ ստեղծեր գաղթած ժողովրդի համար, որով ավելի կգրավեր գաղթականների հոծ բազմություններ, մինչդեռ իրականում գաղթականները թողնված էին բախտի քմահաճույքին:

Այդ նույն ժամանակ Կ. Պոլսի անգլիական դեսպանության քարտուղար Ստ. Ջոնը այցելում է մայրաքաղաքից մի քանի ժամվա ճանապարհ հեռու գտնվող գաղթականների ճամբարը: Այդտեղ կուտակված էին ավելի քան 7000 մահմեդական վրացիներ (աջարացիներ), որոնք կառավարական նավերով բերվել էին Բաթումի շրջանից: Այդ ժողովրդի դրությունը սոսկալի էր: Դրանցից մինչև 1500 մարդ ափ էր իջեցվել $2\frac{1}{2}$ ամիս առաջ, և այդ ամբողջ ժամանակի ընթացքում որևէ նպաստ չէր ստացել, և ոչ ոք չէր էլ մտածում նրանց մասին: Այդ խմբից 211 մարդ մահացել էր տենդից ու սովից: Այդ քարտուղարի վկայությամբ, նրանց մեծ մասն ապրում էր ծանրի տակ, կերակրվելով պատահաբար ձեռք բերած պտուղներով: Ջոնի հարցերին նրանց գաղթելու պատճառների մասին, մուլաներից մեկը ցույց է տալիս թուրքական կառավարության կողմից տրված մի թուղթ ամենագայթակղեցուցիչ խոստումներով, այն է՝ մի տարի շարունակ հացով ապահովում կառավարության հաշվին, ամենահարմար պետական հողերում բնակեցում՝ ցանկացած տարածու-

թյամբ հողով, հողագործական գործիքներով և անասուններով լիակատար ապահովում, տներ, մզկիթներ, դպրոցներ կառուցելու և ուսուցիչներ վարձելու համար դրամ:

Այսպիսով, թուրքական կառավարության պաշտոնական թղթում անբավ խոստումներ, իսկ իրականում՝ թշվառություն: Բնական է, որ այդ գաղթականների մեծամասնությունը երազում էր վերադառնալ իր նախկին հայրենիքը, որտեղ թողել էր իր տունուտեղը: Բայց այդ չէր ժպտում թուրքական կառավարությանը: Ստորև մենք կտեսնենք, որ ոչ միայն այդ մասսան էր հարկավոր թուրքական կառավարությանը, այլև նրա թշվառությունը:

Ադա-Բազարի կազայում կենտրոնացած գաղթականների մասին հյուպատոսական զեկուզագրերից մեկում կարդում ենք. «Աբխազական գաղթականների խմբերից մեկի գլխավորն ասում է՝ եթե գաղթականների նոր հորդաներ գան, ապա երկիրն իսկական դժոխք կդառնա: Արդեն եկած գաղթականների դրությունն այնքան ծանր է, որ նրանք աղերսում են Ռուսաստան վերադառնալու մասին»²:

Եթե թուրքական կառավարությունը բոլորովին չէր զբաղվում այդ գաղթականներին որևէ նպաստ տալու հարցով, ապա նա խիստ մտահոգված էր նրանց վերադարձը ձախողելու և ցասումից զազազած այդ ամբոխին զինելու մասին:

Կենսամիջոցներից իսպառ զրկված և կառավարության կողմից ոտից գլուխ զինված այդ զանգվածին թշուր էր հայկական վիլայեթները՝ հայ գյուղերին կից բնակություն հաստատելու համար: Այդպիսով, հայ գյուղացիության ուսերին պետք է ընկներ այդ բազմահազար զինված շերքեզներին պահելու ծանրությունը: Անգլիական հյուպատոսական զեկուզագրերից մեկում կարդում ենք. «Ոչ մի բան չի կարող արդարացնել այն, ինչ որ անցյալ տարի ձեռնարկեց թուրքական կառավարությունը, լցնելով զինված մարդկանց (շերքեզներին. — Ս. Մ.) մի ամբողջ ամբոխ այդ երկիրը, որի անմեղ բնակչությունը նույնիսկ սովոր չէ գեներ կրել»²:

¹ «Положение армян в Турции», стр. 71.

² Նույն տեղում, էջ 60:

Ռուսաստանի սահմանամերձ վիլայեթների հայ բնակչության դրուժյունը իրոք դժոխային է: Տրապիզոնի անգլիական հյուպատոս Բիլիոտտիի զեկուցագրից երևում է, որ այդ վիլայեթի հայ և հուլյն բնակչությունը, լազական գաղթականների կողոպուտների հետևանքով, այնպիսի դրուժյան էր հասել, որ մասսայորեն միջոցներ էր որոնում Ռուսաստան գաղթելու: Այդպիսով, մահմեդականների ներգաղթին հետևում էր քրիստոնյա տարրի արտագաղթ: Բայց հենց այդ էլ թուրքական կառավարության հիմնական նպատակներից մեկն էր՝ նա ձգտում էր այն բանին, որ հայկական վիլայեթներում, հօգուտ մահմեդական տարրի, հայերի տեսակարար կշիռը պակասի այնքան, որ Բեռլինի տրակտատով ստանձնած պարտավորությունների կիրառումը դառնա անիմաստ:

Ըստ լեյտենանտ Կետչենների տվյալների, միայն Ադա-Բազարի կազան, որի քաղաքային բնակչությունը կազմում էր 11800 մարդ (որից 8000-ը հայ), իսկ կազայի ամբողջ գյուղացիական բնակչությունը՝ 17000, միանգամից թափվում են 25—30000 զինված չերքեզներ: Մայրը Տրոտտերը հաղորդում է, որ ըստ էրզրումի վալու տվյալների, այնտեղ շուտով սպասվում էր մինչև 10000 ընտանիք (50—60000 մարդ) գաղթականություն: Միայն մի կազայում, ուր բնակվում էր ընդամենը 30000 մարդ, վերաբնակություն է հաստատում 25000 զինված չերքեզ: Հայկական վիլայեթներում տեղավորելու համար Տրապիզոնում և Սամսունում ասի և փոխցվում 6000 լազ:

1880 թվականի սեպտեմբերյան մի օր մայրը Տրոտտերը վանի ճանապարհին հանդիպում է հարյուրավոր սայլերով ջարժվող գաղթականների, լեյտենանտ Չերմասյոր Ավազ—Նրզնկա ճանապարհին՝ 6000 սայլերով չերքեզների մի խմբի, իսկ հետևում, հորիզոնում երևում էին էլի բազմաթիվ սայլեր: «Կարելի է կարծել, — գրել է նա, — որ մենք վերադարձել ենք ժողովուրդների մեծ գաղթի դարաշրջանը», ընդ որում այդ գաղթականության «տղամարդիկ ոտից գլուխ զինված էին» և շարժվում էին դեպի հայաբնակ շրջանները, որտեղ հայը զենք կրելու իրավունք չուներ, դա մահացու հանցանք էր համարվում: Թուրք աստիճանավորները, որ նշանակված

էին տեղափոխվող չերքեզ այդ ամբոխներին առաջնորդելու, միայն մեկ կոնկրետ հրահանգ ունեին. նրանց զինել և տեղավորել հայկական գյուղերի շրջաններում: Թուրք պաշտոնյաներից շատերն այդ «գործը» կատարելիս կեղծբում էին թե՛ հայերին, թե՛ գաղթականներին և մեծ հարստություն դիզում: «Նրանք գյուղացիներից փող էին կորզում, սպառնալով չվրճարելու դեպքում նրանց հողերը հատկացնել գաղթականությանը: Գաղթականներից էլ փող էին կորզում, սպառնալով, թե կբնակեցնեն անպետք հողերում: Այդ աստիճանավորներից մեկը, այդպիսով, թալանել էր 90000 ֆրանկ»¹:

Հայկական շրջանները հեղեղած չերքեզների առաջնորդներից ոմանց թուրք պաշտոնյաները նշանակում էին վարչական ու ոստիկանական ղեկավարներ: Բնականաբար, երկրում առանց այդ էլ գոյություն ունեցող կողոպուտներն ու առևանգումները հասնում են աներևակայելի չափերի: Երիտասարդ կանանց ու պատանիների հափշտակումներ շատ հաճախ էին լինում, և դրանց մասին հիշատակված է հյուպատոսական պաշտոնական զեկուցագրերում և զետեղված անգլիական կառավարական հայտնի «Կապուլտ գրքերում»:

Ռուլեն-ժեկմենը, հենվելով այդ պաշտոնական հրատարակության տեղեկությունների վրա, անում է հետևյալ ամփոփումները. «Ջանազան թղթակցություններից կարելի է եզրակացնել, որ ստրուկներ, մանավանդ հաճույքի առարկա ծառայող ստրուկներ, ունենալը և լգնելը հաճախ է պատահում Թուրքիայում, և որ այդ նպատակով աղջիկների և պատանիների գրեթե բացարձակ հափշտակումներ են կատարվում (տես «Կապուլտ գիրք», Թուրքիա, 1879 թ., № 10, էջ 71)»: Ամասիայի մի հայ բողոքական համայնքի գրությունից երևում է, որ այդպիսի հափշտակումներից մեկի գործը քննելիս պարզվում է, որ դատարանի նախագահը մեղադրվող բեյից հենց նոր գնած է եղել մեկ կին և մեկ աղջիկ՝ 5000 պիաստր գումարով (տես «Կապուլտ գիրք», 1880 թ., № 4, էջ 141—142): Նույն տեղում. 1880 թ., № 23-ի 30-րդ էջում գրված ամասիացի մի պատանու և աղջկա վերաբերյալ, որոնց

¹ «Положение армян в Турции», 1896, стр. 68.

գնել է դատարանի անդամ Ֆեքրի բեյը: Մի այլ «Կապույտ գրքում» (1881, № 6, էջ 4) Կալվարեի փոխ-հյուպատոս Ստեփարտի զեկուցագրից յերևում է, որ միայն Ազիզիեի կազայում հաշվվում է չերքեզների մինչև 2000 ատրուկ, որոնք լցվում են Ստամբուլի հարեմները: Տղամարդկանց (պատանիների) գինը տատանվում է 20—30 լիրայի սահմաններում, կանանց գինը՝ 20—100 և նույնիսկ 120 լիրայի, նայած ստրկուհու զեղեցկությանը: 1880 թվականի հունիսի 21-ին Ազիզիեում իսկական ճակատամարտ տեղի ունեցավ ստրկատերերի և փախած ստրուկների միջև: Թե՛ մեկ, թե՛ մյուս կողմից սպանվեցին մեկական մարդ, վեցին հաջողվեց բռնել, երկուսը անհետացան, իսկ 17-ին հաջողվեց փախչել Սվազ, որտեղ նրանց բռնեցին և նահանգապետի կարգադրությամբ բանտարկեցին: «Մեր կողմից ավելացնենք,— ասում է Ռուեն-ժեկմենը,— որ այդ ամենը կատարվում էր մի կայսրության մեջ, որն սկսած 1856 թվականից ճանաչվել է որպես եվրոպական կոնցերտի մասնակից»¹:

Մենք վերևում ասացինք, որ թուրքական կառավարությանն անհրաժեշտ էին ոչ միայն չերքեզները, այլև նրանց թշվառությունը:

Բացի զենքից ոչինչ չունեցող չերքեզները մի իսկական պատուհաս էին հայ գյուղացիության համար: Հյուպատոսական զեկուցագրերում կարդում ենք.

«Չերքեզներն անպատիժ կողոպտում են մեծ ճանապարհի վրա և տներում: Նրանք տերերին քշում են իրենց սեփական հողից, հափշտակում բերքը, մինչդեռ հողի տերերը պետք է հողային հարկ վճարեն կառավարությանը այն հողերի համար, որ իրենք օգտագործել չեն կարող:

Տեղեր կան, որտեղ հողի մշակումը դադարել է, որովհետև չերքեզները քշել են անասունները և զավթել են հողերը: Մի շարք գյուղերի բնակիչներ հայտարարում են, որ իրենց գոյությունը պարզապես անհնարին է, քանի դեռ իրերի այգպիսի դրությունը վերջապես չի կասեցվել»:

Փերզինի գյուղի արտերը զավթել են չերքեզները. գյուղա-

ցիները պետք է վճարեն հարկերը, բայց աշխատել չեն կարողանում: Նրանք իշխանություններին գանգատվել են այդ չերքեզների դեմ, բայց արդարադատություն չեն գտնում: Հափըշտակված կովերի, գոմեշների, ձիերի մի մեծ ցուցակ է կազմված: Նույնպիսի գանգատներ ներկայացրել են Ենիքոյի բնակիչները, ինչպես և Շեյքեր գյուղի ներկայացուցիչները:

Այս տեղեկությունները քաղված են անգլիական հյուպատոսական զեկուցագրերից, որոնք հրատարակված են «Կապույտ գրքերում»¹:

«Ես չգիտեմ,— ասում է Ռուեն-ժեկմենը,— կարելի՞ է արդյոք մի որևէ այլ այնպիսի երկիր տեսնել, որի կառավարությունը այդպես ձգտեր իր սեփական պրովինցիաները լցնել վայրի հորդաներով և ինքը նրանց առաջ այսպիսի երկրնտրանք դներ՝ կամ ապրիլ թալանով ու կողոպուտով կամ աղքատությունից ոչնչացիր»: Թուրքիայի իշխանությունների վարքը ստիպում է մտածել, որ նրանց մեջ միտք է հղացել ֆայհայել և ոչնչացնել քրիստոնյա բնակչությունը, շտալով նորեկներին գոյության այլ միջոց, բացի թալանից»²:

Բազմահազար, գոյության միջոցներից զուրկ գաղթականությանը զինելը և հայաշատ վայրերում կենտրոնացնելը թուրքական իշխանությունների առաջնահերթ քաղաքական ծրագիրն էր: Դրա նպատակն էր, ինչպես նշել ենք, համեմատաբար կարճ ժամանակամիջոցում այնպիսի դրություն ստեղծել, որ հայկական վիլայեթների մահմեդական բնակչությունը իր տեսակարար կշռով գերազանցի հայերին: Հայաստանը մահմեդական բնակչությամբ հեղեղելու քաղաքականությունը գալիս էր տակավին XVI—XVII դարերից, երբ Թուրքիան Պարսկաստանի սահմանագլխին քրդական քոչվոր ցեղեր կենտրոնացնելու համար հայկական վիլայեթների ալպյան արոտավայրերը հատկացնում էր քուրդ ցեղապետներին: Այդպիսով, Հայաստանում մահմեդական տարրը, իհարկե, ավելանում էր: Բայց մինչև XIX դարի երկրորդ կեսը հայ-

¹ «Положение армян в Турции», стр. 62—63.

² Նույն տեղում, էջ 67 և 68:

կական տարրի թվաքանակը պակասեցնելու խնդիրն ասպարեզ չէր հանվում: Հայերը բուրդ ֆեոդալների համար անհրաժեշտ ուժ էին որպես հողագտագործողներ և հողագործներ: Այն ժամանակ ևս հայ գյուղացիությունը, ենթակա լինելով բուրդ աշխրեթապետներին, իհարկե, արտատնտեսական շահագործման էր ենթարկվում, բայց նրա ֆիզիկական գոյությունը վտանգի տակ չէր: Բայց անհա XIX դարի երկրորդ կեսին, և հատկապես երբ հայկական հարցը միջազգային բնույթ ընդունեց, Հայաստանում հայ տարրի ոչնչացումը օրակարգի հարց դարձավ Թուրքիայում: Այդ գաղափարը դեռ 40-ական թվականներին Սիրիայի վերաբերյալ արտահայտել էր ամենաազդեցիկ թուրք փաշաներից մեկը: «Երբ 1840 թվականին Սիրիան վերադարձվեց Թուրքիային, նեշիբ փաշան, նշանակվելով Դամասկոսի նահանգապետ, բրիտանական հյուպատոսարանի մի գաղտնի գործակալի, շփոթեցնելով նրա դիրքը, հայտնել է, որ «թուրքական կառավարությունը Սիրիայի իր տիրույթները կարող է պահպանել միայն քրիստոնյաներին կոտորելու միջոցով»: Այն, ինչ որ նեշիբ փաշան արտահայտել էր որպես տեսական դրույթ, քսան տարի անց Խուրշուդ փաշան կիրառեց գործնականում»¹:

Ահավասիկ, պատմությունը կրկնվում էր, միայն թե Սիրիայի փոխարեն այդ գործողությունների ասպարեզը դարձել էր Հայաստանը:

Վերոհիշյալ վկայությունները նույնպես քաղված են անգլիական հյուպատոսների զեկուցագրերից և զետեղված են Անգլիայի պաշտոնական «Կապույտ գրքերում», այսինքն՝ այն պետության, որը ոչ միայն Բեռլինի տրակտատի քտորագրողներից մեկն էր, այլև հատկապես հայերին վերաբերող 61-րդ հոդվածի վերախմբագրման հեղինակը՝ հօգուտ թուրքերի և ի վնաս հայ ժողովրդի:

Միայն չերեզնների միջոցով չէ, որ Թուրքիան իրագործում էր իր ճիվաղային մտահղացումը: Նույն բանը է՛լ ավել-

լի մեծ մասշտաբներով կատարվում էր բուրդ աշխրեթապետների միջոցով:

Այն եզրակացությունը, որին անգլիական հյուպատոսական զեկուցագրերի հիման վրա հանգել էր բելգիացի Ռուեն-ժեկմենը, նույն քանն էլ հաստատում է իրանդացի պրոֆեսոր էմիլ Դիլոնը Թուրքիայում կատարած իր անձնական դիտումների հիման վրա: Այս վերջին հեղինակը գրում է՝ «Ոչնչացման ծրագիրը ակնհայտորեն գործում է կանոնավոր և հաջող: Քրիստոնյա բնակչությունը ոչնչացվում է, գյուղերն ու բերքերի ձեռքն են անցնում գրեթե նույնքան արագ, ինչքան զավեշտական օպերայի դեկորները... Այստեղ տեղը չէ տալու այն գյուղերի ցուցակը, որոնք մահմեդականություն են ընդունել, բայց մի տիպիկ օրինակ կօգնի պատկերացում կազմելու կատարվող պրոցեսի մասին: Ռուսաստանին սահմանակից Ալաշկերտի պրովինցիայում Ղարաբախի սեյից դեպի արևելք գոյություն ունեն հինգ գյուղ՝ Քեթեր, Մանկասար, Զաչան, Զիրո և Քուբեկերան: Քուրդ էյուբ փաշան իր երեք որդիներին՝ Ուզոբ բեյին, Քանիդ բեյին և Յուսուֆ բեյին, ուղարկում է այդ գյուղերը գրավելու: Այն ժամանակ այդ գյուղերում ապրում էին 400 տուն, կամ մոտավորապես 3000 մարդ, հայ քրիստոնյաներ: Այժմ այդ գյուղերում մեկ հայ էլ չի մնացել: Հայերը մի քանի ամսվա ընթացքում այդտեղից բոլորովին թշվել էին այնպիսի միջոցներով, որոնք պետք է վերագրել թունդ ազդող միջոցների կատեգորիային...»

Բիթլիսի վիլայեթում (Մուշի սանջակի Բուլանըղի կազայում) գտնվում է Խաշ անունով գյուղը: Այժմ այդ գյուղը կիսալուսնի գյուղ է: Այն միջոցները, որոնցով կատարվել է այդ հանկարծակի կերպարանափոխությունը, նույնն են, ինչ որ վերը նկարագրածը: Մուհամմեդ-էմինը բերում է քրդերի խուժան (Զիրաբլի և Քասփակլի ցեղերից) և գրավում գյուղը, այսինքն՝ գրոհով վերցնում և, ըստ իր պատկերավոր արտահայտության, «նստում է այնտեղ»: Բարբախտաբար, գյուղը գտնվում է փոխ-նահանգապետի ապրելու վայրից մոտավորապես 8 կմ հեռավորության վրա, բայց ի դժբախտու-

¹ Փ. Դ. Грин, Армянский кризис и владычество турок, Сб. «Положение армян в Турции», стр. 288.

թյուն բնակիչների, նա հրաժարվել է նույնիսկ մատը մատին խփել և բոլոր բնակիչները ոչխարի պես քշվել են գյուղից»¹։

Չնայած հայերին ոչնչացնելու վերաբերյալ այս ակնառու փաստերին, այնուամենայնիվ այդ ժամանակ էլ գտնվում էին մարդիկ, որ հայերի նկատմամբ Թուրքիայի վարած շարժարարական քաղաքականությունն իրենց պաշտպանության տակ էին առնում։ Այդպիսիներից մեկն էր ցարական արքունի խորհրդական Գրյազնովը, որն իր գաղտնի զեկուցագրերից մեկում, արդարացնելով հայերի նկատմամբ Թուրքիայի քաղաքականությունը, գրում է՝ «ինչպես Թուրքերին, այնպես էլ քրդերին հայերն անհրաժեշտ են, որովհետև Հայկական բարձրավանդակի սահմաններում միայն հայերն են մշակում լավագույն հողերը, ինչպես և միայն նրանք են զբաղվում արդյունագործությամբ և առևտրով։ Իսկ քրդերը և Թուրքերը թեպետև մասամբ ապրում են հայերի հաշվին, բայց դրա փոխարեն այդ ընդունակ և միևնույն ժամանակ խորամանկ ժողովրդին են թողնում հողագործության, արդյունաբերության և առևտրի օգուտները։ Ով ծանոթ է Ասիական Թուրքիայի հայերի դրության հետ, նա պարտավոր է ընդունել, որ հայկական լեռնաշխարհի լավագույն հողերը, ինչպիսին են Բասենի, Ալաշկերտի, Խարբերդի հարթավայրերը, այնուհետև Մուրադ գետի հովտի և Վանա լճի լայնածավալ գոգահովտի հողերը, գտնվում են հայերի ձեռքին։ Թուրքիայում շրջագայելու շորս տարվա ընթացքում Թուրքահայերի այնպիսի չքավորություն, ինչպիսի չքավորության հետ ծանոթ են Ռուսաստանի հյուսիսի ռուս գյուղացիները, ես չեմ տեսել։ Հացահատիկի և անասունների այն քանակությունը, որ ունեն Թուրքահայ գյուղերից շատերը, ռուսական գյուղերի մեծամասնությունը, իհարկե, երազել անգամ չի կարող։ Ալաշկերտի, Մուշի, Վանի, Բասենի հայերին հրապուրել ղեպի մեր Ղարսի մարզը կարող է միայն հայերի ամենաոխերիմ թշնամին»²։

Այսպիսով, ըստ Գրյազնովի, Թուրքահայ գյուղացիությունն իր տնտեսական դրուժյամբ գտնվում էր այնպիսի առատություն մեջ, որին կարող էին նախանձել շատ երկրների գյուղացիները։ Չնայած նախորդ զխում մեր բերած փաստերն անառարկելիորեն ժխտում են ցարական խորհրդականի այդ հայտարարությունը, այնուամենայնիվ հարկ ենք համարում այստեղ ևս հարևանցիորեն անդրադառնալ այդ հարցին։

Մի բանական հարց է ծագում, արդյոք ճիշտ է, օրինակ, ռուս հեղինակ Ի. Ի. Գոլոբորոդկոյի այն վկայությունը, ըստ որի հայերին կողոպտում էին բոլորը, ով դրա համար որևէ հնարավորություն ուներ։ Այս կարծիքն այնքան էր տարածված, որ ով ցանկանում էր խոսել հայերի դրության մասին, ամենից առաջ պետք է պատասխաներ այդ հարցին։ Եվ ահա թե ինչպես է պատկերացնում այդ հարցը ցարական բարձր աստիճանավորը՝ «Թուրքահայ գյուղացիների դրությունը ծանր է թվում միայն այն պատճառով, որ նրանք, հանդիսանալով ավելի ընդունակ և գործունյա, միաժամանակ զբաղեցնելով Հայկական բարձրավանդակի լավագույն հողերը, պարտավոր են յուրահատուկ տուրք վճարել ավելի ծույլ Թուրքերին և առավելապես լեռնաբնակ կիսաքոչվոր քրդերին։ Այդուհանդերձ, շնորհիվ հողի արգավանդության, հայերը զանգվածորեն կարող են բավարարել ֆրդերի ծայրաստիճան համեստ պահանջները»։

Այսպիսով, դուրս է գալիս, որ Թուրքահայության պաշտոնական և անպաշտոն այն դաժան կեղեքումները, որոնց մասին վկայում էին, օրինակ, հյուսպատոսներն ու հարցին տեղյակ հրապարակախոսները, այլ բան չէին, քան «ծայրաստիճան համեստ պահանջներ» այն արգավանդ հողերի դիմաց, որ հատկացվել էին հայ գյուղացիներին։

Ավելին, բանից դուրս է գալիս, ինչպես գրում է այդ աստիճանավորը, որ «քրդերի կողմից թալան ու կողոպուտներ, իհարկե, պատահում են, իսկ որտե՞ղ է, որ դրանք չեն պատահում, բայց ինչքան էլ այդ տարօրինակ թվա, ոչ մի տեղ այնքան համեստ չափերով չեն լինում, ինչքան ֆրդերի մոտ»։ Այս էլ ղեռ բավական չէ։ Գրյազնովի կարծիքով, ընդհանրական դարձած այն պատկերացումը, թե քուրդ աշիրեթապետ-

¹ Эмиль Диллон, Положение дел в Турецкой Армении, «Братская помощь армянам», 1897, II, стр. 41.

² АВГР. ф. Политархив, д. № 3443, лл. 56—75.

ները աչ ու ձախ կողոպտում էին հայ գյուղացիութեանը, թյուրիմացութեան արդյունք և անտեղյակութեան հետևանք է. քանի որ եթե քուրդը հայից վերցնում է իր բաժին ցորենն ու գարին, ապա նա հաճախ ավելցուկով նրան վերադարձնում է այն առարկաների համար, որոնք նրան ծայրահեղորեն անհրաժեշտ են»¹ (բոլոր ընդգծումները մերն են.—Ս. Մ.):

Այստեղ խեղաթյուրված է իրականությունը. իբր ոչ թե քուրդը աշիրեթապետներն էին կեղեքում հայերին, ինչպես կար իրականում, այլ հայերն էին շահագործում քրդերին և թուրքերին: Ահա այս էր, Գրյազնովի կարծիքով, այն պատճառը, որ թուրքիայում հայերը կոտորածի ենթարկվեցին:

Մենք հետագայում առիթ կունենանք անդրադառնալու ուս սևհարյուրակալիների այդ մեկնաբանությունը: Այժմ հարց է ծագում. եթե հայկական վիլայեթների լավագույն և արգավանդ հողերը բացառապես հայերի ձեռքին էին, եթե քրդերի պահանջները ծայրաստիճանի համեստ էին, եթե հայերին կողոպտելը ոչ ոք այնքան համեստ չափերով չէր կատարում, ինչպես քրդերը, և, վերջապես, եթե հայերն էին շահագործում քրդերին, ապա ինչո՞վ բացատրել, որ թուրքահայ գյուղացիությունը 90-ական թվականների կոտորածներից էլ շատ առաջ հոծ մասսաներով դիմում էր պանդխտության՝ մի կտոր հաց վաստակելու համար: Դա բացատրել հայ «հեղափոխականների» ազիտացիայով, ինչպես այդ անում էին Գրյազնովը ու «Նովոյե վրեմյայի» շուրջը համախմբված սևհարյուրակալիները, պարզապես անվազն անհեթեթություն էր: Աշխարհում դեռ ոչ մի տեղ գոյություն չի ունեցել մի այնպիսի մոզական գավազան, որը ժողովրդական զանգվածներին ստիպեր իրենց բարեկեցիկ կյանքը կամովին փոխարինել չբավորությունը: Այդ կարող էր առաջանալ միայն ամենաբիրտ բռնության հետևանքով: Ամեն մի ազիտացիա որևէ շոշափելի արդյունք կարող է տալ միայն այն դեպքում, եթե դրա համար պարարտ հող գոյություն ունի:

Մկրտիչ Խրիմյանը կաթողիկոս ձեռնադրվելուց հետո, երբ

շրջում էր Ռուսաստանում, մի ճաշկերույթի ժամանակ ասում է՝ «80000 զաղթական հայեր կան Կ. Պոլսում: Պարոն Այվազովսկի, քանքարավոր նկարիչ, դու տեսել ես այդ հուժկու համալներին, որոնք վիթխարի ծանրություններ են բարձրացնում... Գաղթականներ կան նաև այլ վայրերում: Բագրեվանդը Հայաստանի ամենաարգավանդ երկիրն է... Իսկ այդ մարդիկ հեռացել են իրենց հայրենի վայրերից: Ինչո՞ւ»¹:

Այս «ինչո՞ւ»-ի պատասխանը չափազանց շատ է հայ գրականության մեջ, բայց մենք դրա պատասխանը կբերենք օտար մարդկանց վկայություններից: Ռուբեն-ժեկվենը, անգլիական «Կապույտ գրքերում» զետեղված հյուպատոսական զեկուցագրերից բերելով հայկական վիլայեթների բնակչության անօրինակ կեղեքման վերաբերյալ բազմաթիվ փաստեր, եզրակացնում է. «Մի՞թե կարելի է սրանից հետո զարմանալ, որ թուրքահայաստանը, որը բնության կողմից օժտված է ամենահարուստ երկրներից մեկը լինել, դարձել է ամենաղժբախտ և աղքատ երկիրը: Մի ազնիվ թուրք Բիլիոտտիին գրում է, որ այժմ գործերի վիճակը շատ ավելի վատ է, քան եմիլեթների ժամանակներում: Ինչպես կառավարական աստիճանավորների, այնպես էլ աղաների կողմից հարստահարվող, ավերվող, իրենց հողերից ըջվող մուսուլմաններն ու քրիստոնյաները արյուն-արցունք են թափում: Երկրի տեսքը ծայրաստիճան տխրալի է: Գյուղերն փրեկցից հողաշեն հյուղեր են ներկայացնում, որտեղ շկան այգիներ, քանջարանոցներ ու աղբյուրներ: Բնակչությունը սնվում է կոպիտ սննդով, կրում է կոպիտ հագուստ... Բնակչության թափառական տարրը մեծանում է ի հաշիվ նստակյաց ժողովրդի...»²: Էրզրումի անգլիական հյուպատոս Կլիֆորդ Լլոյդը 1890 թվականի հոկտեմբերի 21-ի զեկուցագրում վկայում է. «Հայկական գյուղերն այժմ շեն կարողանում իրենց հարկերը վճարել և մյուս տարվա համար սերմացու չունեն, որովհետև հարևան քրդերը թալանել և այրել են նրանց բերքը...»: Նույն հյուպատոսը, վիլայեթով հայ գյուղացիության թշվառ կյանքի մա-

¹ АВПР. ф. Политархив, д. 3443, лл. 56—75.

¹ «Братская помощь армянам», стр. 546.

² «Положение армян в Турции», 1896, стр. 89, 133.

սին, ավելացնում է. «Այդ զարմանալի չէ, եթե նկատի ունենանք, որ պետական հարկերը վճարելուց հետո գյուղացիությանը մնում է բերքի 30%-ը»¹:

Ամերիկացի Գրինն իր աշխատության «Հայաստանի և Քրոստանի առօրյա վիճակը» գլխում գրում է. «Այստեղ բերվում են միանգամայն ճշտված փաստեր և թվեր և, շնայած հնարավոր հետևանքներին, բերվում են գյուղերի և մարդկանց անունները: Այս տեղեկությունները հաղորդել են վստահելի ու հեղինակավոր մարդիկ և արդեն տպագրված են Indépendent-ում 1895 թվականի հունվարի 17-ին»: Այստեղ մենք բերում ենք հանրագումարային տվյալներ: Գյուղերից մեկի օրինական հարկերը կազմում էին 14 000 պիաստր, իսկ քուրդ աշիրեթապետին տուրք էր վճարվել 12 500 պիաստր, այսինքն՝ գրեթե այնքան, ինչքան կազմում էին բոլոր օրինական հարկերը միասին վերցրած: Իսկ որպեսզի պարզ լինի, թե իրականում ինչ էր նշանակում այդ, մենք վերցնում ենք մի այլ գյուղի պատկերը և վեր ենք ածում աշխատանքային օրերի, քանի որ այդ գյուղի վերաբերյալ տվյալները, բարեբախտաբար, տալիս են այդ հնարավորությունը: (Գյուղը կազմված է 60 տնից, որը 1893 թվականին վճարել էր 8078 պիաստր տուրք, օրավարձու աշխատանքը հաշվված է 2,5 պիաստր և տարվա աշխատանքային օրերի քանակը 150 օր): Այդ տվյալներից պարզ կերպով հետևում է, որ ամբողջ գյուղի աշխատանքային օրերի թիվը կազմում էր առ առավել 9000 օր, իսկ աղաներին վճարած տուրքի ընդհանուր գումարը հավասար էր մոտավորապես 3500 աշխատանքային օրի, այսինքն՝ դուրս է գալիս, որ ընտանիքի գլխավորի աշխատանքի առնվազն $\frac{1}{3}$ -ը տրվում էր աղաներին որպես սովորական տուրք: Այստեղ, հարկավ, նկատի չեն առնված կառավարական հարկերն ու այն արտաքր կարգի կեղծբումները, որոնք նույնպես շատ սովորական էին արևմտահայ գյուղում:

«Բերված տեղեկությունները, — գրում է Գրինը, — բնութագրում են այն սովորական առօրյա վիճակը, որ գոյություն

ունի քրդերի և նրանց քրիստոնյա ստրուկների միջև, այսպես կոչված, խաղաղ հարաբերությունների ժամանակ և ցույց են տալիս, թե ինչ կյանքի են դատապարտված քրիստոնյա հայերը, հակոբականները և նեստորականները, երբ կոտորածներ չկան: Հայաստանում իմ կատարած ճանապարհորդություններից և այդ երկրում ապրելուց ես գիտեմ, որ այդ փաստերը կարելի է վերագրել հարյուրավոր գյուղերի, հարկավոր կլինի միայն անունները փոխել»¹:

Գրեթե նույն ժամանակ, երբ Գրյազնովը «ըրջագայել է» Քուրբահայաստանում և հայերին իբր տեսել է լիության ու առատության մեջ, ըրջագայել է նաև մի ուրիշ անձնավորություն՝ Իզաբելա Բիշոպը: Ահա թե ինչ է գրում վերջինը. «Նույնպիսի տազնապալի վիճակ, ինչպիսին ես տեսել էի ասորի ռայայի մեջ, տարածված է նաև հայերի մեջ: Այդ ավելի է, քան տազնապը, դա սոսկալի սարսափ է, որը լուրջ հիմքեր ունի: Այդ վայրի (Հայաստանի.— Ս. Մ.) զգալի մասում ընդհանուր ապօրինություն է թագավորում: Ավազակները կանգնեցնում են քարավանները և կողոպտում. հայերի համար երկրում ճանապարհորդելը անպայման վտանգավոր է. ոչխարները թշում-տանում են. մշտապես կատարվում են այնպիսի բռնություններ, որոնց մասին պատմելն անպատշաճ է: Գրեթե բոլոր գյուղերը հասցված են ծայրահեղ շփոթության. նրանցից հարկ են քամում այն ժամանակ, երբ վճարելու համար քրդերը նրանց մոտ միջոց չեն թողել: 1890 թվականի էրզրումի խլրտումներից հետո ռեպրեսիաները՝ զենք խլելը, քրդերի կողոպուտները, ճնշումները քուրդ բեյերի կողմից, որոնք իրենց բռնությունները պատճառաբանում են կառավարության սանկցիայով, կանանց համար անվտանգության բացակայությունը և առավել ևս վատ ապագայի սարսափը՝ այս ամենը բնակչությանը հասցրել է խղճալի վիճակի»²:

1 Ф. Д. Грин, Армянский кризис и владычество турок, Сборник «Положение армян в Турции», 1896, стр. 257—260.

2 Նույն տեղում, էջ 264:

Այս նկարագրությունները բանալի են տալիս հասկանալու, թե ինչու հայ գյուղացիությունը հարկադրված էր այնքան բարեբեր իր պայանական հողը թողնել և պանդխտության ուղին բռնել: Այդ հետևանք էր հայերի համար Քուրքիայում ստեղծված դժնդակ պայմանների և ոչ թե «հեղափոխական ազդեցության», ինչպես պատկերացնում էին «Նովոյե վրեմյայի» գրչակները և Գրյազնովի նման արքունական խորհրդականները:

Տարակարծություն չկա, որ հայկական վիլայեթներն աչքի էին ընկնում հողի արգավանդությանը և հիասքանչ արոտավայրերով: Մյուս կողմից, բոլոր ականատեսները և ուսումնասիրողներն անխտիր արձանագրում են հայ գյուղացու մեծ տոկունությունն ու աշխատասիրությունը: Այս երկու հիմնական պայմանների առկայության դեպքում պետք է, որ հայ գյուղացիության տնտեսական դրությունը բարեկեցիկ լիներ: Բայց գոյություն ունեցող պետական ուղղակի և անուղղակի հարկերի ծանրությունը, հայկական վիլայեթների աշխատավոր գյուղացիության ամբողջ մասսայի վիճակը դարձնում էր բարեկեցիկ լինելուց շատ հեռու: Վարչական կամայականությունները, կառավարության կողմից հովանավորվող ավարառություններն ու սպանությունները, զուգակցված բացարձակ իրավազրկության հետ, նրա կյանքը դարձնում էին դժոխային, ինչպես վկայում են հյուպատոսական զեկուցագրերը, վերոհիշյալ Իզաբելա Բիշոպը, Էմիլ Դիլոնը, Մալթոմ-Մաթուր և շատ ուրիշ եվրոպացի հեղինակներ:

Այստեղից էլ հասկանալի է, թե ինչու հայ գյուղացիության համար այնքան կարևոր նշանակություն ունի իր իրավունքներով հարևան քուրդ և թուրք աշխատավորության հետ հավասարվելը: Առաջին հերթին այդ նշանակում էր ազատվել այն հավելյալ արտատնտեսական ճնշումից, որին նա ենթարկվում էր որպես ռայա: Դրա համար այլ բան չէր պահանջվում, քան այն, որ թուրքական օրենսդրությունը կիրառվի նաև հայերի նկատմամբ:

Այդ առումով ուշագրավ է հետևյալ փաստը: Ըստ հայոց ազգային սահմանադրության 8-րդ կետի, ազգային վարչությունն իրավունք էր վերապահված պատրիարքի միջոցով

օսմանյան կառավարությունից խնդրելու ինչպես ամբողջ ազգի, այնպես էլ նրա առանձին անդամների հոգևոր և քաղաքացիական իրավունքների պաշտպանությունը: Այս շատ համեստ իրավունքի (խնդրելու իրավունքի) հիման վրա պատրիարքարանը դիմում է կառավարությանը խնդրելով իբրև վայսերական շնորհ հայերի համար կիրառել հետևյալ կետերը.

1. Զինվորական ծառայությունից ազատ լինելու փոխառեն գոյություն ունեցող զինվորական հարկը (բետելի ասկերին) վերացնել և ընդհանուր զինակոչության օրենքը տաքածել նաև հայերի վրա: Այստեղ այլ բան չկար, քան այն, որ հայերը սուլթանի մահմեդական հպատակների պես կատարեն իրենց զինվորական պարտականությունը: Կարծես թե էլ ինչ ավելի նպաստավոր առաջարկ կարող էր լինել պետության ընդհանուր շահերի տեսակետից, մանավանդ որ կառավարությունն ինքն իր ազդարարություններում միշտ հիշատակում էր քրիստոնյաների զինապարտության իրավունքի մասին: Բայց բանն այն է, որ այդ ժամանակ Քուրքիայում յուրաքանչյուր 135 տղամարդից մեկը 20—40 տարեկան հասակում պետք է զինվոր լիներ: Դրա փոխարեն, ըստ օրենքի, քրիստոնյաները զինվորական հասակի յուրաքանչյուր 135 տղամարդի համար, իբրև զինվորությունից ազատվածներ, պետք է 5000 պիաստր հարկ վճարեին, իսկ թուրքական իշխանությունները, հակառակ օրենքի, հարկման էին ենթարկում բոլոր քրիստոնյա տղամարդկանց՝ սկսած ծնվելու օրից մինչև մահ, այլ կերպ ասած՝ փաստական հարկը բազմաթիվ անգամ ավել էր լինում օրենքով նախատեսվածից:

2. Գույքային և եկամտային հարկը («վերվախ») կանոնավորելու և հեշտ գանձելու նպատակով հարկման օբյեկտների ցուցակագրություն և ճիշտ գնահատում անցկացնել:

Բանն այն է, որ այդ ցուցակները կազմված էին շատ կամայականորեն: Սովորաբար դրանք կազմվում էին առանց որևէ վիճակագրության, գրասենյակներում, պետական աստիճանավորների կողմից, նկատի առնելով տեղի անվանի մարդկանց ցուցումները: Բնակչությունը տասնյակ տարիներ

շարունակ այդ ցուցակների հիման վրա վճարում էր գույքա-
յին և եկամտային հարկ:

Հաճախ էր պատահում, որ ունևոր և մեծ գույքատեր ըն-
տանիքը մի քանի անգամ ավելի պակաս էր վճարում այդ
հարկը, քան չբավոր, չնչին գույք ունեցող ընտանիքը: Իսկ
սովորաբար հայերը մահմեդականների համեմատությամբ
եռակի ու քառակի ավելի էին վճարում: Օրինակ, էրզրում
բաղաբի վերաբերյալ ուշագրավ է հետևյալ փաստը՝ այստեղ
«2000 հայ ընտանիքից այդ հարկը գանձվում էր 430 000
պիաստր, իսկ 8000 մահմեդական ընտանիքից՝ ընդամենը
395 000 պիաստր»¹, այլ կերպ ասած, յուրաքանչյուր հայ
ընտանիքը հարկման էր ենթարկվում այն չափով, որ չափով
5 մահմեդական ընտանիքը:

Պատրիարքարանի խնդրագրի այդ կետն այն էր, որ հա-
յերը հարկման ենթարկվեն ըստ իրենց ունեցած գույքի: Բայց
այդ դեպքում մի քանի անգամ պետք է ավելանար մահմե-
դականների վրա ընկնող այդ հարկի գումարը:

3. Քանի որ գյուղացիներից գանձվող հարկերի (գլխա-
վորապես աշարի՝ տասանորդի) 50%-ից էլ պակաս էր անց-
նում գանձարանին, ուստի խնդրվում էր կապալային սիստե-
մը փոխարինել ուղղակի հարկման սիստեմով: Այդ այլ բան
չէր նշանակում, քան այն, որ կառավարությունը հայերի
նկատմամբ հենց իր կողմից գանձարանի համար վնասակար
համարվող սիստեմը փոխարիներ մի սիստեմով, որը կրկնա-
կի անգամ եկամուտ կտար գանձարանին: Այդ առթիվ
Ի. Ի. Գոլոբորոդկոն գրում է. «Թուրքիայում հարկերի ծան-
րությունը պայմանավորվում էր ոչ թե նրանց նոմինալ չա-
փերով, այլ գանձման գիշատիչ ձևերով: Երկրի տնտեսական
դրության վրա կործանարար ազդեցություն էր ունենում մա-
նավանդ կապալային սիստեմը... Կառավարությունը բազ-
միցս գիտակցել էր կապալային սիստեմի վնասը, որովհետև
տեղական վարչությունները հաճախ գործարքի մեջ էին
մտնում կապալառուների հետ և գիտավորյալ պակասեցնում
էին կապալային գները, դրանով ուղղակի վնաս հասցնելով

գանձարանին: Բայց հին հարկագանձման սիստեմի փոփո-
խության ամեն մի փորձ, հանդիպելով օսմանյան աստիճա-
նավորների անբարեխղճությանը և ազդեցիկ բեյերի դիմա-
դրությունը, ջախջախվում էր: Ամեն մի ռեֆորմ խփում էր
ուղղակի նրանց գրպանին»¹:

Պատրիարքարանի այդ խնդրագիրը, հարկավ, որևէ հե-
տևանք չունեցավ և մնաց շիրագործված ցանկություն: Բայց
մեզ հետաքրքրողը ներկա դեպքում այն չէ, որ խնդրագիրը
շիրագործվեց, այլ այն, թե ինչքան համեստ էին թուրքահայ
ժողովրդի «ներկայացուցչության» պահանջները: Սակայն
դրանք համեստ ու օրինական կարող էին համարվել մարդ-
կային տարրական նորմալ հարաբերությունների դեպքում,
իսկ Թուրքիայում հայերի նկատմամբ այդպիսի հարաբերու-
թյուններն ինքնին հեղափոխություն կարող էին համարվել,
քանի որ «Ղուրանը և նրա վրա հիմնված մուսուլմանական
օրենսդրությունը ամբողջ աշխարհի աշխարհագրությունն ու
ազգաբնակչությունը վեր են ածում պարզ ու հարմար ֆոր-
մուլայի՝ ուղղահավաստների և անհավաստների» (Մարքս):

Յուրաքանչյուր հասարակության մեջ ամեն մարդ իր
կյանքը, գույքը և պատիվը կարող է պաշտպանել երկու ճա-
նապարհով՝ սեփական ուժի և պետական իրավունքի միջո-
ցով: Հայ ոռայան զրկված էր այդ երկու միջոցներից էլ: Նա,
զենք կրելու իրավունք չունենալով, հարկադրված էր ենթարկ-
վել ոտից գլուխ զինված մահմեդականին և զրկված էր դա-
տարանում նույնիսկ վկա լինելու տարրական իրավունքից:

Հալիպի անգլիական հյուպատոս Սկինտը հաղորդում է.
«Օրենքի առաջ քրիստոնյա բնակչության հավասարությունը,
որ փոստացված է 1856 թվականի հալթթը-հուլմայունով, այս-
տեղ գոյություն չունի»: Էրզրումի փոխ-հյուպատոս Ռեսսամը
գրում է. «Մահմեդականների համար երկու գործողություն
միանգամայն անընդունելի են՝ քրիստոնյաների առաջ ոտքի
կանգնել և քրիստոնյաներին թույլ տալ դատարանում մահ-
մեդականների դեմ վկա լինել: Սրանք կրոնական դոգմաներ
են... Ես այդ հարցը հարուցեցի մուսուլման իրավագետների

¹ И. И. Голобородько, Старая и новая Турция, 1908, стр. 22.

¹ Նույն տեղում, էջ 164 և 166:

առաջ, և նրանք ասացին. «Դրանք կրոնական դոգմաներ են՝ հիմնված Ղուրանի սկզբունքների վրա, և եթե նորին մեծությունն սուլթանը այդ սկզբունքներին հակառակ հրովարտակ հրապարակի, ամբողջ մահմեդական բնակչությունը կհրաժարվի դրան ենթարկվել», իրավագետները նաև հայտարարեցին. «Այդպիսի հրովարտակը կարող է ապստամբությունն առաջացնել»:

Հետևաբար, թուրքական օրենսդրության մեջ արտահայտություն գտած առանց դավանանքի խտրության իրավահավասարությունը գործնականում չէր կիրառվում: Այս եզրակացությունն ենք հանգում ո՛չ միայն մահմեդական իրավագետների մեկնաբանությունից: Բազմաթիվ ուրիշ վկայություններ էլ կան: Օրինակ՝ «Եթե դատարանում թուրք հանդես է գալիս որպես հայցվոր կամ պատասխանող, ապա քրիստոնյայի վկայությունը չի ընդունվում: Մի քրիստոնյա գյուղացի անցյալ ձմռանը կորցրել էր երեք ձի, որ հետո գտավ մի ուրիշ գյուղի մահմեդականի մոտ: Գործը հասավ մեջլիսի դատարանին: Հայցվորն իբրև վկա ցույց էր տալիս իր գյուղի բնակիչներին, հայտարարելով, որ նրանցից յուրաքանչյուրը երգամբ կհաստատի ձիերն իրեն պատկանելու մասին: Նրանից պահանջեցին երկու թուրք վկա: Նախընտր էր հայտարարում, թե իրենց գյուղում ոչ մի թուրք չի բնակվում: Թուրք չկա՝ ձի էլ չկա»¹:

Այս փաստերը վերաբերում են նախքան Բեռլինի տրակտատն ընդունելու ժամանակին: Այդ տրակտատի 63-րդ հոդվածը հռչակում է. «Օսմանյան կառավարության բոլոր հպատակներին առանց դավանանքի խտրության պետք է թույլատրվի վկա լինել դատարանում»: Այդպիսով, հաթթը-հումայունի համապատասխան կետն ամրապնդվում էր միջազգային ակտով և թուրքական կառավարությունը եվրոպական տիրությունների առաջ հանդիսավոր պարտավորություն էր ստանձնում կյանքում կիրառել այն, ինչ որ մինչ այդ մնացել էր սոսկ որպես թղթի կտոր:

Հարց է առաջանում, ինչպե՞ս հաշտեցնել կրոնական

դոգմայի և միջազգային պարտավորության միջև գոյություն ունեցող այդ աղաղակող հակասությունը: Հասկանալի է, որ այդ երկու տարամերժ սկզբունքները միասին գոյություն ունենալ չէին կարող: Կամ սուլթանական իշխանությունը պետք է հրաժարվեր կրոնական դոգմաներ կիրառելուց, կամ միջազգային պարտավորությունը պետք է լիներ անվանական, ճիշտ այնպես, ինչպես հաթթը-հումայունի սկզբունքները:

Թուրքիայում գործում էր երկու կարգի դատարան՝ շարիաթի և նիզամական: Շարիաթի աղբյուրն էին Ղուրանի դոգմաները, Մուհամեդի մասին հետագա ավանդությունները և մահմեդական անվանի իրավագետների ֆեթվաները (մեկնաբանությունները): Այդ դատարանի իրավասությանն էին ենթակա անշարժ գույքի, ամուսնության, ժառանգության և դավանանքի վերաբերյալ հարցերը: Կ. Մարքսի արտահայտությամբ՝ Ղուրանը և մուսուլմանական իրավունքն ամբողջ աշխարհի ժողովուրդներին բաժանում էին երկու մասի՝ հավատացյալների և անհավատների¹:

Շարիաթի դատարանը ոչ մի բանով իրեն կապված չէր զգում ոչ Թուրքիայի օրենսդրության, ոչ էլ նրա միջազգային պարտավորությունների հետ: Այդ վերջին դեպքում նկատի էր առնվում, այսպես կոչված, նիզամական դատարանը, որի հիմքը կազմված էր մի կողմից, սելջուկների հռչակավոր պետական գործիչ նիզամ-ալ-Մուլքի կողմից XI դարում Բաղդադում հիմնված իրավա-աստվածաբանական դպրոցի մշակած նորմաները, մյուս կողմից, «ղաստուրը»՝ այն օրենքների ամբողջությունը, որ ընդունել էր թուրքական կառավարությունը, ինչպես և եվրոպական պետությունների օրենքների վրա ձևված քաղաքացիական իրավունքը:

Այսպիսով, Թուրքիայում դատավարական պրոցեսը շարունակում էր մնալ անփոփոխ. դա հանդիսանում էր խոր միջնադարից եկող մուսուլմանների և անհավատների միջև ընդհանուր թշնամություն ստեղծող ինստիտուտ: Ավելին, նոր պայմաններում դրությունն ավելի էր վատթարացել, մա-

¹ «Положение армян в Турции», 1896, стр. 233—237.

¹ К. Маркс и Ф. Энгельс, Сочинения, т. X, стр. 6.

նավանդ, եթե նկատի ունենանք, որ դատավորների պաշտոնները դարձել էին առուծախի առարկա, ընդ որում երկու տարի տևող այդ պաշտոնը կաշառքով գրավելու համար վճարվում էր հսկայական գումար՝ շնչին ոտճիկի դիմաց:

Այդ առեղծվածի գաղտնիքը մեզ բացում է Վիլսոնի զեկուցագրերից մեկը: «Ինձ թվում է,—գրում է նա,—դատարանի հեղինակությունը երբեք այնքան նսեմացած չի եղել, և դատական հաստատություններն այնքան արատավոր ու վաճառվող չեն եղել, ինչպես այժմ: Դատական սանդուղքում վերից վար թագավորում է բացահայտ և ամենալպիրշ կերպով կատարվող կաշառակերություն: Այժմ (այսինքն՝ 90-ական թվականներին.—Ս. Մ.) նույնիսկ հասկացողություն չկա, թե ինչ է նշանակում դատարանի արագ և արդարացի վճիռ ինչպես չբավորների, այնպես էլ ունևորների համար: Վճիռները միշտ կայացվում են նրա օգտին, ով ամենից շուտ և ճարպկորեն է կարողանում կաշառել: Շատ տեղերում բանտարկությունը և բանտից ազատվելը առևտրի գործառնություն է դարձել: Բռնված գողերին հովանավորում են դատավորն ու դատարանի անդամները, որոնք դրա համար ստանում են հափշտակածի առյուծի բաժինը:

Ամենահասարակ հրամանը կարող է անմեղ մարդուն ամիսներով բանտարկված պահել, իսկ ոճրագործություններ և ամեն տեսակի ճնշումներ կատարողները մնում են անպատիժ: Դատավորները մեծ մասամբ տգետ մարդիկ են, առանց որևէ կրթության, գիտեն միայն շարիաթը, որով հիմնավորում են իրենց վճիռները, իսկ շատ հաճախ այդ էլ չգիտեն: Ինչ վերաբերում է դատարանի անդամներին, նրանց գրեթե բոլորի մասին կարելի է ասել՝ իսպառ անտեղյակ են օրենքներից և հազիվ թե նրանց 25⁰/₀-ը թուրքերեն մի քիչ գրել գիտե և հազիվհազ է կարողանում կարդալ այն վճիռները, որոնց տակ պետք է դնի իր կնիքը: Դատավորների շնչին ոտճիկը, նրանց ծառայության կարճ ժամկետը (երկու տարի), այդ պաշտոնը գրավելու եղանակը՝ նրանց հարկադրում են դիմել կաշառակերության: Երբ դատավորը գավառի այդ պաշտոնը գնում է, նրա առաջին միտքը լինում է նախ՝ վերականգնել այդ պաշտոնն ստանալու համար իր կատարած

ծախսերը և երկրորդ՝ միջոցներ հայթայթել ժամկետը լրանալուց հետո նոր տեղում պաշտոն գնելու համար»:

Չափազանց ուշագրավ է այդ նույն զեկուցագրի հետևյալ հատվածը, որը Ռուեն-ժեկմենը շարադրում է համառոտակիս «Որևէ փաստ ապացուցելու համար թուրքական օրենքը պահանջում է երկու վկա: Այդ պահանջը բավարարելու համար Փոքր Ասիայում կազմակերպված է երդմանզանցություն (սուտ վկայություն.—Ս. Մ.): Ամեն մի քաղաքում կան սրճարաններ ու բաղնիքներ, որտեղ ուզած ժամանակ կարելի է գտնել կեղծ վկաներ, որոնք փոքր վարձատրությամբ պատրաստ են երդվելու ինչով ուզես: Այդ անձնավորությունները շատ լավ հայտնի են ամբողջ քաղաքին, այդ թվում հենց իրեն՝ դատավորներին: Բայց այդ չի խանգարում, որ նա ամենայն լրջությամբ լսի նրանց ցուցմունքները, կարգադրի դրանք արձանագրել և դրա հիման վրա վճիռ կայացնել»¹:

Շարիաթի դատարանում, որի բոլոր անդամները մահմեդական հոգևորականներ էին, քրիստոնյաների վկայությունը, իհարկե, չէր ընդունվում: Ինչ վերաբերում է նիզամական դատարանին, ապա ըստ Թանզիմաթի օրենքների և սուլթանական կառավարության միջազգային պարտավորության, վկաների ազգությունն ու դավանանքը դեր չէին խաղում: Բայց այդ այդպես էր գրված օրենքների համաձայն, իսկ թե ինչ էր կատարվում գործնականում, այդ մասին վկայում են ստորև բերվող տվյալները:

Տրապիզոնի հյուպատոս Բիլիոտտին գրում է. «Տրապիզոն քաղաքում քրիստոնյաների վկայությունն ընդունվում է, իսկ կազաներում ոչ մի ուժ չունի»: Բայց Տրապիզոնում ևս դա արտաքուստ, ձևականորեն էր ընդունվում: Այդ երևում է նույն հյուպատոսի հետևյալ վկայությունից. «Թեպետ այդպիսի օրենք գոյություն ունի, բայց մինչև այժմ (Տրապիզոն քաղաքում.—Ս. Մ.) ոչ մի մահմեդական չի մեղադրվել միայն քրիստոնյայի ցուցմունքի հիման վրա, և այդ այն աստիճան ընդունված է բոլորի կողմից, որ քրիստոնյաների

¹ «Положение армян в Турции», 1896, стр. 80—81.

մեջ սովորութիւնն է դարձել դրամական հաշիվներ կատարելիս վկա ունենալ միայն մահմեդականի»¹:

Անատոլիայի գերագույն հյուպատոսը գրում է՝ «Անատոլիայի մեծագույն մասում քրիստոնյաների վկայութիւնը թեև օրենքով ճանաչվում է, բայց գործնականում ոչ մի ուժ չունի: Եթե մահմեդականի և քրիստոնյայի ցուցմունքները միմյանց հակասում են, ապա վերջինի ցուցմունքին ոչ մի ուշադրութիւն չի դարձվում: Օրինակ, երեք քրիստոնյա միասին ճանապարհորդում են. նրանցից մեկին ճանապարհին թալանել էին, ընդ որում երեքն էլ ճանաչում էին թալանողին: Այդ գործի դատավարութեան ժամանակ թալանողը երկու մահմեդական սուտ վկաների միջոցով ապացուցեց իր արդարութիւնը և դատարանը նրան արդարացրեց»²:

Չափազանց ուշագրավ է էրզրումի փոխ-հյուպատոս է-վերստի հետևյալ վկայութիւնը. «Այն անձնավորութիւնները, որոնց ձեռքին է գտնվում արդարադատութիւնը, ամենից առաջ ուշադրութիւն են դարձնում դատվողից ստանալիք գումարի վրա, իսկ հետո՝ կրոնի վրա, որովհետև դա վաղուց սահմանված սկզբունք է, որը դատի ժամանակ ուղղութիւն է տալիս դատարանի վարքագծին: Դատարանի վճիռը նպաստավոր է լինում այն մարդու համար, ով ավելի մեծ կաշառք է տալիս, ընդ որում քրիստոնյայի դեմ դատական պրոցեսում մահմեդականին մեծ զիջում է արվում: Այսպես, հարուստ մահմեդականների միջև վեճ լինելու դեպքում շահում է նա, ով ավելի շատ է վճարում, բայց եթե վեճը գնում է հավասարապես հարուստ քրիստոնյայի և մահմեդականի միջև, ապա քրիստոնյան, դավանանքի տարբերութեան պատճառով, գործը բարեհաջող ելք ունենալու համար պետք է ավելի մեծ գումար վճարի, քան մահմեդականը: Եթե նա հայցվոր է, ապա նրա համար ավելի դժվար է գործը շահել, նույնիսկ եթե ավելի մեծ գումար վճարի, քան հակառակորդը, որովհետև այդպիսի դեպքերում դատարանը գերադա-

տում է հրաժարվել ավելի մեծ գումարից, քան դատապարտել իր հավատակցին: Եթե դատարանի առաջ կանգնած են հարուստ քրիստոնյան և չքավոր մահմեդականը, ապա վերջինը ոչ մի երաշխիք չունի հաջողութեան հասնելու: Իսկ չքավոր քրիստոնյայի և հարուստ մահմեդականի վերաբերյալ, թվում է, պարզաբանելու հարկ չկա: Ամեն ինչ առաջինի դեմ լինելու պատճառով նա կարող է հուսահատվել իր հայցի հաջողութեան գործում»¹:

Ինքնին հասկանալի է, որ եթե քաղաքի հայ վաճառականը, վաշխատուն կամ պետական հարկերի կապալառուն իր տնտեսական առավելութեան շնորհիվ որոշ եզակի դեպքերում կարող էր գործը շահել, ապա հայ գյուղացու համար այդ միանգամայն բացառված էր, որովհետև նրա գանգատը սովորաբար կարող էր լինել իրեն թալանող ավազակների դեմ, որոնք թալանածի «առչուծի բաժինը» հատկացնում էին դատավորներին:

Ավելի ցայտուն պատկերացնել թուրքական պետականութեան պայմաններում բուրժուական գրավոր օրենքների և կյանքում ֆեոդալական ամենաբարբարոս կամայականութեան սերտաճումը, քան ցույց է տրված վերոհիշյալ նկարագրութեան մեջ, հազիվ թե հնարավոր լինի:

Երբ խոսք է լինում Թուրքիայի քրիստոնյա բնակչութեան, այդ թվում նաև հայերի իրավագրկութեան մասին, այդ շարք է հասկանալ սոսկ այն իմաստով, թե պետութեան աչքում մի ժողովուրդն արտոնյալ էր, մյուսը՝ ոչ. այդ նշանակում էր ոչ միայն պետութեան խտրական վերաբերմունքը դեպի քրիստոնյա և մահմեդական հպատակները: Դարերի ընթացքում ստեղծվել էր յուրահատուկ հասարակական հոգեբանութիւն, որով մահմեդականի աչքում ուղղահավասարի և գլխավորի հարաբերութիւնը այլ բան չէ, քան ստրկատիրոջ և ստրուկի հարաբերութիւնը: Այդ հասարակական հոգեբանութիւնն իր ցայտուն արտահայտութիւնն էր գտել, այսպես կոչված, օթևանի պարեմակի մեջ:

1 АВПР, ф. Политархив, д. № 3440, лл. 5—23.

2 Նույն տեղում:

1 Նույն տեղում, էջ 83:

Եթե տնտեսական տեսակետից այդ պարհակը համեմատենք կեղեքումների մյուս ձևերի հետ, հարկավ, նա անսպասելիորեն երկրորդական նշանակություն ունի: Բայց դրա նշանակությունը խիստ մեծ էր այն առումով, որ կապված էր քրիստոնյա բնակչության բարոյական սրբությունները ոտնահարելու հետ: Ահա ինչու օթեանի պարհակի վերացման հարցը բոլոր վավերագրերում կապվում է «պատվի իրավունքի» պաշտպանության հարցի հետ և համապատասխան փաստաթղթերում կյանքի, գույքի ապահովության կապակցությունը միշտ արձանագրվում է նաև «պատվի ապահովությունը»:

Օրենքով սահմանված էր և դարերի ընթացքում արդեն կենցաղ էր դարձել, որ ամեն մի քրիստոնյա ընտանիք պարտավոր է երեք օր իր տանը «հյուրընկալել» մահմեդական ճանապարհորդի և պետական ծառայողի՝ սկսած մուրացկանից մինչև ամենաբարձր աստիճանավորին: Քրիստոնյա տաները իրավունք չունեն հրաժարվելու այդ պարհակից, ինչպես որ, օրինակ, իրավունք չունեն հրաժարվելու տասանորդից: Նա պարտավոր էր առանց առարկության իր անկող «հյուրին» հայթայթել այն ամենը, ինչ որ նա կպահանջեր: Գյուղացին պարտավոր էր կատարել նրա բոլոր քահանայքները:

«Օթեանի պարհակի» վերաբերյալ ստորև բերվող նկարագրությունը, — գրում է Մալքում-Մաքուրը, — ընթերցողին պատկերացում կտա այն երկրային դժոխքի մասին, որի մեջ ապրում են սուլթանի քրիստոնյա հպատակները: Այդ դեպքը հաղորդել է Times-ի հատուկ թղթակիցը Թուրքիայում և տպագրել է 1877 թ. փետրվարի 7-ին: «1877 թվականի ծննդյան տոնի օրը մի զապթի (ոստիկան) եկավ Բրանկորստի և ցանկացավ օթեանել գյուղացիներից մեկի տանը, որը երկու սիրունիկ աղջիկ ուներ: Գյուղի տանուտերը, որը պարտավոր էր օթեան հատկացնել, հայտնեց, թե այդ տանը երկու մահմեդական արդեն բնակվում են և առաջարկեց օթեանել մի ուրիշ ընտանիքում: Այդ վիրավորանքի համար ոստիկանն անողորմ կերպով ծեծեց տանուտերին: Այնուհետև, իր ձին ախոռը քաշելով, նա հանեց ձիու սանձը, հագրեց

տանուտերին, որը տոնական զգեստով էր և պատրաստվում էր պատարագի գնալ, նստեց նրա մեջքին, սանձը ձեռքն առավ և սկսեց քշել գյուղի միջով՝ աշխատելով տանել ամենացելանոտ տեղերով: Հասնելով այն տանը, որ տանուտերը հատկացրել էր նրան որպես օթեան, ոստիկանը ցատկեց գետին: Նրանց շրջապատեցին այդ տեսարանից ցնցված գյուղացիները, որոնք այնուամենայնիվ չէին համարձակվում միջամտել և բողոքել: Ոստիկանը տանտիրոջը հրամայեց մի խուրձ խոտ բերել. երբ տանտերը միջամտեց դժբախտ տանուտերի համար, այնպիսի ապտակ ստացավ, որ գետին գլորվեց: Այդ «մարդ-ձիուն» սանձով կապեց դուռն օղակից և մտրակի հարվածով ստիպում էր խտան ուտել: Դժբախտ մարդը, բոլորովին ջարդված, արցունքներով ողողելով իր առաջ դրված խոտը, աշխատում էր կատարել այդ քիրտ հրամանը և ատամներով վերցրեց մի քիչ խոտ և սկսեց ծամել... Տանուտերը գյուղում որոշ նշանակություն ունեցող մարդ է, կառավարությունը նրան վստահում է տարեկան միջին հաշվով զանձել 200 000 պիաստր հարկ, և չնայած դրան, նա այնուամենայնիվ երեք շէր համարձակվել զանգատվել իրեն հասցրած վիրավորանքի համար, որովհետև ոչ մի բան նրան չէր փրկի ոստիկանի կամ նրա ցեղակիցների վրեժխնդրությունից»¹:

Պարզաբանումներն ավելորդ են:

Գոկտոր Ռայտը իր «Slaves and Turks» աշխատության մեջ Դամասկոսի վերաբերյալ գրում է. «Թուրքերն ավերածություններ են կատարում ո՛չ միայն վայրագ մուլեզնուկյան վիճակում, այլև լիակատար սառնասրտությամբ և միանգամայն համապատասխան իրենց իրավունքին, օրենքին և հավատին: Թուրքական տիրապետության տենդենցն այն է, որ անբարոյականացնի, տանջի, ավերի... Ես ճանաչում էի բազմաթիվ քրիստոնյա ամուսինների, որոնք սպանվել են լոկ այն պատճառով, որ պաշտպանել են իրենց կանանց պատիվը: Իմ սեփական տունը ապաստարան էր մի երիտասարդ քրիստոնյա աղջկա համար, որին բոլորի առաջ հետապնդում

¹ «Положение армян в Турции», стр. 143.

էր ֆրանսերեն խոսող և ընդհանրապես քաղաքակրթութեան հավակնութիւն ունեցող նահանգապետը... Թուրքական կայսրութեան մեջ հազիվ թե գտնվի գոնե մի գյուղ, որը չունենա իր ողբերգական հիշողութիւնները, որոնց մասին նույնիսկ դժվար է մտածել և խոսել...»¹:

Երբ Բալկանյան թերակղզու սլավոնների հարցը լայնորեն արծարծվում էր եվրոպական մամուլում, մեծ տերութիւնների կառավարութիւնները հարկադրված եղան զբաղվել այդ հարցով, հարկավ, ոչ թե նկատի ունենալով բալկանյան ժողովուրդների դժնդակ վիճակը, այլ այն, թե ինչ շահ կարող են կորզել ստեղծված իրադրութիւնից: Եվ ահա Անգլիայի արտաքին գործերի մինիստրութիւնը հատուկ միտնալով այնտեղ է ուղարկում մայրը Քոկսին՝ տեղական անառարկելի նյութերի հիման վրա զեկուցագիր կազմելու համար: Քոկսն իր զեկուցագրում փ միջի այլոց գրում է. «Քրիստոնյաները պարտավոր են պահել ճանապարհորդներին, մինչդեռ մահմեդականներն ազատ են այդ պարհակից... Թուրքական ոստիկանութիւնն ապրում է բնակչության հաշվին. նրա բարոյական ազդեցութիւնը քրիստոնյա գյուղացիութեան մտածելակերպում այնպիսին է, որ չկա մի գործողութիւն, որը այդ ոստիկանութիւնը չկարողանա անպատիժ կատարել ամեն մի գյուղում: Ես կարծում եմ, որ այն ամենը, ինչ կարելի է ասել կանանց բռնաբարութիւնների մասին, կարելի է վերագրել այդ կարգի փաստերին»:

Մի քանի փաստ էլ բերենք թուրքահայ գյուղացիների կյանքից, ընդ որում այս փաստերը վերաբերում են ո՛չ թե 70-ական թվականներին, այլ 90-ական, երբ գոյութիւն ունեին ոչ միայն Բեռլինի տրակտատի համաձայն Թուրքիայի վերցրած պարտավորութիւնները, այլև 1880 թվականի մեծ տերութիւնների երկու նոտաներին (11/6 և 7/9) ի պատասխան թուրքական կառավարութեան տված խոստումները՝ Հուլիսի 5-ի նոտայով թուրքական կառավարութիւնը խոստանում է՝ «Օսմանյան կառավարութիւնը մտադիր է իրագործել այդ կետերը (այսինքն՝ 61-րդ հոդվածը.—Ս. Մ.) և

Քրդատանի (այսինքն՝ Հայաստանի.—Ս. Մ.) բոլոր մասերը և մյուս վիլայեթները մի քանի գիտակ աստիճանավորներ ուղարկել, որոնք պետք է առավել իրական միջոցներ գտնեն ինչպես հայերի, այնպես էլ նորին մեծութիւն սուլթանի մյուս հպատակների անվտանգութիւնն ապահովելու համար»:

Իսկ հոկտեմբերի 3-ի պատասխան-նոտայում ասված է՝ «Բնակչության անվտանգութիւնը և կարգն ապահովելու նպատակով էրզրումի, Վանի, Բիթլիսի և Դիարբեքի վիլայեթների դատարանները պետք է կազմակերպվեն և ռեֆորմների ենթարկվեն...»:

Ահավասիկ այդ խոստումներից 10 տարի անց թուրքական կառավարութիւնն ինչպես էր ապահովում հատկապես հայ բնակչության անվտանգութիւնը:

Համապատասխան 1891 թվականի հունվարի 30-ի զեկուցագրերից մեկում կարդում ենք. «Երեսուն մարդուց կազմված ոստիկանների մի խումբ, որ գտնվում էր արշավում, գիշերը տեղավորվում է Բիթլիսից մի քանի ժամվա ճանապարհ հեռու գտնվող տասը տնից բաղկացած մի փոքր գյուղում: Նրանցից շորսը տեղավորվում են նոր ամոսանացած մի երիտասարդ հայի մոտ: Նա, լսելով, որ մարդիկ մտածում են անարգել իր կնոջ պատիվը, կնոջը գաղտնի ուղարկում է հարևանի տունը: Ոստիկանները, այդ իմանալով, հրամայում են վերադարձնել կնոջը և մերժում ստանալով, սարսափելի ծեծում են նրան: Նա ևս փախչում է տնից, բայց երկու օր անց մահանում է հասցրած հարվածներից»¹:

Եվ այս կամայականութիւնները շարունակվում են ամենուրեք, անգն հայերի խոր վրդովմունքի ու ցասման պայմաններում:

Վանի փոխ-հյուպատոսի 1891 թվականի փետրվարի 17-ի զեկուցագրում կարդում ենք. «Ես հավաստի տեղեկութիւն եմ ստացել, որ քննարկի ամսի 7-ին Բիթլիսից Ալի բեյի որդին մինչև 40 շերքից ոստիկաններով գնում են հայկական Հորմուզ գյուղը և գիշերն օթևանում են ոմն Խաչիկի տանը: Այդ մարդը սոսկալի դաժան ծեծի է ենթարկվել և մահացել է այն

¹ Նույն տեղում, էջ 142:

¹ Նույն տեղում, էջ 144:

պատճառով, որ միջոցներ է ձեռք առել իր պատիվը պաշտպանելու համար»¹:

Այդ նույն ժամանակ էրզրումի հյուպատոսը հաղորդում է. «15 օր առաջ մուղիր Հուսեփնն իր եղբորորդու հետ Պատնոսում խուժել է Գասպար անունով մի հայի տուն, նպատակ ունենալով տիրանալ նրա հարսին՝ մի շատ գեղեցիկ երիտասարդ կնոջ: Տան բնակիչներն աղաղակ են բարձրացրել և օգնություն կանչել, որի հետևանքով մուղիրը հանել է ատերձանակը, կրակել և տեղնուտեղը սպանել կնոջը»²:

Բալկանների, Իրաքի և Հայաստանի վերաբերյալ վերը շարադրված վկայությունները պարզ ապացույց են այն բանի, որ թուրքիայում բարոյականության ու պատվի մասին ստեղծվել էր յուրահատուկ հասկացողություն, որն անըմբռնելի է սովորական մարդկային հարաբերությունների պայմաններում: Եթե հայր կամ որևէ ֆրիստոնյա պաշտպանում է իր պատիվը, հենց դրանով անպատվում է բուրժուական շին և արժանանում ինֆեռադատաբանի, իսկ եթե այդ շի հաջողվում, ապա պատվում է իշխանության կողմից:

Չի կարելի չհամաձայնել այն կարծիքի հետ, որ դրա պատճառներից մեկը ինքնապաշտպանության միջոցներից հայերի զուրկ լինելն էր: Ինքնին հասկանալի է, որ զինված հակառակորդի հարձակումից պաշտպանվելու միակ միջոցը զինված դիմադրությունն է: Բայց այդ հակասում էր թուրքիայի պետական օրենքին: Ռայան թեկուզ ինքնապաշտպանության նպատակով դենք գործածելու դեպքում համարվում էր խոտվարար, պետական հանցագործ և ենթակա էր դատական խիստ պատասխանատվության, իսկ նրա հարևան մահմեդականը ոչ միայն ինքնապաշտպանության, այլև կողոպուտի, առևանգության, սպանությունների նպատակով իրավունք ուներ կրելու ամեն տեսակի զենք: Ավելին, բազմաթիվ տվյալներ վկայում են, որ հենց իշխանությունն ինքն էր նրանց զենք մատակարարում:

էրզրումի հյուպատոսն իր զեկուցագրում հաղորդում է.

1 Նույն տեղում, էջ 145:

2 Նույն տեղում:

«Վարդենիսում տեղի ունեցած քրդերի և հայերի միջև ընդհարման ժամանակ, որ առաջացել է մի հայ հարսնացու աղչկա քրդերի կողմից հափշտակելու փորձի հետևանքով, սպանվել են մեկ հայ և երկու քուրդ: Այժմ պատիվ ունեմ հաղորդելու ձեր գերագնացությանը, որ այդ գործով ձերբակալված և Մուշի բանտում բանտարկված հայերից 17 հոգի դատապարտվել են տասնհինգական տարվա բանտարկության: Հարձակմանը մասնակցող քրդերին պատժելու համար ոչինչ չի արված»¹:

Հարց է առաջանում, ինչպե՞ս կարող էր թեկուզ արտաքուստ, թեկուզ ձեռկանորեն հիմնավորել այն գործողությունը, երբ աղչիկ հափշտակելու նպատակով հարձակվողները նույնիսկ դատի չեն տրվել, իսկ աղչկան անպատվությունից փրկողները սոսկալի պատժի են ենթարկվել:

Այդ հարցի պատասխանը կարելի է գտնել նույն զեկուցագրի հետևյալ տողերում. «...Տասնյոթ հայերից ինը քյոփրիքյոյցի են և յոթը թե ութը ալաշկերտցի, նրանք այստեղի (էրզրումի.— Ս. Մ.) բանտում մնացին 3—4 ամիս, մեղադրվելով որպես խոտվարաբներ»:

Բնական է, որ հարսնացու աղչկան պաշտպանելը ոչ մի կերպ չէր կարող որակվել որպես խոտվարարություն, հետևաբար, այդ պաշտպանությունը խոտվություն է համարվել այն պատճառով, որ հայերը զենքի են դիմել, թեկուզև պաշտպանության նպատակով: Ուստի հյուպատոսական զեկուցագրերում հաճախ կարելի է հանդիպել այսպիսի տողերի՝ «Թեև լավ հայտնի է, որ քրդերն ապրում են քրիստոնյաներին կողոպտելով, թուրքական կառավարությունը որևէ ջանք չի գործադրում, որպեսզի նրանց զինաթափ անի կամ քրիստոնյաներին պաշտպանի, մինչդեռ այն օրենքը, որով քրիստոնյաներին արգելվում է զենք ունենալ և կրել, խստորեն պահպանվում է»²:

Որպեսզի թուրքական կառավարությունը քրիստոնյաներին թույլ տար զենք կրելու կամ քրդերին զրկեր զենք կրելու իրավունքից, նա թուրքական կառավարություն չպետք է լիներ:

1 «Положение армян в Турции», стр. 170.

2 Նույն տեղում, էջ 139:

Այդ անհի, նշանակում էր փոխել ամբողջ պետական կառուցվածքը, քանի որ, ինչպես ասել ենք, այդպիսի հարաբերություններ բխում էին Ղուրանի դոգմաներից, իսկ պետական ամբողջ սիստեմը հիմնված էր այդ դոգմաների վրա: Ահավասիկ, այս էր, որ ձևացնում էին, թե շեն հասկանում ոչ միայն փաստորեն արձանագրող հյուպատոսները, այլև մեծ տերությունների միեխտրները:

Հայ գյուղացիությունը, ինչպես ամեն մի խաղաղ երկրագործ գյուղացիություն, հարկավ, կգերադասեր, որ ոչ թե իրեն զենք կրելու իրավունք տրվի, այլ իրեն հետապնդող հարևանները զինաթափվեն: Բայց սուլթանական կառավարությունը հայտարարում էր, որ այդպիսի միջոցառում անհնարին է իրագործել, քանի որ քուրդ բնակչությունը դարերի ընթացքում միշտ զինված է եղել: Ուշագրավ է, որ երբ հայերին զենք կրելու իրավունքի հարցը 1877 թվականին առաջ քաշվեց հինգ մեծ տերությունների կողմից (բացառությամբ Անգլիայից), ապա սուլթանը հայտարարեց, որ դա իբրև կրոնական դոգմա իր իրավասությունից վեր է: Հարցը հանձնեց մուսուլմանական բարձր հոգևորականների և իրավագետների խորհրդակցությանը՝ շեյխ-ու-իսլամի նախագահությանը, որն անառարկելի ֆեթվա հրապարակեց քրիստոնյաներին զենք կրելու իրավունք տալու դեմ այն պատճառաբանությամբ, թե սրբազան օրենքով դա արգելված է և փոփոխման ենթակա չէ:

Եվ մեծ տերություններն օրակարգից հանեցին այդ հարցը, իրենց բարոյական պարտքը կատարած համարելով:

Էրզրումի անգլիական հյուպատոս Լյուդը 1890 թվականի ապրիլի 19-ի զեկուցագրում տալիս է հայերի ընդհանուր վիճակի սեղմ բնութագիրը. «Ձերդ գերազանցության հեռագիրն ստանալուց հետո ես լսել եմ հայերի նկատմամբ մի քանի շատ լուրջ ոճրագործությունների և բռնությունների վերաբերյալ, որոնց մասին ես կհաղորդեմ, հենց որ իմանամ մանրամասնությունները: Այնպիսի երկրում, ինչպիսին Թուրքիան է, անօրինություններ միշտ պետք է սպասել. բայց, դժբախտաբար, գրեթե բոլոր դեպքերում զինված և ոչ ոքի շենթարկվող

քրդերը ոճրագործությունների պատճառն են լինում, իսկ անզեն, անպաշտպան հայերը՝ նրանց զոհը»¹:

Բայց այդ դեռ բոլորը չէ: Քուրդ աշիրեթապետների ոճրագործությունները ոչ միայն պաշտպանություն էին գտնում սուլթանական կառավարության կողմից, այլև հենց ինքը՝ կառավարությունն էր դրդում այդ ոճրագործությունները կատարելուն: Եվ այդ արվում էր օրավուր ավելի ու ավելի բացահայտորեն: «Հայերի սարսափը,—կարդում ենք զեկուցագրերից մեկում,—խիստ աճել է քրդերի վարքագծի հետևանքով. նրանցից շատերը բացեիբաց հայտարարում են, որ իրենց հրահանգված է ճնշել հայերին և որ քրիստոնյաների նկատմամբ ամեն տեսակի բռնությունների համար դատարանի առաջ իրենց ապահովված է անպատասխանատվություն»²:

Մինչև այստեղ մենք աշխատեցինք ընդհանուր գծերով պատկերել այն իրադրությունը, որի մեջ առաջացան Սասունի գյուղացիական ապստամբությունը և Անատոլիայի հայության անագորույն կոտորածները: Այդ ֆոնի վրա դրվար չէ հասկանալ այն պատճառները, որոնք առաջ բերին մեր ժողովրդի մի բուռ հատվածի այդ հերոսամարտը և 90-ական թվականների կեսերին կատարված եղեռնական կոտորածը Անատոլիայի բոլոր հայաբնակ վայրերում:

¹ «Положение армян в Турции», стр. 139.

² Նույն տեղում, էջ 96.

Չորրորդ գլուխ

ՀԱՅԱԿԱՆ ԿՈՏՈՐԱԾՆԵՐԸ

1880 թ. հունիսի 11-ի մեծ տերութիւնների նույնական նոտան թուրքական կառավարությանը:—Ք. Դոան ստահող պատասխանն այդ նոտային:—Տերութիւնների կոլեկտիվ նոտան, այդ նոտայի դեկլարատիվ բնույթը:—Թուրքական կառավարության պատասխան-նոտայի «վրդովեցուցիչ» բնույթը:—Ռեֆորմների նախաձեռնութիւնից խուսափելու տերութիւնների քաղաքականութիւնը:—Կոտորածների նախապատրաստումը կառավարական գործակալների միջոցով:—«Հեղափոխութեան» հորինումը կառավարության կողմից:—1890 թվականի էրզրումի ջարդը:—Կ. Պոլսի Գում-Գափուի ցույցը և նրա հետևանքները:—Կոտորածների միջոցով Հայաստանում հայ բնակչության տոկոսն իջեցնելու քաղաքականութիւնը:—Համիդիե գնդերի կազմակերպման նպատակը:—Քրդերի սանձարձակ գործողութիւնների հովանավորումը իշխանութիւնների կողմից:—Հայ-քրդական հարաբերութիւնները 80-ական թվականներից առաջ:—1893—1894 թթ. գյուղացիական շարժումները Սասունում:—Սասունի ապստամբութիւնը, նրա պատճառներն ու առիթները:—Սասունի գյուղացիության անազորուն կոտորածները կառավարության միջոցով:—Կառավարության ստահող հերյուրանքները ապստամբության քաղաքական բնույթի մասին:—Ռուս դիվանագետ Սմիռնովի զեկուցագիրը Սասունի ապստամբության մասին:—Սասունի ապստամբության և կոտորածների նկարագրութիւնը ըստ մասնավոր նամակների:—Անգլիական փոխ-հյուպատոս Հովորդի զեկուցագիրը Սասունի ապստամբության և կոտորածների մասին:—Ցարական Ռուսաստանի, Ֆրանսիայի և Անգլիայի կառավարու-

թիւնների բռնած ոճրագործ դիրքը Սասունի կոտորածների նկատմամբ:—Սասունի դեպքերի թուրքական քննչական հանձնաժողովը և Անգլիայի, Ռուսաստանի և Ֆրանսիայի դատորդ-պատվիրակները:—Երեք մեծ տերութիւնների պատվիրակների կոլեկտիվ զեկուցագիրը:—Հայկական արյունը սակարկութեան առարկա իմպերիալիստական պետութիւնների միջև:—Կ. Պոլսի Բարը-Ալիի ցույցը:—Տրապիզոնի կոտորածները:—Հայերի նախահարձակ լինելու մասին սուլթան-ցարական դիվանագիտութեան հերյուրանքները:—Դիարբեքի ջարդերը:—Ռուհայի ջարդերը:—Սվազի ջարդերը:—Օտտոմանյան բանկի գրավման արկածախնդրութիւնը և հայկական ջարդերը Կ. Պոլսում:—Ականատեսներ Եախովսկոյի, Կայդանովայի և Վիկտոր Բերարի վկայութիւնները:—«Հնչակի» և «Դրոշակի» հողվածները որպէս թղթային հեղափոխութիւն:—Այդ հողվածների օգտագործումը թուրքական կառավարության և ցարիզմի կողմից:

Սկսած 1878 թվականի հուլիսի 13-ից մինչև 1880 թվականի հունիսի 11-ը, այսինքն՝ Բեռլինի տրակտատն ստորագրելուց հետո երկու տարվա ընթացքում մեծ տերութիւնների դիվանագիտութիւնը որևէ քայլ չէր արել Թուրքիայից պահանջելու իրագործել այն պարտավորութիւնները, որ Բեռլինի տրակտատի 61-րդ հոդվածով նա վերցրել էր իր վրա: Այդ առումով առաջին քայլը 1880 թվականի հունիսի 11-ի նույնական նոտան էր, որ տրակտատն ստորագրող պետութիւնների ներկայացուցիչներն առանձին-առանձին ներկայացրին թուրքական կառավարությանը:

Այդ նոտայում մեզ հետաքրքրող հարցի վերաբերյալ ասված էր.

«1878 թվականի հուլիսի 13-ին Ք. Դուռը Բեռլինի տրակտատի 61-րդ հոդվածի ուժով պարտավորվել է հայերի բնակեցրած պրովինցիաների տեղական պայմաններին համապատասխան վարչական ռեֆորմներ և բարելավումներ մտցնել առանց հետագա հապաղումների, պաշտպանել այդ ժողովրդի անվտանգութիւնը քրդերի և չերքեզների բռնութիւններից ու հարստահարումներից և համապատասխան միջոցառումների մասին պարբերաբար հաղորդել տերութիւնները»:

րին, որոնց վրա պարտավորություն է ընկած հետևելու դրանց կատարմանը»:

«...կառավարությանը¹ որքան հայտնի է, Բ. Դուռը երբեք չի հայտնել իր կողմից ձեռք առած միջոցների մասին...»:

«Տերությունների գործակալների ուղարկած բոլոր զեկուցագրերն ապացուցում են, որ այդ պրովինցիաների դրությունը ծայրահեղորեն ողբալի է, և... կառավարությունը չի կարող թույլ տալ, որ Բեռլինի տրակտատով ռեֆորմներին վերաբերող այդ կետերը մնան որպես մեռած տառ: Ընդ որում, համոզված լինելով, որ տերությունների համատեղ գործունեությունը կարող է հարկադրել Բ. Դուռը կենսագործելու իր պարտավորությունները, ...կառավարությունը, որպես Բեռլինի տրակտատի ստորագրող, իրեն հարկադրված է համարում պահանջելու այդ ակտի 61-րդ հոդվածը լիովին և անհապաղ կենսագործելու և նորին սուլթանական մեծության կառավարությանը հրավիրում է, տրակտատի ուժի հիման վրա, հաշվետվություն ներկայացնել իր ձեռնարկած միջոցառումների մասին...»:

Թուրքական կառավարությունը, բոլոր վեց պետություններից առանձին-առանձին ստանալով տառացիորեն նույն նոտան, հարկադրված էր հորինել մի պատասխան, որը առժամպես քողարկեր իրերի իսկական վիճակը: Արտաքին գործերի մինիստր Աբիդին փաշայի պատասխան-նոտայում հիշատակվում է, որ կառավարությունը ծրագրում է լուրջ ռեֆորմներ անցկացնել այդ վիլայեթներում: Նա գրում է, որ հատուկ հանձնաժողով է նշանակված տեղերում ռեֆորմների հարցն ուսումնասիրելու: Հանձնաժողովն արդեն գործի է անցել և որոշ բան արդեն ձեռնարկված է, օրինակ, նիզամական դատարանը անջատված է գործադիր վարչությունից, հարկերի և մանավանդ տասանորդի բաշխման սիստեմը բարելավվում է, տեղերում կազմակերպվում է համապատասխան ոստիկանություն. Բեքիր փաշան ուղարկվել է տեղերում ստուգման ենթարկելու ոստիկանության դրվածքը:

¹ Բազմակետերի տեղերում նշված է համապատասխան տերության անունը:

Տերությունների դեսպանները Աբիդին փաշայի այդ պատասխան-նոտայի տեքստն ուղարկում են համապատասխան հյուպատոսներին տեղում ստուգելու դրա ճշտությունը: Բոլոր պատասխանները միաբերան վկայում են, որ Բ. Դուռն նոտայում հիշատակված ռեֆորմները իրականում գոյություն չունեն, որ հանձնաժողով իրոք նշանակված է եղել, բայց դա եղել է անվանական և որևէ գործ չի ձեռնարկել, քանի որ այդպիսի հանձնարարություն չի էլ ստացել: Նիզամական դատարանները գործադիր վարչությունից անջատված են վաղուց և ռեֆորմների հետ որևէ առնչություն չունեն, իսկ այդ անջատման հետևանքը հայ բնակչության համար եղել է քացասական: Ոչ հարկերի ու տասանորդի բաշխման սիստեմի բարելավումը, ոչ էլ ոստիկանության կազմակերպման մասին հավաստիացումներն իրականության հետ ոչ մի առնչություն չունեն, և այդ բոլորը լոկ երևակայական ու սուտ տեղեկություններ են: Ճիշտ է, որ Բեքիր փաշան ուղարկվել է այդ վիլայեթները, բայց նա չէր կարող ռեզիդենտի ենթարկել գոյություն չունեցող հաստատությունները: Այսպիսով, ապացուցվում էր, որ Բ. Դուռն պատասխան-նոտան սկզբից մինչև վերջ հիմնված էր գոյություն չունեցող «տվյալների» վրա: Բայց ամենաազաղակող սուտը արտահայտված էր այդ պատասխանի հետևյալ տողերում.

«Ձերդ գերազանցություն, վերջացնելով, ես պետք է կատեգորիկ կերպով հաստատեմ, որ Վանի, Դիարբեքիրի, Բիթլիսի, էրզրումի, Սվազի հայ բնակչության պաշտոնական ցուցակագրությունը հետևյալ արդյունքն է տվել. հայերի թիվը ամբողջ բնակչության համեմատությամբ հասնում է 17%-ի, մյուս ոչ-մահմեդական համայնքներինը՝ 40%-ի, իսկ մուսուլմաններինը՝ 79%-ի»:

Այս վիճակագրական տվյալներին մենք առանձին կանդիդատանք հետազայում, առայժմ հարկ ենք համարում միայն նշել, որ իրականում որևէ «պաշտոնական ցուցակագրություն» չէր կատարվել և այդ տեղեկությունները միայն հորինել էին տեղական վարչությունները և մտել թուրքական այսպես կոչված «սալնամեների» (տեղեկագրերի) մեջ:

Ռուլեն-ժեկմենը, ամփոփելով անգլիական հյուպատոսնե-

րի պատասխանները Աբիդին փաշայի նոտայի առթիվ, գրում է.

«Համայնքներ կազմակերպելու և մուդիրներ նշանակելու գործում ենթադրյալ ռեֆորմները կատարվում են պարզապես զավեշտական պայմաններում» (հյուպատոս Կլեյտոնի զեկուցագրից): «Նախագծի անհեթեթությունը,— գրում է մի ուրիշ հյուպատոս,— օր-օրի վրա ավելի ակնհեր է դառնում»: «Մահմեդականների և քրիստոնյա բնակչության թիվը միանգամայն փոխված է: Աստիճանավորների ընտրությունը նողկալի է: Այսպես, օրինակ, Բասենի շրջանում 17 մուդիրներից (բոլորն էլ քուրդ) միայն մեկն է, որ կարողանում է թուրքերեն կարդալ և գրել. մնացածները զլխովին անգրագետ են»¹.

Ինչպես թուրքական կառավարության պատասխան-նոտայում արտացոլված «հաշվետվությունը», այնպես էլ այդ «հաշվետվության» առթիվ հյուպատոսների տված տեղեկություններն ու պարզաբանումներն ապացույց էին, որ թուրքական կառավարությունը մտադրություն չունի հայկական վիլայեթներում որևէ ռեֆորմ կատարել, այլ աշխատում էր հարցը ձգձգել և քնեցնել: Ուստի տերությունները հարկադրված են լինում երկրորդ նոտան ներկայացնել, այս անգամ արդեն ոչ թե առանձին-առանձին, այլ միասին, և այդ նոտայի տակ ստորագրում են Անգլիայի, Ռուսաստանի, Գերմանիայի, Ավստրո-Հունգարիայի, Ֆրանսիայի և Իտալիայի ներկայացուցիչները: Այդ նոտայում ասված է, օրինակ. «Այն արտահայտությունները, որոնցով Բ. Դուռը իրեն իրավունք է համարել արտահայտվել հայերով բնակեցված պրովինցիաներում կատարվող ոճրագործությունների մասին, ապացուցում են, որ նա չի ընդունում անարխիայի այն աստիճանը, որը տիրապետում է այդ պրովինցիաներում, և իրերի դրության այն լրջությունը, որի շարունակությունը, ամենայն հավանականությամբ, կարող է հանգել այդ լայնածավալ շրջանների ամբողջ ֆրստոնյա բնակչության ոչնչացման» (ընդգծ. մերն է.— Ս. Մ.):

Այս տողերից երևում է, որ վեց մեծ տերությունների աբ-

տաքին գործերի ղեկավար շրջանների համար դեռ 1880 թվականին պարզ էր, որ հայերի նկատմամբ թուրքական կառավարության վաղեմի քաղաքականության շարունակումը տանում էր դեպի հայկական վիլայեթներում հայ տարրի ոչնչացումը:

Շատ ուշագրավ է տերությունների կոլեկտիվ նոտայի նաև հետևյալ դրույթը. «Բ. Դուռը ցանկանում է միատեսակ կազմակերպություն տալ ինչպես քրդերին, այնպես էլ հայերին: Ամենից առաջ անհրաժեշտ է ըստ հնարավորության նրանց վարչականորեն բաժանել այն պատճառով, որ անհնարին է միևնույն օրենքները տարածել նստակյաց և կիսաթափառական ցեղերի վրա: Համայնքների և ընդհանրապես վարչական խմբերի բաժանումը պետք է կատարվի այնպես, որ միացվեն միասեռ տարրերը, այսինքն՝ հայերին կամ, անհրաժեշտության դեպքում, հայերին և թուրքերին խմբավորել, առանձնացնելով քրդերից: Բացի այդ, թափառական քուրդ տարրը, որն ապրում է լեռներում և հայերով բնակեցված հովիտներն է իջնում միայն նրա համար, որպեսզի այնտեղ անկարգություններ կատարի, չպետք է մտցվի յուրաքանչյուր համայնքի բնակչության թիվը որոշող տախտակի մեջ...»: «Անհրաժեշտ է քրդերին հանել այն ցեղերի շարքից, որոնք ենթակա են հայ բնակչությանը խոտոացված ռեֆորմներին, և նրանց տալ հատուկ կազմակերպություն՝ համապատասխան իրենց պրիմիտիվ և ռազմատենչ բարքերին: Նստակյաց և քուրդ տարրի լեռնու տարրերի վերաբերյալ ներքոստորագրողները համոզմունք են հայտնում, որ բոլոր այն պարհակներն ու կոռային աշխատանքները, որոնց քրդերը ենթարկում են հայերին ոչ թե իրավունքի սկզբունքով, այլ արմատավորված շարաշահությունների միջոցով, պետք է վերացվեն»:

Նոտայի հեղինակները, ելնելով իրենց տրամադրության տակ եղած հյուպատոսական տվյալներից, դիվանագիտական լեզվով պարզապես սուտ ու հորինված են համարում թուրքական կառավարության կողմից բերված վիճակագրական տվյալները: Այդ առթիվ նրանք գրում են. «Ծիշտ է, որ Բ. Դուռը ջանում է նսեմացնել այդ հոդվածի (61-րդ.—Ս. Մ.) նշանակությունը, վկայակոչելով ամբողջ ժողովրդի թվի հա-

¹ «Положение армян в Турции», 1896, стр. 95.

մեծատուօթյամբ ինչպես հայ, այնպես էլ քրիստոնյա մյուս բնակչության քանակը: Նոտայում ներկայացված աղյուսակը այն աստիճան տարբերվում է բոլոր մյուսներից, որ տե-
րությունները չեն կարող այն ընդունել որպես բացարձակ ճշմարտություն»:

Կոլեկտիվ նոտան, որ գրվել է 1880 թվականի սեպտեմբերի 7-ին և սուլթանական կառավարությանը ներկայացվել է սեպտեմբերի 11-ին, շատ կողմերով ուշադրավ փաստաթուղթ է, առաջին հերթին նրանով, որ թվում է, թե այնտեղ արժարժված պահանջները բխում են հայ ռայայի վիճակի նորմալացման անհրաժեշտությունից, որն այլ բան չէր, քան հայերի կյանքի, գույքի և պատվի ապահովությունը թուրքական պետականության սահմաններում այնքան, որքան ապահովված էր սուլթանի մահմեդական հպատակներինը:

Բայց այդ փաստաթուղթը, չնայած նրանում թվարկված պահանջներին, ըստ էության ներգործուն լինել չէր կարող, որովհետև իր մեջ որևէ սանկցիա չէր պարունակում: Հենց Բեռլինի կոնգրեսի ընդունած հոդվածը, այլ կերպ ասած՝ կոլեկտիվ նոտան ստորագրող պետությունները, առաջին հերթին Անգլիան, նախօրոք կասեցրել էին այդպիսի սանկցիա կիրառելու հնարավորությունը: Հետևաբար, ռեֆորմների հարցը մնում էր որպես թուրքական կառավարության լոկալ խոստում: Իսկ որպեսզի այդ խոստումը կատարելու բարոյական հիմքը վերանար, թուրքական կառավարության՝ հայերի նկատմամբ հիմնական քաղաքականությունը սկսած 1880 թվականից գնում էր այն ուղղությամբ, որպեսզի իրական դառնա կամ իրականությանը մոտենա Աբիդին փաշայի պատասխան-նոտայում արտացոլված բնակչության տոկոսային հարաբերությունը:

Ի պատասխան պետությունների վերոհիշյալ կոլեկտիվ նոտայի, թուրքական կառավարությունը 1880 թվականի հոկտեմբերի 3-ին մի սնամեջ ու երկդիմի հայտարարություն արեց, որը ցույց է տալիս, թե ինչքան տեղին էր էմ. Դիլունի հետևյալ դիտողությունը. «Օրենքները, ռեֆորմները և սահմանադրությունները, թեկուզ դրանք կազմած լինեն ամենաիմաստուն և փորձված օրենսդիրներն ու պետական մարդիկ,

չարժե այն թղթին, որի վրա դրանք գրված են, քանի դրանց կենսագործումը հանձնարարված է թուրքերին առանց որևէ վերահսկողության: Դրան ապացույց կարող է ծառայել թուրք աստիճանավորների կյանքն ու գործունեությունը վերջին 50 տարվա ամեն մի ցանկացած միջոցին»¹:

Իսկ եվրոպական դիվանագիտության բոլոր ակտերը, որ վերաբերում էին հայերի կյանքի ապահովության հարցերին, թողնված էին առանց որևէ հսկողության: Թուրքական կառավարական շրջանները, շատ լավ գիտակցելով այդ հանգամանքը, ինչպես և քաջ ըմբռնելով, որ կոլեկտիվ նոտան նույնպես ավելի շարժե, քան այն թուղթը, որի վրա նա գրված էր, այդ հայտարարության մեջ պարզապես զանց էին առնում կոլեկտիվ նոտայի պահանջները: Ահավաստիկ այն միջոցառումները, որ թուրքական կառավարությունը ենթադրում էր անցկացնել հայկական վիլայեթներում:

«1. Էրզրումի, Վանի, Բիթլիսի և Դիարբեքի վիլայեթներում, կարգ ու կանոնը և բնակչության անվտանգությունն ապահովելու նպատակով, դատարանը պետք է կազմակերպվի և ռեֆորմի ենթարկվի, որին պետք է հետևի կայսերական մուշիրը»:

Այստեղ ռեֆորմներ «դարձվածքը» այնքան անբովանդակ էր, որ վապիտան Կլեյտոնի արտահայտությամբ՝ պարզապես «Ֆարս» էր:

«2. Սկսած այն օրից, երբ տերություններից խնդրված օգնությունը կատարվի, կայսերական կառավարությունը երեք ամսվա ընթացքում կվերակառուցի վերոհիշյալ վիլայեթների ոստիկանությունն ու ժանդարմերիան, որով ավելի դրական կերպով կապահովվի կարգը և հասարակական անվտանգությունը»:

Հասկանալի է, «հասարակական անվտանգությունը» ապահովելու համար առաջին հերթին անհրաժեշտ է վերացնել այդ անվտանգությունը խախտող աղբյուրները, այսինքն՝ զինաթափ անել քրդերին, մյուս կողմից՝ ոստիկանությանը և ժանդարմերիայի կազմում ապահովել հայ տարրի մասնակ-

¹ «Братская помощь армянам», 1897, II, стр. 27.

ցությունը: Մենք արդեն ասել ենք, որ գոյութիւն ունեցող ֆեոդալ-թեոկրատական պետութեան պայմաններում այդ անել անհնարին էր, եթէ նույնիսկ Բ. Դոան մտադրութիւնը անկեղծ լինէր, քանի որ այդ արմատապես հակասում էր իսլամի դոգմաներին: Մինչդեռ սուլթանական կառավարութեան հայտարարութիւնը շատ հեռու էր անկեղծ լինելուց, ուստի հենց հաջորդ հոգեվածից պարզ հետևում է, որ ոչ մի երաշխիք չէր ստեղծվում հայերի հասարակական անվտանգութեան համար:

«3. Ժանդարմերիայի ալայ-բեյերին (հրամանատարներին) նշանակելու է կայսրութեան ռազմական մինիստրութիւնը: Մյուս սպաների ընտրութիւնը պետք է կատարվի գնդային խորհրդի միջոցով, իսկ նրանց հաստատումը վերապահվելու է ռազմական մինիստրութեանը, գեներալ-նահանգապետների առաջարկութեամբ»:

Այսպիսով, ամբողջ հրամանատարութեան կազմը նշանակվում էր կենտրոնից և ենթակա էր կենտրոնին: Հետևաբար, ոստիկանութեան և ժանդարմերիայի կազմակերպական էութեան մեջ որևէ փոփոխութիւն չէր նախատեսվում, մնում էր նույն կենտրոնացման սկզբունքը, որը հիմնված էր պաշտոնական կաշառակերութեան վրա:

«4. Համայնքների կազմակերպման եղանակը, որ շարաքոված է Բ. Դոան հուլիսի 5-ի նոտայում (Աբիդին փաշայի պատասխան նոտայում.— Ս. Մ.), կկենսագործվի 4 ամսվա ընթացքում և պետական շահերին համապատասխան»:

Եթէ նկատի ունենանք, որ այդ նոտայում թուրքական կառավարութիւնը հայերի տեսակարար կշիռը ցույց էր տալիս 17%օ, իսկ կողեկտիվ նոտայով պահանջվող նստակյաց և քոչվոր բնակչութեան վարչականորեն առանձնացումը չէր բխում Թուրքիայի հասկացած պետական շահերից, ապա պարզ կլինի, որ այդ կետը պարզապես անբովանդակ էր և որևէ փոփոխութիւն չէր սպասվում:

«5. Բացառյալ մաքսերից և անուղղակի հարկերից, ինչպէս և փոստ-հեռագրական վարչութեան մուտքերից, վերոհիշյալ վիլայեթների մնացած բոլոր եկամուտների գումարների 10%օ-ը նախապես պետք է հատկացվեն տեղական կա-

րիքներին, իսկ մնացորդը (վերոհիշյալ 10%օ-ը հանելուց հետո) պետք է ուղարկվի Կ. Պոլիս»:

Այլ կերպ ասած, ժողովրդից գանձված հարկերի մի մասն ամբողջութեամբ անցնում էր պետական գանձարանը, իսկ մյուս մասի 90%օ-ը նույնպես անցնում էր գանձարանը և տեղական կարիքների համար՝ ժողովրդական լուսավորութեան, հանրային աշխատանքների, վարչական և այլ ծախսերի համար հատկացվում է միայն ուղղակի հարկերի 10%օ-ը: Մի կողմ թողած այդ տոկոսի շնչին լինելը, որով չէին կարող ծածկվել նույնիսկ վարչական ծախսերը, հետևաբար մյուս կարիքների համար պետք է առաջ գար հավելյալ ինքնահարկում, այստեղ ռեֆորմի էութիւնը բոլորովին շրջված է: Բանն այն է, որ ռեֆորմների էութիւնը պետք է լինէր հայերին իրենց իրավունքներով մահմեդական հպատակների հետ հավասարեցնելը: Մինչդեռ հայերը, ինչպես տեսանք էրզրումի օրինակով, գրեթէ հինգ անգամ ավելի էին ուղղակի հարկեր վճարում, քան մահմեդականները, ուրեմն՝ ռեֆորմի էութիւնը այն պետք է լինէր, որ ֆինանսական քաղաքականութեան մեջ շլինէր այդ արտառոց տարբերութիւնը: Իսկ այդ մասին թուրքական կառավարութեան հայտարարութեան մեջ ոչինչ չէր ասվում, ենթադրվում է, որ հարկազանձման սխտեմը փոփոխութեան չի ենթարկվելու:

«6. Դատական պաշտոնների համար ընտրութիւնները և նշանակումները կատարվելու են գոյութիւն ունեցող հատուկ որոշումներին համապատասխան, իսկ ինչ վերաբերում է վարչական աստիճանավորներին, ապա նրանք նշանակվելու են կայսերական հրամանով, գեներալ-նահանգապետների առաջարկութեամբ և համապատասխան մինիստրութեան ներկայացումով: Գեներալ-նահանգապետները լիազորված են լինելու՝ համաձայն գոյութիւն ունեցող որոշումների՝ հեռացնել և նշանակել վարչական աստիճանավորներին, բացառյալ մոստեսարիֆներից, ֆինանսական գործի ղեկավարներին և քարտուղարներին»: Այսպիսով, ըստ այդ հոգեվածի, բոլոր նշանակումները կատարվում են գոյութիւն ունեցող որոշումներով (օրենքներով), հետևաբար որևէ բարեփոխութիւն չէր նախատեսվում:

«7. Նիզամական դատարանները կիրառելու են օսմանյան կողքքսը (մեջեյե) և կայսրութեան մեջ գոյութիւն ունեցող մյուս օրենքները»:

Եթե նկատի ունենանք, որ առաջ էլ նիզամական դատարաններում կիրառվող օսմանյան կողքքսն էր, ապա ինքնին հասկանալի կլինի, որ թուրքական կառավարութիւնը բոլորովին մտադիր չէր որևէ ռեֆորմ մտցնել գոյութիւն ունեցող գատական գործի մեջ:

Ահավասիկ այս էին թուրքիայի հասկացած այն ռեֆորմները, որոնց հետ այնքան հույսեր էին կապում հայ ղեկավար շրջանները, առաջին հերթին Կ. Պոլսի պատրիարքարանը: Այդ ամենից բխում է, որ թուրքական կառավարութիւնը պարզապէս անտեսում էր մեծ տերութիւնների կոլեկտիվ նոտայի պահանջներն այն աստիճան, որ անգլիական դեսպան Գոշենը իր զեկուցագրում այդ նոտան համարում է «վրդովեցուցիչ»: «Ես խոսք չեմ գտնում,— գրում է նա,— իմ խոր համոզմունքն արտահայտելու այդ քաղաքականութիւնից բխող վտանգի մասին»: Բայց Գոշենին հուզողը գալիք վտանգը չէր, այլ բրիտանական թագի պրեստիժը: Ոստի նա հարց է տալիս իր կառավարութեանը՝ արդյոք ժամանակը չէ՞, որ Անգլիան իր վրա նախաձեռնութիւն վերցնի հրավիրել մեծ տերութիւններին՝ ռեալ միջոցների դիմելու հայերի աղետալի դրութեան առաջն առնելու վերաբերյալ: «Եթե նրանք հրաժարվեն կամ անտարբեր վերաբերվեն այդ առաջարկին, ապա համենայն դեպս դրա պատասխանատվութիւնը չի ընկնի նորին մեծութեան կառավարութեան վրա»¹:

Ինչպես Գոշենը, այնպես էլ անգլիական կառավարութիւնը միանգամայն համոզված էին, որ այդ նախաձեռնութիւնը կձախողվի, բայց Անգլիան բարոյական կապիտալ կշահի, ուստի արտաքին գործերի մինիստր Գրանվիլը մյուս հինգ տերութիւններում գտնվող անգլիական դեսպաններին շրջաբերական է ուղարկում, որտեղ ասված էր՝ «Բ. Դուան կողմից ձեռնարկված ռեֆորմների եղանակն այնպիսին է, որը կարող է միայն դիվանագիտական ներկայացուցիչների բողոքն

առաջացնել, և նորին Մեծութեան կառավարութիւնը իրեն երջանիկ կհամարի, եթե Ձեր կառավարութիւնը հրահանգի Կ. Պոլսի իր դեսպանին միանալու իր կոլեգաների հետ այդ առթիվ համատեղ առաջարկ ներկայացնելու Բ. Դուանը¹:

Բոլոր հինգ տերութիւններն էլ խուսափողական պատասխան տվեցին Անգլիայի առաջարկին: Ռուսն-ժեկմենը այդ առթիվ գրում է՝ «Եթե պետութիւնները, ելնելով իրենց շահերից, անհրաժեշտ համարեին անկեղծ պատասխանել Անգլիայի առաջարկութեանը, նրանք այսպես պետք է պատասխանեին լորդ Գրանվիլին՝ «Մեր պահանջներին ուշադրութիւն չդարձրին, մեր նույնական նոտան անբարեխիղճ պատասխանի արժանացավ, իսկ կոլեկտիվ նոտան անպատասխան մնաց: Իրերի դրութիւնն այնպիսին է, որ Հայաստանը եթե հենց այժմ չի ապստամբի, ապա միայն այն պատճառով, որ նրան ճնշող տեռորի և ոչնչացման սիստեմը կասեցրել է նրա բոլոր ուժերը: Ինչ եք սպասում նոր կոլեկտիվ նոտայից. թուրքական կառավարութիւնը համոզված է, որ եթե ինքը շարունակի ընդդիմանալ Բեռլինի տրակտատի 61-րդ հոդվածի կատարմանը, ապա Եվրոպան ինքը չի դիմի այն իրագործելուն: Եթե դուք գործ եք պահանջում և ոչ թե խոսք, ապա ինքներդ սպացուցեք, որ հարկավոր դեպքում պատրաստ եք սպառնալիքից գործի անցնել»: Բայց ոչ մի մեծ տերութիւն այդպես չի ասում, ըստ երևույթին, նրա համար, որ այդ նրան կհարկադրի նախաձեռնութիւնը իր վրա վերցնել... Ամեն ինչ, այդպիսով, սահմանափակվեց լոկ դիվանագիտական կոմեդիայով»²:

Եվրոպական դիվանագիտութեան համար այդ կոմեդիան, իսկ հայերի համար ամենասուսկալի տրագեդիան, հետևանք էր այն ճշմարտութեան, որ տերութիւններից յուրաքանչյուրին զբաղեցնող թուրքիայի, ինչպես և ամեն մի գաղութային և կիսագաղութային երկրի կենսական հյութերի ծծելն էր և ոչ թե որևէ ժողովրդի ֆիզիկական ոչնչացման հարցը. այս վերջին հարցը ծայրահեղ դեպքում լոկ պատրվակ կարող է ծա-

¹ «Положение армян в Турции», 1896, стр. 106.

¹ «Положение армян в Турции», 1896, 108.

² Նույն տեղում, էջ 109:

ուայել առաջին հարցը կենսագործելու համար: Այս հանգամանքը՝ այդ դիվանագիտական կոմերցիան՝ քաջ գիտակցում էր թուրքիան: Ուստի նա ավելի հաստատակամորեն սկսեց վարել իր հայաչինջ ոճրագործ քաղաքականությունը:

Եվ ահա հյուպատոսական զեկուցագրերում մենք կարդում ենք.

«Եթե մի տարի առաջ շկար ոչ կյանքի, ոչ գույքի ապահովություն, ապա այժմ ավելի քիչ է: Եթե առաջ աղքատություն էր, այժմ դա ավելի է մեծացել, արդարադատության մասին հիշողություն իսկ չկա, իսկ ոճիրները, կաշառակերությունները և բռնությունները ավելի են բազմացել. ամբողջ բնակչությունը լիակատար հուսահատության մեջ է, և այժմ ավելի հաճախ, քան առաջ, նույնիսկ առանց փոխադարձ համաձայնության և կանխատեսության, խղճուկ ուսյայի մեջ, որը համբերությամբ տանում էր բազմադարյան բռնության լուծը, առանձնապես վրդովեցուցիչ փաստերն առաջ են բերում անկարգություններ և տեղական խռովություններ: Կառավարությունը, հեռու լինելով այդ դժբախտությունների առաջն առնելու միջոցներ փնտրելուց, մտահոգված է միայն մեկ ցանկությամբ՝ հայերին սանձահարել՝ նրանց դեմ գրգռելով քրդերին: Նա այս վերջիններին բաժանում է մարտինի հրացաններ, շարունակելով հայերին արգելել զենք կրել նույնիսկ սեփական պաշտպանության համար»¹:

Այսպիսով, թուրքական կառավարությունը, մի կողմից, շահասիրելով քուրդ աշիրիթապետներին, նրանց զենք մատակարարելով, ուժեղացնելով առանց այն էլ գոյություն ունեցող անարխիան, հայերի ամենաշնչին քողոքն անգամ ապստամբություն համարելով՝ ամեն կերպ աշխատում էր քրդերին գրգռել հայերի դեմ, նրանց խոստանալով, որ անպատիժ կմնան ո՛չ միայն կողոպուտների, անհատական սպանությունների, այլև մասսայական կոտորածների համար: Մյուս կողմից՝ նա դիմում էր ամեն մի հնարավոր միջոցի, որպեսզի հայկական գյուղերում որևէ զենք չլինի քրդերին որևէ դիմադրություն ցույց տալու համար: Էմիլ Դիլոնը գրում է.

¹ «Положение армян в Турции», 1896, 107.

«Հայկական վիլայեթների բարձրաստիճան պաշտոնյաներից շատ-շատերը, շնայած իրենց անձնական հակամաներին, ելնելով ծառայության զգացմունքից, հարկավոր են համարում առիթ փնտրել կատարելու այնպիսի զանցանքներ, որոնց համար չի կարելի որևէ արդարացում գտնել:

Նրանց կատարած խելագարությունները անհավատալի կթվային, եթե դրանք հանրահայտ չլինեին: Հետևյալ փաստը քննվել և ստուգվել է թուրքիայում եղող օտարերկրյա ներկայացուցիչների կողմից: 1893 թվականի գարնանը Մուշի նահանգապետ Գասիբ փաշան, ձգտելով Ավզուտի և նրա հարևան գյուղերի հայ բնակչության մեջ անբարյացակամության որևէ ապացույց գտնել, այնտեղ է ուղարկում ոստիկանական կապիտան Ռաշիդ էֆենդուն, որպեսզի զենքի վերաբերյալ խուզարկություն կատարի: Ռաշիդը ուղևորվում, ամենամանրակրկիտ խուզարկություն է կատարում տներում, տանիքներում և գետնի տակ, բայց ապարդյուն, ոչ մի տեղ հրազեն չի գտնվում: Նա վերադառնում և զեկուցում է, որ գյուղացիները խստորեն պաշտպանում են որևէ զենք ունենալու արգելման վերաբերյալ օրենքը: Բայց Գասիբ փաշան կատարում է. «Ինչպես եք համարձակվում պնդել, ինչ որ, իմ ունեցած տեղեկություններով, բացարձակ սոստ է,— գոռում է նա:— Անմիջապես վերադարձեք և զենքը գտեք: Չհամարձակվեք վերադառնալ առանց զենքի»: Ոստիկանական կապիտանը նորից վերադառնում է Ավզուտ և տակնուվրա է անում բոլոր անկյունները, այսինքն՝ ավերում է բոլոր տները, բայց ոչինչ չի գտնում: Ճարահատյալ նա կանչում է գյուղի տանուտերին և ասում. «Ինձ ուղարկել են թաքցրած զենքը գտնելու: Ասա, որտեղ է զենքը»:

— Բայց մենք որևէ զենք չունենք:

— Պետք է որևէ տեղ լինի:

— Հավատացնում եմ, որ ախարվում եք:

— Լավ, այժմ լսիր: Ես այստեղ զենք պետք է գտնեմ, կա թե չկա, այդ միևնույն է: Ես չեմ կարող վերադառնալ առանց զենքի: Եթե ինձ որևէ զենք չտաք, ես պետք է իմ մարդկանցով մնամ ձեր գյուղում:

Այդ, հարկավ, նշանակում էր թալան ու ավերում: Տանուտերը տարակուսանքի մեջ ընկավ:

— Ախր, ի՞նչ անեմ,— հարցնում է նա,— երբ մեր գյուղում զենք չկա:

— Այդ դեպքում զնացեք և գտեք, գողացեք, զնեցեք, բայց գտեք:

Մի քանի մարդ ուղարկվում են մոտակա քրդական գյուղը, որտեղ նրանք գնում են երեք սալլ հին խանչալներ, կյոթ-քարի հրացաններ և ժանգոտած սրեր, որոնք էլ հանձնում են Ռաշիդին: Նա ուրախ և զվարթ վերադառնում է Մուշի նահանգապետի մոտ: Գասիբ փաշան, տեսնելով այդ կոլեկցիան, խիստ ուրախանում և ասում է՝ «Տեսնում եք, որ ես իրավացի էի»¹:

Այս և նման բազմաթիվ փաստերը թուրքական կառավարությանը անհրաժեշտ էին հայերին Եվրոպայի աչքում ցուցադրելու որպես խոռվարարների և ապստամբների, որով կարողանար արդարացնել իր ոճրագործ քաղաքականությունը:

Էրզրումի անգլիական հյուպատոս Կլիֆորդ Լյոյդը 1890 թվականի հոկտեմբերի 2-ի զեկուցագրում բերում է հետևյալ ուշադրավ փաստը.

«Այաշկերտի հովտում, որտեղ բնակչությունը այս գարնանը շատ թշվառության մեջ էր, և որտեղից մեծ շահով փորձել էին զաղթել Պարսկաստան, թուրք պաշտոնյաները «հեղափոխություն» հայտնաբերեցին, և նրանց հետագա գործողությունները առիթ տվին ուժեղ և միանգամայն օրինական դժգոհության: Քրիստոնյաները, թշվառության մատնվելով քրդերից, որոնք անպատիժ նրանց կողոպտում, բերքը այրում էին, վճռել էին ապագայում նրանցից ազատվել և մի քանի հարյուր մարդ ուղևորվել էին դեպի Պարսկաստան, որտեղ խոստացել էին նրանց ընդունել: Բայց թուրքական աստիճանավորները սահմանագլխին զաղթականներին ձերբակալել և վերադարձրել էին: Հայերը միայն մի բան էին խնդրում՝ քրդերից պաշտպանություն, բայց բանն այն է, որ կառավարությունը չէր կարող այդ նրանց տալ... Հետևանքն այն եղավ,

որ հովտը նորից հեղեղվեց քրդերով, որոնք բացահայտ հայտարարում էին, որ իրենց գործողությունները խրախուսվում են թուրքական կառավարության կողմից...»: Այնուհետև Լյոյդը, ելնելով իր տրամադրության տակ եղած բազմաթիվ փաստերից, անում է հետևյալ ամփոփումը.

«Ինչ վերաբերում է հիշատակված գանգատների երկրորդ հիմքին, ապա անհրաժեշտություն չեմ զգում մանրամասնություն մեջ մտնել, որպեսզի ցույց տամ, թե թուրքական կառավարությունը հայերին մերժում է մտքի և գործողության որևէ ազատություն... Ես կարծում եմ, որ այս պրովինցիաներում հայ բնակչության ոչ մի դասակարգ որևէ շահով չի մտածում հեղափոխության մասին: Բացի այդ, զինված ապրստամբությունն անհնարին է: Սակայն տրտունջները կամ բողոքի որևէ ձևը թուրքական կառավարությունը դիտում է որպես ապստամբություն, որի դեմ գործադրվում են վերոհիշյալ իմ զեկուցագրում շարադրված միջոցները, որոնք առանց որևէ հիմքի հայերին զրկում են ամեն մի անձնական ազատությունից: Այդ հանգամանքը խիստ ուժեղացնում է դժգոհությունները և մահմեդականների ու քրիստոնյաների միջև թշնամության զգացմունք է առաջացնում...»¹:

Մի այլ հյուպատոս՝ Համպսոնը, նույն հարցի մասին գրում է՝

«Այս վայրերում հայերի մեջ խոռվության ձգտման կամ ապստամբության ծրագրի մասին միտքը զուրկ է հիմքից և այդպիսի մտադրության կենսագործման հնարավորությունը լիովին բացակայում է: Այստեղի հայերը ամենախաղաղ ժողովուրդն են: Նրանք ոչ զենք ունեն, ոչ առաջնորդներ, և ընդհանուր ապստամբության մասին միտքը ժպիտ է առաջացնում բոլոր նրանց մեջ, ովքեր ծանոթ են երկրի իրական գրության հետ: Այդուհանդերձ թուրքական իշխանությունները համառորեն այնպես են գործում, որ կարծես թե ապրստամբություն է սպառնում:

Թուրքական կառավարությունն այդպես գործելով, ինքը

¹ «Братская помощь армянам», II, стр. 29.

¹ «Положение армян в Турции», 1896, стр. 153—154.

նպաստում է, որ իրագործվի այն վտանգը, որն ինքն իրը թե՛ ձգտում է կանխել»:

90-ական թվականների հայկական շարժերից շատ առաջ թուրքական կառավարության գործակալներն ամենուրեք, և հատկապես եվրոպական մամուլում, տարածում էին այն ստահոգ լուրերը, որ իբր թե հայերը զինվում և պատրաստվում են ապստամբելու սուլթանական կառավարության դեմ, որ արտասահմանից անհաշիվ քանակությամբ զենք ու զինամթերք են ստանում, զինվորական գաղտնի խմբեր են կազմակերպում և կառավարության համար ծանր կացություն են ստեղծել: Այսպես, օրինակ, Պետերբուրգում հրատարակվող «Գոլոս» թերթում տպագրվում է էրզրումից ստացված մի թղթակցություն, որն արտատպում է նաև «Մշակ»-ը: Այդտեղ հաղորդվում էր՝ «էրզրումի վիլայեթի հայերը սառը և հրաձիգ զենքերի բավական մեծ պաշար ունեն: Այդ պատճառով նրանց հարաբերությունները թուրքերի հետ այժմ բուրբուխ փոխվել են: Ինձ ասացին (անկասկած թուրքական աղբյուրները.—Ս. Մ.), որ հայերը կազմակերպել են զինված ընկերություններ, որոնք ուշադրությամբ հետևում են անցքերի զարգացմանը, որպեսզի հարկավոր դեպքում իրենց օգնությունն ավելի իրական և օգտակար դարձնեն»¹:

«Մշակ»-ում տպագրված է գերմաներենից թարգմանված մի այլ հոդված, որտեղ ասված է՝ «Ապստամբության կենտրոնը զետեղված է Հին Բայազետի հարավային կողմերում: Ապստամբած հայերի զորաբաժինն ամենասաստիկ կերպով ուժ և զորություն է ստանում: Սկզբում, երբ 1200 հոգուց բաղկացած մի խումբ, որ դուրս էր եկել Մուշի գավառից, մինչև Հին Բայազետին մոտենալն այնքան բազմացավ, որ նրանց թիվը հասավ 2800 հոգու, որոնք արդեն սկսել են գործել»²:

Պարզ հասկանալու համար, թե որտեղից են բխում այդ լուրերը, որ հաղորդում են եվրոպական թղթակիցները, մեզ բանալի է տալիս նույն «Մշակ»-ում տպագրված մի այլ թըղ-

¹ «Մշակ», 1880, № 155:

² Նույն տեղում, № 161:

թակցություն. «Երեկ և այսօր հուզյալ օրեր են Կ. Պոլսի համար: Հուլիսի 28-ին լուր տարածվեցավ, թե Հայաստանի վերաբերյալ կարևոր հեռագիրներ կառավարությունը վար դրել է: Ահա երեկ կիմանանք. «Ստամպուլ» կհրատարակե, «Սեմաֆոռ» և «Վազրթ» կհաստատեն, թե «հանուն ազգային վրեժխնդրության հայոց զինյալ զորեղ խմբեր հարձակեր են Վասպուրականի քյուրդ գյուղերու վրա և 7 գյուղ այրել, մրկեր են...»¹:

Վերոհիշյալ գերմաներեն հոդվածի թարգմանության մեջ մենք կարդում ենք՝ «Այս շարժման օգտին պիտի նպաստի և այն իրողությունը, որ Զուլամեթկի կողմերում նույնպես ապստամբեցին հայերը (գլխավորապես նեստուրական աղանդի) (ընդգծ. մերն է.—Ս. Մ.). նրանք հանդիսավոր կերպով ընդունեցին հռչակավոր Մար Շիմոնին՝ որպես իրենց քաղաքական և զինվորական գլխավոր և երդվեցին անպայման կերպով հնազանդվել նրան մինչև մահ: Մար Շիմոնն առաջ տարավ իր բանակը դեպի Վանի կողմը...»: «Այժմ աստվածային արդարությունը զարթնեցնում է և մեր ազգը մի նոր կյանքով, որը մենք պետք է մեր արյունով ստանանք...»: «Դուրս գալուց առաջ նա դիմեց առաջին գնդերի հրամանատարներին իր ոգելից ճառով, որի մեջ նրանց ուշադրությունը դարձնում էր այն կետի վրա, թե որպիսի սրբազան նշանակություն ունի սկսվող պատերազմը ժողովրդի և կրոնի համար»: «Այս շարժումների պատճառով թուրք կառավարությունը գտնվում է խիստ անհաստատ դրության մեջ»:

Որ այդ «ապստամբությունները» իրականության հետ որևէ առնչություն չունենին և հորինված էին, բխում է այն պարզ իրողությունից, որ նեստորական հայեր գոյություն չունենին և Մար Շիմոնը ասորիների հոգևոր պետն էր և ոչ թե հայ էր:

Վերևում հիշատակված հյուպատոսական պաշտոնական հաղորդումներից մենք տեղեկացանք, որ հայերի ապստամբության մասին լուրերը գործին տեղյակ մարդկանց մեջ միայն ժպիտ կարող էին առաջացնել: Այնուամենայնիվ թուրքական իշխանությունները տարիներ շարունակ համառ կեր-

¹ «Մշակ», 1880, № 138:

պով տարածում էին այդ լուրերը, հաստատ գիտենալով, որ դրանք ելնում են հենց սուլթանի պալատից:

Մեր համբավավոր պատմաբան Լեոն իր «Թուրքահայ հեղափոխության գաղափարաբանությունը» աշխատության մեջ գրում է՝ «1890 թվականի հունիսի 18-ին էրզրումում տեղի է ունենում առաջին ընդհարումը թուրքական զորքի և տեղական հայ ժողովրդի միջև, մի ընդհարում, որ կազմակերպել էին մի քանի հայեր՝ նախկին «Պաշտպան Հայրենյաց» կազմակերպության անդամներից: Կովի մեջ սպանվեցին և վիրավորվեցին մոտ 20 հայեր և մի քանի հոգի էլ՝ թուրք ոստիկանների կողմից: Դեպքն ահագին տպավորություն էր թողնում բոլոր տեղերի հայերի վրա: Սկսվել էր այն կռիվը, որին սպասում էին Խրիմյանի «երկաթե շերտի» և Բաֆֆու հերոսների ժամանակից»¹:

Մենք այսօր էլ չենք հրաժարվում երեսուն տարի առաջ արտահայտած մեր այն կարծիքից, որ Լեոնի ծառայությունը հատկապես մեր նորագույն պատմության վերաբերյալ՝ փաստական նյութերի դրսևորման գործում շատ մեծ է: Խոնարհվելով հանդերձ նրա այդ քրտնաջան ու բեղմնավոր աշխատանքի առաջ, այնուամենայնիվ մենք կարծում ենք, որ Լեոն այստեղ իրավացի չէ: Մեր տրամադրության տակ եղած և տակավին չհրատարակված արխիվային փաստաթղթերը, ինչպես և հրատարակված եվրոպական հյուպատոսական գեղուցագրերը, մեզ բոլորովին այլ եզրակացություն են բերում, ամենից առաջ, էրզրումի դեպքերը «մի ֆանի հայերի» կողմից կազմակերպված ընդհարում չէին, այլ թուրքական կառավարության կողմից կազմակերպված պրովոկացիա և ջարդ:

Ռուսաստանի դեսպանության ստույգ տեղեկությունների համաձայն, 1890-ական թվականների հունիսի սկզբներին Թուրքիայի գաղտնի ոստիկանությունը իր գործակալների միջոցով տեղեկություն է ստանում, որ իբր թե էրզրումի Սանասարյան դպրոցում և հայոց մայր եկեղեցում ու առաջնորդա-

րանում թաքցված է մեծ քանակությամբ հրացան և համապատասխան քանակությամբ փամփուշտ: Որոշ ժամանակ անց դպրոցը, եկեղեցին և առաջնորդարանի բոլոր շենքերը ամենախիստ խուզարկության են ենթարկվում: Խուզարկությունն իր նպատակին չի հասնում, քանի որ նույնիսկ մի հրացան չի գտնվում: Սակայն հենց եկեղեցու և առաջնորդարանի խուզարկության փաստը և այդ գործողության ժամանակ սրբությունների հետ անվայել վարվելը, բնականաբար, խիստ վրդովմունք է առաջացնում հավատացյալ հայերի մեջ:

Մեր աղբյուրը հաղորդում է, որ նույնիսկ Կ. Պոլսի պարիարք Խորեն Աջլզյանը հատուկ խնդրագիր է ներկայացնում սուլթանի առաջին քարտուղարին. նա մանրամասն նկարագրում է իր հոտի տառապանքները և խոր վիշտ է հայտնում, որ նույնիսկ տաճարները կառավարության կասկածների տակ են առնվում և նրանցում զենքի պահեստներ են փնտրում, որ սուրբ գրքի հայերեն թարգմանություններում, որ կատարված են շատ դարեր առաջ, ակնարկություններ են գտնում անկախ Հայաստանի մասին, որ տոնացույցերից ջնջվում են Հայաստանի կանոնականացված թագավորների անունները: Պարիարքը, թվարկելով հայերի կրած նաև մյուս տառապանքները, խնդրում է միջոցներ ձեռք առնել փոխելու իրերի գույություն ունեցող դրությունը: Խնդրագիրն ընդունվում է, բայց, իհարկե, ոչ մի հետևանք չի ունենում²:

Այս փաստն ինքնին պարզ ապացույց էր, թե ինչպիսի ազդեցություն էր ունեցել այդ խուզարկությունը Թուրքիայի հայ համայնքներում: Հուզումն ակներև էր ոչ միայն էրզրումում, այլև մյուս հայաբնակ վայրերում:

«Էրզրումի դեպքերը, — գրված է նույն փաստաթղթում, — մտքերի մեծ ալեկոծում առաջ բերին ամբողջ հայ աշխարհում: Դրանք առանձնապես որոշակի արտահայտվեցին Վանում և Մուշում, բայց այնտեղ գործը իշխանությունների նկատմամբ բացահայտ դիմադրության շնորհիվ»:

Իսկ թուրքական կառավարության ձգտումը հենց այդ վերջին հանգամանքն էր, որպեսզի ամեն մի դիմադրություն

¹ Լեո, Թուրքահայ հեղափոխության գաղափարաբանությունը, Փարիզ, 1934, հ. 1, էջ 170:

² АВІР, ф. Политархив, д. № 3447, лл. 53—75.

առիթ ծառայեցնի հայկական շարդեր կազմակերպելու համար:

Ծթե վանը և Մուշը, հուզվելով հանդերձ, առիթ չտվին թուրքական պրովոկացիայի համար, ապա էրզրումը, ենթարկվելով այդ պրովոկացիային, սովեց այդ առիթը:

Խուզարկությունից հետո խանութպաններն ու արհեստավորները, իբրև բողոքի նշան, մի քանի օր շքացեցին իրենց խանութներն ու արհեստանոցները: Նրանցից շատերը հավաքվում էին եկեղեցու բակում: Դա բավական էր, որ կառավարութունը այդ համարեր հեղափոխություն: Նա պրովոկացիա էր տարածում, թե հայերը պատրաստվում են ապստամբել: Միաժամանակ վալին կարգադրում է զորքով շրջապատել պատրիարքարանը: Հուզված մահմեդական ամբոխը, գինվածով ինչով կարող է, ծպտյալ զինվորների առաջնորդությամբ, հոծ զանգվածով շարժվում է դեպի եկեղեցու բակը: Հայերից շատերը, լսելով այդ մասին, իսկույն ցրվում են, մնացածները բողոքում են իրենց այդ տարրական իրավունքը ոտնահարելու դեմ: Այդ ժամանակ զինվորներին հրաման է տրվում զենքի ուժով ցրել եկեղեցու բակում մնացած հայերին: Լսվում է ատրճանակի կրակոց, որը զինվորների համար ազդանշան է ծառայում սվիններով հարձակվելու հայերի վրա: Հենց այդ ժամանակ վրա է հասնում մոլեգնած խուժանը, խառնվում է զինվորների հետ, սկսվում է եկեղեցու բակում մնացած հայերի ջարդ: Ըստ ռուսական հյուպատոսական սվյալների, այդտեղ սպանվածների և վիրավորվածների թիվը 200-ից անցնում էր:

Դեպքերի մասին, հարկավ, արձագանքում է եվրոպական մամուլը. Բ. Գուլը հարկադրված է լինում այդ առթիվ հատուկ հեռագրով շրջաբերական ուղարկել օտար երկրներում գործող իր ներկայացուցչություններին, որտեղ էրզրումի դեպքերը միանգամայն շրջված են ներկայացվում: Ռուսական դեսպանը իր 1890 թվականի հունիսի 21-ի № 89 զեկուցագրում ասում է. «Դեպքերը շարադրված են խեղաթյուրված և կապակցությունից զուրկ: Բ. Գուլը հաղորդումից հետևում է, որ տուժած հայերին վիրավորել ու սպանել են իրենց ցեղակիցները»: Ահավասիկ այդ խեղաթյուրված շրջաբերականը,

որը հրապարակվել է մամուլում, աղբյուր է ծառայել էրզրումի այդ ջարդի մեղքը գցել «հայ հեղափոխականների» վրա և Լեոն էլ ի շարս այլոց հավատացել է այդ հերյուրանքներին:

Անգլիական հյուպատոսն այդ առթիվ գրում է. «Մուշն թվականի հունիսի 20-ին մահմեդականների ամբոխը էրզրումի փողոցներում հարձակվեց անպաշտպան հայերի վրա և նրանցից շատերին սպանեց ու վիրավորեց, միաժամանակ կողոպտելով նրանց տներն ու խանութները, բայց մինչև այժմ, ինչքան ինձ հայտնի է, ոչ մի միջոց չի ձեռնարկվել հանցավորներին հետապնդելու: Մի դեպքում հայ խանութպանը դիմել է նահանգապետին զանգատով, որը ուղարկվել է գլխավոր դատախազին: Վերջինիս ամենայն մանրամասնությամբ հաղորդվել են գործի հանգամանքները և հայտնվել են հանցագործների ու վկաների անունները: Հանցագործները ձերբակալվել են, բայց հենց հաջորդ օրը ազատվել են և նրանց դեմ այլևս ոչ մի գործողություն չի ձեռնարկվել: Մյուս կողմից, քրիստոնյաները ձերբակալման են ենթարկվել և երկար ժամանակ պահվում են բանտում, թեպետ նրանց դեմ ոչ մի մեղադրանք չի հարուցվել»¹:

Ուշագրավ էին հնչակյան կոսակցության լիդերներից մեկի՝ Ռուբեն Խանազատի, հետևյալ տողերը. «Ամենից հետաքրքրականն այն է, որ մենք, Տրապիզոնում եղածներս, և թե այլ տեղերում, այն համոզումն ունեինք, թե էրզրումի եվրոպական հյուպատոսներն իսկույն ահազանգ պիտի հնչեցնեն այդ դեպքերի առթիվ և «հայկական հարցը» պիտի հրապարակ գար և շուտով իր լուծումն ստանար, իսկ երբ տեղի շունեցավ, ամենուրեք մեծ հիասթափություն առաջացավ»²:

էրզրումի ողբերգությունը դեռ թարմ էր, երբ մի ամիս էլ շանցած՝ տեղի ունեցավ մի այլ ողբերգություն, այս անգամ արդեն Թուրքիայի մայրաքաղաքում՝ Կ. Պոլսում, դեսպանների աչքի առաջ: Գուլ-Գափու թաղամասում, ուր գտնվում էր հայոց պատրիարքարանը, մի տարերային ցույց կազմակերպվեց: Ռուսական դիվանագիտական ներկայացուցիչը հե-

1 «Положение армян в Турции», 1896, стр. 154.

2 Լեո, հիշատակած աշխ., էջ 172:

տեյալ կերպ է գնահատում այդ ցույցը. «Որքան էրզրումի դեպքերը, որ առաջ բերին թուրքերը (իմա՝ թուրքական կառավարութիւնը.— Ս. Մ.), և եկեղեցին խուզարկելով վիրավորեցին հայ ժողովրդի զգացմունքները, մասնավոր դեպքի հետեանք էին, նույնքան Գում-Գափուի դեպքը հետեանք էր հայերի մեջ ընդհանուր հուզմունքի»¹:

1890 թվականի հուլիսի 15-ի կիրակի օրը, պատարագի հենց սկզբին, ամբիոն է բարձրանում մի վանեցի (հավանաբար հնչակյան Ճանկույանը) մի նամակ ձեռքին և հայտարարում է, որ այդ նամակը կարդալու է եկեղեցում հավաքված ժողովրդին: Այդ ժամանակ ամբիոնի վրա գտնվող անձնավորութիւնը դիմում է պատրիարքին կշտամբանքով և նրան անվանում է ազգի դավաճան ու թուրքահայաստանի իր հոտի նկատմամբ անտարբերութեան համար մահվան արժանի: Եկեղեցում հավաքված ժողովուրդն այն աստիճան է հուզվում և աղմուկ-աղաղակն այնպիսի շափերի է հասնում, որ պատարագն ընդհատվում է: Ումանք ցանկանում են բռնել հանդուգն ճառասոսին, բայց նա երկու անգամ ատրճանակով կրակում է և փախչում: Իրարանցումի ժամանակ պատրիարքը եկեղեցուց հեռանում է պատրիարքարան: Ժողովրդի դժգոհ մասը հարձակվում է պատրիարքարանի վրա և պահանջում է, որ Աշրգյանը, իբրև ազգի ներկայացուցիչ, իրեն առաջնորդի դեպի սուլթանի պալատը՝ իր բողոքը հայտնելու հայկական վիլայեթներում տեղի ունեցող վայրագութիւնների դեմ: Խորեն պատրիարքը հարկադրված առաջնորդում է ժողովրդին, բայց ճանապարհին ուշաթափվում է: Նրան կառք են նստեցնում և թափորը շարունակում է ընթանալ դեպի Յելզգ-Քյոշը՝ սուլթանի պալատը:

Հենց այդ նույն օրը մահամեղականները տոնում էին Կուրբան-Բայրամը: Պալատում կատարվում էր տոնական արարողութիւն, որի ժամանակ սուլթանն անձամբ պետք է կրտրեր զոհաբերվող անասունի գլուխը: Գում-Գափուի ցույցի տուր պալատ է հասնում արարողութեան ժամանակ:

Թուրքական կառավարութիւնը հենց այդպիսի առիթ էր

փնտրում: Առանց հարցնելու ու քննելու ցույցի պատճառները և թե ինչ են խնդրում ցուցարարները, Դեմվիշ փաշային հանձնարարվում է գինված ուժի միջոցով անհապաղ ջախջախել խռովութիւնը և խռովարարներին պատժել իբրև պետական հանցագործների:

Մինչ այդ գինվորների մի ջոկատ կտրել էր դեպի Յելզգ-Քյոշը գնացող ցուցարարների ճանապարհը, տեղի էր ունեցել ընդհարում, եղել էին սպանվածներ և վիրավորվածներ: Դեմվիշ փաշան, վրա հասնելով, հրամայում է շրջապատել երթը. գինվորների սվինների սարսափի տակ ցուցարարների մեծ մասը ցրվում է: Տեղի են ունենում ձերբակալութիւններ:

Ահա այս էր Գում-Գափուի այն տխրահոշակ «հեղափոխութիւնը», որի հետ այնքան վարդագույն հույսեր էին կապում հնչակյանները: Մեր կարծիքով, դա պարզապես մի ավանտյուրա էր, որ այնքան թանկ նստեց թուրքահայ ժողովրդին: Լեռն, խոսելով այդ դեպքի մասին, գրում է՝ «Մի խելագար դիտավորութիւն, որին, իհարկե, ոչ ոք չէր հավատում և ամենից առաջ՝ հենց հաջի-աղա սոցիալիստները (իմա՝ հնչակյանները): Այս բավական չէ. նրանք ոչ միայն չէին հավատում, այլև գիտեին, թե ինչ սոսկումներ կարող է բերել այդ փորձը Հայաստանի հայ ազգաբնակչութեան գլխին, ուստի և ցույցից առաջ նրանցից մեկը կտրում է հեռագրական թելը, որպեսզի գավառները հեռագրական հրաման չուղարկեին հայերին կոտորելու մասին: Ինչպե՞ս շասել, թե այդ մարդիկ երեսաներ էին, և միայն դժբախտ իրականութիւնն էր կարող այդպիսիներին հանձնել ամբողջ ժողովրդի ճակատագիրը»¹:

Հնչակյանների կարծիքով, ահա թե ինչ նշանակութիւն ունեն հուլիսի 15-ի ցույցը. «Թուրքիայի բաժանման խնդիրը,— գրում է «Հնչակը» իր առաջնորդող հոդվածներից մեկում,— նորից երևան եկավ: Ամեն ճիգ, ամեն ջանք գործ դրված՝ սարսափած թուրք կառավարութեան ու նրա կեղտոտ մամուլի կողմից Եվրոպայի աչքին աննշան դարձնելու հուլիսի 15-ը, ապարդյուն անցավ... Թուրքիայի բազմավեր մերկ

¹ АВІР, ф. Политархив, д. № 3447, лл. 53—75.

¹ Լեռ. Թուրքահայ հեղափոխութեան գաղափարաբանութիւնը, հ. 1, էջ 174—175:

մարմինը կրկին ընդհանուրի քննությանը ենթարկվեց, ամեն-
քը տեսան, որ Քուրքիան երկունքի մեջ է,—նրան դեռ ստրուկ
մնացած օտար ազգությունների ազատությունը ծնվելու վրա
է, գնով նրա՝ Քուրքիայի սեփական մահի»:

Լեոն, բերելով «Հնչակի» այդ առաջնորդողը, դարձյալ
իրավացիորեն գրում է՝ «Այս բոլորը սուտ էր, ոռոմանտիկ
զառանցանք միայն: Հուլիսի 15-ը ոչ մի օգուտ չտվեց հայ
ժողովրդին... Ընդհակառակն, այդ մի սև թվական է, որից
սկսած՝ թուրքահայության բնաջնջումն արդեն իրական հողի
վրա է դրվում: Այդ մի աննշան ու շնչին դեպքի օր էր, որ,
սակայն, դարձավ մի ընդարձակ ու լայն բացված դուռ, որի
միջով աղետներ աղետների հետևից սկսեցին թափվել ան-
մեղ ու անդիտակ թուրքահայ գյուղացիության գլխին: Քուր-
քական կառավարությանը առիթներ էին հարկավոր, և ահա
այդ առիթներն առատությամբ մատակարարում էին հայ թե-
թևամիտ, քաղաքականապես անգրագետ հեղափոխականներն
իրենց իսկ շատածված ցույցերով և մանր ապստամբությու-
ններով»¹:

Չնայած մայրաքաղաքում Գում-Գափուի ցույցը որևէ նշա-
նակություն չունեցավ և ձերբակալվածների մեծ մասը շու-
տով ազատվեց, բայց գավառներում դրությունը օրավուր
ավելի սոսկալի էր դառնում: Քուրդ աշիրեթապետների և
թուրքական վարչության համագործակցությունը ավելի սերտ
էր դառնում շնորհիվ այն բարիքների, որ սուլթանական կա-
ռավարությունը շնորհում էր այդ աշիրեթապետներին իբրև
պատվանշաններ, դրամական միջոցներ, լայն արտոնությու-
ններ և հայ ժողովրդի անպատիժ կեղեքում:

Բանտերը ամենուրեք լցված էին հայերով, նույնիսկ Սվա-
զի վալին զեկուցում էր, որ իր վիլայեթում բանտերում այլևս
տեղ չկա: Ռուսական դիվանագիտական ներկայացուցիչը
1890 թվականի նոյեմբերի 8-ի № 154 զեկուցագրում հաղոր-
դում է՝ «Հայ գյուղացիական բնակչության դրությունը այս
ժամանակի ընթացքում իսկապես զգալիորեն փոխվել է դեպի
վատը... Հյուսիսայտոսները դեպանատուն են ներկայացնում

¹ Նույն տեղում, էջ 174—175:

թուրքերի և քրդերի կողմից կատարվող սպանությունների,
կողոպուտների և բռնությունների երկար ցուցակներ»:

Արաբկիրի բանտի դռանը փակցրել էին արաբերեն գրված
մի թուղթիկ, որի մեջ ասվում էր, որ հայերին իզուր են մե-
ղադրում թուրքական իշխանությունից ազատվելու, հատուկ
թագավորություն ունենալու ձգտման մեջ: Նրանք հեռու են
այդպիսի մտքերից և պահանջում են միայն, որ իրենց իրա-
վունքները պաշտպանվեն, որ օրենքի առաջ քրիստոնյաների
և մահմեդականների միջև տարբերություն չլինի: Թուղթիկի
վերջում ասվում էր, որ հայերը շատ են, և նրանց շարժմանը
չեն կարող վերջ տալ ոչ մահապատիժները, ոչ աքսորները, ոչ
էլ բանտարկությունները»¹: Սամսունի հյուպատոսի զեկու-
ցագրում ասված է՝ «Յոզգաթում ունևոր հայերից ձերբակալ-
ված է 150 մարդ, իսկ Կեսարիայում՝ մինչև 160»: Անգորա-
յում 17 մարդ դատապարտված են, որոնցից 5-ը՝ կախաղանի,
12-ը՝ ցմահ տաժանակիր աշխատանքի: Բանտերում խոշտան-
գումներն աներևակայելի չափերի էին հասել: Մեծ վեզիր
Ջևադ փաշան հատուկ շրջաբերականով կարգադրել էր բո-
լոր վիլայեթների վալիներին՝ ամեն միջոց ձեռք առնել, որ
օտարերկրացիները չկարողանան ծանոթանալ գործի իսկա-
կան դրության հետ»²: Վանի ռուսական փոխ-հյուպատոսի
զեկուցագրից տեղեկանում ենք, որ 1891 թվականի սկզբնե-
րին Վանի հայ ազգաբնակչությունը խաղաղ ցույց է կազմա-
կերպել վալու ապարանքի և ռուսական հյուպատոսարանի
առաջ, բողոք արտահայտելով բռնությունների, ձերբակալու-
թյունների և ձերբակալվածների անօրինակ խոշտանգում-
ների դեմ:

Ահավասիկ, այս էր Գում-Գափուի ցույցի արդյունքը հա-
յերի համար, այսինքն՝ մի առիթ, որ ստեղծեցին հնչակյան-
ները, իսկ թուրքական կառավարությունն այդ օգտագործեց
իր հայահալած ծրագիրն իրագործելու և արդարանալու համար:

Դեռ 1880-ական թվականների վերջերից, երբ Քուրքիան
արդեն համոզվել էր, որ հայկական հարցին տերությունների

¹ АВПР, ф. Политархив, д. № 3447, лл. 53—75.

² Նույն տեղում:

միջամտութիւնը լուկ երկերեսանի շղարշված դեմոնստրացիայից այն կողմը անցնելու նպատակ չունի, այդ շարաքաստիկ հարցը վերջնականապես վերացնելու համար դիմում է հայերի տոկոսը Հայաստանում իջեցնելու կոնկրետ քաղաքականութեանը: Մյուս կողմից, Ռուսաստանի սահմանազխին հուսալի հենարան ունենալու համար Յուրբիան անհրաժեշտ էր համարում այդտեղ ստեղծել հոծ մահմեդականութիւն: Քուրդ տարրը, իր ռազմատենչ ինստիւկտներով, հենց անզլիական դիվանագիտության հորդորանքներով շատ հարմար նյութ էր համարվում այդ նպատակին ծառայեցնելու համար: Այսպիսով, մի կողմից, Ռուսաստանի դեմ հենց տեղում մշտապես դիմված ուժ ունենալու հեռանկարը, մյուս կողմից, հայերին բացեիքաց բնաջնջելու քաղաքականութիւնը և դրա հետ միասին հոծ մահմեդական բնակչութիւն ստեղծելու միտումը Յուրբիայի առաջ դրին հայերի համար մի դիվային ծրագիր՝ կազմակերպել քրդական իռեզուլյար գնդեր, որ սուլթան Աբդուլ Համիդի անունով կոչվեցին «համիդի»:

Տակավին XIX դարի 90-ական թվականներին էմիլ Դիլոնն արել է հետևյալ դիտողութիւնը, որի դեմ հազիվ թե հնարավոր լինի առարկել.

«Ք. Դուռը, վախենալով Հայաստանում ռեֆորմ անցկացնելու խոստման վերաբերյալ իր համար լուրջ դժվարութիւններին և պատերազմի ժամանակ Ռուսաստանի սահմանամերձ պրովինցիաներում ապրող քրիստոնյաների թշնամութիւնից, 1891 թվականին վճռեց մեկ գնդակով երկու նապաստակ սպանել և կազմակերպեց, այսպես կոչված, համիդի հեծելազոր, որ կազմված էր բացառապես քրդերից: Կայսրութեան որոշ բարձր աստիճանավորների առաջարկած ծրագիրն այն էր, որ հայերին դուրս մղեն սահմանամերձ երկրամասերից, ինչպես, օրինակ, Ալաշկերտից, և նրանց փոխարինել մահմեդականներով, որպեսզի նրանց (հայերի) թիվը բոլոր հինգ պրովինցիաներում կրճատվի այնքան, որ վերանա հայ բնակչութեան համար հատուկ ռեֆորմների անհրաժեշտութիւնը և որպեսզի պատերազմի դեպքում քրդերը գործեն որպես կազակների հակակշիռ ուժ:

Ոչնչացման այդ բացահայտ քաղաքականութիւնը ճշտո-

րեն իրագործվելու էր և զգալիորեն ընդլայնվեց այդ ժամանակից, և եթե դրան շուտով վերջ չտրվի, ապա անտարակույս կհասցնի հայկական հարցի վերջնական լուծմանը (այսինքն՝ հայերի ոչնչացման.—Ս. Մ.). բայց այդ լուծումը խայտառակութիւն կլինի քրիստոնեութեան համար և նողկալի ծաղրանք՝ քաղաքակրթութեան նկատմամբ»¹.

Համիդի գնդերի կազմակերպումը մի իսկական պատուհաս էր հայ ժողովրդի գլխին: Նույն էմիլ Դիլոնը գրում է՝ «Մի ականավոր օտարերկրացի պետական գործիչ, որը սովորաբար համարվում է համոզված թուրքֆիլ, մոտ ժամանակներս ինձ հետ մասնավոր զրույցի ժամանակ նկատեց, որ թուրքական տիրապետութիւնը Հայաստանում ճիշտ կլիներ բնորոշել որպես կազմակերպված ավազակութիւն, օրինականացված սպանութիւն և վարձատրվող անբարոյականութիւն»²:

«Զորքի մեջ գրանցված քրդերը թողնվել են իրենց հայրենի վայրերում, ազատված են ծառայութիւնից, մատակարարվում են զենքով, օժտված են դեսպանական անձեռնմխելութեամբ և ապահովված են ոռճիկով... Եվ նրանք իրենց միսիան կատարում են փութաշան ճշտութեամբ՝ կողոպտում են հարուստ հայերին, քանդում են տները, այրում են հացն ու անասնակերը, ոչնչացնում են գյուղերը, մորթում են անասունները, հափշտակում են երիտասարդ աղջիկներին, անպատվում են ամուսնացած կանանց, կոտորում են ամբողջ գյուղեր և կոտորում են բոլոր նրանց, ովքեր այնքան արիւթիւն կամ անխոհեմութիւն ունեն, որ փորձում են ընդդիմանալ նրանց: Այժմ հայերը պատկանում են երկրագնդի ամենաշքավոր և ամենադժբախտ ժողովուրդների թվին»³:

էմիլ Դիլոնի՝ այդ միանգամայն ճիշտ և իրազեկ մարդու, դիտողութիւններից վրիպել է հույժ ուշագրավ մի կետ: Քանն այն է, որ այդ գնդերի իդեան թելադրել էր անզլիական դի-

¹ Эмил Диллон, Положение дел в Турции, 56 «Братская помощь армянам», II, стр. 13.

² Նույն տեղում, էջ 14:

³ Նույն տեղում, էջ 13:

վանագիտությունը, իբրև մի գիտնված ուժ, որը հակադրվեր Ռուսաստանին: Ճիշտ է, այդ դեպքում անգլիական դիվանագիտությունը ենթադրում էր, որ սպայությունը և գնդերի կազմակերպական եղանակը պետք է լինի անգլիական, այսինքն, որ այդ իռեգուլյար գնդերը անվանապես կհամարվեն թուրքական, ինչպես, օրինակ, Օսմանյան բանկն էր: Եթե նկատի ունենանք, որ հայերին կողոպտելու հարցը բացառելու դեպքում քուրդ-թուրքական անտագոնիզմը շատ ավելի ուժեղ էր, քան քուրդ-թուրքական մերձակցությունը, ուստի, բնականաբար, սուլթանական փշխանությունը ավելի նպատակահարմար էր համարում հայկական վիլայեթներում ունենալ թեկուղ վատ կազմակերպված բարեկամ, քան լավ կազմակերպված թշնամի: Եվ պատահական չէ, որ անգլո-հայկական կոմիտեն, նույնիսկ 1895 թվականին լորդ Քեմբերլեյին ներկայացնելով հայկական ռեֆորմների խընդիրը, հարցերից մեկն էլ համարում էր քուլտը քրդերին գինավորական կարգապահության ենթարկելը, որի համար իբրև միջոց առաջարկում էր այդ գնդերի հրամանատարությունը հանձնել եվրոպացիներին (իմա՝ անգլիացիներին):

Անգլիայի այդ միտումը հակասում էր նաև Ռուսաստանի հեռանկարներին: Ռուսաստանի համար հույժ վտանգավոր էր սահմանազխիսի փրեն հակադրված տեսնել անգլիական սպաների և դրամի միջոցով կազմակերպված հեծյալ գնդեր: Այդ հարցը ռուսական կառավարության առաջ պարզ ու հրատակ դնում է գեներալ-լեյտենանտ Զելենոյը իր «Հայկական հարցի մասին» գաղտնի զեկուցագրում, որին իր տեղում մենք կանդորդառնանք: «Ռուսաստանին,— գրում է նա— չի կարող ժպտալ եվրոպական սպաների և փողի միջոցով բազմաթիվ ագահ, բայց դրամ շունենալու պատճառով չկազմակերպված քրդերի հեծյալ հրոսակախմբերի կազմակերպումը, դրանք Անդրկովկասի համար առաջիկա քիչ են վտանգ ներկայացնում, բայց եթե կազմակերպվեն, որպես թեև իռեգուլյար, բայց կազմակերպված և ռազմական որոշ նշանակություն ունեցող հեծելազորի մի գանգված, այդ դեպքում դրանք իսկապես վտանգ կներկայացնեն Անդրկովկասի համար»¹:

¹ АВІР. ф. Политархив, д. № 3440, лл. 5—23.

Ուրեմն՝ ցարական Ռուսաստանի համար չարթններից փոքրագույնը համիդիե գնդերի իբրև «անկազմակերպ» հրոսակախմբեր մնալն էր: Բայց այդ արդեն այլ բան չէր նշանակում, քան այն, որ դրանք կհանդիսանային հայ բնակչության բնաջնջման գործիք:

1891 թվականի փետրվարի 14-ին Կ. Պոլսի անգլիական դեսպանը համիդիե գնդերի կազմակերպման մասին հաղորդում է իր կառավարության՝ «Այդ ծրագրի մասին մենք դեռևս բավականաչափ տեղեկություն չունենք, բայց ես անձամբ երկյուղով եմ նայում դրան»: Դեսպանի երկյուղը, իհարկե, հայերի վիճակը չէր, այլ այն, թե որքան կհամապատասխանի այդ ձեռնարկումը Անգլիայի քաղաքականությանը հայկական վիլայեթներում: Այդ զեկուցագրից ընդամենը շորս օր անց էրգրումից ստացվում է հյուպատոս Համպտոնի նամակը, որտեղ ասված է. «Սըր, պատիվ ունեմ սույն գրությանը կցել տեղական պաշտոնական թերթում տպագրված՝ քրդերից իռեգուլյար հեծելազոր կազմակերպելու և նրանց պետերից ոմանց առաջիկայում Կ. Պոլսի մեկնելու մասին հողվածի թարգմանությունը: Այդ պետերը անցյալ շաբաթ ուղևորվեցին Երզնկա, որտեղից մեկնելու են մայրաքաղաք:

Ինչպես ես առաջ հաղորդել եմ ձերդ գերազանցությանը, քրդերին գինելու որոշումը այստեղ դիտվում է մեծ երկյուղով: Այդ դեպքումնքն ուժեղանում է քրդերի՝ իրենց վարքի պատճառով. նրանցից շատերը բացիբաց հայտարարում են, որ իբր թե իրենք նշանակված են հայերին սանձահարելու համար և իբր թե իրենք երաշխավորություն են ստացել, որ դատական պատասխանատվության չեն ենթարկվելու քրիստոնյաների նկատմամբ ճնշումներ գործադրելու համար:

էրգրումում ապրող հայերը շատ անհանգստացած են և նրանցից շատերը, որոնք հնարավորություն ունեն, հայտարարում են, որ մտադիր են ճանապարհները բացվելուց հետո հեռանալ քաղաքից»¹:

Համիդիե գնդերը կազմված էին քրդական առանձին-առանձին ցեղերից: Յուրաքանչյուր ընտանիք պետք է տար

¹ «Положение армян в Турции», 1896, стр. 161—162.

առնվազն մեկ մարդ, տալով նրան ձի և հանդերձանք. հրացանը և փամփուշտները տրվում էին պետության կողմից: Գունդը կերակրվում էր իր հաշվին, ձեռք բերված ավարը ամբողջությամբ անցնում էր ցեղին: Համիդի գնդերը ունեին հետևյալ ներքին կազմակերպությունը: Գնդի հրամանատարը (գնդապետ) համարվում էր աշիրեթապետը: Շատ աշիրեթներ (ցեղեր) կազմում էին մի քանի գունդ, այդ դեպքում աշիրեթապետը համարվում էր բոլոր գնդերի հրամանատարը (գեներալը): Առանձին գնդերի հրամանատարներ հաստատվում էին ցեղապետի մերձավոր ազգականները՝ եղբայրները, որդիները և այլն: Մնացած սպայական պաշտոնները բաշխվում էին գնդի հրամանատարների ազգականների միջև: Հեծելազորի ընդհանուր թիվը հասնում էր մոտավորապես 30 000-ի:

Որպեսզի պարզ լինի այդ գնդերի ռազմական և բարոյական արժեքը, մենք հարկ ենք համարում բերել Դիարբեքի Տյուպատոսի հաղորդած հետևյալ տեղեկությունը՝ «Միրանի բոշվոր քրդերի հզոր առաջնորդն է Մուստաֆա աղան: Այդ մարդու նախընթաց կյանքը հասարակության մեջ մեծ հույս չի առաջացնում նրա գործողությունների ազնվության վերաբերյալ: Նա մեղադրվել է հրդեհումների, սպանությունների, թալանների և ամեն տեսակ ոճրագործությունների համար: Միայն մի քանի ամիս սրանից առաջ նա հափշտակել է տասնյակ հազարավոր մանր եղջերավոր անասուններ, և երբ նրա դեմ զանգատ հարուցվեց, նա շնորհյալացավ Մարդինի նահանգապետի դատարանին. ապարդյուն անցան նաև գեներալ-նահանգապետի սպառնալիքները: Այժմ նա տեղական վարչությունից ներումն է խնդրում, դրա համար առաջարկելով կազմակերպել դրագոնների գունդ: Ծա չեմ կարող պնդել, որ ծանոթ եմ այդ զորքի կազմակերպման, պարտականությունների և կարգապահության վերաբերյալ կառավարության մտադրությունների հետ, բայց այդ նախագծի իրականացումը ժողովրդին, ընդհանրապես, և քրիստոնյաներին, մասնավորապես, մեծ սարսափի մեջ է գցել: Նրանք արդարացի կերպով նշում են, թե քանի որ այդ հրոսակախմբերը խաղաղ ժողովրդի համար միշտ էլ սարսափ ու պատուհաս են

եղել, ապա ոչ ոք չգիտե, թե ինչ կարող են անել նրանք որպես զինված զորք»¹:

Հասկանալի է, որ նման զինվորական կազմակերպությունը մի առանձին ռազմական արժեք ունենալ չէր կարող: Ուստի նրա դերը, իբրև ռուսական փառակներին հակակշիռ մի ուժ, շատ շնչին էր: Հետևաբար անգլիական դիվանագիտության հիմնական միտումը շիրականացավ: Ուստի այդ գնդերի դերը մնաց այն, որ հայերի ցաքուցրիվ և անկազմակերպ ճնշումը վերածվեց կազմակերպված ընդհանուր ճնշման:

Եթե նկատի ունենանք, որ այդ գնդերի հրամանատարները բոլորն էլ անխտիր Մուսա բեյի, Հուսեյն բեյի և Մուստաֆա աղայի նման պաշտոնական ավագակապետներ էին, որոնք գլխավորում էին սուլթանական կառավարության կողմից կազմակերպված և նրա հովանավորության տակ գտնվող նույնպես պաշտոնական հրոսակախմբերը, ապա պարզ կլինի, որ համիդի գնդերի կազմակերպումը Թուրքիայում հայտարարը ոչնչացնելու նպատակի համար իրոք որ մի ճիվաղային միջոցառում էր: Հասկանալի են նաև ինչպես Դիարբեքի անգլիական Տյուպատոսի վերոհիշյալ հաղորդումը բնակչության սարսափի մասին, այնպես էլ էրզրումի Տյուպատոսի գրության հետևյալ տողերը՝ «Ծա կարող եմ ձեր գերազանցությանը կրկնել միայն այն, որ այդ միջոցառումը, որով քրդերի մեջ մտցվում է զինվորական կազմակերպություն, բոլոր քրիստոնյաների (հայերի) և օտարերկրացիների, հավասարապես նաև թուրքերի, մեջ առաջ է բերել մեծ երկյուղ և անհանգստություն»²:

Համիդի գնդերում որևէ զինվորական կարգապահություն գոյություն չունեի. ամեն ինչ որոշողը հրամանատարն էր, այսինքն՝ հենց նույն ցեղի աշիրեթապետը: Աշիրեթապետներն ու շխխերը ցեղի վրա վիթխարի ազդեցություն ունեին, իսկ համիդի կազմակերպմամբ նրանց ազդեցությունը փոխարկվեց բռնապետության, նախկին անկազմակերպ

1 Նույն տեղում, էջ 168—169:

2 Նույն տեղում, էջ 163:

ավազակութիւնը՝ պետականորեն կազմակերպված ավազակութիւն:

Թե որքան անձեռնմխելի և ինչքան արտոնյալ էին համիդիեի նույնիսկ սոսկական շարքային զինվորները, երբ նրանց գործողութիւնները վերաբերում էին հայերին, բազմաթիվ փաստերից բերենք մի քանիսը.

Անգլիական «Կապույտ գրքերից» մեկում ղետեղված են հյուպատոսական հաղորդագրութեան հետեյալ տողերը. «Քրդերի և հայերի միջև առաջացած ընդհարումը, որը ծագել էր քրդերի կողմից հարսնացու հայ աղջկանը հափշտակելու փորձ անելու պատճառով և որի ժամանակ սպանվել էին երկու քուրդ և մեկ հայ, այժմ պատիվ ունեմ հաղորդելու ձեր գերազանցութեանը, որ այդ գործով ձերբակալված և Մուշում բանտարկված հայերից տասնյոթը դատապարտվել են 15-ական տարի տաժանակիր աշխատանքի: Հարձակման մեջ մասնակցող քրդերին պատժելու համար ոչինչ չի արված»¹: Ուրեմն, համիդիե զինվորները հարձակվում են հարսնացուին հափշտակելու, հայերը պաշտպանում են անմեղ գոհին: Տեղի է ունենում ընդհարում, 17 հայեր պատժվում են, իսկ հարձակվող քրդերը՝ ոչ:

Էմիլ Գիլոնը իր աշխատութեան մեջ քերում է հետեյալ վկայութիւնը. «Մանկասար գյուղում (Ալաշկերտի շրջան) Գետրգ վարդանյանը ի միջի այլոց ցույց է տվել հետեյալը. «1892 թվականին մի քուրդ՝ Քերեվաշի որդի Անդոն (Ջալալի ցեղից), իր ընկերներով մտավ փմ տունը և խլաց 5 ոսկի, որ ես պահել էի սերմացու գնելու համար: Ես նրա դեմ զանգատ տվի, բայց իշխանութիւնը արհամարհանքով մերժեց: Անդոն, իմանալով, որ փորձ եմ արել նրան պատասխանատուութեան կանչելու, մի անգամ գիշերը 12 մարդով բարձրացավ իմ կտուրը և երդիկից կրակեց: Գնդակը կպավ իմ հարս Եգեկոյին, որն անմեղապես մահացավ: Այդ դեպքի ժամանակ սպանվեցին նրա երկու տղաները և իմ փոքր երեխան՝ Միսակը: Այնուհետև քրդերը թալանեցին տանս իրերը, անկողինը, 4 եզ և 4 կով: Ես շտապեցի Ղարաքիլիսա գյուղը և

դանգատվեցի Ռահիմ փաշային: Նա ինձ լսելով, ասաց. «Համիդիեի քրդերը սուլթանի ծառաներն են: Չեզ հետ այդպե՞ վարվելը՝ նրանց իրավունքն է: Դուք՝ հայերդ, ստախոս եք»: Ինձ ձերբակալեցին և ազատեցին միայն այն ժամանակ, երբ վճարեցի երկու ոսկի»²:

Նույն հեղինակի մանրամասն նկարագրած մի դեպքի բովանդակութիւնը հետեյալն է: Քուրդ Իբիլ-օղլու-Իբրահիմը իր ընկերներով արածացնում է Ալիջահրիկ լգուղի արտերը: Չորս հայ երիտասարդ գնում են խնդրելու, որ անասունները հանեն արտերից: Նրանց դիմավորում են հրացանների համազարկով՝ մեկին սպանում, մյուսին մահացու վիրավորում են: Մյուս երկու հայերը շտապում են դեպքի մասին հաղորդել շրջանի ոստիկանութեանը: Գյուղացիները քահանայի հետ գալիս են դեպքի վայրը: Շուտով հասնում է նաև ոստիկանութիւնը: Տեղում չգտնելով արդեն հեռացած քրդերին, հայերին մեղադրում են համիդիեի զինվորներին սպանելու և որևէ տեղ թաղելու մեջ: Բոլորին, հարկավ, ձերբակալում և ուղարկում են Հասան-ղալայի բանտը, որտեղից էլ՝ էրզրում: Գյուղի հայերը բանակցութեան մեջ են մտնում իշխանութիւնների հետ: Գալիս են հետեյալ համաձայնութեան. հայերը պետք է գտնեն իրենց մարդկանց սպանող քրդերին և 400 ոսկի կաշառք վճարեն, որից հետո ձերբակալված քահանան և 12 գյուղացիներն ազատ կարձակվեն: Քանի որ սպանողները Ալաշկերտի շրջանի համիդիեի քրդերից էին և գյուղացիները նրանց լավ ճանաչում էին, ուստի շատ հեշտութեամբ գտնվեցին: Սպանողները չժխտեցին իրենց կատարած գործողութիւնը, մի քանի այլ մահմեդականների հետ ցուցմունք տվին դեպքի էութեան մասին: Այդ գործի առթիվ դատական վճռի մեջ արձանագրվել էր՝ «Մի քանի քրդերի սպանելու գործով մեղադրվող հայերն ապացուցեցին իրենց անմեղութիւնը, քանի որ երկու հայ սպանող այդ քրդերը ողջ և առողջ գտնվեցին սուլթանական համիդիեի զորքի մեջ...»²:

¹ Эмиль Диллон, Положение дел в Турецкой Армении, 86» «Братская помощь армянам», 1897, II, стр. 21.

² Նույն տեղում, էջ 22—23:

Այսպիսով, այս և նման բազմաթիվ փաստերը, որ բերում են իրար հետ որևէ առնչություն չունեցող աղբյուրներ, աներկբայելի ապացույց են քրդերի այն բացեիքաց հայտարարության, որ համիդիեի զինվորները հայերի նկատմամբ իրենց գործողությունների համար որևէ պատասխանատվության ենթակա չէին, որ կառավարությունը ապահովում էր նրանց անձեռնմխելիության փրավունքը:

Մինչև XIX դարի 80-ական թվականները հայերի և քրդերի հարաբերությունները պարզապես դրացիական էին, օրինակ, Մոկսը, Սասունը և ընդհանրապես այն անառիկ լեռնաշխն շրջանները, որտեղ դարերի ընթացքում հայերն իրենց հարկերը վճարում էին քուրդ աշիրեթապետներին: Հատկապես կենցաղային մի շարք հարցերում դավանական տարբերությունն իրեն զգացնել չէր տալիս: Սովորական էր, որ հայերի սրբերի տոներին քրդերը ևս զոհեր էին մատուցում և ուխտագնացություն էին կատարում: Հաճախ էր պատահում, որ հայերը և քրդերը միմյանց համար փոխադարձաբար կնքահայր էին դառնում: Նրանց մեջ միմյանց մոտ հյուրընկալվելը, միմյանց ուրախություններին մասնակցելը շատ սովորական բան էր: Նրանք միմյանցից փոխ էին առել բազմաթիվ ֆուկլորային նյութեր: Թուրք պաշտոնյաների նկատմամբ այդ երկու ժողովուրդներն էլ անբարյացակամ վերաբերմունք էին ցուցաբերում:

Էրզրումի ուսական հյուպատոսի 1867 թվականի փետրվարի 9-ի № 59 զեկուցագրում Մոկսի վերաբերյալ կարդում ենք՝ «Հայերն ու քրդերը միաշափ ուղմատենչ ու բաջ են. նրանք ապրում են համերաշխ ատելությունը կառավարության նկատմամբ, որ փորձեր է անում նրանց ենթարկել սուլթանի իշխանությանը: Այդ երկու ժողովուրդներն էլ իրենց անկախ են համարում Թուրքիայի կառավարությունից, մանավանդ հայերը: Նրանք իրենց դարավոր համոզմունքով հարկերը վճարում են բացառապես միայն իրենց քրդերին, նրանց բեյերին և աղաներին համարում են իրենց պետերը»¹:

Այդ նույն հյուպատոսի մի այլ զեկուցագրում էրզրումի վիլայեթի մասին ասված է. «Ցամավա ընթացքում հետևելով բնակչության փոխադարձ հարաբերություններին, ինձ թվում է, որ սուլթանի կառավարության նկատմամբ էրզրումի (վիլայեթի) ժողովուրդների ընդհանուր ատելությունը մահմեդականներին (քրդերին) և քրիստոնյաներին մերձեցնում է իրար հետ: Կրետեի ապստամբությունը, որը տարբեր կերպով է ընկալվում զանազան շրջաններում, մահմեդականները դիտում են որպես այլահից առաքված արժանի պատիժ սուլթանին: Այդ ապստամբության ճնշման մասին երկու հայտարարությունը մտքերը շահագոտարին և բնակչությանը շմոտեցրին կառավարության հետ, իսկ հայտարարությունների սուտ լինելը ավելի գրգռեց բոլորին, մանավանդ մահմեդականներին: Այստեղ կառավարության հանդեպ բոլորը կորցրել են իրենց հավատը և, բացի այդ, օր-օրի վրա համոզվում են, որ սուլթանը ցանկանում է իրենց երկիրը վերջնականապես կործանել: Կասեմ, որ այժմ մահմեդականներն ավելի շատ են տրտնջում, քան քրիստոնյաները և գրեթե հուսահատության մեջ են»:

Նույն հյուպատոսը մի այլ զեկուցագրում հաղորդում է՝ «Հաղարանլի քրդական ցեղը 1000 վրանով հեռացավ Թուրքիայից և անցավ Պարսկաստանի սահմանները, Վանի մուտեսարիֆին սպառնալով՝ չվերադառնալ նախկին բնակչության վայրը»: Բայց չհաշտվելով Մակուի խանի պահանջների հետ և «Աբդուլլա փաշայից (Վանի նահանգապետից) ստանալով ամենակեղծավոր խոստումներ, նրանք նորից վերադարձան և նորից հրաժարվեցին հարկ վճարել կառավարությանը...»:

Գերսիմի և Ղուզուլչանի քրդերը այնքան հոգսեր են պատճառում Երզնկայի մուտեսարիֆին, որ ամբողջ շտաբը բանակով շարժվեց նրանց դեմ և տեղավորվեց այդ երկրամասերի սահմաններում»¹:

Պատմական այդ շրջանում ևս հայ գյուղացիությունը ենթակա էր քուրդ աշիրեթապետներին, բայց կառավարության

¹ АВПР, ф. Политархив, 1862—1870 гг., д. № 8, лл. 2—5.

¹ Նույն տեղում, թթ. 96—101:

և այդ աշխրեթապետների անտագոնիզմը հարկերը տիրելու շուրջը մի միջոց էր, որ հայ գյուղացիության դրուձյունը հաջորդ շրջանի համեմատությամբ դարձնում էր տանելի: Քուրդ աշխրեթապետներին մտահոգություն պատճառողը թուրքական կառավարության ձգտումն էր վերջնականապես իրեն ենթարկել այդ ցեղերին և ազգաբնակչության հարկերը իր ձեռքում կենտրոնացնել: Հարկավ, այդ ժամանակ ևս հազվադեպ չէին ինչպես կողոպուտները, այնպես էլ շարաշահությունները, բայց մասսայական կոտորածները բացառված էին:

Բաֆֆին իր ճանապարհորդական նոթերից մեկում արձանագրում է թուրքահայ գաղթականներից լսած հետևյալ խոսքերը՝ «Մեր երկիրը վատ չէր, հողն ընդարձակ էր, իսկ ջուրն առատ, ցանում էինք, որքան կամենում էինք: Մենք մեր հողի տերն էինք: Մեր սարերը խոտավետ էին, իսկ մեր անասունները կուշտ ու պարարտ: Մեր հարևան քրդերը չէին վնասում մեզ, մենք սիրով էինք ապրում միմյանց հետ և նրանց քրվա էինք կոչում: Պատահում էին, որ լինում էին ավազակություններ, օրինակ, մի խումբ քրդեր, ուրիշ երկրից գալով, կողոպտում էին ինչպես մեր, նույնպես և իրենց ազգակիցների անասունները, խտրություն չէին դնում, մենք էլ նույնպես էինք վարվում նրանց հետ: Այդ մեր երկրի սովորությունն է»¹:

Եթե համեմատենք այս վերջին տվյալները մեր կողմից բերված նախորդ տվյալների հետ, պարզ կլինեն այն հակառակ կառավարությունները, որ կատարվել էին հայ-քրդական և թուրք-քրդական հարաբերությունների մեջ 70 և 90-ական թվականների միջև ընկած ժամանակաշրջանում:

Այդ հարցում վերջին տեղը չէր գրավում սուլթանական կառավարության ագիտացիան, որին առիթ էր ծառայում Բեռլինի տրակտատի 61-րդ հոդվածի կենսագործման հարցը: «Հայաստան» բառը իբրև աշխարհագրական անուն թուրքիան վերացրել էր և այն փոխարինել էր «Քյուրդստան» բառով: Օրինակ, Վանի միսիոներական դպրոցը Ֆրանսիայից

ստացել էր աշխարհագրության դասագրքեր. որովհետև այդ դասագրքի քարտեզում նշված է եղել «Հայաստան» բառը, արգելվում է այդ դասագրքերի օգտագործումը և կարգադրվում է դրքերը վերադարձնել Ֆրանսիա: Քրդերի մեջ պրոպագանդվում էր, որ հայերը ցանկանում են ինքնուրույն պետություն ստեղծել և «Քյուրդստանը» «Հայաստան» դարձնել, իսկ քրդերին իրենց ենթարկել, որ երեկվա ուսանողներն էլ երկրի տերը դառնալ և ազատ քրդերին ուսյա դարձնել: Եթե այս հանգամանքը միացնենք այն արտոնությունների հետ, որ թուրքական կառավարությունը հատկացնում էր աշխրեթապետներին, այդ բոլորը կապելով դավանական տարբերության հետ, պարզ կլինի, թե ինչու առաջվա սովորական կողոպուտները վեր էին ածվում համատարած հայ-քրդական անտագոնիզմի: Այդ հանգամանքը մեծապես օգտագործում էր թուրքիան, հայերի ամեն մի դժգոհություն ցուցադրելով որպես ապստամբություն և հեղափոխություն, որի ճնշումը իբր թե պահանջում էր ոչնչացնել հայերին: Համիդիե գնդերի կազմակերպմամբ հայերի մասսայական ջարդերը դառնում են օրակարգի հարց, հարկավոր էին միացնել առիթներ: Իսկ առիթներն անսահման էին: Եվ առաջին մասսայական շարժն սկսվեց Սասունից:

«1893 և 1894 թվականների ամառը, Սասունի լեռներում, հնչակյան ագիտացիայի հետևանքով տեղի ունեցան գյուղացիական շարժումներ, — գրում է Լեոն, — որոնք հնչակյանների կողմից որակվեցին որպես ապստամբություն թուրք կառավարության դեմ: Այս շարժումների ոգին հնչակյան հայդուկային մի փոքրիկ խումբ էր, որի ղեկավարն էր Մուրադ անունով հնչակյան հայտնի գործիչը (Համբարձում Պոյաճյանը)»¹: Այս հատվածում Լեոն երկու կարևոր միտք է արտահայտում: Այդ մտքերից մեկին մենք համակարծիք ենք, իսկ մյուսը առարկելի ենք համարում. 1) Մեր կարծիքով, Լեոն Սասունի այդ դեպքերն ամենայն իրավամբ գյուղացիական շարժումներ է համարում, ըստ երևույթին նկատի ունենալով այն, որ այդ շարժումները գյուղացիության սոցիալ-տրն-

¹ «Փորձ», 1877, № 3:

¹ Լեո, նշված աշխատությունը, էջ 178—179:

տեսական անագորույն կեղեքման հետևանք էին և իրենց մեջ որևէ քաղաքական պահանջ չէին պարունակում: 2) Լեոն այդ շարժումների ոգին, հետևաբար, կազմակերպիչը, համարում է հնչակյան կուսակցությանը: Մեր կարծիքով, այս դեպքում իրավացի չէ մեր հարգելի պատմաբանը: Այդ մասին նա որևէ տվյալ չունի, բացի նրանից, որ շարժման մասնակիցների մեջ արձանագրում է հնչակյան մի փոքր խմբակ: Գոնե մեր տրամադրության տակ եղած արխիվային փաստաթղթերի հիման վրա այդպիսի եզրակացության գալը ոչ մի վկայություններ չի հաստատվում, մինչդեռ ցարիզմի դիվանագիտությունը հայերի ամեն մի թեկուզ չնչին քաղաքական ելույթը ուռեցնում և պատկերում էր որպես քաղաքական ապրստամբություն. այդ մասին մենք ավելի հանգամանորեն կխոսենք հաջորդ գլխում: Լեոն պարզապես հավատացել է «Հընչակի» անհիմն հայտարարություններին, որը Սասունի ապրստամբության մեջ տեսնում էր մի հեղափոխություն, որի նպատակն էր լուծել հայկական հարցը:

«Հատուկ թղթակցով, — գրում է «Հնչակը», — մի մեծ ու ծանր լուր հասավ մեզ՝ հնչակյան հեղափոխական կուսակցության նախաձեռնությամբ Սասնո գավառը և Մշո դաշտի մի քանի գյուղեր ապստամբվել են կառավարության դեմ: Մի քանի անգամ Մուշից և Բաղեշից զորքեր են ուղարկվել ապրստամբների վրա, բայց ջարդվել են: Կառավարությունը, չունենալով բավականաչափ զինված ուժ, գլուխը կորցրած դիմում է ուրիշ կենտրոններին օգնություն խնդրելով: Ապրստամբական շարժումը ավելի ու ավելի ընդարձակ ծավալ է ստանում շարունակ»¹:

Մենք չգիտենք, հնչակյանները հավատում էին թե ոչ իրենց ասածին, որ ապստամբության նախաձեռնողները եղել են հնչակյանները, բայց հաստատ գիտենք, որ թուրքական կառավարությունը պաշտոնապես նույն բանն էր ասում, հաստատ գիտենալով, որ ասածը հորինված է Յելդզ-Քյոզքի պալատներում: Թուրքական կառավարությանն անհրաժեշտ էին թեկուզ չնչին առիթներ՝ օրինական հիմք ստեղծելու հա-

յերի բնաջնման իր հիվաղային քաղաքականությունն ու գործունեությունը Եվրոպայի աչքում արդարացնելու համար: Հնչակյաններն այդ առիթը տալիս էին ոչ թե քաղաքական ապստամբություններ կազմակերպելով, այլ իրենց գրական հոխորտանքներով և երբեմն անիմաստ ու պրովոկացիայի համար նյութ ծառայող դավադրություններով:

Մենք չենք ծխտում, որ այդ ժամանակ հնչակյանները գործում էին Թուրքիայում, բայց նրանք աշխատում էին կենտրոններում՝ Կ. Պոլսում, Տրապիզոնում, Վանում և այլ քաղաքներում ու դավադրական խմբակներից այն կողմը չէին անցնում, նպատակ ունենալով իմպերիալիստական պետությունների ուշադրությունը հրավիրել հայկական հարցի վրա: Եթե ոմանք էլ ուսուցչության կամ այլ գործով գնում էին գավառները, ապա նրանց «հեղափոխական» գործունեությունը պարզապես «ծապլավարիզմ» էր, որ գեղարվեստորեն պատկերել է մեր տաղանդավոր գրող Ե. Օտյանը:

«Հնչակի» մի այլ հոդվածում մենք կարդում ենք՝ «Հայկական խնդիրն ու իր լուծումը այսօր կախված են հայ հեղափոխականներից... Այսօր մինիստրների կողմից անգամ մատնանշված և հաստատուն իրողություն է, որ հայկական խնդիրն իր ներկա եռանդուն վիճակում, որը բերել նրան դրել է իր լուծման նախընթաց օրը, պարտական է հայ հեղափոխականներին... Անցյալ ամիսներում արդեն, Սասունի դեպքեն անմիջապես վերջ, մենք գրեցինք — մենք կշարունակենք, և ավելի մեծ եռանդով, մեր հեղափոխական գործունեությունը: Մենք կնայենք, թե ինչ է անում Եվրոպան իր քննություններով ու դիպլոմատիայով, և պետք եղած դեպքում հեղափոխական շարժումներով մենք կծանրանանք նրա վրա, այդպիսով, հարկադրելով նրան լուծում տալ մեր խնդրին»¹:

Այսպիսով, եթե Սասունի ապստամբությունը մի «քաղաքական հեղափոխություն» էր և նրա կազմակերպիչներն ու առաջնորդները հնչակյաններն էին, ապա այս մեջբերումից պարզապես բխում է, որ նրանք մի նպատակ ունեին՝ եվրո-

¹ Լեո, նշված աշխատությունը, էջ 178—179:

¹ Նույն տեղում, էջ 181:

պական դիվանագիտութեանը հարկադրել զբաղվելու հայկական հարցով:

Այժմ տեսնենք, թե ինչ են ասում արխիվային փաստաթղթերի վկայութունները Սասունի ապստամբութեան իրական դեպքերի մասին:

Սասունը մի անառիկ լեռնային երկիր է, որը գտնվում է Մուշից դեպի հարավ՝ Բիթլիսի վիլայեթում: Երկրի բնակիչները հայեր և քրդեր էին: Վերջինների շնխեթն ու աշիրեթապետները դեռ XVII դարից օգտվում էին թեմարի հողատիրական իրավունքով և, շնայած թեմարի հողատիրութեան պաշտոնական վերացմանը, մինչև XIX դարի վերջերը նրանք փաստորեն օգտվում էին այդ իրավունքից և իրենց գրեթե անկախ էին համարում թուրքական իշխանությունից: Հայերը ևս, իբրև աշխատավոր գյուղացիական ժողովուրդ, նույնպես գրեթե կապ չունեին թուրքական իշխանության հետ: Նրանք հարկերն ու պարհակները դարերի ընթացքում վճարում էին քուրդ ցեղապետներին:

Կ. Պոլսի ռուսական դեսպան Նելիդովի կարգադրությամբ կազմվել է մի հատուկ ընդարձակ զեկուցագիր¹, որը գրել է թուրքիայում երկար տարիներ իբրև դեսպանատան գլխավոր քարտուղար և խորհրդական աշխատող արքունական խորհրդական Սմիռնովը: Մենք հետագայում այդ աղբյուրը անվանելու ենք Սմիռնովի զեկուցագիր: Ահավասիկ այդ փաստաթղթում Սասունի մասին մենք կարդում ենք՝ «Այդ վայրենի և անառիկ երկրում, հենց բնութեան պայմանների շնորհիվ, հայերը մինչև վերջին ժամանակները շատ քիչ բանով էին կախված թուրքական իշխանություններից: Առաջներում նրանք քրդերի հետ ապրում էին շատ ավելի համերաշխ, նրանց հարկ էին տալիս, և քրդերը նրանց ոչ միայն չէին նեղացնում, այլ նույնիսկ, ընդհակառակն, պաշտպանում էին թուրքերի ոտնձգություններից: Վերջին տարիներում հարաբերությունները միանգամայն փոխվեցին. քրդերի նկատմամբ սուլթանի առատ ողորմածությունները և նրանց իռեզուլյար

հեծելազոր դարձնելը ակամա նրանց մերձեցրին թուրքերի հետ»:

Հայտնի ավազակապետ-աշիրեթապետ Մուսա բեյը, որի մասին իր տեղում մենք խոսել ենք, հարձակվում է մի հարսանեկան հանդեսի վրա, ցանկանալով հափշտակել հարսնացուին: Արաբո անունով մի հայ, որ մասնակցում էր հարսանեկան հանդեսին, սպանում է հարձակվող քրդերից երկուսին: (Այս դեպքին է վերաբերում աշխատութեանս 186-րդ էջում զետեղված անգլիական հյուպատոսական տեղեկությունը): Այս դեպքը մեկն է այն «քաղաքական ապստամբություններից», որոնց մասին խոսում են թուրքական կառավարությունը և «Հնչակը»: Արաբոն դատապարտվում է 15 տարվա տաժանակիր աշխատանքի: Նրան հաջողվում է փախչել Բիթլիսի բանտից և թաքնվել Սասունի գյուղերում: Նրան ձերբակալելու փորձերն ապարդյուն են անցնում և վերջանում են գազանային բռնություններով: 1893 թվականի գարնանը թուրքական զորքերը հանկարծակի հարձակվում են Ավզուտ և Վարդենիս գյուղերի վրա և, չգտնելով այնտեղ Արաբոյին, սոսկալի կոտորածներ են սարքում: Սմիռնովի զեկուցագրում մենք կարդում ենք՝ «Զինվորները տանջում և այրում էին շիկացած երկաթով տղամարդկանց, բռնաբարում էին կանանց, ձիու սմբակներով ճզմում էին մանուկներին, կոտորում էին անասունները և մինչև 100 մարդ ձերբակալելով վերադարձան Մուշ» (այս էր «Հնչակի» հիշատակած «քաղաքական ապստամբություններից» մեկը):

Մուշի առաջնորդ ծայրագույն վարդապետ Ներսես Կարախանյանը համարձակվում է բողոքել այդ վայրագությունների դեմ: Այդ դեպքը ևս թուրքական կառավարությունը որակում է որպես «քաղաքական ապստամբություն» և ձերբակալելով Ներսես վարդապետին, 30 զինվորի ուղեկցությամբ ուղարկում է Բիթլիսի վալու դատարանին:

1893 թվականի հուլիսին Կ. Պոլսից նոր հրաման է ստացվում՝ ինչ կերպ էլ լինի, ամեն միջոց գործադրել ձերբակալելու Արաբոյին և նախկին ուսուցիչ Միհրան Տամատյանին, որը ժողովրդին փարոզել է հարկեր չվճարել բուրժուական կառավարությանը, քանի որ գյուղացիությունն իր վրա ընկնող

¹ АВПР, ф. Политархив, Армянский вопрос, Янв.-июнь, 1895 г., лл. 53—75.

հարկային ու պարհակային բոլոր պարտավորությունները վճարում է Բրդերին: Տամատյանին հաջողվում է ձերբակալել: Նրան ուղարկում են Բիթլիսի բանտը, այնտեղից էլ կառավարության պահանջով՝ Կ. Պոլիս, որտեղ կառավարությունը նրան ազատում է կալանքից: Այսպիսով, տեղի է ունենում հույժ ուշագրավ կազուս. հնչակյան ագիտատորը, որը գյուղացիությանը հորդորում էր կառավարությանը հարկեր չվճարել, ազատվում է բանտարկությունից, իսկ ագիտացիայի ենթարկվող գյուղացիությունը կոտորվում է: Այս առեղծվածը եվրոպական թղթակիցներից ոմանք բացատրում էին նրանով, որ Տամատյանին կասկածում էին թուրքական կառավարության պրովոկատոր լինելու մեջ: Մենք այդ կարծիքը չենք բաժանում: Տամատյանը պաշտոնապես թուրքական գաղտնի ոստիկանության ագենտ չէր, բայց նրա կատարած պրոպագանդիստական գործը օբյեկտիվորեն պրովոկացիայի դեր կատարեց: Թուրքական կառավարությանն այդ էլ հարկավոր էր հայկական կոտորածներ կազմակերպելու համար: Իսկ Տամատյանին կառավարությանը դա միայն ազդեցություն քաղաքականություն էր եվրոպական հասարակական կարծիքի առաջ բարեգութ երևալու համար: Այդ նույն քաղաքականությունը կիրառվեց նաև Գում-Գափուի ցույցի ժամանակ. Կ. Պոլսում ձերբակալվածներից շատերն ազատվեցին, իսկ գավառում կազմակերպեցին սարսափելի կոտորածներ:

Ինչ վերաբերում է Արաբոյին, ապա Սմիռնոսի զեկուցագրի համաձայն նրան ձերբակալել չհաջողվեց, Սասունի և Մշո դաշտի գյուղացիները նրան չէին հանձնում կառավարությանը և ամենուրեք թաքցնում էին: Թուրքական կառավարությունը այդ երևույթը համարում է մեծ խռովություն և Սասուն է ուղարկում Երզնկայից՝ 19-րդ հեծյալ գունդը, Մուշից՝ 22-րդ հեծյալ գունդը, էրզրումից՝ 25-րդ հետևակ գնդի առաջին գումարտակը՝ երկու թնդանոթով: Զորքերը շրջապատում են Սասունի անառիկ գյուղերից մեկը՝ Տալվորիկը: Գյուղացիները զինվում են ով ինչով կարող է: Լեռն այդ առթիվ գրում է՝ «Մի թուրք պաշտոնական հիշատակարանից մենք տեղեկանում ենք, որ հայերը զինված էին կայծքարի հրա-

ցաններով, դաշույններով, կացիններով, ցաքատներով...»¹: Չնայած զինված ուժերի ահռելի տարբերությանը, թուրքական զորքերը այդ անգամ չկարողացան գրավել Տալվորիկը: Մեր աղբյուրը դրա պատճառը համարում է «տեղանքի ծայրահեղ անառիկ լինելը և լեռնային արահետներով մյուս գյուղերի հետ հաղորդակցության հնարավորությունը»: «Վերահաս աշունը, — ասում է Սմիռնոսը, — զորքին հարկադրեց հեռանալ: Հեռանալուց առաջ զինվորական հրամանատարությունը բանակցությունների մեջ մտավ տանուտերերի հետ և, այդպիսով, որոշ հանդարտություն ստեղծեց»:

Այս Սասունի ապստամբության առաջին փուլն էր: Երկրորդ փուլի մասին, որը դեպքերի բուն էությունն է կազմում, մեր աղբյուրը չափազանց լակոնիկ է արտահայտվում, կանգ առնելով ապստամբության բուն պատճառի վրա, առանց պատմելու դեպքերի մանրամասնությունների և Զեքի փառայի գլխավորությամբ տեղի ունեցած կոտորածի մասին:

Սմիռնոսը գրում է՝ «Դրանից հետո մի տարի անց՝ 1894 թվականի ամռանը՝ ամենուրեք լուրեր տարածվեցին թուրքերի և քրդերի հուլիս ամսում Սասունում կատարած արյունալի գազանությունների և ջարդերի մասին: Խոսում էին մինչև վերջ այրված գյուղերի, հազարներով կոտորված հայերի, կանանց բռնաբարությունների, երեխաներին մորթելու, մարդկանց մաշկելու և կենդանի-կենդանի թաղելու մասին: Այդ տագնապալի լուրերը հայկական աշխարհում ամենաուժեղ հուզումներ առաջացրին: Հյուպատոսական զեկուցագրերը, դժբախտաբար, այնուամենայնիվ հաստատեցին տեղի ունեցած ոճրագործությունների մասին լուրերը:

Ըստ երևույթին գործը բռնկվել էր նրանից, որ Գիարբեֆիից ամառային յայլաղներն եկած Բեհրանլի ցեղի բուրջ աշիրեթապետները հայերից պահանջել էին վճարել սովորական հարկերը և, մերժում ստանալով, փչել էին հայերի անասունները (ընդգծ. մերն է.—Ս. Մ.): Հայերը դիմում են Սասունում կանգնած 32-րդ գնդի 4-րդ գումարտակի հրամա-

¹ Լեռ, նշված աշխատությունը, էջ 180:

նատար Սալիհ էֆենդուն, որպեսզի իրենց պաշտպանի: Սալիհ էֆենդին, շնայած հայերից դրա համար փող էր ստացել, դանդաղեցնում է հայերի պաշտպանությունը, մանավանդ որ քրդերը ևս իրենց կողմից դիմել էին նրան՝ օգնել իրենց հարկերը գանձելու համար: Հայերը, տեսնելով, որ խուլ են մնում դեպի իրենց խնդրանքները, իրենք ետ են խլում անասունները, ընդ որում տեղի ունեցած ընդհարման ժամանակ սպանվում են մի քանի մարդ: Դրանից հետո շուտով գալիս է կայմակամը՝ հարկերը հավաքելու: Հայերը խնդրում են հետաձգել, հայտնելով, որ առանց անասունների իրենք չեն կարողացել հացահատիկը հավաքել և փող չունեն: Այդ ժամանակ կայմակամը հրամայում է ձերբակալել մի շարք հայերի, բայց ժողովուրդը հարձակվում է ոստիկանների վրա և ազատում ձերբակալվածներին: Կայմակամը փախչում և զեկուցում է հայերի ապստամբության մասին: Սալիհ էֆենդին իր կողմից նույն բանը հաղորդում է իր գծով: Բ. Գուռը, ստանալով այդ տեղեկությունները, հրամայում է անհապաղ Սասունում կենտրոնացնել նիզամը և Հայդարանլի ցեղի քրդերի երկու գունդ համիրի: Ահա այդ զինվորական ուժը լեռնային հրետանու հետ միասին Սասունում կատարում է այն վրդովեցուցիչ գազանությունները, որոնք գրեթե բոլորովին ոչնչացրին Տալվորիկ, Շենիկ, Սենազ, Գելիգյոզալ, Անդոր և մյուս գյուղերը: Ապստամբության ղեկավարները, ինչպես ասում են, եղել են ոմն Գրքոն, որին իբր թե մորթել են քրդերը, և Մուրադը կամ դոքտոր Համբարձումը (հնչակյան՝ Համբարձում Պոյաշյանը.— Ս. Մ.), որը որոշ լուրերի համաձայն փախել է, այլ տեղեկություններով՝ նստած է Մուշի բանտում:

Մմիռնովը, դեսպանատան մեջ եղած բազմաթիվ պաշտոնական փաստաթղթերի հիման վրա արձանագրելով հարցի փաստական կողմը, ինքն անում է հետևյալ եզրակացությունը.

«Ծվրոպական հասարակական մտքի արտակարգ մեծ հու-

1 Առաջին դեպքում խոսքը քուրդ աշիրեթապետներին վճարվող հարկերի մասին է, երկրորդ դեպքում՝ պետական հարկերի:

զումը Բ. Գուռը հարկադրեց դեպքերի տեղն ուղարկել քննչական հանձնաժողով, ընդ որում տերությունները պնդեցին, որ հանձնաժողովում մասնակցեն օտարերկրյա պատվիրակներ: Հանձնաժողովի խնդիրն է պարզել Սասունում կատարված ոճրագործությունների իսկական շափը և գտնել հանցավորներին:

Հանուն մարդասիրության և թույլ շտալու համար, որ թաքցվեն թուրքական վարչության գործողությունները, ընդհակառակն, ձգտելով մերկացնել նրա բոլոր ոճրագործությունները, Ռուսաստանը միաժամանակ մտահոգված է, որ հետագայում չլրկնվեն այդքան ցավալի դեպքեր: Բայց որևէ բան ձեռնարկելը առանձնապես դժվար է այն պատճառով, որ Բ. Գուռը, շնայած պատրաստակամության է հայտնում ենթարկվելու Բեուլինի համաձայնության 61-րդ հոդվածին, հեռավոր շափով անկեղծ չէ հայ բնակչության դրությունը բարելավելու իր ձգտման մեջ: Մինչդեռ անգլո-հայկական կոմիտեները անկասկած կձգտեն քաղաքականության բնագավառը մտցնել Հայաստանի կարգավորման հարցը, այլ փերպ ասած, կփորձեն ստեղծել միջազգային հայկական հարց, որը Ռուսաստանի համար պետական կարևորություն ունեցող հարց է, քանի որ Ռուսաստանը տիրում է Կովկասին և մեծ քանակությամբ հայ հպատակներ ունի»:

Մմիռնովի զեկուցագիրը շատ կողմերով ուշագրավ լինելով հանդերձ, մենք ուշադրություն ենք հրավիրում այն կետի վրա, որտեղ նա Սասունի դեպքերի պատճառը համարում է հարկերի հարցը: Եվ իրոք, բազմաթիվ արխիվային փաստաթղթերը, եվրոպական մամուլի թղթակիցների հոդվածները, մասնավոր անձնավորությունների նամակները, ծավալուն աշխատությունները, որոնք Սասունի ապստամբության կապակցությամբ հեղեղեցին ամբողջ աշխարհը, միաբերան վկայում են այդ տեսակետի ճշմարտությունը: Անգլիացի հրապարակախոս Մակքոլը իր «Անգլիայի պատասխանատվությունը Հայաստանի առաջ» աշխատության մեջ, խոսելով Սասունի դեպքերի մասին, գրում է՝ «Քրիստոնյա հայերը պարտավոր են քրդերին փրկագին վճարել, որպեսզի փրկեն իրենց սեփականությունը, կյանքը և կանանց պատիվը, որով-

հետև թուրքական իշխանությունները հայերին մերժում են պահանջվող պաշտկանությունը: Դրա հետևանքով քրիստոնյա բնակչության մասան այնքան էր քայքայվել, որ ի վիճակի չէր դրանից վեր վճարել նաև պետական հարկերը: Դրան իբրև ապացույց կարելի է ամբողջ էջեր լրացնել կապույտ գրքերից վերցրած քաղվածքներով... Բոլոր հաղորդումները համաձայն են այն բանում, որ Հայաստանում նորերս կատարված գազանությունները (այսինքն՝ Սասունի կոտորածները. — Ս. Մ.) առաջացել են մասամբ նրանից, որ հայերը փորձել են իրենց և իրենց գույքը պաշտպանել քրդերից, մասամբ էլ նրանից, որ հայերը հրաժարվել են կառավարական հարկերը վճարել, որովհետև զրկված են եղել այդ հնարավորությունից: Այդ պատճառով հայերը զրկվել են կյանքի իրավունքից, և նրանց շարդերն այդպիսով համարվել են օրինական»¹:

Գոյություն ունեն միայն երկու աղբյուր, որոնք ժխտում են այդ հանգամանքը և Սասունի կոտորածների պատճառը համարում են քաղաքական հեղափոխությունը: Այդ կարծիքը գալիս է երկու տարամերժ աղբյուրներից՝ Թուրքիայի կառավարության հայտարարություններից և «Հնչակի» հոդվածներից: Բայց այդ երկու աղբյուրը նույն տեսակետն արտահայտում էին միանգամայն տարբեր միտումներով: Այն ժամանակ, երբ Թուրքիան աշխատում էր հեղափոխության պատրվակի տակ քողարկել հայերի նկատմամբ իր ճիվաղային քաղաքականությունը, հնչակյանները կեղծ հեղափոխական ֆրազեոլոգիայով ցանկանում էին իմպերիալիստական պետություններին դրդել զբաղվելու հայկական հարցով:

Ամերիկացի միսիոներ Գրինի «Հայկական ճգնաժամը և Թուրքիայի տիրապետությունը (Սասունի շարդը)» աշխատության առաջաբանում կառուցելով, հատկապես պատասխանելով Թուրքիայի հերյուրանքներին, գրում է՝ «Սա ճանաչում եմ այդ ժողովրդի (հայերի. — Ս. Մ.) ֆիզիկական, բարոյական և մտավոր մեծ կարողությունները: Այն անդունդը, որի մեջ

կարող է ընկնել առանձին անհատը կամ ժողովուրդը, միաժամանակ ցույց է տալիս նաև այն բարձունքը, որին նա կարող է հասնել: Կարելի է միայն զարմանալ, որ այդպիսի կարկառուն ընդունակություններ, եռանդ և խելք ունեցող ժողովուրդը մինչև այժմ մնում է ենթակա վիճակում: Բայց եթե դիտվի, ինչպես Կ. Պոլսում և երկրի ներսում բազմաթիվ տարիներ ապրելու ընթացքում ես դիտել եմ, թե ինչպես մատի ամեն մի շարժմանը հետևում է սոսկալի վրեժխնդրություն, պետք է միայն զարմանալ այդ դժբախտների խելագար համարձակության վրա, որ իբր թե հեղափոխություն են ձեռնարկել: Իրականում նրանք այդպիսի բան չեն մտածում: Գոյություն ունեն առանձին ազիտատորներ, բայց նրանց նպատակը ևս միայն այն է, որպեսզի քաղաքակիրթ աշխարհի ուշադրությունը դարձնեն դեպի իրենց ժողովրդի հեծածանքները, որոնք նույնիսկ աստված չի լսում»¹:

Սասունի ապստամբության և կոտորածների մասին գոյություն ունեցող բազմաթիվ վկայություններից մենք անհրաժեշտ ենք համարում այստեղ բերել միայն երեքը, որոնցից երկուսը հրատարակված են, իսկ մեկը հյուպատոսական զեկուցագիր է, որ մենք հայտարարել ենք արխիվում:

Ամերիկացի Ֆ. Դ. Գրինի «Հայկական ճգնաժամը և Թուրքիայի տիրապետությունը» աշխատությանը կցված են 18 նամակ, որոնց բնագրերի վավերականությունը հաստատում են զանազան բնագավառների 20 անկանավոր գործիչներ: Այդ նամակների մասին հեղինակը տալիս է հետևյալ բացատրական ծանոթագրությունները՝ «Այս նամակները գրել են այնպիսի մարդիկ, որոնք որևէ առիթ չէին կարող ունենալ փաստերը խեղաթյուրելու գործում, մինչդեռ, մյուս կողմից, այս հաղորդումների հեղինակներից յուրաքանչյուրը իրեն անձնական վտանգի էր ենթարկում՝ նամակում բերելով նման փաստեր և իր գրառումներն ուղարկելով փոստով: Այստեղ բերվող փաստաթղթերից մի քանիսը Թուրքիայից ստացվել են զարտուղի ճանապարհով: Դրանց մի մասը հատուկ սուր-

¹ Коп. Мэлькольм-Макколь, Ответственность Англии перед Арменией, 36-е Положение армян в Турции, 1896, стр. 133.

¹ Տես կառույցի «Առաջաբանը» Գրինի գրքին՝ կցված «Положение армян в Турции», 1896, էջ 225:

հանդակով ուղարկվել է Պարսկաստան և այնտեղից ուղարկվել է մեր երկիրը, մյուս մասի հեղինակները, շվետահելով թուրքական փոստին, իրենց հաղորդումներն ուղարկել են Կ. Պոլսի բրիտանական փոստատան միջոցով: «Նամակները հիմնված են գլխավորապես ջարդի ենթարկված վայրերից փախստականների, ինչպես և ջարդերին մասնակցող քրդերի և զինվորների ցուցմունքների վրա: Ուստի այդ ցուցմունքների մեծագույն մասը քաղված է առաջին ձեռքերից, որովհետև դրանք ակնատեսներից ստացել են այնպիսի մարդիկ, որոնք այդ ժամանակ գտնվել են հարևան վայրերում, հայտնի են իրենց անաշուտությամբ, արևելյան վկայություններն ստուգելու հմտությամբ, լավ ծանոթ են թուրքերեն և հայերեն լեզուներին և արժանի են ամենաբարձր վստահության: Նամակները գրված են միմյանցից միանգամայն անկախ, տարբեր ժամանակ և ? տարբեր վայրերից, որոնք գտնվում են ջարդի ենթարկված վայրի շուրջը: Վկայությունները միմյանց հետ համընկնում են և ճնշիչ բնույթ ունեն»:

«Ցուցմունքներում լիակատար համերաշխություն կա այն մասին, որ Սասունում կատարվել է մի վիթխարի և իր սարսափով աննկարագրելի ջարդ, որին ենթարկվել են հայ տղամարդիկ, կանայք ու երեխաները, և որ այդ ջարդը կատարել են թուրքական սուլթանի կողմից զինված քրդական զորքերը և կանոնավոր բանակի զինվորները, որոնք ուղարկվել են հատուկ հրամանով, և իրագործվել է թուրքական բարձրաստիճան սպաների անձնական ղեկավարությամբ: Որևէ կասկածի ենթակա չէ (քանի որ արքունական պաշտոնական հաղորդումը նույնմբեր ամսին տպագրված Կ. Պոլսի լրագրերում), որ 4-րդ բանակային կորպուսի հրամանատար Զեքի փաշան, որը ջարդի ժամանակ առաջնորդում էր կանոնավոր զորքը, դրանից հետո սուլթանից հատուկ շքանշան ստացավ, և բացի այդ, սուլթանը հատուկ սուրհանդակների միջոցով մետաքսե դրոշներ ուղարկեց քրդերի շորս գլխավոր պետերին»:

Այդ նամակներից մեկը բերում ենք հատկապես № 6 և 8-ը: Ընդ որում № 6 նամակի մասին Գրինի աշխատության մեջ ասված է՝ «Կազմված է այնպիսի վկայությունների հի-

ման վրա, որոնք հավաքված են հատուկ փութաջանությամբ՝ գեպպերի վայրին մերձենալի ամենամոտիկ կետում: Այդ վավերագրերը գրել են այնպիսի մարդիկ, որոնք մոտ հարաբերության մեջ են անցյալ հոկտեմբերին տեղում առաջին քննությունը կատարող Եվրոպայի բարձր աստիճանավորի հետ, որի հաշվետվությունը մինչև այժմ չի հրատարակվել»:

Այս ծանոթագրության իմաստը պարզ լինելու համար անհրաժեշտ է նկատի ունենալ, որ «այն վայրը, որտեղ կատարվում էր կոտորածը (այսինքն՝ ամբողջ Սասունը.— Ս. Մ.), շրջապատված էր զինվորական կորդոնով ոչ միայն ջարդերը կատարելու ժամանակ, այլև դրանից հետո մի քանի ամսվա ընթացքում, այնպես որ Սասունի գյուղերը դրսից ոչ ոք մտնել չէր կարող»¹:

Բիթլիսում քաղաքի անվտանգության վերաբերյալ անհանգստություն է տիրում: Թուրքական իշխանությունների կողմից փոստի գրաքննությունը շարունակվում է և որոշ նամակներ՝ հասցեագրված Միացյալ Նահանգներում ապրող անձնավորությունների, որոնք այնտեղ պաշտոնական գիրք են գրավում, չեն հասնում ըստ պատկանելուն:

Համիդիեի զինվորները, որոնք հավաքագրվել են քրդերից և զորքի մեջ են մտել վերջին երեք տարում, որոշ չափով հանդերձված են, բայց թողնվել են իրենց տներում: Նրանք ամեն կարգի ապօրինություններ են կատարում: Կառավարությունը շարունակում է գանձել թալանված շրջանների հարկերը, զապթիաներին (ոստիկաններին) կամ թուրքական զինվորներին ուղարկում է գյուղերում ապրելու և բնակչությանը հարստահարելու այնքան ժամանակ, մինչև որ նրանք ինչպես ուզում են փող ճարեն: Բաշկալայում շատերը, տուն վերադառնալով, գտնում են, որ իրենց սեփականությունները գրավել է կառավարությունը և մերժում է վերադարձնել նրանց գույքը կամ թույլ տալ ապրելու իրենց տներում:

Իշխանությունները ամեն տեսակի միջոցառումներ էին ձեռնարկում և այժմ էլ ձեռնարկում են, որպեսզի արտաքին աշխարհում լուր չտարածվի Մուշում կատարված հայտնի

¹ Նույն տեղում, էջ 229—230:

շարդերի մասին: Անգլիական հյուպատոս Հովորդը ուղեր-
վեց դեպքի վայրը: Նա մշտական ձանձրացուցիչ լրտեսու-
թյան տակ էր գտնվում և հնարավորությունից զրկված էր
անցնելու ավերված վայրերը:

Քե ինչ չափով է հայկական ագիտացիան առաջացրել
սոսկալի կոտորածը, դժվար է որոշել: Մի տարվա ընթաց-
քում, կամ ավելի, Կ. Պոլսից մի հայ ապրում էր այդ վայ-
րերում որպես ագիտատոր: Երկար ժամանակ նա վարպե-
տորեն թաքնվում էր իրեն փնտրողներից, բայց վերջապես
ձերբակալվեց և ուղարկվեց Բիթլիսի բանտը: Նա պահանջեց,
որ իրեն ուղարկեն Կ. Պոլիս՝ սուլթանի մոտ և ներկայանա,
ասում են, որ նա ապրում է մայրաքաղաքում...

Կառավարությունը կասկածում էր, որ Տալվորիկ գյուղում
ապաստան են գտել ագիտատորներ (խոսքը Արաբոյի մա-
սին է.— Ս. Մ.) և հրաման է տալիս քրդական մի քանի ա-
ռաջնորդների հարձակվել այդ շրջանի վրա. ընդ որում նա իր
վրա պատասխանատվություն է վերցնում քրդերի բոլոր
սպանությունների համար և ամբողջ ավարը խոստանում է
նրանց:

«Տամատյանին Բիթլիս տանելուց հետո շուտով, հունիսի
առաջին շաբաթում, քեքրանլի ցեղի քրդերը սկսած են հա-
վաքվել Տալվորիկի շուրջը: Գյուղացիները, տեսնելով, որ
քրդերը օր-օրի վրա ավելի են հավաքվում և արդեն մի քանի
հազար մարդու են հասնում, կասկած են տածում նրանց
մտադրությունների վերաբերյալ և սկսում են պատրաստվել:
Ութերորդ օրը կռիվ է տեղի ունենում: Գյուղացիների ավելի
ուժեղ դիրքը նրանց հնարավորություն տվեց հակառակորդին
զգալի վնաս հասցնել, իր կողմից շնչին կորուստ ունենալով:
Մայրամուտի պահին կռիվի հետևանքն այն է լինում, որ քրդ-
երը կորցնում են մինչև 100 մարդ, իսկ գյուղացիներից
սպանվում է միայն 6 հոգի, այդ թվում նաև մի կին: Գյուղա-
ցիներին հաջողվում է քանդել ջրի խոր մասում գտնվող կա-
մուրջը, նախքան քրդերի ջոկատը հակառակ կողմից կգրոհեր
նրանց վրա: Այսպիսով, քրդերը պարտություն կրելով, այդ
ամռանը չկարողացան ուրիշ հարձակում կատարել:

Այդպիսի պայմաններում գեներալ-նահանգապետը շարժ-
վեց Մուշ և զորքով ու երկու դաշտային հրանոթով մտավ
Տալվորիկի մոտի շրջանը, բայց արդյոք այն պատճառով, որ
իր ուժերը անբավարար համարեց, թե հրաման ստացավ հան-
գրատությունը շխանգարել, նա հարձակման չդիմեց և սահ-
մանափակվեց նրանով, որ պահում էր պաշարման մեջ:
Նախքան հեռանալը, նա պատանդներ տալով, տեսակցու-
թյուն ունեցավ Տալվորիկի ամենաազդեցիկ մարդկանց հետ
և նրանց հարցրեց, թե ինչու չեն ենթարկվում կառավարու-
թյանը և չեն վճարում հարկերը: Նրանք պատասխանում են,
որ իրենք կառավարության դեմ չեն ապստամբում, բայց
հարկերը երկու անգամ չեն կարող վճարել՝ քրդերին և կա-
ռավարությանը: Եթե կառավարությունը իրենց պաշտպանի,
հարկերը կառավարությանը կվճարեն (ընդգծ. մերն է.—
Ս. Մ.): Բանակցություններից բան դուրս չեկավ և պաշարումը
շարունակվեց այնքան, մինչև որ ձյուն եկավ: Ձմռանը, երբ
վիլայեթում լայնորեն տարածված էր կոլոպուտը, Տալվորի-
կի մի քանի հարուստ բնակիչներ հրավեր ստացան այցելելու
գեներալ-նահանգապետին, բայց նրանք անհարմար համա-
րեցին ընդունել այդ հրավերը:

Վաղ գարնանը մի քանի քրդական ցեղերի հրաման տրը-
վեց հարձակում գործել Սասունի գյուղերի վրա: Զորքեր ու-
ղարկվեցին Մուշից և Բիթլիսից. նրանք իրենց հետ վերցրին
ուսղմական պաշար, պարեն և տասը ջորի բարձած նավթ
(80 կուժ): Ամբողջ շրջանը պաշարվեց քրդերով և զորքով:
Այդպիսով, պաշարման մեջ գտնվող գյուղերը ժամանակ առ
ժամանակ արտելք էին կատարում սնունդ ճարելու համար:

Մի անգամ քրդերը թշուղ են մի քանի եզ. վերջինների
տերերը հետևում են իրենց անասուններին մինչև քրդերի
օրան և տեսնում են եզներից մեկը մորթված է: Նրանք պա-
հանջում են վերադարձնել մյուս եզները և մերժում են ստա-
նում: Գյուղացիները հեռանում և որոշ ժամանակ անց վե-
րադառնում են մի քանի ընկերներով: Տեղի է ունենում ընդ-
հարում, որի ժամանակ երկու կողմից սպանվում են երկու

թե երեքական մարդ: Քրդերը իրենց սպանվածներին անմիջապես ներկայացնում են Մուշ և հաղորդում են, որ ամեն տեղ վխտում են հայեր և օտարերկրյա զինվորներ: Իշխանությունները անմիջապես բոլոր ծայրերից հավաքում են մինչև 20 000 քուրդ. բացի այդ, Մուշից գալիս են 500 համիդիներ:

Սկզբում բաց են թողնվում քրդերը, իսկ զորքը չի երևում: Գյուղացիները, ենթադրելով, որ գործ ունեն միայն քրդերի հետ, կովի մեջ են մտնում և մի քանի անգամ նրանց հետ են մղում: Քրդերը հրաժարվում են առանց զինվորների օգնության գործողությունը շարունակել: Զորքի որոշ մասը քրդերի հագուստ է հագնում և մեծ հաջողությամբ օգնում է քրդերին: Զորքի ոչ մեծ ջոկատներ մտնում են մի քանի գյուղ, հայտարարելով, որ եկել են պաշտպանելու հավատարիմ հպատակներին: Նրանց տեղավորում են տներում, բայց նրանք գիշերը վեր են կենում և մորթոտում քնած գյուղացիներին՝ տղամարդկանց, կանանց, երեխաների:

Մյուս գյուղերի բնակիչները հասկանում են, որ իշխանությունների նպատակը հայերին ոչնչացնելն է, և հուսահատված վճռում են իրենց կյանքը ավելի թանկ գնով ծախել: Այդ ժամանակ սկսվում է կոտորածը, որը տևում է 23 օր կամ, ընդհանուր առմամբ, օգոստոսի կեսից մինչև սեպտեմբերի կեսը: Ֆերիկ փաշան (մարշալ Զեթի փաշան), որ շտապով եկել էր Երզնկայից, կարգում է սուլթանի ֆերմանը կոտորելու մասին և այնուհետև, հրամանագիրը իր կրծքին պահած, զինվորներին հորդորում է շնորհիվ իրենց պարտքը կատարելուց: Օգոստոսի վերջին օրը, այսինքն՝ սուլթանի գահ բարձրանալու տարեդարձին, զինվորներին առանձնապես հորդորում էին աչի ընկնել, և նրանք այդ օրը կատարեցին ամենագազանաբարձ կոտորածը:

Զարդի ժամանակ ոչ մի տարբերություն չէր արվում, թե արդյոք այդ մարդիկ և գյուղերը խաղաղ են եղել և հարկերը վճարել են, թե ոչ: Հրաման էր տրված լիակատար մաքրում կատարել: Մի գյուղում քահանան, ավագների հետ միասին, ներկայանում է սպային, ներկայացնելով հարկերի վճարման մասին անդորրագիրը և հայտարարելով իրենց հավա-

տարիմ հպատակության զգացմունքները, աղերսելով գթություն, բայց գյուղը շրջապատվեց և բնակչությանը կոտորեցին սվիններով: Մի գյուղի տանուտերի քրդերը բռնում, գցում են գետին և շուրջը պարելով կտոր-կտոր են անում:

Գելիգյուզանում շատ երիտասարդների ձեռք ու ոտքերը կապել, շարել էին կողք-կողքի, ծածկել էին ջախով և կենդանի-կենդանի այրել: Մյուսներին բռնել և կտոր-կտոր էին արել: Մի ուրիշ գյուղում բռնել էին քահանային և մի քանի ավագների, նրանց խոստացել էին ազատություն, եթե ցույց տան, թե որտեղ են թաքնվել մնացած բնակիչները, իսկ երբ գերիները հրաժարվել են մատնել իրենց համագյուղացիներին, նրանց բոլորին, բացի քահանայից, սպանել են: Քահանայի վիզը պարան են գցել, որը ձգել են երկու հակառակ կողմերից, մի քանի անգամ նրան գրեթե խեղդամահ են արել, բայց նորից ուշքի են բերել, այնուհետև սվինները ցցել են սուր ծայրով դեպի վեր, որոնց վրա նետել են այդ դժբախտին:

Մի գյուղի բնակիչներ, փախուստի դիմելով, կանանց և երեխաներին, մոտավորապես 500 հոգի, տեղավորել են ձորի քարայրում: Մի քանի օր անց զինվորները գտել են և կոտորել նրանց, ովքեր դեռ սովամահ չէին եղել:

Մի այլ գյուղում ջոկել են 60 հարս ու աղջիկ և փակել են կիկղեցում, իսկ հետո զինվորներին թույլ են տվել նրանց հետ վարվելու ինչպես ցանկանան, որից հետո բանտարկյալներին կոտորել են:

Երրորդ գյուղում ջոկված 50 կանանց խնայել են. նրանց հորդորելիս են եղել հավատափոխ լինել և թուրքական հարեմների տիրուհի դառնալ, բայց նրանք հրաժարվել են, գերադասելով իրենց հայրերի և ամուսինների բախտին արժանանալ:

Ժողովրդին հավաքում էին տներում և հետո հրդեհում էին տները: Այդպիսի հրդեհներից մեկի ժամանակ մի փոքրիկ տղա դուրս է պրծնում, նրան անց են կացնում սվինի վրա և նորից կրակի մեջ նետում:

Հաճախ երեխաներին մազերից բռնած բարձրացնում և կտրում էին: Հղի կանանց փորը պատում էին: Նոր ամուս-

նացած մի գեղեցիկ զույգ փախչում է լեռան գագաթը, զին-
վորները հասնում են նրանց հետևից և, տեսնելով նրանց գե-
ղեցկությունը, ասում են՝ նրանց կազատեն, եթե մահամեղա-
կանություն ընդունեն, բայց մահվան սարսափն անգամ չկա-
րողացավ ընկճել նրանց:

Վերջին բախումը տեղի ունեցավ Անդոկ լեռան վրա (Մու-
շից դեպի հարավ), որտեղ ապատանել էին մի քանի հազար
մարդ: Քրդերը շոկատներով ուղարկվում էին հարձակվելու
փախստականների վրա, բայց 10—15 օր չկարողացան հաս-
նել նրանց: Զինվորները ևս հայերի դեմ ուղղում էին իրենց
լեռնային հրանոթները և նրանց որոշ վնաս հասցրին: Վեր-
ջապես, երբ պաշարվածները մի քանի օր քաղցած մնացին և
նրանց ռազմական պաշարը վերջացավ, զորքը կարողացավ
լեռան գագաթին հասնել առանց որևէ վնասի, և փախստա-
կաններից ոչ մեկը չազատվեց:

Այդ ժամանակ ամբողջ ուշադրությունը դարձվեց Տալվո-
րիկի շրջանում շրջապատվածների վրա: 3—4 հազար մարդ
էր պաշարված այդ փոքր հովտում... Նրանց մի մասին կո-
տորեցին հրացանների համազարկով, մնացածներին սվին-
ներով...»:

«Որքան հայտնի է, նրանց թվում եղել են 10—15 ոչ-տե-
ղացիներ և, ինչպես բոլորն ասում են, նրանք ունեցել են ոչ
ավելի քան 100 հրացան:

Եթե որևէ մեկը նույնիսկ հնարավորություն ստանա այդ
շրջանը մտնելու, նա կարող է զոհերի թիվը միայն մոտավո-
րապես որոշել, որովհետև շատ դիակներ լցրել են փոսերը և
հողով ծածկել. այժմ անձրևը կորցրել է նրանց գերեզմաննե-
րի հետքերը: Իսկ այնտեղ, որտեղ փոսեր չեն եղել, դիակների
վրա նավթ են լցրել և այրել»:

Նման փաստեր այս կամ այն մանրամասնությամբ բեր-
ված են նաև մնացած նամակներում: Ահավասիկ 8-րդ նա-
մակի վկայություններից.

«Քրդերից և թուրքերից ճնշվող հայերը հայտարարել են՝
«Մենք չենք կարող հարկեր վճարել և քրդերին, և կառավա-
րությունը»»:

№ 12 նամակի հեղինակը գրում է՝ «Անհրաժեշտ է ընդ-

հանուրի գիտակցության մեջ մտցնել, որ թուրքիան իրեն
նպատակ է դրել ամբողջ կայսրության մեջ ոչնչացնել քրիս-
տոնյաներին (այսինքն՝ հայերին.— Ս. Մ.) և որ մի քանի
տարի է, փնչ նա անց է կացնում այդ քաղաքականությունը»:

Այժմ ծանոթանանք Վանի անգլիական փոխ-հյուպատոս
Հորվորդի զեկուցագրին, որ գրել է 1894 թվականի նոյեմբե-
րի 6-ին, այսինքն՝ դեպքերից ընդամենը 1½ ամիս անց, իսկ
քննությունը կատարել է հենց դեպքերի ընթացքում:

«Թուրքական իշխանությունները Սասունի շրջանի վրա
առաջին անգամ ուշադրություն դարձրին 1892 թվականին մի
կաթուղի հայի՝ ոմն Տամատյանի այնտեղ գնալու հետևան-
քով: Տամատյանը ինչպես այդ շրջանի, այնպես էլ Մուշի
հարթավայրի գյուղերում իրեն այնքան անզգույշ էր պահում,
որ տեղական իշխանությունները նրան համարեցին քաղաքա-
կան շարժման պրոպագանդիստ: Նրան բռնեցին և 1893 թվա-
կանի մայիսին ուղարկեցին Բիթլիսի բանտը, այնտեղից էլ
Կ. Պոլիս, բայց նա կարողացավ արդարանալ: Թե ինչ մի-
ջոցներով նա կարողացավ դրան հասնել, հայտնի չէ: Բայց
իսկություն է միայն այն, որ նրա ձեռքակալությունից հետո
Սասունի հայերի բախտը վճռված էր: Քրդերը սպառնալի և
մեծ ամբոխներով սկսեցին հավաքվել Տալվորիկում. գյուղա-
ցիները տագնապի ենթարկվեցին, նախատեսելով հարձա-
կում: Եվ իսկապես այդ տեղի ունեցավ: Բայց հայերը, գտնը-
վելով ավելի հարմար դիրքում, քան քրդերը, նրանց ետ մղե-
ցին մեծ կորուստով, և կամուրջը, որի մյուս կողմում հավաք-
ված էին քրդերի մեծ զանգվածներ, որոնք պատրաստ էին
միանալու առաջինների հետ, քանդեցին:

Քրդերը նահանջում են: Այդ ժամանակ դեպքի տեղն է
գալիս Բիթլիսի վալի Հասան Թահսին փաշան, զորքերի զգա-
լի շոկատներով: Բնակիչների հետ անհաջող բանակցություն-
ներից հետո վալին հեռանում է, բայց զորքը թողնում է:
Այն դիրքը, որը զրավում էին հայերը, այնքան անառիկ էր,
որ զորքերը չեն համարձակվում հարձակվել նրանց վրա, այլ
հույս են դնում հյուսիս նրանց սովի միջոցով: Իսկ երբ տես-
նում են, որ այդ հաշիվը չի հաջողվում, նրանք ձմռան սկզբին
վերադառնում են Բիթլիս:

Այդ ժամանակին են վերաբերում այն դեպքերը, որոնց մասին ես հիշատակել եմ նախորդ զեկուցագրերում, այն է՝ վալու պահանջը, որ տանուտերերը ներկայանան իրեն և նրանց հրաժարվելը, նրանց շրջանը զինվորական շոկատ ուղարկելը, քրդական ցեղերի հավաքը, վերջապես, օգոստոսին լրացուցիչ զորքերի ժամանումը:

Բիթլիսից ուղարկված զորքը իր հետ վերցրել էր 80 տակառիկ նավթ և 4 լեռնային հրանոթ:

Սկզբում զորքերը գյուղերում շէին երևում և հարձակումները կատարում էին միայն քրդերը: Հայերը, ենթադրելով, որ իրենք գործ ունեն միայն այդ վերջինների հետ, եռանդուն դիմադրություն են ցույց տալիս և ետ են մղում նրանց: Քրդերը համաձայնում են հարձակումը նորոգել միայն այն պայմանով, որ իրենց օժանդակեն զինվորները: Այդ ժամանակ մի քանի զինվոր, քրդական հագուստ հագած, մասնակցում են նոր հարձակմանը, որն ավելի հաջող է անցնում, քան առաջինը:

Սրանից հետո զորքերը, պաշտպանելու պատրվակով, մտնում են գյուղերը, տեղավորվում տներում և գիշերվա ընթացքում կոտորում բոլոր բնակիչներին՝ տղամարդկանց, կանանց և երեխաներին: Ֆերիկ (գենեբալ) Օսման փաշան, որը ժամանել էր Երզնկայից, կարողում է սուլթանի ֆերմանը, որով նրան լիազորում էր պատժել ապստամբած գյուղերին, և պահանջում է, որ զինվորները անհապաղ կատարեն իրենց պարտականությունը: Զինվորները սկզբում վարանում են, բայց սպաները սպառնալիքներով նրանց հարկադրում են, և ավերման ու ջարդի գործը կատարվում է ամենամահողը կերպով, հաշվի չառնելով ո՛չ հասակը, ո՛չ սեռը:

Մեծ թվով մարդիկ, իբրև հավատարիմ հպատակության նշան, ձեռներում բռնած հարկերի վճարման անդորրագրերը, քահանայի առաջնորդությամբ գնում են դեպի զորքի հրամանատարը, որպեսզի գթություն հայցեն: Նրանց շրջապատում և տեղնուտեղը կոտորում են:

Գելիգյուզանում մի քանի երիտասարդների ձեռք ու ոտքերը կապում, գցում են գետին կողք-կողքի՝ ծածկում են ցախով. նրանց կենդանի-կենդանի այրում են:

Մի ուրիշ գյուղում բռնում են քահանային և մի քանի ավագների. նրանց ազատություն են խոստանում, եթե միայն ասեն, թե որտեղ են թաքնվել գյուղի բնակիչները. նրանք ցույց են տալիս թաքստարանը և նրանց կոտորում են: Քահանային շղթա են գցում վիզը և այնպես են ձգում, որ նա կիսախեղդ է լինում. վերջապես սվինները թաղում են գետնի մեջ՝ աուր ծայրը դեպի վեր և նրան նետում են սվինների վրա:

Իբրև սպանելու գործիք մեծ մասամբ ծառայում էին սվինները: Մի գյուղի բնակիչներ, կանանցով ու երեխաներով, փախչում են մի ինչ-որ քարայր, որտեղ մի քանի օր անցնելուց հետո նրանցից թույլերը մահանում են սովից: Մյուսներին վերջապես հայտնաբերեցին զինվորները և բոլորին մինչև վերջին մարդը արախողխող արին:

Մոտավորապես 60 հարս ու աղջիկ տանում են եկեղեցին և դնում են զինվորների տրամադրության տակ, որպեսզի հետո կոտորեն: Ամենագեղեցիկ կանանց մի կողմ են քաշում և նրանցից պահանջում են մահամեղախանություն ընդունել և ամուսնանալ թուրքերի հետ: Նրանք հրաժարվում և սպանվում են:

Բիթլիսից բերված նավթը ծառայում էր այն բանի համար, որ տները իրենց բնակիչներով այրեն: Մի զինվոր Բիթլիսում պատմում էր, թե ինչպես մի երեխա մի կերպ փախչում է բոցերից, նրան սվինի վրա են բարձրացնում և նորից նետում են բոցերի մեջ: Նավթը գործածվում էր նաև դիակները այրելու համար:

Կատարվում են բազմաթիվ այլ բարբարոսություններ:

Կոտորածներին մասնակցում էին ոչ միայն զինվորները, այլև քրդերը: Բավական մեծ թվով մարդիկ փախչում են Տավրիկի մոտ գտնվող լեռան վրա և վճռում են ինչքան կարելի է թանկ ծախել իրենց կյանքը: Քրդերը հարձակվում են նրանց վրա, բայց անհաջող. իսկ երբ այդ դժբախտների զինամթերքներն ու սնունդը վերջանում են, զինվորներին հաջողվում է բարձրանալ լեռան գագաթը և բոլորին կոտորել: Եզրափակիչ տեսարանը տեղի է ունենում Տավրիկի հովտում, որտեղ հավաքված են լինում բազմաթիվ տղա-

մարդիկ, կանայք և երեխաներ: Նրանց շրջապատում են ջր-
դերն ու զինվորները և հրացանագարկ են անում կարաբին-
ներից, իսկ վերջում կոտորում են սրերով և սվիճներով:

Այդ մոլեգնությունները շարունակվում են օգոստոսի
18-ից մինչև սեպտեմբերի 10-ը, դրանք սկսում են **Բիթլիսի և**
Մուշի կայազորները, որոնց աստիճանաբար միանում են
4-րդ կորպուսի մյուս զորքերը:

Մոտավորապես սեպտեմբերի 10-ին գալիս է **Նրզնկայի**
գլխավոր պարետը և դադարեցնում է ավերածությունները,
որոնք պետք է շարունակվեին: Ասում են, որ դրա համար
նշված էին դարձյալ շորս գյուղեր, այդ թվում **Մուշի հովտում**
գտնվող **Վարդենիսը**: Այդ գյուղին, սկսած **Մուսա բեյի** պրո-
ցեսից, կառավարությունը վատ էր նայում, որովհետև նրա
բնակիչներից ոմանք այն ժամանակ գնացել էին **Կ. Պոլիս**
ցուցմունք տալու **Մուսա բեյի** դեմ:

Քրդերի պետերից մեկը, որը շատ ուշ էր հասել գործո-
ղության վայրը, գնացել է մի ուրիշ շրջանի գյուղ, գոնե այն-
տեղ ավար ձեռք բերելու համար:

Բոլոր նախորդ փաստերը ես հավաքել եմ **կոտորածներին**
մասնակցող զինվորների պատմածներից: Գրանք հաստատել
են զանազան կողմերից, ի միջի այլոց այդ հաստատում էր
նաև մի գապթիա, որը այդ բոլորին վկա է եղել:

Սպանված զոհերի թիվը դժվար է որոշել: **Բիթլիսում**
վստահեցնում են, որ դրանք 8000-ից անցնում են: Համենայն
դեպս հաստատ է, որ 25 գյուղերի բնակչության մեծ մասը
անհետացել է և որ այդ գյուղերից ոմանք ունեցել են արտա-
կարգ շատ բնակչություն: Այսպես, **Մուշի մուսեաարիֆի**
հավաստիացումով Սեմալ գյուղի բնակչությունը հաշվվում
էր մինչև 1700 մարդ: **Բիթլիս փախած մարդկանց թիվը**, ինչ-
պես ես տեղեկացել եմ, շատ փոքր է:

Մուշից վերադառնալիս կարանտինում մի զինվոր պատ-
մում էր, որ ինքը ընդամենը 5 մարդ է սպանել, իսկ մյուսը
պարծենում էր, որ սպանել է մինչև 100 մարդ: **Գերիների**
թիվը չափազանց չնչին է՝ 20—30-ից ոչ ավել: **Նրանք իրենց**
կյանքի համար պարտական էին պարետի ժամանելուն:
Նրանց մեջ մի քանի հոգի Տամատյանի նման ազիտատորներ

էին, բայց դրանք տեղացիներ էին և ոչ թե դրսից եկածներ,
ինչպես առաջ զեկուցվել էր: Նույնպես ապստամբություն չի
եղել, ինչպես զեկուցվել է Կ. Պոլիս: Բնակիչները զենքի են
դիմել միայն **Բրդերից** պաշտպանվելու համար: **Մանրակրկիտ**
քննությունից ես իմացա, որ զապթիաներից մեկի ինձ հա-
ղորդած տեղեկությունը, որ իբր թե բնակիչները սպանել են
զինվորի և զապթիայի, զուրկ է որևէ հիմքից: Ո՛չ մուսեա-
րիֆը, ո՛չ էլ զինվորական պարետը, որոնց ես հարցուփորձ-
արի, այդպես բան չասացին, և ես ոչ մի տեղ չսեցի, որ
հայերը կատարած լինեն այնպիսի մի գործողություն, որը
կարող լիներ համարվել կառավարության դեմ ապստամբու-
թյուն:

Իմ գալուց երկու օր առաջ վալին գնացել էր **Սղերթ** և
այդ պատճառով ես նրան չտեսա: **Բիթլիսում** կարծում են, որ
նա դեռ երկար կմնա այնտեղ, որովհետև Սասունի ջարդերի
գլխավոր պատասխանատվությունը նրան են վերագրում:
Ըստ երևույթին, վալին ինքը այդ բանը իրենից չի հեռաց-
նում, որովհետև նա միջոցներ է ձեռք առնում, որպեսզի
բնակիչներից շնորհակալազիր ստանա Սասունի վերաբերյալ
իր կարգադրությունների համար: Քաղաքի բնակիչները մեր-
ժել են ստորագրել, բայց գյուղերում նա կարողացել է մի-
քանի տանուտերերի հարկադրել այդպիսի փաստաթուղթ
ստորագրելու, որն էլ հրատարակվել է լրագրերում: Արգեն-
երեք տարի է, որ նա **Բիթլիսում** է և հաջողությամբ զբաղ-
վում է «Հայկական հարցով», այն իմաստով, որ իր սպանա-
լիքներով նա շարունակաբար ամբողջ պրովինցիայի հայե-
րից փող է կորզում: Սակայն Սասունում նրան այդ շահողվեց
և դրա համար այդ շրջանի բնակիչներից սոսկալի վրեժ լու-
ծեց:

Վերջում ես ինձ թույլ եմ տալիս ավելացնելու, որ ես
ստիպված էի պայքարել ամենամեծ դժվարությունների դեմ,
որպեսզի արժանահավատ տեղեկություններ քաղեմ, որով-
հետև շարունակ գտնվում էի ոստիկանական ագենտների
հսկողության տակ և բնակիչները վախենում էին, որ իրենց
կտեսնեն ինձ հետ զրուցելիս: Ինձ թույլ շտվին գնալ Սասունի
շրջանը, պատրվակելով, թե մի կողմից, կարող եմ այնտեղ

տարածված ժանտախտը հաղորդել զորքին, իսկ մյուս կողմից, որ իմ այստեղ ժամանումը կարող է ապստամբություն առաջացնել: Այդուհանդերձ իմ ձեռք բերած գլխավոր փաստերը, ինձ թվում է, բավականաչափ պարզ են: Իսկ ինչ վերաբերում է մանրամասնություններին, ապա նրանք բխում են արժանահավատ աղբյուրներից»¹:

Մեր կողմից բերված այս վկայությունները, համեմատելով ռուսական դիվանագիտական ներկայացուցչության կազմած զեկուցագրի հետ, չի կարելի չզալ այն եզրակացության, որ դեպքերի նկարագրությունները շատ նման են միմյանց: Մինչդեռ այդ փաստաթղթերի հեղինակները բոլորովին տարբեր մարդիկ են, որոնք միմյանց հետ առնչություն անգամ չեն ունեցել: Ավելին, Գրինի բերած 18 նամակների մեջ շատ հաճախ հանդիպում են դեպքերի նկարագրման զարմանալի նմանություններ: Միաժամանակ բոլոր տվյալները միաբերան վկայում են, որ Սասունի շրջանը այնպես էր շրջապատված զորքերով, որ դրսից ոչ մի մարդ չէր կարողանում թափանցել երկրի ներսը, նույնիսկ պետությունների պաշտոնական ներկայացուցիչներին այս կամ այն պատրվակով արգելվում էր մտնել Սասունի գյուղերը, նույնիսկ կոտորածից ամիսներ հետո: Մյուս կողմից՝ միջոցներ էին ձեռք առնված, որ փրկված հայերը իրենց անձնական կյանքի վտանգի գնով որևէ հարաբերության մեջ չմտնեն օտարերկրացիների հետ: Այս պայմաններում հարց է առաջանում, ո՞րն էր այս տեղեկությունների աղբյուրը:

Պրոֆ. Մ. Գ. Ներսիսյանի խմբագրությամբ հրատարակված «Геноцид армян в Османской империи» վավերագրերի ժողովածուում զետեղված է Հովվորդի մի այլ զեկուցագիրը, որը գրված է նույն օրը և հասցեագրված է նույն դեսպանին, ինչ որ մեր բերած այս վավերագիրը: Ըստ էության այդ երկու զեկուցագրերի միջև որևէ տարբերություն չկա, բայց դրանք միևնույն տեքստի թարգմանությունը չեն: Ուստի, մեզ թվում է, որ Հովվորդը միևնույն օրը երկու զեկուցա-

գիր է գրել տարբեր հասցեներով՝ մեկը Կ. Պոլիս՝ դեսպանին, մյուսը՝ էրզրում՝ գերագույն հյուպատոսին: Այս վերջինը իր զեկուցմանը կցել է նաև Հովվորդի զեկուցագիրը և երկու փաստաթղթերն ընկել են անգլիական դեսպանատան արխիվը, որոնցից մեկը վերևում բերված փաստաթուղթն է, մյուսը՝ ժողովածուում զետեղվածը: Ի միջի այլոց, անուղղակի կերպով այդ բխում է Ռ. Վ. Գրեյվսի զեկուցագրից (տես Геноцид, էջ 24—25):

Այդ հարցի պատասխանը մենք գտնում ենք Հովվորդի զեկուցագրի մեջ: Նա, ինչպես տեսանք, իր փաստերի աղբյուրները համարում է արժանահավատ, իսկ մի այլ տեղ նա գրում է՝ «Փաստերը ես հավաքել եմ կոտորածներից մասնակցող զինվորների պատմածներից»: Եվ փրոք, փաստերի ամբողջությունը ցույց է տալիս, որ դրա աղբյուրը կարող էր լինել տարբեր գյուղերում և վայրերում տեղի ունեցած ականատեսի հաղորդածը: Այդպիսին չէին կարող լինել հայերը, որովհետև նրանցից յուրաքանչյուրը ծայրահեղ դեպքում կարող էր վկա լինել իր գյուղում կամ իր ներկա եղած տեղում կատարված դեպքերի մասին, բայց ոչ ամբողջ շրջանի: Ավելին, նկատի ունենալով, որ փախած հայերը փրկվել կարող էին միայն դեպքերից առաջ փախչելով, ուստի անհավանական է, որ նրանք ծանոթ լինեին դեպքերի այնպիսի մանրամասնությունների հետ, ինչպիսիները նկարագրված են այդ փաստաթղթերում: Հետևաբար, միակ վկաները կարող էին լինել հենց իրենք՝ այդ ոճրագործություններին մասնակցողները, որոնք, պարծենալով, ամենուրեք պատմում էին իրենց կատարած «հերոսությունների» մասին, մանավանդ որ իրենք համոզված էին, որ օրինական գործ են կատարել, իրագործելով փառաշահի հրամանը: Ահա ինչու Հովվորդը վստահ կերպով հայտարարում է, որ հաղորդումը բխում է արժանահավատ աղբյուրից: Այդ աղբյուրներն էլ այդ տեղեկությունները տարածում էին ամենուրեք, որտեղից քաղել են մեր հիշատակած 18 նամակի հեղինակները: Ահա ինչու ռուսական, անգլիական և ամերիկյան տվյալները հիմնականում նման են միմյանց: Հարկավ, զինվորների, զապթիաների և քրդերի պատմածների մեջ կարող էին լինել չափազան-

¹ АВПР. ф. Политархив, д. № 3435, Сасунские дела 1894—1895 гг., лл. 156—160.

ցություններ և այդ շափազանցություններն էլ անցած լինելին այդ գրականութեան մեջ: Բայց մի բան անառարկելի է, որ կոտորածների ծրագիրը կազմված էր նախօրոք և կոտորածների կազմակերպողը հենց ինքը՝ թուրքական կառավարութեանն էր, որը դրա իբրև պատրվակ հորինել էր Սասունի հեղափոխական ապստամբության առասպելը, մի հանգամանք, որ նրան անհրաժեշտ էր տերությունների առաջ հիմնավորելու իր կատարած ոճրագործութեան արդարացի լինելը: Եթե սուլթանական կառավարութեանը շունհնար եվրոպական տերությունների վստահեցումը, որ հայերի հնազանդեցումը դա սուլթանական պետության ներքին գործն է, հազիվ թե նա դիմեր այդպիսի խելագար քաղաքականութեան: Սուլթանական կառավարութեանը դրանում միանգամայն վստահ էր:

Ցարական արտաքին գործերի մինիստրութեան գաղտնի հրահանգում, որը Սասունի դեպքերի առթիվ հասցեագրված էր Կ. Պոլսի դեսպանին, մենք կարդում ենք՝ «Թուրքահայերի մեջ հոգումները վերջին տարիներում քրոնիկական երևույթ են դարձել, ամեն անգամ եվրոպական մամուլում ագիտացիա հարուցելով և որոշ պետութեանների մոտ ձգտում առաջացնելով հայկական հարցը թուրքիայի ներքին վարչական քաղաքականութեան շրջանակից առաջ քաշել միջազգային հողը, համաձայն առաջավոր հայ գործիչների մեջ ավելի ու ավելի զարգացող ազգային երազանքներին:

1890 թվականին (իր տեղում մեր հիշատակած էրզրումի և մյուս վայրերի դեպքերի կապակցությամբ.—Ս. Մ.) մենք թուրքական կառավարութեանը քիչ ապացույցներ չենք տվել մեր բարի հարևանութեան և հաստատ մտադրութեանների մասին՝ չբարդացնել Բ. Դուան դժվարին դրութեանը նրա հայ հպատակներին զսպելու գործում:

Սկսած այդ ժամանակից, այդ հարցի էական կողմերի վերաբերյալ մեր հայացքը չենք փոխել: Հայաստանից առաջին տազնապալի տեղեկութեաններն ստանալուն պես ես փութացի անցյալ նոյեմբերի 21-ի գաղտնի հեռագրով անհապաղ հայտնել իսկական պետական խորհրդական ժաղով-

սկուն այն մասին, որ մենք բոլորովին մտադիր չենք հայկական գործերը սրելու (խոսքը Սասունի մասին է.—Ս. Մ.):

...Մենք հեռու ենք այն մտքից, որ Բեռլինի դաշնագրի համաձայն, թուրքական կառավարութեան խոստացած վարչական ռեֆորմները Հայաստանում բարերար արդյունքների հասնեն, նույնիսկ Բ. Դուան հավաստիացումների անկեղծութեան պայմաններում: Թշնամական ու վայրի ցեղերով շրջապատված հայ բնակչության կյանքը և տեղանքի պայմանները, երկրում սանձարձակ քրդական զորքի ներկայութեանը — այս բոլորը լուրջ խոշորոտներ են հանդիսանում Փոքր Ասիայի հյուսիս-արևելյան ծայրամասերում իրերի ամուր և հանգիստ դրութեան հաստատելու»¹:

Այսպիսով, ցարական Ռուսաստանը, սկսած դեռ էրզրումի դեպքերի ժամանակվանից, իրեն համար քաղաքական կուրս էր դարձրել, որ հայկական վիլայեթների «վարչական ռեֆորմները» թուրքիայի ներքին գործն է և ինքը այդ գործին չի միջամտելու: Մյուս կողմից՝ համոզված էր, որ թուրքական կառավարութեանը ինքը այդ «վարչական ռեֆորմները» չի էլ կիրառելու:

Ուշագրավ է, որ այդ նույն քաղաքական կուրսն էր վարում մի ուրիշ մեծ տերութեան, որ ստորագրել էր Բեռլինի դաշնագրութեանը: Մեր խոսքը Ֆրանսիայի մասին է:

Սասունի կոտորածներից ընդամենը մի քանի ամիս առաջ ահավասիկ ինչ է գրում Կ. Պոլսի ֆրանսիական դեսպանորդ Կամբոնը իր կառավարութեանը: Նա, արձանագրելով մի շարք փաստեր, գրում է, որ թուրքական կառավարութեանը «համառորեն ձգտում է Հայաստանում պահպանել սարսափների, կոտորածների, բռնութեանների ռեժիմ» և այնուհետև անցնում է հետևյալ դատողություններին՝ «Հայկական հարցի ինչպիսի լուծում կարելի է ենթադրել կամ նախատեսել այժմյան խառնակ հանգամանքներում: Հայաստանի անկախութեանը: Այդ մասին որևէ խոսք չի կարող... Նույն դժվարութեանը ուժի մեջ է մտնում, եթե ենթադրվի կիսավտոնոմ մարզ կազմելը: Որտե՞ղ է սկսվում և որտե՞ղ է վերջա-

¹ АВПР, ф. Политархив, д. № 3435, л. 106.

նում Հայաստանը: Մնում է ռեֆորմների խոստումը: Բայց շատ լավ հայտնի է, թե ինչ արժեն թուրքիայում այդպիսի խոստումները: Ինչ վերաբերում է մասնավոր բարելավումներին, ապա տասը տարի առաջ դրանք թերևս բավարարելի հայերին, իսկ այժմ կարելի է երկյուղ կրել, որ դա բավական չի լինի: Այսպիսով, հայկական հարցը հնարավոր լուծում չունի, նա մնում է բաց, և թուրքերը իրենց վատ կառավարմամբ ու անգործունեությամբ միայն սրելու են այն»¹:

Սասունի դեպքերը ակներևորեն ցույց տվին, որ հայերին ոչնչացնելու դիվային ծրագրի իրագործումն արդեն սկսվել էր: Ի՞նչ միջոցներ պետք է ձեռք առնել դրա առաջն առնելու համար: Եվրոպական դիվանագիտությունը դրա համար այլ միջոց չկարողացավ մտածել, քան այն, որ թուրքական կառավարության քննչական հանձնաժողով նշանակվի և քննության առնվի Սասունի կոտորածների պատճառները և մեղավորները պատժի ենթարկվեն: Այլ կերպ ասած, չնայած դիվանագիտությանը քաջ հայտնի էր, որ ոճրագործությունների պատճառը հենց գոյություն ունեցող սուլթանական կառավարական սիստեմն էր, իր այդ որոշմամբ կեղծ դիմակի տակ հանցավորներ էր որոնում մասնավոր երևույթների, այս կամ այն պետական գործչի գործունեության մեջ: Այսինքն, այդ այլ բան չէր նշանակում, քան այն, որ եվրոպական իմպերիալիզմը, չնայած իմպերիալիստական տերությունների և ֆինանսական իմբավորումների ներքին հակասություններին, ձգտում էր պահպանել սուլթանիզմի քայքայված սիստեմը ի վնաս ոչ միայն հայ, այլև թուրքիայի բազմազգ ժողովուրդի, այդ թվում նաև թուրք և քուրդ ժողովուրդներին:

Անցնենք այդ տիրահաշակ գավեշտական հանձնաժողովի գործունեությանը:

Վերևում մենք տեսանք, որ Վանի անգլիական հյուպատոսարանը հանձին իր փոխ-հյուպատոս Հովվորդի, ամեն միջոցներով տեղեկություններ էր հավաքում կատարված դեպքերի մասին և, չնայած գործերով այն շրջափակման, որ անթարկված էր Սասունը, նրան հաջողվում է հենց թուրքա-

կան աղբյուրներից քաղած փաստերի միջոցով մերկացնող ահռելի տեղեկություններ հավաքել: Այդ բոլորից, հարկավանտեղյակ չէր թուրքական կառավարությունը: Ուստի նա միջոցներ է ձեռք առնում վերացնելու այդ վտանգը և ամենից առաջ անգլիական ներկայացուցչությունից պահանջել վերջ տալու իր ներքին գործերին միջամտելուն, աշխատելով իր կողմն ունենալ ուսական և ֆրանսիական ներկայացուցչություններին:

Այդ կողմից շատ հետաքրքրական է ցարական դիվանագիտական ներկայացուցչի հետևյալ հաղորդումը արտաքին գործերի մինիստրությանը.

«Սուլթանը, գրգռված լինելով նորերս անգլիական մամուլում Սասունի հայերի ջարդերի մասին պատմություններով, որոնց մեջ հիշատակվում էին 20 ավերված գյուղերի և 3000 զոհերի մասին, նա, հույս ունենալով թաքցնել քրդերի օգնությամբ թուրքական զորքերի այնտեղ կատարած վայրագությունները, հրամայել է եվրոպական հանդեսներին ուղարկել կատեգորիկ հերքումներ և անգլիական դեսպանորդից պահանջել է Մուշից ետ կանչել գործը քննելու համար այնտեղ գտնվող Վանի հյուպատոսին, որի հաղորդումներին է: Բ. Դուռը վերագրում սուլթանի համար տհաճ տեղեկությունների հրապարակումը:

Այդ փափկանկատ բացատրության համար արտաքին գործերի մինիստրը անձամբ գնացել է դեսպանորդի մոտ, բայց սըր Ֆիլիպ Քլերիի կողմից հանդիպել է խիստ կտրուկ մերժման:

Դեսպանը վճռականորեն հայտարարել է, որ հյուպատոսի գործողության պարսավումը այդ դեպքում հավասարազոր կլինի պարսավմանը հենց անգլիական մինիստրության, որը նրան Բիթլիս և Մուշ է գործուղել և նա գործում է այն իրավունքի հիման վրա, որ Անգլիան վայելում է Կիպրոսի կոնվենցիայով, որ ինքը, այնուամենայնիվ, չի կարող իր հյուպատոսին մեղադրել թուրքական նահանգապետի շտուգված զանգատների հիման վրա, այլ մտադիր է, գործը քննելու համար, այնտեղ ուղարկել զինվորական կցորդ գնդապետ Չերմսայդին: Այնուհետև դեսպանը, հրաժարվելով լսել:

¹ «Братская помощь армянам», 1897, II, стр. 92—93.

Սաիդ փաշայի բացատրությունները, ընդհատել է խոսակցությունը:

Սուլթանն էլ ավելի գրգռված դեսպանի այդքան խիստ վերաբերմունքից և Չերմսայդին Մուշ գործուղելու նրա համառ մտադրությունից, հոկտեմբերի 30-ին դիմել է մեծ վեզիրին գաղտնի իրադեով, որտեղ շարադրելով Սաիդ փաշայի և դեսպանի բանակցությունների վերոհիշյալ անհաջող հանգամանքները, նա հայտարարում է, որ կայսրության ներսում գործը քննելու համար անգլիական աստիճանավորների նոր գործուղումը միջազգային իրավունքի խախտում կլինի և չի կարող թուլյատրվել, որ անգլիական հյուպատոսի ամբողջ գործունեությունը այդ վայրերում ապօրինի է եղել և որ դեսպանի կողմից Կիպրոսի կոնվենցիայի վկայակոչումն անհիմն է, որովհետև այդ կոնվենցիան ստորագրված է սուլթանի գերագույն իրավունքների անձեռնմխելիության մասին դրական ժանոթագրությամբ, իրավունքներ, որոնց ոտնձգություններ են հանդիսանում անգլիական հյուպատոսի գործողությունները, ինչպես և գնդապետ Չերմսայդին Հայաստան գործուղելու դեսպանի սպառնալիքը: Այնուհետև իրադեն, տեղական թուրքական իշխանությունների զեկուցագրերի հիման վրա, հերքում է անգլիական հյուպատոսի իբր թե շարամտորեն շահագանցված տեղեկությունները»¹:

Այս հաղորդումից ընդամենը մի շաբաթ անց, 1894 թ. Նոյեմբերի 22-ին, ժադովսկին, իբրև լրացում իր վերոհիշյալ զեկուցման, հաղորդում է, որ հայերի ջարդերի վերաբերյալ թուրքական կառավարության և անգլիական դեսպանի միջև գծությունների արությանը մեղմացել է նրանով, որ Բ. Դուռը հրաժարվել է անգլիական հյուպատոսին ետ կանչելու պահանջից, իսկ դեսպանը հրաժարվել է գնդապետ Չերմսայդին վերջին դեպքերի վայրը գործուղելու իր մտադրությունից:

«Մինչդեռ,— շարունակում է ժադովսկին,— վրդովեցուցիչ ռազմական միջոցառումների մանրամասնություններն արդեն

Քափանցել են եվրոպական մամուլը և ամենուրեք մերկացնող հոդվածների փոթորիկ են բարձրացրել Հայաստանի քրիստոնյա բնակչության նկատմամբ թուրքական զորքի կատարած զազանային գործողությունների դեմ: Այդ պախարակումների ստահոգ և անամոթ հերքումները, որ մոտ օրերս սուլթանի անձնական հրամանով հեռագրով ուղարկվել են արտասահմանի թուրքական ներկայացուցչություններին, հնարավորին շահի լայն հրապարակման համար, չկարողացան ցանկալի տպավորություն թողնել Եվրոպայի հասարակական կարծիքի վրա և չկանգնեցրին մեղադրանքների և մերկացումների հեղեղը, որը Բ. Դուռը վերջին օրերս հարկադրեց արգելել օտարերկրյա գրեթե բոլոր լրագրերի մուտքը...»

Ըստ երևույթին, սուլթանը գիտակցում է այժմյան ճգնաժամի վտանգը և վերջին օրերս երկու անգամ ինձ մոտ հավատարիմ մարդ է ուղարկել անգլիական դեսպանի նկատմամբ իր դժվարությունները բացատրելու համար և բարեկամական խորհուրդ խնդրելու մասին»:

Ժադովսկու խորհուրդը շահագանց դիպլոմատիկական էր: Նա ամենից առաջ սուլթանական իշխանությանը կշտամբում էր այն բանի համար, որ համիդիե զեդերին դրել են այնպիսի դրություն մեջ, որ նրանք իրենց համարում են ոչ թե սուլթանի հպատակներ, այլ իրավահավասար դաշնակիցներ և այդ պատճառով օսմանյան կառավարությունը Եվրոպայի առաջ պատասխանատու պետք է լինի նրանց գործունեության համար այն աստիճան, որ կարող է հայկական վիլայեթները կորցնել, ինչպես իր ժամանակին կորցրեց Բուլղարիան: Այլ կերպ ասած, նա անուղղակիորեն թուրքական կառավարությանը թելադրում էր այդ ջարդերի հանցանքը բարդել քրդերի վրա և համապատասխան միջոցառումներով խաղաղեցնել եվրոպական հուզմունքը:

Ժադովսկու մյուս կշտամբանքը վերաբերում էր Կիպրոսի համաձայնությանը, որը իր ժամանակին կայացել էր Անգլիայի և Թուրքիայի միջև և պարզապես ուղղված էր ընդդեմ Ռուսաստանի ունեցած հեռանկարներին Հայաստանի նկատմամբ: Բնական է, որ Ռուսաստանը այդ կոնվենցիայից բխող

¹ АВІР. ф. Политархив, д. № 3435, Сасунские дела, лл. 44—46.

հետևանքներին չէր կարող միջամտել, այլ կարող էր միայն անտեսել: Հետևաբար, Բ. Դոան և անգլիական դիվանագիտական ներկայացուցչի հարաբերությունների սրվելը Սասունի կոտորածների շուրջը ռուսական դիվանագիտության համար միայն ձեռնառու հանգամանք կարող էր համարվել: Ուստի ռուս դիվանագետը պատասխանում է՝ «Իմ անձնական կարծիքով, ես ենթադրում եմ, որ ներկա ռուպին նրա (սուլթանի.— Ս. Մ.) համար ձեռնառու է չվարանել անգլիական դեսպանի սպառնալիքներից, բայց շտապել, քանի դեռ ուշ չէ, հաշտության ուղիներ որոնել՝ երկուստեք զիջումների հիման վրա»¹:

Ուշագրավ է, որ սուլթանի ներկայացուցչի հարցմանը, թե ինչ դիրք ընդունի կառավարությունը անգլիական դեսպանի պահանջի նկատմամբ, ֆրանսիական ներկայացուցչի պատասխանը լինում է գրեթե նույնը:

Կամբոնը իր զեկուցագրում հաղորդում է՝ «Ըստ երևույթին, նորից առաջանում է հայկական հարցը՝ թուրքական կառավարության համար առանձնապես տագնապալի հանգամանքներում: Սուլթանը հարցմունք արավ իմ կարծիքի մասին: Ես պատասխանեցի, որ անհրաժեշտ է Հայաստանի կառավարման գործում ռեֆորմներ մտցնել, քննել ամեն մի հանցագործություն, մանավանդ համիդիե գնդերի կողմից, վերականգնել սուլթանի գերագույն հեղինակությունը, զգացնել տալ նրա գերագույն իշխանությունը: Որ նա իզուր է երկյուղ կրում անգլիական գործակալների քննությունից, եթե ինքը շտապի դա հանձնարարել աչքի ընկնող, բոլորի կողմից հարգված մարդկանց, որոնք վստահություն և հեղինակություն վայելեն, շարագործներին զսպեն և մարդկանց ու իրերը համապատասխան կարգի դնեն»²:

Շատ հետաքրքրական է, որ իրենք՝ դիվանագետները իրենց ասածին չէին հավատում: Նույն Կամբոնը զեկուցագրի վերահիշյալ հատվածից ընդամենը հինգ տող հետո գրում է՝ «Նա (սուլթանը.— Ս. Մ.) ըստ երևույթին փորձ կանի նրան

մատնանշված ուղղությունը, բայց, ամենայն հավանականությամբ, այդ փորձը կլինի անիրական և նրա հետևանքները կլինեն ոչ-տևական» (ընդգծ. մերն է.— Ս. Մ.):

Ռուսաստանի և Ֆրանսիայի դիվանագիտական ներկայացուցիչների խորհրդով թուրքական կառավարությունը որոշ շափով նահանջի ուղի է բռնում և իր վրա պարտավորություն է վերցնում արտակարգ և անաչառ հանձնաժողով կազմել քաղաքական հարցերն քննելու տեղի ունեցած դեպքերի պատճառները: Իսկ Անգլիան հրաժարվում է Չերմսայդին այդ շրջանն ուղարկելուց: Համաձայնություն էությունը այն է, որ թուրքական կառավարությունը պետք է հայտարարեր տեղի վարչական անձնավորությունների հանցագործությունները և պարզեր այն ոճիրները, որոնց ենթարկվել էին Սասունի հայկական գյուղերն ու գյուղացիությունը: Մինչդեռ այդ համաձայնությունից անմիջապես հետո «Բարձրագույն Դուռը,— գրում է ռուսական դեսպանորդը,— հուլիս հիմնական առիթ տվեց նրան մեղադրելու իր վրա վերցրած պարտավորություններն իրագործելու անբարեխղճության մեջ: Նա աշխարհով մեկ ուղարկեց և իր լրագրերում տպագրեց ամենագրական տոնով պաշտոնական հայտարարություն, որով հայկական դեպքերը ներկայացվում էին պարզապես խեղաթյուրված տեսքով, դրանով իսկ քննչական հանձնաժողովի համար անհնարին էր դարձնում նրա վրա դրված հանձնարարությունների կենսագործումը: Այնուհետև Բ. Դուռը թուրքական լրագրերում հայտարարեց, որ հանձնաժողովին հանձնարարված է քննել հայերի հանցագործությունները»:

Այսպիսով, այն ժամանակ, երբ ըստ համաձայնության, թուրքական կառավարության կողմից կազմված արտակարգ հանձնաժողովը պետք է պարզեր թուրքական իշխանությունների հանցագործությունները հայերի նկատմամբ, իրականում այդ հանձնաժողովին հանձնարարվում է առանց քննության արդարացնել տեղական իշխանություններին և մեղադրանքը բարդել հայ գյուղացիության վրա: Այստեղից ինքնին հասկանալի է դառնում, որ արտակարգ հանձնաժողովի որոշումներն ու եզրակացություններն արդեն կազմված էին Կ. Պոլսում, նախքան հանձնաժողովը քննության կանցնելու տեղում:

1 АВПР, ф. Политархив, д. № 3435, Сасунские дела, лл. 50—52.
2 Նույն տեղը, թթ. 97—99:

«Այդպիսի տարօրինակ փարթագիծը չէր կարող չզրգռել անգլիական կաթինետին և մի անգամ էլ չարել բանակցութունները: Երեք օր առաջ Բ. Դուռը Լոնդոնի իր դեսպանից ստացել է հեռագրական հաղորդում, որը հայտնում է այն կարևոր հայտարարության մասին, որ արել է լորդ Քեմբեռլեյը և որը սուլթանին աննկարագրելի շփոթության մեջ է գցել»:

Սուլթանական կառավարությունը, հույսը դնելով տերությունների շահերի հակասությունների վրա, նորից դիմում է նրանց օժանդակությանը և խորհրդին:

Հետաքրքրական է այստեղ պարզել, թե մեծ տերությունների դիվանագետները ինչ էին սպասում այդ հանձնաժողովի քննության արդյունքներից:

Ցարական արտաքին գործերի մինիստրության կողմից իր ներկայացուցչին այդ առթիվ տված հրահանգում ապօրում է՝ «Մենք պատրաստ ենք այդ ուղղությամբ ձեռք-ձեռքի տված ընթանալ Անգլիայի հետ»: Այսպիսով, երեք խոշոր տերությունները՝ Անգլիան, Ռուսաստանը և Ֆրանսիան, վերջին հաշվով, համակարծիք էին վերջնական եզրակացման հարցում, որը շատ պարզ կերպով արտահայտված էր ցարական հրահանգում: Ըստ այդ կարծիքի, հարցի քաղաքական կողմը պետք է իսպառ հանդես չգար, ամեն ինչ պետք է վերածվեր քրեական ոճրագործության և հենց դրանով զսպվեր եվրոպական հասարակական կարծիքի հուզմունքը:

«Եթե Սասունի դեպքերի մասին հենց առաջին մշուշապատ և հակասական տեղեկությունները եվրոպական մամուլին և անգլիական քաղաքական խմբակներին առիթ տվին այդքան տագնապալի ազիտացիա բարձրացնել թուրքական վարչության դաժանությունների առթիվ, ապա հիմք կա կասկածելու, որ «Կապուլտ գրքում» Փոքր Ասիայի դեպքերի մասին անգլիական գործակալների զեկուցումների հանդես գալու հետ, այդ ազիտացիան ավելի լայն շափեր կքնդունի և անգլիական քաղաքական խմբակների հարձակումները թուրքական վարչության վրա ավելի խիստ ձեռով կարտահայտվեն: Մեր սեփական աղբյուրներից հայտնի է, որ այս վճռելի

նկատմամբ արվող մեղադրանքները զուրկ չեն լուրջ հիմքերից...

Երկիրը խաղաղեցնելու գործում մենք համեմատաբար հաջողության կհասնենք, եթե հանձնաժողովը բարեխղճորեն կատարի իր վրա դրված պարտականությունները և մանրակրկիտ քննության առնի դեպքերը, երևան բերի հանցավորներին, որոնք պետք է խիստ պատասխանատվության ենթարկվեն իրենց վարքագծի համար:

Բ. Դուռը, իր աստիճանավորներին շարագործությունների համար տույժի ենթարկելով, դրանով իսկ բավարարյուն կտա գրգոված հասարակական կարծիքին և վերջ կտա այն ֆաղափական ազիտացիային, որը ձգտում է հայկական դեպքերից ստեղծել միջազգային բարդ հարց, որի առաջանալուց այնքան արդարացիորեն երկյուղ է կրում օսմալեյան կառավարությունը»¹ (ընդգծ. մերն է.—Ս. Մ.):

Նույն քաղաքականությունն էր վարում նաև Անգլիան, չնայած այն արտաքին աղմուկին, որ ստեղծվել էր հենց Անգլիայում: Այլ կերպ ասած, դեպքերի ամեն կերպ նսեմացումը և ոճրագործությունների մեղքը թուրքական կառավարությունից հեռացնելը այն կենտրոնական հարցն էր, որի շուրջը պտտվում էին դիվանագիտական խաղերը: Եվ այդ հարցում միանգամայն համերաշխ էին գործում Անգլիան ու ցարական կառավարությունը: Լոնդոնի կաթինետի այդ միտումը լիովին արտահայտություն է գտել լորդ Քեմբեռլեյի և թուրքիայի դեսպանի զրույցում, որը գաղտնի հեռագրով հայտնրվել է թուրքական կառավարությանը:

Այդ փաստաթուղթը մենք հանել ենք ցարական արտաքին գործերի մինիստրության արխիվից:

«Լոնդոնի թուրքական դեսպանի գաղտնի հեռագիրը
1894 թվականի նոյեմբերի 26-ին.

Լորդ Քեմբեռլեյը խնդրեց, որ այս երեկո գնամ իր մոտ: Նա ինձ ասաց, որ խիստ վրդովված է Կ. Պոլսից ստացված տե-

¹ АВПР. ф. Политархив, д. № 3435, л. 15.

ղեկութիւնների համար, որոնց համաձայն կայսերական (Քուրթական.—Ս. Մ.) կառավարութիւնը պաշտոնական հաղորդագրութեամբ մամուլում հայտարարել է, որ հանձնաժողով է գնալու Մուշ՝ հայ հրոսակների կողմից կատարված ռեազործութիւնները հետաքննելու համար: Բացի այդ, նույն հաղորդագրութեան մեջ հայտնվում է, որ շքանշաններ են շնորհվելու զորքերի հրամանատարին և Մուշի մուֆթիին, իսկ զորքերի գործողութիւններին ընդդիմացող նահանգապետը հեռացվել է պաշտոնից:

Լորդ Քեմբելը գտնում է, որ այդ հաղորդագրութեամբ ամբողջութեամբ փոխվում է հետաքննութեան բնույթը և կանխորոշվում է նրա արդյունքը:

Անգլիական կառավարութիւնը մինչև այժմ սահմանափակվել էր խոստացած հետաքննութեամբ, դիմադրելով ամեն կողմից ուղղված պահանջներին՝ հրապարակելու հյուպատոսական հաղորդումները: Նա ամենայն փութաշարժումով իրեն վերապահել էր իր կարծիքը հայտնելու իրավունքը հետագայում, երբ հետաքննությունը միջոց կընձեռե գործը նսեմացնելու և մարելու համար (ընդգծ. մերն է.—Ս. Մ.): Այսուհետև այս դիրքավորումը անհնարին է դառնում, որովհետև հենց որ այդ հաղորդագրութիւնը տարածվի և օգտագործվի մեր թշնամիների կողմից, Անգլիայում կբարձրանա թուրքիայի դեմ հասարակական կարծիքի մի այնպիսի ուժգին շարժում, որ անգլիական կառավարութիւնը հնարավորութիւն չի ունենա ընդդիմանալ դրան: Նորին մեծապատվութիւնը անհունորեն ցավում է, որ այդ ցավալի հաղորդագրութեամբ Բ. Դուռը հայկական կոմիտեիների ձեռքին խաղալիք է դարձել և նրանց ձեռքը ամենաուժեղ զենքն է տվել մեզ ընկճելու համար:

Ես փորձեցի լորդ Քեմբելիցին պատճառաբանութիւններ բերել, սակայն նա հրաժարվեց ամեն մի բանավեճից, հայտնելով, որ իրերի ներկա դրութեան պայմաններում դա միայն ժամանակի կորուստ է:

Վաղը չէ մյուս օրը, շորեքշաբթի, կայանալու է կարինետի նիստ և լուրջ կերպով զբաղվելու է այդ հարցով: Ամեն

հիմք կա ենթադրելու, որ որոշումները կարող են ծանր հետևանքներ ունենալ:

Լորդ Քեմբելը ինձ խնդրեց կայսերական կառավարութեանը հաղորդել կայսրութեան ծայրահեղ վտանգավորութիւնը: Մինչև այժմ Անգլիան ջանացել է այդ հարցին մոտենալ ամենաբարեկամական ձևով, հնարավորութեան սահմաններում նսեմացնել այն և շօգուծել դաշնագրերի ընձեռած հնարավորութիւններից (ընդգծ. մերն է.—Ս. Մ.): Բայց սրանից հետո այդ անկարելի է և նա շատ է վախենում, որ հարցը կարող է շատ լուրջ և ելրոպական բնույթ ստանալ. նա շատ ցավում է, որ որոշ պետութիւններ արդեն սկսել են վրդովվել այդ իրադրութիւնից:

Նորին մեծապատվութիւնը վերջացրեց, ինձ ասելով, թե լորդ Ռոզբերին և կարինետի իր կոլեգաները լիովին բաժանում են իր կարծիքը և իր մեծ զարմանքն արտահայտեց կայսերական կառավարութեան կողմից ստեղծված այս նոր իրադրութեան համար, որն սպառնում է խոշոր բարդութիւնների մեծամեծ վտանգներ առաջացնել¹:

Այս ամենից այլ բան չի լսում, քան այն, որ դիվանագիտութեանը հետաքրքրողը այդ, այսպես կոչված, հասարակական կարծիքի մարտն էր, իսկ դրա համար բավական էր, որ թուրքիան «տույժի ենթարկեր» մի բանի բարձր աստիճանավորների և դրանով հարցը փակեր: Եվ ո՞րն էր այդ «տույժը»: Այդ հարցի պատասխանը մենք գտնում ենք ցարական դիվանագիտութեան այն խորհրդում, որ տրվում է սուլթանի անձնական ներկայացուցչին:

«Բանի դեռ ժամանակն է՝ ձեռք առնել իրական միջոցներ, որոնք այժմ, շնսեմացնելով նրա (սուլթանի.—Ս. Մ.) արժանապատվութիւնը, բավարարեն Անգլիային և հասարակական կարծիքին: Այդ իմաստով ես մատնանշեցի հեռացնել դեպքերի գլխավոր հանցավոր Բիթլիսի գեներալ-նահանգապետին և դրա հետ միասին երկու գնդապետների, որոնք հռչակվել են իրենց ակներև և աննպատակ դաժանութիւններով»²:

1 Նույն տեղում, թթ. 100—101:

2 Նույն տեղում, թթ. 97—99:

Այսպիսով, բազմաթիվ հայ գյուղերի ոչնչացումը, հազարավոր հայերի ջարդերը պետք է հատուցվեին մի քանի մարդկանց պաշտոնանկ արվելով: Եվ դա պետք է հանգրստացնեի իմպերիալիստական պետությունների և բուրժուական հասարակական կարծիքի խիղճը:

Ինսպանների համերաշխությունը, որի նպատակն էր թուրքիային փրկել իր ոճրագործ քաղաքականության հետևանքով առաջացած ճգնաժամից, սուլթանին հարկադրեց կազմել վերոհիշյալ արտակարգ հանձնաժողովը, կազմված պետական բարձր աստիճանավորներից: Բայց հարց էր առաջանում՝ ինչպե՞ս ապահովել «բարեխիղճ և անաշուք քննությունը», երբ հենց սուլթանի կարգադրությամբ ամենուրեք հրապարակված և հանձնաժողովին կարգադրված էր «հետաքննել հայ հրոսակախմբերի կողմից կատարված ոճրագործությունները»: Հարցի այդ վտանգը անգլիական դիվանագիտությանը, մյուսների համաձայնությամբ, հարկադրեց սուլթանական հանձնաժողովի կազմի մեջ մտցնել երեք մեծ տեղությունների ներկայացուցիչներին որպես դիտորդ-դելեգատներ:

Բացի այն հրահանգը, որ կառավարության կողմից տրված էր հանձնաժողովին, երեք պետությունների ներկայացուցիչները կազմեցին հատուկ հրահանգ, ըստ որի քննությունը պետք է սահմանափակվեր միայն Սասունի դեպքերով. քննությունը վարելու էին թուրքական իշխանությունները, իսկ դիտորդ-դելեգատները պետք է սահմանափակվեին վերահսկողությամբ և «ապահովեին քննության բարեխիղճությունը»: Նրանց հրահանգված էր ամեն օր կազմել կոլեկտիվ արձանագրություն, անկախ կառավարական հանձնաժողովի արձանագրությունից, ներկա լինել հանձնաժողովի բոլոր գործողություններին, հանձնաժողովի նախագահի միջոցով հարցեր առաջարկել վկաներին, իսկ նախագահի հրաժարվելու դեպքում հարցեր առաջարկել անմիջականորեն:

Սուլթանը հատկապես վերջին կետի դեմ խիստ առարկում էր, համարելով այդ անվստահություն կառավարության նկատմամբ: Սակայն դեսպանորդը ոչ մի կերպ չհամաձայնեց զիջել այդ կետում:

Այս առնչությամբ մենք կարևոր ենք համարում բերել իսկական գաղտնի խորհրդական ներկողվի հույժ գաղտնի հրահանգը՝ ուղղված էրզրումի գեներալ-հյուպատոսին.

«Ի լրացումն Սասունի դեպքերի վերաբերյալ իմ հեռագրական հաղորդումների, պարտ եմ համարում բացատրել հետևյալը:

Սասունի կազայում տեղի ունեցած ջարդերի և դրանց ուղեկցվող գազանությունների բոլոր հանգամանքների պարզաբանումը հանդիսանում է թուրքական քննչական հանձնաժողովի բացառիկ նշանակությունը. հանձնաժողովին կից, նրա գործողությունների ճշտությանը և անաշուքությանը հետևելու համար, պետք է ներկա գտնվեն էրզրումի ռուսական, անգլիական և ֆրանսիական հյուպատոսությունների դելեգատները: Քանի որ վերջինի տրամադրության տակ հատուկ աստիճանավոր չկա, որի վրա կարելի լինեի դնել նախատեսված հանձնարարությունը, ապա որպես ֆրանսիական դելեգատ հանդես կգա այստեղի ֆրանսիական հյուպատոսարանի աստիճանավոր Վիլբերը, որին ես հանձնում եմ սույն նամակը:

Դելեգատների հարաբերությունները թուրքական քննչական հանձնաժողովի և էրզրումի հյուպատոսարանների հետ ընդհանուր գծերով սահմանված են սրան կից ուղարկվող հրահանգներով, որոնցից մեկը կազմել է Բ. Դուռը, և ընդունել ենք մենք, մյուսը մշակվել է համաձայնություն կայացվելով Անգլիայի, Ֆրանսիայի դեսպանությունների և իմ միջև: Այդ հրահանգների առավել կարևոր պայմանը դելեգատների իրենց ձեռնարկումների թույլտվությունն է, իսկ նախագահի հրաժարվելու դեպքում թույլատրվում է հարցաքննվող վկաներին հարցեր առաջադրել: Միայն այդ ճանապարհով հնարավոր կլինի բացահայտել ճշմարտությունը, այսինքն՝ ենթակա անձնավորությունների հանցավորության աստիճանը և հայերի հետ այդքան անգույթ դատաստան տեսնելու պատճառները: Ինքնըստինքյան հասկանալի է, որ դելեգատների գործունեությունը երբեք այդ նպատակից հեռու չպետք է տարածվի և մանավանդ չպետք է շոշափի քաղաքական հարցեր, որոնց բարձրացնելը ոչ մի դեպքում չի մտնում կայսերական կառավարության նպատակների մեջ:

Համակված լինելով մարդասիրության անկեղծ զգացմունքով և Փոքր Ասիայի քրիստոնյա բնակչության գոյության ծանր պայմանները թեթևացնելու ցանկությամբ, մենք, սակայն, հեռու ենք խրախուսելու հայերի քաղաքական բաղձանքները, որոնք կազմում են Եվրոպայում գտնվող հայկական կոմիտեների գործունեության առարկան և Արևմուտքից ու երբեմն ուսաստանների կողմից, որոնք վարակված են հեղափոխական ոգով և այնտեղ դառնում են ազգային պրոպագանդայի ազենտներ, տարածվում են թուրքահայերի մեջ:

Այս երկու ձգտումների և պահանջների միջև եղող մանրազնին տարբերությունը պետք է կազմի մեր դելեգատի գլխավոր խնդիրը, ընդ որում հարկավոր է, որ նա խուսափի հայերի մեջ ավելորդ, դժվար իրականանալի հույսեր հարուցելուց, հավասարապես խուսափի թուրքական հանձնաժողովի հետ հարաբերությունների ավելորդ սրումից, որովհետև քննության հաջողությունը կարող է ապահովվել միայն նրա ճիշտ ընթացքի դեպքում:

Առաջարկելով ձեզ այդ իմաստով ցուցմունքներ տալ պ. Պրժևալսկուն և նրա ուշադրությունը դարձնել ամեն ինչում ֆրանսիական դելեգատի հետ համաձայնությամբ գործելու անհրաժեշտության վրա, որը կստանա նույնպիսի ցուցմունքներ, ես հույս ունեմ, որ նա հաջողությամբ և տակտով կկատարի իր վրա դրված հանձնարարությունը¹:

Մեր կողմից բերված բոլոր փաստական տվյալները, նույնիսկ հարցը հարուցող անգլիական դիվանագիտության միտումները, ինչպես տեսանք, հանգում էին թուրքական կառավարությանը եվրոպական հուզմունքի հետևանքով առաջացած ճգնաժամից փրկելուն: Մենք տեսանք նաև, որ ֆրանսիական դելեգատ Վիլբերը նույնպիսի հրահանգներ էր ստացել, ինչ որ ուսական դելեգատ Պրժևալսկին, որը իր հարաբերությունները չպետք է սրեր թուրքական հանձնաժողովի հետ: Մինչդեռ ֆրանսիական դելեգատը հարկադրված է լինում 1895 թ. փետրվարի 6-ին Կամբոնին հաղորդել՝ «Օսմանյան իշխանությունները աշխատում են ամեն հնարավոր

միջոցներով խանգարել վկաներին խոսելու»: Փետրվարի 21-ին հաղորդում է՝ «որ իր ու իր կոլեգաների ունեցած տեղեկություններով, նույնիսկ Սասունի սահմաններից դուրս իշխանությունները խուլ կերպով հետապնդում են հայերին»: Մարտի 6-ի Կամբոնի գրությունից երևում է, որ քննիչները ձեռնարկում էին քննությունը շեղել իր նորմալ ընթացքից: Սակայն վկաների ցուցմունքների ճշման տակ թուրքական հանձնաժողովը հարկադրված է լինում ընդունելու, որ Սասունի կոտորածներին մասնակցել են զորքերը, միաժամանակ եզրակացության մեջ արձանագրում է, որ «տեղի ունեցած ապստամբությունը ճնշելու համար զորքերի մահաբեր միջամտությունը եղել է լիովին օրինական»: Կամբոնի ապրիլի 4-ի զեկուցագրում կարդում ենք՝ «Վիլբերը պնդում է այն դժվարությունները, որոնց եվրոպական դելեգատները հանդիպում են իրենց միսիան կատարելու ժամանակ: Ակներև է, որ օսմանյան կոմիսարները փորձում են սարսափեցնել Սասունի դեպքերի իսկական վկաներին և ենթադրում են քննությունը վարել միայն (թուրքական. — Ս. Մ.) պաշտոնական փաստաթղթերի և այն ցուցմունքների հիման վրա, որոնք բխում են աստիճանավորներից և իշխանությունների հետ կապ ունեցող անձնավորություններից»: «Տեղական իշխանությունները շարունակ ճնշում են գործ դնում քննության ընթացքի վրա. հարևան տեղից եկած վկաներին, Մուշ գալուց հետո, անմիջապես հանձնում են ոստիկանության հսկողությանը, որն իր վրա է վերցնում նրանց կացարան և սնունդ հայթայթելը և թելադրում է այն ցուցմունքները, որոնք պետք է տան հանձնաժողովին: Նրանցից ոմանք հրաժարվեցին իրենց նախկին ցուցմունքներից, երբ մի գիշեր անցկացրին ոստիկանության ձեռքին. ուրիշները, որոնք պնդում էին իրենց նախկին ցուցմունքները, դրա հետևանքով բանտարկության ենթարկվեցին. վկաների մեծ մասի հայտարարությունները կարծես բերանացի արված լինեն և արվում են միևնույն արտահայտություններով, որով խիստ անվստահություն են ներշնչում: Շատ մարդիկ, որոնք ցանկություն են հանդես բերում ցուցմունք տալու հանձնաժողովին, իշխանությունների կողմից պահվում են գյուղերում: Չնայած այն հավաստիա-

¹ АВПР. ф. Политархив, д. № 3435, лл. 225—227.

ցումներին, որ սուլթանը բազմիցս տվել է մեզ, ԲՆՆՈՒՔՅԱՆ ԿՈՄԻՏԵՍԻ ՎԵՐՈՒՄԻՆ»¹:

1895 թվականի հուլիսի 28-ին եվրոպական երեք պետությունների դեկլարատիվ կոնկլուզիվ զեկուցագիր ներկայացրին, որտեղ բերվում են բազմաթիվ փաստեր:

«Այս բոլոր փաստերը որևէ շահով չեն ապացուցում, որ հայերը 1894 թվականի հուլիսի վերջին ապստամբություն են բարձրացրել: Այդ մեղադրանքը հաստատելու համար փաստաթղթերից վկայակոչում էին մեկը, որ գտնվել էր Մուրադի մոտ, որպես քաղաքական ծրագիր, բայց նրա բովանդակությունը պարզ կերպով ցույց է տալիս, որ ոչինչ չի պարունակում, բացի դեպքերի մերկ թվարկումից: Եթե ապստամբությունը աստիճանաբար զարգանում էր նախորդ երեք ամսվա ընթացքում, եթե դրությունն այնպիսին էր, ինչպիսին պարզվում է Գուենչի մուտեսարիֆի մայիսի 3/15 հեռագրից և կառավարական ազենտների պաշտոնական զեկուցագրերից, ապա ինչպե՞ս բացատրել իշխանությունների գործողությունները, որոնք մայիս, հունիս և հուլիս ամիսների ընթացքում որևէ միջոցի չեն դիմել գործի այդպիսի լուրջ և սրված դրության ժամանակ:

Հայերին մեղադրելու ինքնին զավեշտական այն մեղադրանքը, որ իրենք են այրել իրենց սեփական գյուղերը, գոմերը և այլն, հենված է միայն լուրերի վրա. իրենց ականատես անվանող վկանների ցուցմունքները այնքան հակասական և արտառոց են, որ ներքոստորագրյալները հարկադրված են մերժել դրանք, որպես որևէ հավատ չներշնչող. բայց եթե մի րոպե նույնիսկ ընդունենք այդպիսի մեղադրանքների հիմնավորությունը, հնարավոր է արդյոք ենթադրել, որ հայ լուսավորչական բնակչությունը, որը առանձնապես նվիրված է իր կրոնին, ինչպես մյուս բոլոր ուղղափառ դավանանքի բրիտանոնյաները, հասնի մինչև այնտեղ, որ սրբապղծի և քանդի իր եկեղեցիները, դրանք այնպիսի դրության հասցնի, որը արձանագրել են ներքոստորագրյալները:

Ուստի վերջինները հարկադրված են ընդունել հայերի

կողմից առաջադրվող մեղադրանքների հիմնավոր լինելը և հանձնես ջրդերի ու զինվորների տեսնել ամբողջ գյուղեր հրդեհելու հանցավորներին:

Վերջապես, եթե ջրդերի և հայերի առանձին արյունալի բախումների բնույթը պարզելու համար նկատի ունենանք այդ կոնկլուզիվի ժամանակ զորքի անգործունեությունը, եթե ոչ մասնակցությունը, իշխանությունների կողմից դրանք վերացնելու կամ հարձակման ենթարկված գյուղացիությանը օգնություն ցույց տալու համար կարգադրությունների լիակատար բացակայությունը, եթե մենք հիշենք, որ լուրեր էին տարածվել նրանց կոտորելու հրամանի մասին, որից օգտվել էին ջրդերը Կավառի գյուղացիներից փող կորզելու համար, որ հայերի աչքի առաջ ավերվում էին նրանց գյուղերը, ապա հասկանալի կդառնա, որ նրանց ոչինչ չէր մնում անել, քան իրենց վրա վերցնել իրենց սեփական կյանքի և իրենց հարազատների ու ընտանիքների կյանքի պաշտպանությունը...

Բոլոր վերը շարադրածները ներքոստորագրողներին իրավունք է տալիս կրկնելու, որ քննության սրբապղծ փաստերը չեն հաստատում Կավառի և Տալվորիկի հայերի ապստամբությունը կառավարության դեմ»:

Այնուհետև կոնկլուզիվ զեկուցագրում մանրամասնորեն և կետ առ կետ արձանագրվում են այն գազանությունների փաստերը, որոնք տարածվել և արձագանք էին գտել եվրոպական մամուլում: Զեկուցագրի այդ կետերը հիմնականում հաստատում են այդ փաստերը, շնայած այն դժոխային միջոցներին, որ թուրքական կառավարությունը ձեռնարկել էր վկանների ցուցմունքները իր օգտին դարձնելու: Բայց փաստերը այնքան շատ ու անհերքելի էին, որ նույնիսկ այդ պայմաններում հնարավոր եղավ ֆակությունը գոնե մոտավոր շահով պարզել:

Օրինակ, «ներքոստորագրողները բոլոր վերոհիշյալների հիման վրա չեն կարող բաժանել այդ տեսակետը և հարկադրված են հավատալու, որ իրականում հայերը՝ տղամարդիկ, կանայք և երեխաներ, զոհ են դարձել զինվորների, ջրդերի և զապիխանների հետապնդումներին, որոնք վիրավորել ու սպանել են առանց սեռի ու հասակի խտրության բոլոր իրենց

¹ «Братская помощь армянам», II, стр. 95—96.

ձեռքն ընկնողներին. ընդ որում առանձնապես կարևոր է նշեալ այն փաստը, որ բացի Տալվորիկի 11 գյուղացիներից, ոչ մի գերի չի եղել»:

«Մուշի և մերձակա գյուղերի բնակիչները հայտարարում են, որ դեպքերի մասին իրենց ոչինչ հայտնի չեն. Սեմալի որոշ բնակիչներ նույնիսկ համարձակվում են պնդել, որ շղիտեն իրենց սեփական գյուղի քահանայի ո՛չ անունը, ո՛չ նրա սպանութան մասին: Այդ հակասական և կեղծ բացատրութունները, մի կողմից, և այդ բացասումները, մյուս կողմից՝ ավելի շատ հաստատում, քան վերացնում են մեղադրանքը»:

Վերևում մենք հիշատակեցինք անձամբ սուլթանի և սուլթանական կառավարության տագնապալի վիճակը, երբ անգլիական կառավարությունը ամենակտրուկ կերպով պահանջում էր, որ Կիպրոսի համաձայնության հիման վրա իր ներկայացուցիչը պետք է քննություն կատարի Սասունի դեպքերի վերաբերյալ: Հապա ի՞նչը հարկադրեց, որ անգլիական դիվանագետները, շնայած սուլթանի հայտարարությանը, որ քննությունը կատարվելու է հայերի հանցանքի աստիճանը երևան հանելու համար, համաձայնեց Թուրքիայի պահանջին՝ քննությունը կառավարության կողմից կատարվելու մասին, երեք տերությունների ներկայացուցիչներին հատկացնելով դիտորդ-դելեգատների դեր:

Հենց այն հանգամանքը, որ այդ տագնապալի մասին սուլթանն իր անձնական ներկայացուցչի միջոցով խորհուրդ էր հարցնում Ռուսաստանի և Ֆրանսիայի ներկայացուցիչներից և վերջինների պատասխանների նմանությունը Անգլիայի սպառնալիքներից երկյուղ չկրելու վերաբերյալ, մեզ թելադրում է, թե որտեղ էր գտնվում Բ. Գուան այդքան վստահության գաղտնիքը: Նա համոզված էր, ինչ դիրք էլ բռնի հայերի վերաբերյալ, եվրոպական տերությունների միջև եղող հակասությունները թույլ չեն տա, որ հարցը շատ խիստ բարդության հասնի:

Այս առումով շատ հետաքրքրական է այստեղ բերել Ռուսաստանի արտաքին գործերի մինիստրության ասիական դեպարտամենտի դիրեկտորի 1896 թվականի նոյեմբերի 14-ի դիտողություններից որոշ հատվածներ:

Այդ դիտողությունների նպատակը 1891 թվականի դեկտեմբերի և 1896 թվականի հոկտեմբերի 11-ի հրահանգների համեմատական վերլուծությունն է:

Դիտողությունների հեղինակը գտնում է, որ «1891 թվականին չէր կարելի կասկածել ռուս-ֆրանսիական մերձեցման բարենպաստ տպավորության մեջ Եվրոպայում: Նա հանդիսանում էր եվրոպական խաղաղության ամրության երաշխիք և գրավականը...»:

1891 թվականի հրահանգը Արևելքի վերաբերյալ մատնանշում էր սուլթանին պաշտպանել այն ժամանակ այնքան հզոր եռյակ դաշնակցության մեքենայություններից, որը ձգտում էր Թուրքիային իր կողմը գրավել: Ռուսաստանի և Ֆրանսիայի խնդիրն այն պետք է լիներ, որ սուլթանի համար ապահովվի գործողությունների լիակատար ազատություն, նրան ավելի արիություն և համարձակություն ներշնչել արտաքին դավերի դեմ պայքարի գործում: Որևէ խառնակության դեպքում երկու պետություններն էլ պատրաստ էին Թուրքիային օժանդակել կանխելու հնարավոր վտանգները...»:

«...1891 թվականին Մեծ Բրիտանիայի գործելակերպը Ռուսաստանին և Ֆրանսիային արդարացի երկյուղ էր ներշնչում: Բրիտանական բազմաթիվ էսկադրանների հանդես գալը Վեանտի ջրերում, երբ այդ ջրերում խապառ բացակայում էին եվրոպական մյուս պետությունների դրոշակները, իր վրա էր գրավում ընդհանուր ուշադրությունը և սուլթանի վրա խոշոր տպավորություն էր գործում: Կ. Պոլսի ռուսական և ֆրանսիական դեսպաններին հրահանգված էր մատնանշել, որ իրենց կառավարությունների միջև տեղի ունեցած մերձեցումը լուրջ հակակշիռ է անգլիական ծովային դեմոնստրացիային: Ֆրանս-ռուսական էսկադրան թուրքական ջրերն ուղարկելու հարցը պետք է դառնար երկու կառավարությունների միջև հետագա քննարկումների առարկա: Գաղտնի խորհրդական Նելիդովի և Կ. Պոլսի ֆրանսիական դեսպան պ. Կամբոնի համատեղ գործողությունները հիմնը-

ված էին Միջերկրական ծովում մեր և հատկապես ֆրանսիական տրադիցիոն շահերի և բրիտանական շահերի միջև ակնհայտ հակասությունների վրա»¹ :

Այսպիսով, երեք մեծ տերությունները, որոնց միջև գոյություն ունեցող հակասություններն այդքան լուրջ էին, և որոնք իրենց վրա էին վերցրել Թուրքիայի ամբողջականության ապահովումը, պարզապես հակասության մեջ էին սեփական երկրի հասարակական կարծիքի հետ: Հայաստանում կատարվող դեպքերը օպոզիցիոն տարրերի համար շատ հարմար առիթ էին հարձակվելու իրենց կառավարությունների վրա: Ուստի, շնայած այդ պետությունների միջև եղող հակասություններին, նրանք շահագրգռված էին միջոցներ որոնել հանդարտեցնելու իրենց երկրի հասարակական կարծիքը և լոնցնելու օպոզիցիոն կերպով տրամադրված հոսանքներին: Եվ ահա վերստին հանդես է գալիս հայկական ռեֆորմների շարաքաստիկ հարցը:

Երեք կառավարությունների դեսպանները մշակեցին 1895 թվականի հայկական ռեֆորմների, այսպես կոչված, մայիսյան նախագիծը, որով որոշ իրավահավասարություն պետք է ստեղծվեր հայկական վեց վիլայեթների (էրզրումի, Վանի, Խարբերդի, Բիթլիսի, Սվազի, Դիարբեքի) հայ և մահմեդական բնակչության իրավունքների միջև:

Չնայած այս նախագիծը կազմված էր թուրքական կառավարության նախնական համաձայնությամբ, բայց դիվանագետներից ոչ մեկը համոզված չէր, որ այն չի մնալու որպես սոսկ արխիվային փաստաթուղթ:

1891 թվականի հրահանգի վերաբերյալ վերևում մեր բերած վկայությունը ցույց է տալիս, թե կուլիաների հետևում ինչ դիվանագիտական իրադարձություններ էին տեղի ունենում հայկական հարցը միջազգային շուկա հանելու վերաբերյալ: Իրավացի է կոն, երբ գրում է՝ «Հայ ժողովրդի արյունը նորից վաճառքի էր հանված իմպերիալիստական բորենիների միջև. կատարվում էին քստմանլի սակարկություններ, և սուլթանը շահում էր նոր կողմնակիցներ»: Ինչպես գի-

տենք, այդ նախագիծը կազմելու մեջ որևէ մասնակցություն չունեցան մյուս երեք մեծ տերությունները (Գերմանիան, Ավստրիան և Իտալիան), որոնք ջանում էին Թուրքիայի վրա ինչպես տնտեսական, այնպես էլ քաղաքական ազդեցության գերակշռությունն իրենց ձեռքը գցել: Ռուսաստանն ու Ֆրանսիան, ցարական արտաքին գործերի մինիստրության ասիական դեպարտամենտի դիրեկտորի վկայությամբ, ոչ մի միջոցի առաջ կանգ չէին առնում մի կողմից՝ եռյակ դաշնակցության մեքենայությունների դեմ պայքարելու, մյուս կողմից՝ Անգլիային մեկուսացնելու համար: Ինչպես տեսանք, իրենց այդ քաղաքականությունն ապահովելու համար անհրաժեշտ էին համարում «սուլթանի համար ապահովել գործողությունների լիակատար ազատություն»: Անգլիան էլ իր կողմից ավելի էր առաջ անցնում Թուրքիային իր ազդեցության տակ պահելու քաղաքականության մեջ: «Եվ ահա այդ բոլոր սակարկություններից, առուժախի համաձայնություններից դուրս էր գալիս մի սոսկալի դատավճիռ հայ ժողովրդի համար—բնաջնջում»¹:

Այդ բնաջնջման համար սուլթանական կառավարությանը շատ բան պետք չէր՝ միայն թեկուզ ամենաշնչին առիթներ, որոնք նա կարողանար որակել որպես ապստամբություն:

Եվ ահա այդպիսի առիթներից մեկը հանդես եկավ 1895 թվականի սեպտեմբերին:

Սկսած մայիսից մինչև սեպտեմբեր սուլթանը չէր էլ մտածում ռեֆորմների վերաբերյալ իրադե հրապարակել, ընդհակառակն, նրա կառավարությունը որևէ ցույցի առիթ էր սպասում, որպեսզի հայկական մասսայական ջարդեր կազմակերպի: Եվ ահա սեպտեմբերի 30-ին տեղի է ունենում մի ցույց: Այդ առթիվ կոն գրում է. «Կ. Պոլսի անգլիական դեսպան հայասեր Ֆիլիպ Քրոին այսպես էր նկարագրում այդ բանն իր կառավարությանն ուղարկած գեկուցման մեջ. Հնչակյան կուսակցությունը Կ. Պոլսի դեսպաններին ուղարկում է մի շրջաբերական, որի մեջ հայտարարում է,

¹ АВПР. ф. Политархив, д. № 3449, 1896, лл. 274—281.

¹ Լեռ, Թուրքուսայ հեղափոխության գաղափարաբանությունը, հ. 1, էջ 182:

թե հայերն ուզում են սարքել մի խաղաղ ցույց (ընդգծ. մերն է.— Ս. Մ.)՝ հայտնելու համար թուրք կառավարությանը իրենց դժգոհությունն այն առթիվ, որ բարենորոգումների ծրագիրը մինչև այժմ չի մտցված կյանքի մեջ: Բայց հակառակ խոստման, այդ մի խաղաղ ցույց չէր, այլ զինված (ընդգծ. մերն է.— Ս. Մ.): Բոլորի զենքերը (ունովներն) միևնույն տեսակի էին, և այս մի ապացույց համարվեց, որ նրանց մատակարարել է հեղափոխական կուսակցությունը: Ցուցարարները, թվով 2000 մարդ, հավաքվեցին Գում-Գափուռի եկեղեցում: Պատրիարք Իզմիրլյանը սկսեց խորատել, որ ետ կենան ցույցից, սպասեն մինչև պետությունները հարկադրեն, որ սուլթանը ստորագրի ռեֆորմների ծրագիրը: Բայց մի երիտասարդ գոչեց՝ «Շատ ենք սպասել» և հարձակվեց պատրիարքի վրա, որը հազիվ կարողացավ թաքնվել մերձակա սենյակում: Այնուհետև ցույցն ուղղվեց դեպի Բ. Գուռը (այս պատճառով էլ ստացավ Բաբը-Ալիի ցույց անունը)»¹:

Մենք ոչ մի կերպ չենք կարող համաձայնել մեր անվանի պատմաբանի այն տեսակետի հետ, որ դա խաղաղ ցույց չէր, այլ զինված ցույց էր: Այն հանգամանքը, որ ցուցարարների մեջ եղող հնչակյաններից խլել էին նույն սիստեմի մի տասնյակ ատրճանակ, վկայություն չի կարող ծառայել ցույցի ոչ խաղաղ բնույթի համար: Եթե մի քանի հնչակյաններ կրակել էին զորքի վրա, այդ միայն առիթ կարող էր ծառայել, որ թուրքական կառավարությունը խաղաղ ցույցը զինված ապստամբություն համարի: Այդ ցույցը իրոք որ խաղաղ ցույց էր, նրա նպատակն էր իր բողոքը հայտնել ռեֆորմների նախագծի հաստատումը ձգձգելու համար: Այլ բան է, որ թուրքական կառավարության աչքում այդ էլ բավական էր ապստամբություն որոնելու, իսկ հնչակյանների մի քանի կրակոցները միայն ցանկալի առիթ էին կառավարության ոճրագործ դիտավորությունները ի կատար ածելու հենց Կ. Պոլսում:

Որ այդ այդպես է և ոչ այլ կերպ, երևում է հենց Լեոյի

¹ Նույն տեղում, էջ 183—184:

նկարագրությունից: «Թուրք կառավարությունը,— գրում է նա,— վաղորոք իրազեկ էր այդ ցույցին: Նա զինել էր սոֆթաներին (մահմեդական կրոնական դպրոցների ուսանողներին) և մահմեդական խուժանը հաստ բերով (մահակներով.— Ս. Մ.) և ուղարկել էր նրանց փողոց (ընդգծ. մերն է.— Ս. Մ.): Ցուցարարների ճանապարհը կտրեցին թուրք ոստիկանությունը և զորքերը՝ հրամայելով նրանց ցրվել: Բայց որովհետև ցուցարարները զինված էին, ուստի դիմադրություն առաջ եկավ նրանց կողմից, հրաձգություն սկսվեց երկու կողմերի միջև: Մի հայի արձակած զնդակով սպանվեց զինվորական հրամանատարը, թուրքերը հարձակում գործեցին, իսկ հայերը փախուստի դիմեցին (ընդգծ. մերն է.— Ս. Մ.)՝ թողնելով կովի տեղում բազմաթիվ դիակներ: Այնուհետև սոֆթաներն ու խուժանը սկսեցին իրենց գործը՝ փողոցներում հարձակվելով հայերի վրա և իրենց լքերով ջարդելով նրանց գլուխները: Սարսափն ու ահաբեկումը տիրեցին մայրաքաղաքի և նրա արվարձանների վրա: Կոտորվեցին մոտ 2.000 հայ»¹:

Իբրև Լեոյի այդ նկարագրության սրբագրում մենք պետք է ավելացնենք, որ ցուցարարներից սպանվածների թիվը շատ չնչին էր: Սպանվածների մեծագույն մասը ցույցի հետ առնչություն չունեցող ժողովուրդն էր: Խուժանը մահակներով հայերին ջարդում էր ամենուրեք, իսկ ոստիկանությունը միայն օժանդակում էր նրան: Թալանի ենթարկվեցին հայերին պատկանող խանութները և շատ հայերի տներ: Հարց է առաջանում, եթե ցույցը զինված ապստամբության (կամ զինված ցույցի) բնույթ էր կրում, այդ ինչպես է, որ մահակներով (ընդ որում ապացուցված էր, թե ինչպես այդ ժամանակ, այնպես էլ հետո այդ մահակները իրար շատ նման էին և բնականաբար պատրաստված էին կառավարական հատուկ պատվերով և բաժանված խուժանին) զինված խուժանը ջարդում էր ատրճանակներով զինված հայերին: Մի՞թե պարզ չէր, որ ցուցարարները զինված չէին, այլ նրանց մեջ կային ատրճանակ ունեցող մի քանի մարդ:

¹ Նույն տեղում, էջ 184:

Մենք այստեղ կրեքենք երկու տարբեր աղբյուրներից քաղած տվյալներ Տրապիզոնի դեպքերի մասին, որ սկսվեցին հոկտեմբերի 5-ին:

Ռուսական դեսպան Նելիդովը իր զեկուցագրում գրում է՝ «Տրապիզոնում գործն սկսվեց Վանի նախկին վալի Բահրիի վրա հայերի կողմից մահափորձ կատարելուց, ընդ որում ինչպես նա, այնպես էլ նրան նավ ուղեկցող պարետ Ահմեդ Համիդ փաշան վիրավորվեցին: Դրանից անմիջապես հետո հայերը, որոնց մեջ նրանց հանդիպող թուրքերը ճանաչել էին Բահրի փաշայի վրա հարձակվողներից մեկի որդուն, ցանկանալով քաֆեվել, սպանել էին բոլորովին անմեղ մի երիտասարդ մահմեդականի, որը պատահաբար գտնվել էր այդտեղ: Այդ դարձել է հայերի ջարդերի առիթ: Հայերի թաղամասը 3¹/₂ ժամվա ընթացքում, շնայած ռազմական ուժերի ներկայությունը, գտնվել է մահմեդականների լիակատար տնօրինության տակ. վերջինները զինված խմբերով հարձակվում էին հայերի տների վրա, կողոպտում և կոտորում էին, մինչև որ շեփորի ազդանշանով անկարգությունները դադարեցվեցին:

Հայերի ամենահարուստ խանութները, պահեստները և գրասենյակները կողոպտվեցին, ընդ որում տուժեցին նաև մի քանի հույներ և եվրոպացիներ: Սպանվեցին առավել հայտնի և ունևոր հայ քաղաքացիները և վաճառականները: Զոհերի թիվը ամենաշափավոր հաշիվներով 300-ից անցնում է: Կանաչք և երեխաները մասսաներով փրկվում էին օտարերկրյա հյուպատոսարաններում և ռեյդում գտնվող նավերում, այնպես որ նրանցից սպանվածներ գրեթե չեն եղել: Մեր հյուպատոսարանը լեփ-լեցուն է եղել հարևան տներից և թաղից փախած ընտանիքներով, որոնց մի մասը շատ օրեր անց է կացրել Տրապիզոն ռեյդի եկած «Ազով» նավում»¹:

Այս նկարագրությունից մենք տեսնում ենք, որ կոտորածն ու թալանը նախօրոք եղել է կազմակերպված, որ խուժանը նախօրոք զինված հարձակվել է հայերի տների, խանութների վրա, ավելին, որ շնայած ռազմական ուժերը չեն միջամտել

դադարեցնելու «անկարգությունները», բայց շեփորի ձայնով նա ընդհատվել է: Այնուհանդերձ Նելիդովն ասում է, որ «հայերն են (եղել Տրապիզոնի անկարգությունների» առիթը տվողը: Հարց է առաջանում. որտեղից՞ գիտեին մահմեդականները, թե հայերը պետք է տեսոք կատարեին հենց այն ժամանակ և պետք է սպանվեր պատահաբար այստեղ գտնվող մահմեդական անմեղ երիտասարդը, որ նախօրոք պատրաստվել էին ջարդելու «խռովարար» հայերին: Պարզ է, որ Նելիդովը կրկնում էր թուրքական աղբյուրներից քաղած տեղեկությունը:

Ահա ինչ է գրում այդ նույն դեպքերի մասին Ֆրանսիական դեսպան Կամբոնը. «Այն մարդիկ, որոնք քաղաքը տեսել էին ջարդերից մի քանի րոպե առաջ, ոչ մի կերպ չէին կարող ենթադրել, որ այդքան շուտով կարող են նման դեպքեր տեղի ունենալ: Ժողովրդի զանգվածը զբաղված իր սովորական գործերով, լցված էր փողոցները: Այժմ չիովին ապացուցված է, որ մահմեդականները, առանց որևէ ազդանշանի, միահամուռ և միաժամանակ հարձակվել էին հայերի վրա: Բեռնակիր բանվորները, որոնք մեծ մասամբ պատկանում են հայկական արտեղներին, իրենց գործերով մեծ թվով գտնվում էին մաքսատան մոտ. սրանց կոտորեցին: Մի քանի դժբախտներ, փորձելով փրկվել, նավակներով ուղևորվում էին դեպի նավահանգստում կանգնած նավը, նրանց էլ սպանում են նավավարների թիերի զարկերով: Բոլոր փողոցներում և հրապարակներում պատահած հայերին կոտորում էին, ընդ որում սպանում էին շլաված դաժանություններով: Առևտրականներին հանում էին իրենց խանութներից և հանձնում մարդասպանների ձեռքը:

Զարդը վերջացավ ամենակարճ միջոցում: Այդ ժամանակ ամբողջ հարձակվեց թալանելու խանութները:

Պնդում են, որ այդ ժամանակ զինվորները և զապթիաները ոչ միայն չէին խոչընդոտում դրան, այլև խրախուսում էին: Ինձ պատմում էին, օրինակ, որ մի տեղ խռովարարները չէին կարողանում գրավել հայի տունը, որովհետև նրանց կրակոցները հեռու չէին հասնում, զինվորները այդ տեսնելով, իրենց հագուստները փոխեցին և մարդասպանների հետ

¹ АВПР. ф. Политархив, д. № 3433, лл. 60—63.

կրակ բացեցին: Համենայն դեպս ես իբրև ականատես (de visu) կարող եմ վկայել, որ ոստիկանական դիրքերում գտնվող զապթիաները զենքը ձեռքներին կանգնած էին պաշտպանողական վիճակում և ամենաշնչին փորձ անգամ չէին կատարում կանգնեցնելու խռովարարներին:

Ձոհերի ճիշտ թիվը դեռ հայտնի չէ: Իշխանությունները որոշում են 180 մարդ, բայց, ըստ երևույթին, միայն Տրապիզոն քաղաքում հավանաբար 500-ից ավելի է: Հայերից գրեթե ոչ ոք տուն չի վերադարձել: Ֆրանսիական վանականները ապաստան են տվել 3.300 մարդու:

Պաշտոնական բացատրությամբ ջարդերին առիթ է ծառայել ատրճանակի կրակոցը, որ արել են հայերը և սխալ են հասկացել մահմեդականները:— Կոտորածի միաժամանակյա սկիզբը քաղաքի բոլոր մասերում այդ բացատրությունը բոլորովին անարժանահավատ է դարձնում: Որևէ կասկածից դուրս է, որ դա մանրակրկիտ կերպով կանխամտածված դավադրություն էր: Այդ մասին են վկայում կանոնավոր զորքի մասնակցությունը կոտորածին և թալանի թուլլովությունը»¹:

Էրզրումի հյուսպատոսը, հաղորդելով հոկտեմբերի 31-ի և նոյեմբերի 3-ի ջարդերի, էրզրումի շրջակայքի հայ գյուղերի մեծամասնության ավերման մասին, ավելացնում է՝ «անհրաժեշտ է դատի տալ զինվորականներին, որոնք մասնակցում էին թալանին և ջարդերին: Անգլիայի, Իտալիայի և Ռուսաստանի հյուսպատոսները և ես մեր ձեռքում ունենք այդպիսի մասնակցության անկասկած ապացույցներ»²:

Այն տեղեկությունները, որ հատկապես ռուսական դիվանագիտությունը տարածում էր, թե հայկական կոտորածներին առիթ էին տալիս հայերը, նախահարձակ լինելով մահմեդականների վրա, բերում էին թուրքական աղբյուրներից: Թուրքական իշխանություններն իրենց միտումները թաքցնելու և կոտորածներն արդարացնելու դիտավորությամբ իրենց ստեղծած ամեն մի պրովոկացիան ցուցադրում էին որպես հայերի նախահարձակում և իրենց կողմից հեղափոխության

ու ապստամբությունների ճնշում: Այս աղբյուրի հիման վրա էլ ռուսական դիվանագետները հաճախ կրկնում են՝ «շատ տեղերում հարձակման նախաձեռնությունը պատկանում էր հայերին: Նրանք համարյա ամենուրեք հանդիսանում են նախահարձակվողներ, բայց մուսուլմանները շուտով անցնում են հարձակման և, չզսպվելով իշխանությունների կողմից, անպատիժ թալաններ ու սպանություններ են կատարում»: Գրությունն այսպես է բացատրում Կ. Պոլսի ռուսական դեսպան Նելիդովը իր 1895 թվականի հոկտեմբերի 12/24-ի № 161 զեկուցագրում¹:

Նախ՝ փոքր-ինչ հետո մենք կանգ կառնենք այդ նույն զեկուցագրի այն մասի վրա, որտեղ նկարագրվում է հայկական վիլայեթների դրուժյունը հյուսպատոսական զեկուցագրերի հիման վրա, և կտեսնենք, որ վերոհիշյալ եզրակացությունը որևէ առնչություն չունի փաստական դրուժյան հետ:

Երկրորդ՝ հարց է առաջանում, ի՞նչն էր պատճառը, որ հայերը, գիտե՞նալով հանդերձ, որ ընդհարման դեպքում իրենց կոտորելու և թալանելու են, այնուամենայնիվ նախահարձակ էին լինում, որպեսզի ընդհարում առաջանա: Դրա միակ, չնայած ամեն մի տրամաբանությունից զուրկ, պատասխանը այն էր, որ սուլթանական իշխանությունը ընդունի երեք պետությունների դեսպանների կազմած մայիսյան ռեֆորմների նախագիծը: Բարի, իսկ ինչո՞վ բացատրել, որ սուլթանական իրադեոլ ռեֆորմների նախագիծը հաստատելուց հետո ևս ջարդերը շարունակվում էին ավելի մոլեռանդությամբ, որ մոռացնել էին տալիս նույնիսկ Սասունի կոտորածները: Ի՞նչ իմաստ կար հայերի նախահարձակ լինելու մեջ:

Ռուսաստանի ներքին գործերի մինիստրությունը Խրիմյան կաթողիկոսին հասցեագրած 1895 թվականի հոկտեմբերի 31-ի նամակում գրում է՝

«Ձերդ արբազնությանը անհայտ չէ, որ օսմանյան կառավարությունը հաստատել և հրապարակել է Ռուսաստանի, Ֆրանսիայի և Անգլիայի ներկայացուցիչների կողմից Բ. Դոան

¹ «Братская помощь армянам», II, стр. 101—102.

² Նույն տեղում, էջ 102:

հետ մշակված ռեֆորմների նախագիծը Փոքր Ասիայի հայ բնակչության համար: Անհրաժեշտ է ժամանակ և մեր կողմից հաստատակամ հսկում, որպեսզի այդ ռեֆորմներն իրագործվեն:

Մինչդեռ թուրքական պրովինցիաներից շարունակվում են հաղորդվել հայ և մահմեդական բնակչության նոր բախումների մասին տազնապալի լուրեր, որոնցից երևում է, որ վերջին ժամանակներս տեղի ունեցած Դիարբեքի, էրզրումի, Ջեյթունի արյունալի կոփաներում հայերը, ըստ երեվոյթին, գրեթե ամենուրեք անկարգությունների նախաձեռնող են հանդիսացել:

Մեր սահմանին մոտ գործերի այդքան անհանգիստ դրության պատճառով և նկատի ունենալով, որ կովկասահայերը, հուզումները Թուրքիայում հենց սկսվելու պահից, մեծ համակրանքով էին վերաբերվում Փոքր Ասիայի իրենց ցեղակիցների խռովարար գործողություններին, ցույց տալով նրանց նյութական օգնություն, արտաքին գործերի մինիստրությունը գտնում է, որ ձեռք սրբազնության համար հասել է ժամանակը ձեր խորհուրդներով և ազդեցությամբ զսպելու աստժով ձեզ հանձնված հոտին վտանգավոր ձեռնարկումներից ինչպես Ռուսաստանում, այնպես էլ մեր սահմաններից դուրս:

Ռուսական կառավարությունը ոչ մի դեպքում չի կարող հավանություն տալ հայ առաջավոր մարդկանց կողմից գործադրվող հեղափոխական միջոցներին...»¹:

Այսպիսով, ցարական բյուրոկրատիայի համար Թուրքիայում տեղի ունեցող կոտորածները «հայերի խռովարար գործողության» հետևանքներն էին, իսկ կովկասահայերի համակրանքը թուրքահայերի այդ ողբերգության նկատմամբ և նյութական օգնություն ցույց տալը հավասարազոր էր համարվում թուրքահայերի հեղափոխական շարժումներին նպաստելուն: Ավելին, դուրս է գալիս, որ ռեֆորմների նախագիծն ստորագրելուց հետո ևս հայերը նախահարձակ էին լինում շարդեր առաջացնելու համար: Այս ամենից չի կարելի չեզրակացնել, որ ցարիզմն ու սովթանիզմը հար և նման

էին բացատրում Թուրքիայում կատարվող հայկական շարդերի պատճառները:

Այժմ տեսնենք, թե անկախ Նեխրովի և Գորեմիկինի վերոհիշյալ կարծիքներից, ինչպես է նկարագրում դրությունը նույն Նեխրովը համաձայն հյուպատոսական տվյալների:

«Հսկայական անհանգստություն է տիրում այն բոլոր քաղաքներում, որտեղ զգալի քանակությամբ հայ բնակչություն գոյություն ունի:

Առայժմ ես հաղորդումներ եմ ստացել Սև ծովի ափերից՝ Կերսունդից, Սամսունից, Օրդուից, որտեղ քրիստոնյաները ընդհանրապես սարսափով սպասում են մուսուլմանների հարձակմանը: Ես այդ հանգամանքի վրա հրավիրեցի մեծ վեճերի և արտաքին գործերի մինիստրի ուշադրությունը, և այնտեղի իշխանություններին անմիջապես ամենախիստ հրամաններ ուղարկվեցին: Բայց նրանք ի վիճակի կլինեն՝ արդյոք իրագործելու դրանք: Մուսուլմանների գրգռվածությունն ու սանձարձակությունը արդյո՞ք չեն հասել այն չափերին, որտեղ դատողություններն ու հորդորանքները անզոր են, որտեղ ներգործություն կարող է ունենալ հաստատուն նյութական ուժը, որ իշխանությունների տրամադրության տակ չկա: Դրա հետ միասին մահմեդականների վրա ուժեղ տպավորություն են գործում նաև նրանց մեջ տարվող այնպատմությունները, որ հայերի շարդերը իբր թե ծագում են գերագույն իշխանության թուլտվությամբ, որ դրանք հրահանգված են հոգևոր կառավարության կողմից, հաճելի են Ցելզզին, որտեղից, խալիֆի մերձավոր անձնավորությունների կողմից, տրվում են հայերին դավաճանության համար պատժելու մասին հրամաններ: Այդ կարգի պատմություններ տարածված են անսահման չափերով:

Ի միջի այլոց խոսվում է իբր թե պրովինցիաներն ուղարկված հետևյալ հրամանի մասին՝ «հայերին չդիպել, նրանց որևէ շարիք չպատճառել, եթե նրանք սկսեն խռովություններ ստեղծել՝ ոչնչացնել նրանց»:

Ինչքան էլ կասկածելի է նման հրահանգների գոյությունը, չի կարելի ժխտել, որ մահմեդականների գործողությունները ամեն տեղ կարծես թե ղեկավարվում են դրանցով:

¹ Նույն տեղում, թթ. 108—109:

Թուրքերի կողմից ամենուրեք լուրեր են տարածվում թուրք խաղաղ բնակչության վրա հայերի հարձակումների մասին, և անմիջապես սկսվում է գլխովին ջարդ, որի ժամանակ սպանվածների մեջ թուրքեր գրեթե չեն լինում: Այսպես, Անհիսար վայրում, Անատոլիական երկաթուղուն մոտ, Իզմիրից երեք ժամ և Կ. Պոլսից ութ ժամ հեռավորության վրա, շուկայի օրը, թուրքերը, զինաթափ անելով հայերին, հարձակվում են նրանց վրա՝ կրակոցի տված նշանով, և սպանում են մինչև 60 մարդ, որոնց տիակները գցում են հորերը: Իզմիրի ֆրանսիական միսիոները ներկա է եղել դիակները հորերից հանելու ժամանակ և ինքը հաշվել է 50-ից ավելի դիակ: Տեղական մուղիրն արդարանում էր նրանով, որ իրեն պալատից գրել է իր մեկ ազգեցիկ հովանավորը, թե «հայերին հարկավոր է պատժել դավաճանության համար»:

Փոքր Ասիայի ներքին վայրերից տեղեկություններ միայն նոր են սկսում ստացվել: Ամեն տեղ տիրում է ամենատուժեղ անհանգստություն՝ մահմեդականների մեծ շափով զինվելու, նրանց գրգռվածության և ֆանատիզմի պատճառով: Ըստ Բ. Դուան տեղեկությունների, Զեյթունի հայերը (Հալիպի վիլայեթում), որոնք հայտնի են իրենց ուղմատենչությունը, պատրաստվում են հարձակվել թուրքերի վրա»¹:

Նեխիդովի զեկուցագրի այս մասը ուշադրությամբ քննելու դեպքում չի կարելի չզարմանալ այն անտրամաբանության վրա, որ բխում է հայերի նախահարձակ լինելու մասին նրա հայտարարության և այս հատվածի հակասությունից:

Եվ իրոք, նրա խոստովանությամբ ծովափնյա քաղաքների հայ բնակչությունը սոսկալի տազնապի ու սարսափի մեջ էր, հետևաբար, նա նախահարձակ լինել չէր կարող: Նեխիդովի այն պնդումը, որ իշխանություններն ուժ չունեն դապիլու խուժանի ելույթները, ինչպես և այն լուրերը կասկածի տակ առնելը, որ հենց պալատից հրահանգված էր հայերին կոտորել, պարզապես մտացածին էր և նպատակ ունի մեղքը սուլթանական կառավարությունից վերացնելու և խուժանի վրա գցելու: Բավական է հիշել, որ Տրապիզոնում բոլոր թաղամա-

սերում ջարդերը սկսվեցին միաժամանակ և ընդհատվեցին հատուկ ազդանշանով, հետևաբար, դրանք անկազմակերպ ամբոխի տարերային շարժում չէին, այլ կազմակերպված և հատուկ կենտրոն ունեցող ջարդեր էին: Իսկ այդ կազմակերպիչը ոչ այլ ոք էր, քան տեղական իշխանությունը, որ գործում էր կենտրոնից ստացած հրահանգով: Այդ ապացուցվում է նաև Իզմիրի մուղիրի հայտարարությամբ: Հետևաբար, այնքան տարածված լուրերը, որ կառավարության թելադրանքով էին կազմակերպվում հայերի կոտորածները, կասկածելի չէին, ինչպես զեկուցում է Նեխիդովը, այլ միանգամայն հավաստի, մանավանդ եթե նկատի ունենանք զեկուցագրի հեղինակի կողմից փաստի այն արձանագրումը, որ ջարդերը կարծես թե ղեկավարվում էին լուրերին համապատասխան: Եթե ջարդերի ժամանակ «սպանվածների մեջ թուրքեր գրեթե չէին լինում», ապա դրանից ավելի պարզ ապացույց չի կարող լինել, որ հայերի նախահարձակ լինելը «թուրք խաղաղ բնակչության վրա» լոկ առասպել էր, որ նախօրոք հնարել էին թուրքական իշխանությունները և այդ աղբյուրներից էր, որ կրկնում էին Նեխիդովն ու Գորեմիկիներ: Որ այդ այդպես էր, երևում է Զեյթունի վերաբերյալ հաղորդումից: Նեխիդովի ամբողջ զեկուցման մեջ այդ միակ կետն է, որտեղ նշվում է հայերի նախահարձակ լինելու մասին, այն էլ «ըստ Բ. Դուան տեղեկությունների» էր:

Խրիմյանին հասցեագրած Գորեմիկիների նամակից մենք տեղեկանում ենք, որ հայերի նախահարձակ եղող այդ վայրերից մեկն էլ Դիարբեքիրն էր:

Բարեբախտաբար, մեր տրամադրության տակ կա Դիարբեքիրի դեպքերին վերաբերող հրատարակված ֆրանսիական աղբյուրից բխող փաստաթուղթ:

Կանոգ առնենք այդ փաստաթղթի վրա:

Դիարբեքիրի ֆրանսիական փոխ-հյուպատոս Մեյրիեի զեկուցագրից մենք իմանում ենք, որ 1894 թվականի հոկտեմբերին, Դիարբեքիրի վիլայեթի վալիի քացակայության պատճառով, վիլայեթի կառավարումը ժամանակավերապես հանձնվում է Մարդինի մուսեսարիֆ Անիզ փաշային, որը «ամբողջ քաղաքին հայտնի էր իր ֆանատիզմով և հայատյա-

¹ АВІР, ф. Политархив, д. № 3433, лл. 60—63.

ցությամբ: Իր վրա դրված պարտականութիւնները կատարելու ժամանակ նրա միջոցառումները հաստատեցին այդ համբավը և հայերի նկատմամբ նրա աշառու և թշնամական վերաբերմունքի ապացույց ծառայեցին»: Ինչպես այդ զեկուցագրից երևում է, հայերին սարսափ է պատում, երբ իմանում են, որ 1895 թվականի հոկտեմբերի 4-ին նա հատարավել է վալիի պաշտոնում: Նրա իշխանության տակ հայերը այդ մեկ տարում անտանելի տառապանքներ էին կրել: Այդ նշանակման մասին փոխ-հյուպատոսը գրում է՝ «նա ինքը դրա մասին որևէ հույս ունենալ չէր կարող և բոլորի համար մնաց անբացատրելի»: Որպեսզի այդ պաշտոնն իր համար ապահովի, նրան հարկավոր էր, որ իր կողմից ճնշվող բնակչութիւնը հավանութիւն տա այդ նշանակմանը. նա ուժով հարկադրում է բարձր հոգևորականությանը և անվանի հայերին շնորհակալական հեռագիր ուղարկել սուլթանին Անիզ փաշային Դիարբեքիի վալի նշանակելու համար:

Քաղաքի հայ բնակչութիւնը հուզվում է, որ քաղաքի հայ երեւելիները ժողովրդի անունից շնորհակալական հեռագիր են ուղարկել սուլթանին մի մարդու համար, որի ամբողջ գործունեությունը վիլայեթի հայ բնակչության կեղեքումն է եղել միայն: «Նրանք,— գրում է Մեյրիեն,— փակեցին իրենց խանութներն ու եկեղեցիները, որտեղ արգելեցին իրենց քահանաների մուտքը և, վերջապես, իրենց երեւելիներին ստիպեցին նոր հեռագիր ուղարկել Կ. Պոլսի պատրիարքին, հերքելով առաջին հեռագիրը, հայտնելով, թե դա եղել է հակառակ ժողովրդի կամքի: Ութ օր հետո ստացվեց պատասխանը: Ամեն ինչ մնաց այնպես, ինչպես որ կար: Քրիստոնյաները դադարեցրին իրենց ցույցը»:

Ահավասիկ այս էր այն «ապստամբութիւնը», որը պատճառ էր համարվում վիլայեթում 119 գյուղերի ավերման ու հրդեհման և 6000 ընտանիքի կոտորածի և երկրից ցրվելու: Բայց այդ «ապստամբութիւնը» լոկ պատրվակ էր:

Իսկութիւնն այն է, որ Աբդուլ Համիդը ռեֆորմների իրական ստորագրելուց հետո Շաքիր փաշային Կ. Պոլսից գործուղում է հայկական վիլայեթները ռեֆորմները «կենսագործելու» համար: Եվ ուր գնում է Շաքիր փաշան, մի քանի որ

անց սկսվում է հայերի ջարդը: «Երբ հոկտեմբերի 22-ին լուր ստացվեց, որ սուլթանը ընդունել է ռեֆորմները,— գրում է ֆրանսիական փոխ-հյուպատոսը,— մահմեդականների զրբզրովածութիւնը շտեմնված չափերի հասավ. վաճառքում եղած բոլոր զինքերը գնվեցին առասպելական գներով»:

Հայերի մեջ խուճապը իր գագաթնակետին է հասնում: Ֆրանսիական փոխ-հյուպատոսը գրում է՝ «Զորեքշաբթի օրը, հոկտեմբերի 30-ին, ժամը երեկոյան 8-ին, ես գնացի վալիի մոտ, որպեսզի նրան հաղորդեմ այդ լուրերի մասին և խընդրեմ միջոցներ ձեռք առնել կանխելու սպառնացող անկարգութիւնները: Նա ինձ պատասխանեց, որ բոլորովին հարկ չկա վախենալու, որ մահմեդականները հանգիստ են, որ ինքը պատասխանատու է հանգստութիւն համար, եթե քրիստոնյաները որևէ բան չանեն այդ հանգստութիւնը խանգարելու: Բոլորովին չհանգստանալով այդ բացատրությամբ, ես անմիջապես հեռագրեցի ձերդ գերագանցութիւնը սպառնալի դրութիւն մասին: Ինձ համար որևէ կասկած չկար, որ Անիզ փաշան այդ մասին ինձնից ավելի լավ գիտեր և որ նրա մի խոսք բավական էր, որպեսզի տեղի չունենային այդ բոլոր դժբախտութիւնները»...

«Կոտորածն սկսվեց նշանակված ժամին, ըստ առաջուց պայմանավորված ազդանշանի, առանց որևէ մեկի կողմից որևէ կոչի»...

«Իմ խիղճը փնձ հարկադրում է ամենայն համոզվածությամբ հայտարարել, որ Դիարբեքիի ջարդերը կատարեցին մահմեդականները և (հայերից) ոչ ոք դրանք չառաջացրեց, որ գեներալ-նահանգապետը, զորքերի հրամանատարը, ոստիկանութիւնը պետք սարսափի տեսարաններին վերաբերվում էին ամենայն հանգստութիւնը և ոչ մի միջոց ձեռք չէին առնում դրանք կանգնեցնելու համար, որ եթե նրանք ուղղակի չէին մասնակցում, բայց վերաբերմունքը խրախուսիչ բնույթ էր կրում, որ ես իմ աչքերով տեսա զինվորներին, զապթիաներին, որոնք միացած մահմեդականների և քրդերի հետ, կրակում էին քրիստոնյաների վրա, որ այս վերջինները զենքի էին դիմում միայն ինքնապաշտպանութիւն համար, երբ հարկադրված էին լինում: Ոստիկանութիւնն ու

գործը միջամտում էին միայն նրա համար, որպեսզի խփեն գոհերին»:

Որպեսզի ցույց տանք, թե որքան անհիմն էր Նեխիդովի այն կարծիքը, թե իշխանությունները հնարավորություն չեն ունենում զսպել կատաղած ամբոխին, հարկ ենք համարում բերել Մեյրիեի հետևյալ վկայությունը՝ «Կիրակի օրը ցերեկվա ժամը 3-ին ես իմ պատուհանից տեսա, ինչպես կարող էին տեսնել բոլորը, զինվորների, զապիտանների, քրդերի և թուրքերի, որոնք միասին տանիքներից և մինարներից կրակում էին հայ-լուսավորչական եկեղեցու վրա (որտեղ գտնվում էին կոտորածից փախած հայերը.—Ս. Մ.)... Ես հոգևորական անձնավորություններից մեկին, որն ապրում էր ինձ հետ հարեան և քաղաքում մեծ հարգանք ուներ՝ Աբբաս խոջային, խնդրեցի միջամտել դադարեցնելու այդ արյունահեղությունը... Մի քանի բուպե անց մենք տեսանք, որ այդ մարդիկ ներքև իջան և հեռացան... ժամը 8-ին մոտ Աբբաս խոջան, որը տանից երբեք դուրս չէր գալիս, ինձ այցելության եկավ հյուպատոսարան. նրա հետևից շուտով եկան թաղամասի երեկելի մահմեդականները, և նրանք բոլորը ինձ վստահեցնում էին, որ ամեն ինչ վերջացած է և պետք է զբաղվել հանգստության վերականգնումով: Այնքան կարևոր ի՞նչ կարող էր պատահել, որ սանձահարեր այդ մոլեգնածների կատաղի պարոքսիզմը և գրեթե հանկարծակի դադարեցնելը կոտորածները նրանց լիակատար բորբոքման պահին... Այսպես թե այնպես, Դիարբեքիրում ջարդը վերջացավ: Դրժբախտաբար նույնը չի կարելի ասել գյուղերի մասին: Այնտեղ նա շարունակվեց դեռևս 15 օրից ավելի և ամեն ինչ ավերածություն ենթարկվեց»:

Ռուսական գերագույն շտաբի փոխ-գնդապետ Տոմիլովը 1904 թվականին ծպտյալ կերպով գործուղվում է տնտեսական և ռազմական տեսակետից ուսումնասիրելու Բաղդադի երկաթուղու նշանակությունը: Նրա շափազանց ընդարձակ հաշվետվությունը հրատարակված է, որի I հատորում Ուոհայի ջարդերի մասին գրված է.

«Քաղաքն ինքը մեծ չէ, բայց հեռվից բավականին հրատարակ է: Գրեթե բոլոր տները կառուցված են սրբատաշ

կրաքարից... Կաթուղի միսիոներները քաղաքի բնակչությունը հաշվում են մինչև 50.000, դրանցից 15—16 հազարը հայեր են... Մահմեդականների և հայերի հարաբերությունները ծայր աստիճան թշնամական են: Հայերը շափազանց լավ են հիշում 1895 թվականի բոլոր սարսափները, ատում են մահմեդականներին և շարունակ սպասում են նոր ջարդերի, որ այստեղ դաժան բնույթ էր ընդունել: Ըստ Դիարբեքիրի ֆրանսիական փոխ-հյուպատոսի զեկուցագրի, ինչպես և կաթուղի միսիոներների պատմածների, ջարդն ակավել էր 1895 թվականի նոյեմբերի 6/18-ին, ընդ որում առաջին օրը թալանվել էր 300 տուն և սպանվել 125 մարդ: Այնուհետև հայերը 20 օր փակվել են իրենց թաղամասում: Հայերի խանութները շուկայում բոլորովին կողոպտվել էին: Թուրքական իշխանությունները ձերբակալել էին հեղափոխական կոմիտեին պատկանելու մեջ կասկածվող առավել ազդեցիկ հայերին և պահանջել էին, որ հայերը հանձնեն զենքերը: Հայերը հրաժարվել են, հավատացնելով, որ իրենք զենք չունեն. այդ ժամանակ կանչում են հայ քահանային և թուրք մուխտարները նրա հետ միասին շրջում են հայերի տները, փոխոր հայերին ստիպելով ավետարանի վրա երգվել, որ իրենք զենք չունեն: Բացի այդ, ամենախիստ խուզարկություններ են կատարում ոչ միայն տներում, այլև գերեզմանատանը: Դրանից հետո թաղամասի պաշարումը վերացվում է, բայց ջարդերի կրկնվելու լուրերը չեն դադարում: Դեկտեմբերի 16/28-ին ոչ միայն Ուոհայի մահմեդականների, այլև շրջակա գյուղերից եկած քրդերի խուժանը խուժում է հայկական թաղամասը և սկսում է ջարդել հայերին, կողոպտել և տները հրդեհել: Առանձնապես սոսկալի է եղել 2000 հայերի վիճակը, որոնք փակվել և կենդանի-կենդանի հրկիզվել են եկեղեցում: Մահմեդականները, հայերին փակելով եկեղեցում, պատուհաններից գցելիս են եղել վառվող խաիրներ, գորգեր, նավթ և այլ վառվող առարկաներ: Եկեղեցում փակված բոլոր 2000 մարդը կամ այրվել, կամ ծխից խեղդվել էին: Կենդանի են մնացել միայն երկու մարդ և մեկ երեխա:

Միսիոներները հավատացնում են, որ այդ բոլորը կատարվել է Կ. Պոլսից տրված հրամանով և կազմակերպվել է

տեղական իշխանությունների կողմից: Զորքերը եռանդուն մասնակցություն են ունեցել հայերի ջարդերին: Դրա համար քերվել է շրջակայքի քուրդ ցեղերի համիրդի հեծելազորը:

Հարկավ, թուրքական իշխանությունները ժխտում էին այս վերջին բացատրությունը և ամբողջ հանցանքը պնդում էին հայերի վրա ու առաջ էին քաշում Յելդզ-Քյոշըում ստեղծված վերսիան: «Նրանք ասում էին, որ ջարդերն առաջ են բերել հայ հեղափոխականները, որոնք աշխատում էին անկարգություններով և նույնիսկ իրենց հղբայրակիցների արյան զնով քրիստոնյաներին ապստամբության դրդել և առաջ բերել եվրոպական տերությունների միջամտություն, որպեսզի այդ միջոցով ավտոնոմիա և իրավունք ձեռք բերեն, անպատիժ կերպով շահագործեն և տնտեսապես ստրկացնեն իրենց ատելի մահմեդականներին»¹: Եվ իրոք, այդ վերսիան թուրքական իշխանությունները համառ կերպով տարածում էին ամենուրեք, որը և հանդիսանում էր մահմեդական ամբոխին գրգռելու հիմնական պրովոկացիան:

Դրա փայլուն ապացույց կարող է ծառայել Ֆրանսիացի ականատեսի վկայությունը, որը զետեղված է Ֆրանսիական պաշտոնական «Դեղին գրքերից» մեկում, և վերաբերում է հատկապես Ուռնայում կատարված ջարդերին: Մենք հարկ ենք համարում այդ վկայությունը մեջ բերել ընդարձակ կերպով:

«Կիրակի օրը, նոյեմբերի 6-ին (1895 թ.), թուրքական ժամանակով ժամը 5-ին մի երիտասարդ թուրք իր երեք ընկերներով ուղղակի մայր եկեղեցու առաջ մորթեց հայ դրամափոխին: Մարդասպանը ձեռքակալվեց, բայց նա համառ կերպով պնդում էր, որ սպանությունը կատարել է իշխանավորի հրամանով: Նրան տարան Հաուպտվախտ, որտեղ սպանեցին սվիններով: Այդ երկու մահն առիթ ծառայեց հետագա ջարդերի: Մահմեդականները բացեիբաց հայտարարում էին, որ քրիստոնյաներին պետք է կոտորել: Այդ նույն գիշերը թուրքերն սկսեցին հրացաններով կրակել և հայերն ամ-

բողջ գիշերն անցկացրին մահվան սարսափի տակ: Մյուս օրը ոստիկանությունը, որպեսզի գրգռի մահմեդականներին, լուր տարածեց, որ գիշերը հայերն են կրակել թուրքերի վրա և սպասում են սուլթանի հրամանին, որպեսզի կոտորեն գյավուրներին: Չնայած այդ լուրերին, հայերն անցան իրենց առօրյա գործերին, բայց նրանց անպատվում էին իրենց սեփական խանութներում, և նրանք ավելի վատթարից խուսափելու համար հեռացան իրենց տները: Թուրքերը, օգտվելով հայերի բացակայությունից, սկսեցին ջարդել նրանց խանութները և զինվորների օգնությամբ թալանել: Այդ բոլորը ես տեսա իմ սեփական աչքերով հյուրանոցի պատուհանից, որի առաջ կանգնած էի:

Զորապետ Հասան փաշան, այդ կողպուտը անբավարար համարելով, ասում էր կողպուտողներին՝ «Թալանի համար ժամանակ դեռ շատ կլինի. առաջ գնացեք հայկական թաղամասը և կոտորեցեք հայերին, իսկ հետո ազատվելով նրանցից, վերցրեք այն բոլորը, ինչ որ կա տներում ու խանութներում»: Տեսնելով, որ նրա խորհուրդը բավականաչափ արագ չի կատարվում, նա կանչեց կապիտանին և հրամայեց վերցնել զինվորների մի ջոկատ և զինվորների միջոցով ջարդարարներին քշել հայոց թաղամասը: Զորքը եկավ և գոչելով՝ «մահ գյավուրներին», այդ ամբողջ խուժանին քշեց հայոց թաղամասը... Բայց հայերը ժամանակ ունեին պատնեշել իրենց և թաղամասի գլխավոր մուտքերը փակել: Չեղբ առած միջոցների շնորհիվ հայերը կարողացան կանգնեցնել այդ մուլեզնածների գրոհը, որոնց հաջողվեց քանդել 300 տուն և սպանել 120 մարդ. թուրքերից սպանվել էին 4 հոգի: Նրանք ամենավայրենի գազանությամբ նորից հարձակվեցին շուկայի վրա և կողպուտեցին մինչև 1700 խանութ:

Հաջորդ օրը տեղական իշխանությունները ակնհայտ սուտ պատրվակով, որ իբր թե հայերն են հղել նախահարձակ, և մուսուլմաններին ավելի բորբոքելու նպատակով, ուղղակի դատի տվին դեղագործ Մելքոնին ու նրա ազգականներին: Նրանք հանձնվեցին խուժանի հոշոտմանը:

Դրանից հետո վարչությունը քաղաք բերեց թուրք և այլ գյուղացիների և նրանց բաժանեց իր տրամադրության տակ

¹ «Отчет о поездке по Азиатской Турции генерального штаба подполковника Томилова в 1904 г.», ч. 1, СПб, 1907, стр. 292—294.

եղած ամբողջ զենքը, որպեսզի հարձակվեն իրենց թաղամասում պատասպարված հայերի վրա: Մի անգամ էլ դրանք հարձակվեցին այդ թաղամասի վրա վայրենի գոռոտ-գոռումով, որպեսզի ամեն ինչ հրի ու սրի մատենեն: Քայց խուժանը, դիմադրության հանդիպելով, հեռացավ, թողնելով 5 սպանված և թալանելով 50 տուն ու սպանելով 20 հայի: Դրանից հետո հայոց թաղամասը շրջապատեցին զորքերը. արտաքին աշխարհի հետ ամեն մի հարաբերություն ընդհատվեց:

Չորեքշաբթի օրը բանտարկեցին քաղաքի ականավոր հայերին: Նրանցից պահանջում էին, որ ինչ կերպ էլ լինի, խոստովանեն, թե պատկանում են հեղափոխական կոմիտեին: Նրանցից պահանջում էին կոմիտեի անդամների անուններ, ինչպես և հանձնել 1800 հրացան կամ զգալի քանակությամբ դրամ, եթե ցանկանում են ազատվել: Այդ դժբախտները, հնարավորություն չունենալով խոստովանելու գոյություն չունեցող կոմիտեին հարելու մասին, ոչ էլ հանձնել շեղած հրացանները, հավատարով թուրքերի խոսքերին, հանձնեցին դրամը՝ ինչքան կարողացան հավաքել, բայց ազատվելու փոխարեն փակվեցին մութ զնդանում, որտեղ մինչև այժմ (1896 թ. հունվար.—Ս. Մ.) տառապում են:

Հետագա ամբողջ շարադրությունը աներկբայելիորեն կապացուցի, որ հատկապես կառավարությունն էր նախապատրաստել և հրահանգել կոտորածը: Վարչությունը, տեսնելով, որ հայերին կոտորելու համար հարկադրված կլինի զոհաբերել մեծ թվով թուրքեր, հնարեց հետևյալ թակարդը, որպեսզի հայերին զինաթափ անի և հանձնի թուրքերի կամփին:

Նա կանչեց հայկական համայնքի ղլխավորներին և հայտարարեց, որ խիստ հրաման է արձակված կոտորածին վերջ տալու, որի համար հայերն էլ իրենց կողմից պետք է իրենց հավատակիցներին հարկադրեն զենքերը հանձնել: Իշխանությունը, իբրև իր հայտարարության հավաստիացում, հայոց թաղը պաշտպանելու համար մարտկոցներ դրեց: 20 օր հայերի դեմ ոչինչ չձեռնարկվեց... Քահանաները ոստիկանության ուղեկցությամբ տնից տուն էին մտնում և ավետարանի վրա երգվել տալիս զենք ունեն, թե ոչ: Ամբողջ առկա զենքը

հավաքվեց, այնուհետև խուզարկության ենթարկվեցին հոգևորականների տներն ու գերեզմանատունը:

Կառավարությունը, համոզվելով, որ հայերը լիովին զինաթափված են, հեռացրեց պահակազորը և հայերին հրամայեց անցնել իրենց առօրյա աշխատանքին:

Նրանք, տեսնելով իրենց խանութները ավերված ու հրդեհված, իրենց աչքերին չէին հավատում:

Հատկապես հունվարի 16-ին (1896 թ.) լուր տարածվեց, որ թուրքերի կողմից հայերի դեմ մեծ շարժում է պատրաստվում: Քահանաները վաղ առավոտյան ներկայացան իշխանությանը, խնդրելով կանխել նոր հուզումները: Նրանք դեռ տուն չէին վերադարձել, երբ հայոց թաղամասը շրջապատեցին 3000 զինվոր և 1500 համիդի, որոնք խուժանի հետ միասին, որին իշխանությունը նույնպես զինել էր, կատաղած գազանների պես հարձակվեցին հայերի տների վրա, կոտորելով ճանապարհին պատահածներին, իսկ հետո էլ հրդեհի մատնեցին տները: Անհնար է նկարագրել ձեզ այն նողկալի տեսարանները, որոնք շարունակվեցին ամբողջ օրը: Նրանց կատաղությունն ու արյունարբությունը հագեցում շտապավորությունները, որովհետև մյուս օրը նորից վերսկսվեց:

Այս ամենն արվում էր հանուն մարգարեի և երկրի վրա նրա ստվեր հանդիսացող սուլթանի:

3000 հայեր փրկություն են որոնում մայր տաճարում. մեծամասնությունը կանայք, աղջիկներ ու երեխաներ էին... Վերջապես, որպեսզի վերջ տան ավերածությանը, այդ շաքարոծները նավթ բերին թափեցին այդ դժբախտների շուրջը և տաճարը այրեցին. նրանք, ովքեր ազատվել էին սվիսներից, կրակի զոհ դարձան:

Հունվարի 16—17-ը՝ երկու օրվա ընթացքում զոհված հայերի թիվը հասնում էր 10.000-ի...

Բերեջինում այլևս ոչ մի քրիստոնյա (իմա՝ հայ) չկա: Նրանք բոլորը, ովքեր չմորթոսվեցին կամ Եփրատի մեջ չնետվեցին, հարկադրված էին մահմեդականություն ընդունել:

Երիտասարդ կանանց և աղջիկների վաճառքն այստեղ հրապարակներում շարունակվում է էժան գներով¹:

¹ «Братская помощь армянам» II, стр. 109—111.

Դիարքեքրի հետ ջարդեր սկսվեցին նաև Սվազում: Սվազի ֆրանսիական փոխ-հյուպատոս Քաունինն հաղորդում է՝ «Ջարդն սկսվեց ուղիղ կեսօրին՝ քաղաքի բոլոր մասերում միաժամանակ»...

«Ջարդը, հավանաբար, կազմակերպված էր նախօրոք, քանի որ աչքի էր ընկնում հատուկ միաբանություններ: Այստեղ դեր խաղացողը իշխանությունների խրախուսանքն էր... Ավելորդ է ասել, որ զապթիաները, զինվորները, վարչական աշխատողները անձնապես մասնակցում էին ինչպես կոտորածին, այնպես էլ թալանին»¹:

Այսպիսով, մեր բերած բոլոր փաստական տվյալները անառարկելիորեն վկայում են, որ հայերի նախահարձակ լինելու առասպելը թուրքական իշխանությունների հնարածն էր, որը որդեգրել էր նաև ցարական բյուրոկրատիան: Իրականությունն այն է, որ հայկական կոտորածները նախօրոք կազմակերպված էին սուլթանական կառավարության կողմից, նպատակ ունենալով հայկական վիլայեթներում որքան հնարավոր է նոսրացնել հայ տարրը հօգուտ մահմեդական ազգաբնակչության: Մենք տեսնում ենք, որ բոլոր տեղերում կոտորածները կազմակերպված բնույթ էին կրում. քաղաքների թաղամասերում հանդես էին գալիս միաժամանակ, սկսվում էին հատուկ ազդանշանով և դադարում էին հանկարծակի, նույնիսկ երբեմն ջարդերի ամենաեռուն պահին: Մեր բերած փաստերը անառարկելիորեն ապացուցում են, որ եթե հայերը զենքի էին դիմում, ապա դա լինում էր ճարահատյալ, ինքնապաշտպանության նպատակով: Կասկածից վեր է նաև այն, որ ընդհարումների ժամանակ կոտորածներին ակտիվորեն մասնակցում էին նաև ոստիկանությունն ու զինվորները: Չի կարելի ժխտել նաև այն հանգամանքը, որ ընդհարումների ժամանակ այս կամ այն կոնկրետ դեպքում մասնակցում էին նաև յուսպես կոչված «հայ կոմիտեները»: Բայց բազմաթիվ տվյալներում ոչ մի տեղ մենք չենք հանդիպում, որ դրանք մասսաներին կազմակերպած լինեն ոչ միայն ապստամբության համար, այլև պաշտպանական գործում:

Եվրոպական դիվանագիտությունը սուլթանական կառա-

վարությունը հասարակական մեղադրանքից փրկելու և սեփական երկրի օպոզիցիայի բերանը փակելու համար հանցագործությունների բուն հեղինակին թողած, կոտորածների հանցանքը գցում էին հրամանները կատարողների՝ բուրդ և թուրք ամբոխի, մի քանի պաշտոնյաների և ոճրագործությունների զոհ դարձած հայ ժողովրդի վրա:

Հայ, այսպես կոչված, «հեղափոխականների» ավանտյուրիստական դավադրության գագաթնակետը՝ ժամանակին մեծ աղմուկ հանած «օսմանյան բանկի» գրավման գեպքն է, որի մասին հայ ժողովուրդը ոչ մի տեղեկություն չունի, ճիշտ այնպես, ինչպես այդ մասին տեղեկություն չունեին ո՛չ եվրոպական դիվանագետները, ո՛չ էլ թուրքական իշխանությունները, բայց այդ ավանտյուրան, ինչպես ամեն մի ավանտյուրա, ոչ միայն որևէ նշանակություն չունեցավ հայկական ռեֆորմները իրագործելու տեսակետից, այլ միայն առիթ հանդիսացավ հայ ժողովրդի բազմահազար նոր ու անիմաստ զոհերի համար:

Հայ, այսպես կոչված, «հեղափոխականները» հոլովում էին հեղափոխություն և ապստամբություն բառերը, իսպառ շահականալով և խեղաթյուրելով այդ վեհ գաղափարների բուն բովանդակությունը: Նրանց հասկացողությամբ հեղափոխությունն ու ապստամբությունը ոչ թե ժողովրդական զանգվածների ակտիվ շարժում պետք է լինեին ընդդեմ տիրող կարգերի, այլ ինտելիգենտների դավադրական գործըղություն ժողովրդական զանգվածների գլխի վրայով: Նրանց հիմնական նպատակն այն էր, որ տեռորիստական գործողությունների միջոցով եվրոպական դիվանագիտությանն ստիպեին զբաղվելու հայկական հարցով: Եվ այդ է, որ նրանք անվանում էին հեղափոխություն և ապստամբություն: Բայց դա իրականում որևէ առնչություն չունի ոչ հեղափոխության, ոչ ապստամբության հետ: Այդ բառերը շփազանց շատ էին հոլովվում ինչպես «Հնչակի», այնպես էլ «Իրոշակի» էջերում: Դավադրական ելույթները, առանց մասսաների հեղափոխական կազմակերպման, դեռ ոչ մի երկրում և ոչ մի անգամ օգուտ չեն բերել ազատության համար մղվող պայքարում, բացի վնասից: Իսկ թուրքական պայմաններում, երբ հայերի

¹ Նույն տեղում, էջ 108:

ազատագրական իղձերի դեմ կանգնած էին՝ սկսած եվրոպական Ֆինանսական կապիտալից, սուլթանիզմից, արևելյան տիպի ֆեոդալական հարաբերություններից մինչև քրդական քոչվորական ֆեոդալիզմը, դավադրական «հեղափոխականությունը» կարող էր միայն կործանարար ազդեցություն ունենալ հայ աշխատավոր գյուղացիության համար, չբերելով որևէ օգուտ հայ ժողովրդի ազատագրական տենչանքին:

Կանգ առնենք այդ ժամանակ տեղի ունեցած այն դավադրական «հեղափոխությունների» վրա, որոնք հայ նացիոնալիստների կարծիքով, ազատագրական պայքարի կարկառուն դեպքեր են համարվում:

Դավադրական «հեղափոխության» ամենախոշոր ակտը, ինչպես իր մտահղացումով, այնպես էլ համարձակությամբ, անտարակույս, Օտտոմանյան բանկի գրավման դեպքն էր: Ինչպես գիտենք, այդ բանկը միջազգային ֆինանսական կապիտալի խոշոր օբյեկտներից մեկն էր և միաժամանակ Թուրքիայի գրեթե ամբողջ պետական ֆինանսական գործառնությունները ընթանում էին այդ բանկի միջոցով: Դաշնակցականների մի խումբ, զինված դինամիտով և ռումբերով, շատ համարձակ և աներևակայելի հաջողությամբ 1896 թվականի օգոստոսի 26-ին (ն. տ.) գրավում է այդ բանկը իր 500-ից ավելի ծառայողներով, բռնում է շենքի բոլոր ելքն ու մուտքերը: Այդպիսով, մի պահ այդ խումբը իր ձեռքերի մեջ է առնում Թուրքիայի ֆինանսական սիրտը և բանկում գտնվող վիթխարի հարստությունները:

Այդ առթիվ ռուսական դեսպան Նելիդովի 1896 թ. օգոստոսի 16/28-ի № 123 զեկուցագրում մենք կարդում ենք.

«Զերդ գերազանցությանը օգոստոսի 14-ի և 15-ի իմ հեռագրերով ես արդեն տեղեկացրել եմ Կ. Պոլսում առաջացած լուրջ անկարգությունների մասին: Դրանք առաջացրել են այն հայերը, որոնք 30 հոգով ատրճանակներով և դինամիտային ռումբերով խորամանկությամբ թափանցել են Օտտոմանյան բանկը և Թուրքական կառավարությանը ու մեծ տերությունների ներկայացուցիչներին ներկայացրել են Դաշնակցության հեղափոխական կոմիտեի նամակներում շարադրված պահանջները (մայիսյան ռեֆորմի կիրառումը.— Ս. Մ.):»

«Հայերի շարժման մասին լուրը արագությամբ տարածվեց բաղաբուն և զանազան թուրքական թաղամասերից դուրս թափվեցին դանակներով և մահակներով զինված բաշիրազուկների ամբոխներ, որոնք սկսեցին հարձակվել բոլոր նրանց վրա, ում որ հայ էին համարում, և սկսվեց անպաշտպան և որևէ հանցանք չունեցող քրիստոնյաների բարբարոսական շարդ: Ոստիկանությունը ոչ միայն մնում էր որպես կատարվող սարսափների դիտող, այլև շատ դեպքերում մասնակցում էր կոտորածներին և թալաններին: Զորքերը, որոնք շատ ուշ էին հասնում անկարգությունների վայրերը, նույնպես ոչ մի միջոց չէին ձեռնարկում դրանք դադարեցնելու համար: Այդպիսով, Ստամբուլի, Ղալաթիայի և Բերայի զանազան վայրերում և նույնիսկ ավելի հեռու թաղամասերում մինչև երեկո քրիստոնյաների հետ կատարվում էր ահեղ գատատան, որն ընդհատելու համար ոչ մի միջոց ձեռք չառնվեց:

Մինչդեռ Օտտոմանյան բանկում դիրք մտած հեղափոխականները պատուհաններից ռումբեր էին նետում այդտեղ առաջադրած զինվորների և ոստիկանների վրա, որոնք սահմանափակվեցին լուկ նրանով, որ հեռվից շրջապատեցին շենքը: Նրանք բանկից պալատ ուղարկեցին բանկի դիրեկտորի օգնական պ. Օբուանոյին, որին հանձնարարեցին սուլթանին հայտնել, որ նրանք դուրս կգան, եթե միայն նրանց ապահովվի, օտարերկրյա դեսպանների մասնակցությամբ, իրենց բոլոր պահանջների կատարումը¹:

Այդ ժամանակ պալատ ներկայացավ դեսպանության առաջին թարգման պ. Մաքսիմովը, որին ես ուղարկել էի տեղեկանալու տեղի ունեցող դեպքերի մասին և սուլթանին առաջարկելու համար վտանգի դեպքում իմ ծառայությունները:

1 Այդ պահանջները, որ բերված են Լեոյի «Թուրքահայ հեղափ. գաղափարաբանությունը» աշխատության 2-րդ հատորի 26-րդ էջում, հետևյալն են՝ «Այստեղին շպիտի հեռանանք 2 օր:

Մեր պահանջներն են ներկայիս համար.

1. Միջազգային միջամտությամբ ամբողջ երկրին մեջ կյանքի ազդեցիկ ապահովության երաշխավորություն.

2. 2. 2. Դաշնակցության ներկայացված պահանջներու ընդունվելը. (այսինքն՝ մայիսյան ռեֆորմների ծրագրի իրագործումը.— Ս. Մ.):»

Աբդուլ Համիդը ջերմագին խնդրում է նրան մասնակցել այդ գործին և լիազորում է ապստամբներին խոստանալ բանկից ազատ հեռացում և Թուրքիայից մեկնում, եթե նրանք հրաժարվեն այդ հիմնարկը օդ ցնդեցնելու վերաբերյալ իրենց հանցագործ մտադրությունից:

Չնայած այդ ձեռնարկության ակնհայտ վտանգավորությանը, պ. Մաքսիմովը համարձակ կերպով իր վրա է վերցնում այդ հանձնարարությունը և պպ. Վենցենտի ու Օբուանոյի հետ ուղևորվում է բանակցելու ապստամբների հետ: Երեք ժամ վիճաբանելուց հետո նրան հաջողվում է համոզել նրանց, որ պաշտպանած գործի շահերից ելնելով, Եվրոպան ամեն կերպ մասնակցություն է ցուցաբերել, որ հոժարակամ դուրս գան բանկից և անգլիական նավ նստեն և մյուս օրը հեռանան արտասահման: Ռումբերը և դինամիտը (13¹/₂ կիլոգրամ) նրանք թողին բանկում, 5 հոգի վիրավորներին և 5 հոգի սպանվածներին փոխադրեցինք մեր հիվանդանոցը: Իսկ հեղափոխականները, որ մնացել էին 15 հոգի, բոլորն էլ հայեր, ինչպես հավատացնում էին՝ թուրքահպատակներ, նավով ուղևորվեցին Մարսել»¹:

Ահավասիկ այս դավադրական ավանտյուրան էր, որ դաշնակցականները համարում են իրենց կատարած սխրագործությունների գլուխգործոցներից մեկը:

Այժմ մենք վկայություններ բերինք, թե ինչ նստեց այդ

3. Մեր դեմ բռնություն գործադրվելու չէ.

4. Կյանքի կատարյալ երաշխավորություն բոլոր անոնց, որք այստեղ, պանքային մեջ, և անոնց, որք մասնակցած են քաղաքի մեջ տեղի ունեցող այլ և այլ խռովությանց:

Պանքայի կահավարսիքին և դրամական հարստության ձեռք չպիտի գիպցնենք, մինչև որ կատարվեն մեր պահանջները. իսկ հակառակ պարագային, դրամական հարստությունը և պաշտոնական թղթերը պիտի ոչնչացնենք և բոլոր պաշտոնեաներու հետ պիտի դիմենք մեր մահվան՝ պանքայի ավերակներու տակ:

Մենք ստիպված ենք այս ծայրահեղ միջոցները ձեռք առնել:

Մարդկության ոճրագործ անփութությունն է, որ մղած է մեզ դեպի այս ծայրահեղությունը:

¹ АВІР. ф. Политархив, д. № 3449, лл. 170—173.

ավանտյուրան, որի մասին, բացի դաշնակցական ավանտյուրիստներից, հայ ժողովրդին ոչինչ հայտնի չէր. բայց հայ ժողովուրդը իր արյունով պետք է հատուցեր այդ դավադրության համար:

Նույն զեկուցագրում նեխիդովը հաղորդում է՝ «Չնայած անկարգությունների այդ առաջին պատճառի վերացմանը, քաղաքում սկսած երեկվա երեկոյից՝ հանգստությունը չի վերականգնված: Հայերի ջարդը շարունակվում էր լայն շափերով, և դրա հետ միասին հաճախ տուժում են նաև մյուս քրիստոնյաները, նույնիսկ օտարահպատակները»:

Ռուսական զինվորական գործակալը իր ծածկագիր զեկուցման մեջ Կ. Պոլսից հաղորդում է՝ «Օգոստոսի 14-ի կեսօրից և այսօր գիշերը Կ. Պոլսում տեղի են ունենում հայերի ջարդեր: Բնակչության մեջ խուճապը խիստ մեծ է այն պատճառով, որ վստահություն չկա դեպի կառավարության միջոցառումները: Ոստիկանությունը ինքը հորդորում և մասնակցում է կոտորածներին: Զինվորական պահակները դիտավորյալ չեն լսում կամ օժանդակում են մարդասպաններին»: Նույն գործակալը հաջորդ օրը նույնպես ծածկագիր զեկուցում է գերագույն շտաբին.

«Կ. Պոլսում երկու օրվա ընթացքում սպանված են ավելի քան 5 500 անպաշտպան հայեր: Միանգամայն պարզված է, որ ջարդերը կատարել է կառավարության կողմից նախօրոք կազմակերպված խուժանը՝ ոստիկանական պաշտոնյաների զեկավարությամբ»¹:

Մենք այստեղ կբերենք այդ ջարդերի ականատեսների վկայություններից, որոնք ցույց կտան դաշնակցականների կարծիքով, այդ «հերոսության», մեր կարծիքով, դավադրական ավանտյուրայի, հետևանքները:

Ռուսաստանի Կ. Պոլսի դեսպանության աշխատակից Շախովսկոյը 1896 թվականի օգոստոսի 21-ին (հ. տ.) գրում է.

«Սույն օգոստոսի 14-ին, ժամը 2-ի սկզբին, երբ ես գտնվում էի գերագույն հյուպատոսարանում, այնտեղ վազեց

¹ Նույն տեղում, թթ. 183 և 184:

Ռուսական նավագնացութեան և առևտրի ընկերութեան ծառայողներին մեկը և ասաց, որ հայերը գրոհել են Օստոմանյան բանկի վրա, այնուհետև հաղորդեց, որ փողոցներում բռնում են անցնող հայերին և տեղնուտեղը սպանում, որ ինքը այդ տեսել է իր աչքով: Այդ լուրն ստանալուն պես ես ուղևորվեցի Կալաթա-Սերայ (ոստիկանատուն.—Ս. Մ.), որ իմանամ, թե ինչ է կատարվել: Ինձ չէին թողնում անցնել, բայց երբ բացատրեցի, թե ով եմ, ինձ թույլ տվին անցնել. և առաջին բանը, որ ես տեսա՝ մի հայի դիակ էր, որի ոտից քարը տալով քակն էին նետում, ընդ որում զինվորներից մեկը զարկեց նրա գլխին: Էնվեր բեյը ինձ հաղորդեց հայերի կողմից բանկի վրա գրոհելու մասին, և որ նրանք կտորել են բանկ մտնող փորձողներին, ավելացնելով՝ անհնարին է, որ ոստիկանությունը շարդելիս լինի հայերին: Այդտեղից, շտապելով, ես գնացի դեպի բանկը (մոտավորապես ժամը 2-ին): Փողոցում կուտակված էր ժողովրդի մեծ ամբոխ, որը միանման մահակներով (սպիտակ, բավականին կարճ և զլուխները հաստ) զինված հետապնդում էր հայերին: Բանկի մոտ արդեն զորքեր էին և հրաձգություն էր գնում նրանց և բանկում ու մի քանի հարևան տներում դիրք բռնածների միջև, ընդ որում, ես լսեցի, թե ինչպես երկու ումբ պայթեցին: Վերադառնալով Բերա, իմ աչքի առաջ թուրքերի ամբոխը, զինված մահակներով և երկար խանշալներով, դեպի կամուրջը տանող փողոցում կտորել էին թունելի մոտից փախչող 20 հայի, իսկ այդ փողոցի ելքի մոտ գտնվող ոստիկանությունը կանգնած էր դեպքերը դիտողի դերում: Ճանապարհի շարունակությունը դեռ խաղաղ էր, թեև պատահում էին առանձին մահակավորներ: 4-րդ ժամին Կալաթա-Սերայում ումբ էր նետվել, որի հետևանքով սպանվել և վիրավորվել էին 12 մարդ, առաջացնելով սոսկալի խուճապ, որից հետո Կալաթա-Սերայը շրջապատվել էր զորքով: Իմանալով նետված ումբի մասին, ես նորից գնացի այնտեղ և տեսա, ինչպես առաջին անգամ, թե ինչպես բերում էին ձեռքակալված հայերի, որոնց մեջ շատ վիրավորներ կային: Այդտեղից ես իջա Ենի-Չարչի և Թոփխանե, որտեղ արդեն սկսվել էր գերիների շարդը, որի մասին վկայում էին փողոցում թափված,

սոսկալի այլանդակված դիակները, բայց թալան դեռ չէր սկսվել: Առափնյա փողոցում ամեն ինչ խաղաղ էր, բայց զուգահեռ փողոցներում տեղի էր ունենում կոտորած, ընդ որում լավում էին նաև կրակոցներ: Թունելից դեպի կամուրջը տանող փողոցում ես նորից տեսա փախչող հայերի, որոնց հետապնդում էր ամբոխը: Ստամբուլում, կամուրջի մոտ, ես տեսա ինչպես սպանեցին մի քանի հայի: Ոստիկանության միևնույն ուղում էր ինձ հավատացնել, որ բանկի մոտ խաղաղ չէ, իսկ մյուս բոլոր տեղերում ոչինչ չկա, որ ինքը կարգադրություն է արել ամենուրեք զորքեր ուղարկվեն անկարգությունները կանխելու համար: Երբ ես նրան մատնանշեցի այն, ինչ տեղի էր ունենում կամուրջի, թունելի մոտ և մյուս տեղերում, նա ձեռքերից, որ այդ մասին ոչինչ չգիտի և իրար անցավ, հրամաններ տվեց զորք ուղարկելու, որն իրականում ուղարկվեց շատ ուշ: Ստամբուլից վերադառնալիս ես Թոփխանեում և Ենի-Չարչիում հանդիպեցի շարդի ու թալանի եռուն շրջանին. մինչև 20 ոստիկան հանգիստ դիտում էին տեղի ունեցող դեպքերը: Ինձ զարմացրեց նաև այն, որ ամբոխը բոլորովին ազատ կերպով ճանապարհ էր տալիս եվրոպացիներին, չդիպչելով նրանց, չնայած որ ուղղակի խցկվելով պետք է անցնեին ամբոխի միջով: Կալաթա-Սերայից դեպի դեսպանատուն գնալիս ես տեսա, թե ինչպես մի ոստիկան 2 թուրքի մահակներ տվեց և ցույց տվեց դեպի ներքև»:

«Դիտելով հաս-Քյոյ արվարձանը ես գտա հետևյալը.—
...հաս-Քյոյում հաշվվում է մոտավորապես 900 տուն հայ, որոնցից միայն ինը տուն թալանի չի ենթարկվել, իսկ մնացածը մաքուր թալանված են, այնպես որ տառացի ոչինչ չի մնացել... սպանված են 430 մարդ, վիրավորված՝ 60-ը: Նավաստիները Դելի-Մեհմեդ փաշայի գլխավորությամբ այդտեղ են եկել 14-ին (հ. տ.) ցերեկվա ժամը 3-ին (թուրք. ժամ) և դիտում էին անկարգությունները: Մյուս գրքերը եկել էին 15-ին՝ մոտավորապես երեկոյան ժամը 10-ին (թուրք. ժամ)...»:

Մի ուրիշ ականատես՝ Օ. Կայդանովան, իր նամակում գրում է՝ «Օգոստոսի 14-ին և 15-ին (հ. տ., 1896 թ.) մենք կանգ-

նած էինք Կ. Պոլսում. մենք հարկադրված եղանք վկա լինել թուրքերի կողմից հայերի ջարդերին: Մեր տեսած սարսափելի պատկերները այժմ էլ շին հեռանում մեր աչքերի առաջից: Գծվար է հավատալ, որ այդ ամենը իսկապես եղել է, որ մենք այդ բոլոր սարսափները երազում չենք տեսել: Մեր նավը կանգնել էր նավահանգստում... Մինչև ժամը 2-ը մենք դեռ ոչինչ չգիտեինք սկսված խառնակության մասին, հանգիստ գրուցում էինք: Հանկարծ... այդ մոմենտը առանձնապես մեխվել է իմ հիշողության մեջ—առափնյա փողոցում լավեց մի սոսկալի, ինչ-որ աղիողորմ աղերսական, երկար ու բարձր ճշոց, փակ դրանից հետո անմիջապես ատրճանակի մի քանի կրակոց. արագ, վայրկենաբար երևացին մի քանի դեմքեր, առջևից մեկը վազում էր օրորվելով, ուժասպառ: Նրան հետապնդում էին մոտ տասը մարդ. այդ ամենը տեղի ունեցավ մի ինչ-որ ակնթարթում և անմիջապես հետո մենք տեսանք վազողի փոված դիակը առափնյա փողոցում: Դա օրավարձու հայերից մեկն էր, որը աշխատում էր նավահանգստի բեռնակիր նավակների մոտ... Բոլորս վազեցինք դեպի նավակողը, որտեղ ականատես եղանք հետևյալ պատկերին: Հենց այն տեղի դիմաց, որտեղ կանգ էր առել մեր նավը, գտնվում էր մի մեծ սևացած շենք, որտեղ ապրում էին հայ բանվորներ, մեծ մասամբ զանազան վայրերից եկած, որոնք զբաղվում էին նավահանգստում օրավարձու աշխատանքով՝ բեռնանավակներն ու նավերը բարձելով, իրեր տեղափոխելով և այլն: Նրանցից շատերը այդ ժամանակ աշխատում էին նավահանգստում, շատերն էլ գտնվում էին շենքում, դեպի որը շարժվում էր թուրքերի մի ամբողջ՝ զինված մահակներով և սրերով: Նավահանգստում աշխատող հայերին ակնթարթաբար տեղնուտեղը սպանեցին՝ մահակներով մի քանի հարված հասցնելով գլուխներին. ցատկելով դիակների վրայով, հետապնդողները հարձակվեցին բանվորների տան վրա. առջևից գնացողները սանդուխներով բարձրացան և պատուհաններից ներս մտան, մնացած ամբոխը կանգ առավ ներքևում. բոպեաբար աղաղակը հանդարտվեց, լավում էր մի

ինչ-որ ոռնոց. ահա պատուհաններում երևացին թուրքերը, որոնք քարշ էին տալիս տանը գտած հայերին, դժվար էր որոշել սպանված էին, թե կիսամահ: Նրանք վերևից նետում էին ամբոխին, որը նրանց ջարդում, փողոցով քարշ էր տալիս և ոտքերի տակ տրորում. տեսարանը այն աստիճան զզվելի, սոսկալի էր, որ անհնարին էր նայել: Մարդ ուզում էր այդ տեսարանից հեռու փախչել, բայց դրա հետ միասին այդ անել անհնարին էր, որովհետև սարսափից արյուններս ուղղակի սառել էր և մի ինչ-որ բան ստիպում էր հետևել դժբախտ դոճերին մի ինչ-որ հույսով... Մի հրաշքով չե՞ն փրկվի արդյոք նրանք: Ահա նրանցից մեկը՝ կապույտ կարկատած արխալուղով մի օրավարձու, գլխին սպիտակ թաշկինակ կապած, փախչում էր փողոցով. մի ակնթարթ մեր աչքին երևաց նրա մահացու-սփրթնած դեմքը. նրա հետևից հասան, գետին գլորեցին, նրա անշարժ դիրքից երևում էր, որ կյանքի նշույլ չէր մնացել—ընկած էր փողոցի մեջտեղը երեսը դեպի վեր, ձեռքերը պարզած երկու կողմը. մոտից անցնող թուրքը աբացի տվեց մահացածի ուղղակի երեսին, իսկ մյուսը ծակեց իր սրով: Այդ բոլորը կատարվեց արտակարգորեն արագ. չէր լավում մահացողների ոչ մի ճիշ, ոչ մի հառաչանք: Նրանց խորձերի պես լցնում էին սայլերը՝ մեկը մյուսի վրա: Երբ փոքր-ինչ ուշքներս հավաքեցինք, տեսանք, որ նրբանցքից դուրս եկան հսկայական սայլեր՝ գլխեզլուխ բեռնված սպանվածների դիակներով. նրանցից ոմանք կարծես շարժվում էին... Սայլերն ուղեկցում էին ոստիկանները...»:

Նամակի ականատես հեղինակը, բերելով բազմաթիվ փաստեր Կ. Պոլսի այդ նավահանգստում կենտրոնացած հայ օրավարձու բանվորների քստմանելի կոտորածի մասին, գրում է՝ «Առանձնապես տարօրինակ տպավորություն էր թողնում այն հանգամանքը, որ հենց այդտեղ՝ մարդկանց գլխովին ոչնչացնելու տեսարանի առաջ, ափի երկարությամբ և նեղուցում կանգնած էին վիթխարի նավեր՝ եվրոպական բոլոր տեղությունների ներկայացուցիչներ... Դա մարտ չէր, ոչ էլ պատերազմ կամ ապստամբության ճնշում, այլ պարզապես ինչ-

որ մի զգվելի գլխովին մասսայական կոտորած, մարդկանց որս...»¹:

Ճրանսիացի Վիկտոր Բերարը շատ մանրամասն նկարագրում է ջարդերը Կ. Պոլսի արվարձան Խաս-Քյոյում, որտեղ կենտրոնացած էր մինչև հինգ հարյուր հայ արհեստավորների ընտանիք: Նրա նկարագրած դեպքերը հարևանս են Օ. Կայ-դանովայի վերոհիշյալ նկարագրություններին, ուստի դրանց վրա մենք կանգ չենք առնում, սակայն անհրաժեշտ ենք գտնում բերել մի քանի ընդհանուր բնույթ ունեցող վկայություններ: Նա գրում է՝ «Ոչ մի հույն, ոչ մի հույնի տուն, ոչ մի հույնի խանութի ցուցափեղկ չէր վնասվել, և այդ իսկական հրաշք է թվում այս Խաս-Քյոյ նավահանգստում, որտեղ հույների և հայերի կրպակներն ու տները այնպես խառն էին, որ չէր կարելի նրանց իրարից տարբերել»: Բերարը, պատմելով իր գրույցը Խաս-Քյոյի կենդանի մնացած մի քանի հայ տղամարդկանց հետ, գրում է՝ «Քահանայի սենյակում նստած էին 10—12 մարդ՝ այն բոլորը, ինչ կենդանի էր մնացել այդ թաղամասի հայ տղամարդկանցից: Նրանք խուսափել էին ընդհանուր կոտորածից: Մեկը աշխատում էր Բերայի մի եվրոպացու տանը. նրան հրեք օր թողել էին իրենց մոտ: Մի ուրիշը զնացած է եղել Կադի-Քյոյ և նրան թաքցրել է ալբանացի մի մահմեդական:

— Իսկ դո՞ւ:

— Ե՛ս, ես զնացել էի Ատամբուլ, տարել էի կարած կոշիկները, ես կոշկակար եմ: Փողն ստանալով, վերադառնում էի: Մենք հրեք հայ էինք նավակում, որտեղ հրեք էլ թուրք նավակավարներ էին: Թուրքերը մեզ ասացին՝ «այսօր տուն չգնաք, ահա արդեն մի ժամ է, ինչ Խաս-Քյոյում հայերին կոտորում են»: Մենք խնդրեցինք նրանց մեզ տանել էյուր...

էյուրը մահմեդականների թաղամաս է Ոսկեղջյուրի մյուս ափին և Կ. Պոլսում համարվում է ֆանատիկոսության կենտրոն: Նրա մզկիթում, որն անմատչելի է գյավուրների համար, պահվում է մարգարեի թուրը, և ամեն մի նոր սուլ-

թան, գահ բարձրանալիս, գոտևորվում է այդ թրով: Ուստի մեզ համար տարօրինակ էր այդ հրեք հայերի մտադրությունը ջարդի ժամանակ այդպիսի ապաստարան ընտրելու վերաբերյալ: Բայց հայը շարունակեց.

— Մենք էյուր ուղևորվեցինք Ֆեհմի փաշայի մոտ: Նա շատ բարեպաշտ ծերունի է, որին սուլթանը չի սիրում և որը ցանկանում է մահանալ էյուրում, որպեսզի թաղվի մզկիթի մոտ: Ամբողջ տարին Ֆեհմին ասում էր հայերին՝ «Եկեք ինձ մոտ փրկվելու» (որովհետև ահա մի տարի է, ինչ բոլորը գիտեն, որ մեզ կոտորելու են): Ահա և մենք թաքնվեցինք նրա տանը: Բայց տունը փոքր և արդեն լիքն էր: Նա մեզ ուղեկցեց մզկիթ և ասաց մուլլային. «Վերցրու այս մարդկանց և փրկիր»: Մուլլան մեզ բակ տարավ: Հարյուրից ավելի էինք: Մեզ համար խափրներ և ջրամաններ բերին, և մենք 4 օր այդտեղ մնացինք: Ամեն օր, առավոտյան և երեկոյան, թաղի թուրքերը մեզ համար ուտելիք էին բերում: Երկրորդ օրը զինվորների և ոստիկանների հետ եկան մարդասպանները: Նրանք ուզում էին ներս մտնել բակը և ասում էին՝ «Միապետը թույլ է տվել հայերին կոտորել»: Մուլլան, կանգնած դռների մոտ, պատասխանում էր. «Ես չգիտեմ ինչ է ձեզ թույլ տվել միապետը: Բայց մարգարեն, որը հրամայել է կռապաշտներին կոտորել, արգելում է կոտորել գրեթե մարդկանց: Սրանք քրիստոնյաներ են, և դուք չպետք է նրանց կոտորեք, և սոֆթաներն ու մյուս մուլլաները նրանց ներս չթողին: Բայց նրանք անթիվ էին, և հետևում գտնվողները մահակները բարձրացրած գոշում և մյուսներին հրում էին: Այդ ժամանակ պաշտոնական հագուստով մի ոստիկան, որ բոլորից առաջ էր, գոչեց՝ «Յասակ, յասակ», այսինքն՝ «արգելվում է, արգելվում է», և նրանք հեռացան և նույնիսկ հայերի խանութները չկողոպտեցին...»:

«Խուժանը, բացի մահակներից, ուրիշ զենք չունեիր, բայց դրանք միևնույն ձևը և միևնույն երկարություն ունեին. ենթադրում են, որ դրանք պատրաստված էին հատկապես այդ գործի (ջարդերի. — Ս. Մ.) համար նավագնացության արհեստանոցներում, և հայտնի է, որ դրանից շատ օրեր առաջ բաշխված էին տարբեր ոստիկանական կետերին, որովհետև

¹ «Братская помощь армянам», II, стр. 75—79.

իշխանութիւնները նախագրուչացված էին և սպասում էին հայ հեղափոխականների կողմից ապստամբութեան...»:

«4. Պոլսի կոտորածները, — գրում է Վիկտոր Բերարը, — ֆանատիկոսութեան բռնկում չէին... Առաջին անգամ, 1895 թվականի հոկտեմբերին, սոֆթաները (աստվածաբանութեան ուսանողները) և մեդիսիսների մարդիկ մասնակցում էին Ստամբուլի ընդհարումներին: Իսկ 1896 թվականին, որոշ մարդկանց հավաստիացումով, նրանք փակված էին մզկիթներում և գտնվում էին ոստիկանութեան հսկողութեան տակ. այժմ սուլթանը նրանց չի վստահում և վախենում է, որ նրանք, ազատութեան մեջ լինելով, կարող են շարժվել պալատի դեմ: Ես լսել եմ նաև, որ սուլթանի ազենաների հրավերին՝ մասնակցելու կոտորածին, նրանք հրաժարվել են օժանդակել: Այդ փրկու բացատրություններն էլ հնարավոր են: Բայց մի բան հավաստի է, որ նրանք 1895 թվականին գործում էին, իսկ 1896 թվականին ձեռնպահ մնացին: Հավաստի է նաև այն, որ հարյուրավոր հայերի փրկեցին մզկիթների մարդիկ:

Մյուս կողմից, այդ կոտորածների մեջ որևէ ժողովրդական շարժում չկար: Ամեն ինչ պատրաստված էր նախապես՝ մարդասպանները, մահակները, լրտեսները և սայլերը: Բոլորը շարժվում էին և բոլորը կանգ էին առնում առանձին նշանով... Առնվազն 6—7 հազար գոհերից հազիվ 30—40-ը հույն, թուրք կամ եվրոպացիներ էին, որոնց շահագանց նմանութեան պատճառով հայի տեղ էին դրել»:

Կոտորածներից որոշ ժամանակ անց Վիկտոր Բերարը անցնում էր մի շենքի մոտից, որի ներքևի հարկում հայ աշակերտուհիները դասի նստած խմբովին կրկնում էին ֆրանսերենի ուսուցչուհու բառերը: Հեղինակն այսպես է վերջացնում իր աշխատութեան այդ գլուխը.

«Սովորեցեք ֆրանսերեն, փոքրիկ հայ աղջիկներ: Ձեր հայրերը արդեն սովորել էին մեր լեզուն: Երբ իրականութեանը նրանց խիստ դաժան էր թվում, նրանք իրենց հայացքը ուղղում էին դեպի Ֆրանսիա, իսկ մենք առանց մի խոսքի, առանց ափսոսանքի որևէ շարժման թույլ տվինք կոտորելու ձեր հայրերին»:

Սուլթանական կառավարությունը հայ ժողովրդին կոտորելու իր ճիվաղային քաղաքականությունն իրագործելու համար առաջին հերթին առաջ էր քաշում թուրք խուժանին, որի բնութագիրը հիանալի կերպով տվել է Կ. Մարքսը: «Թուրք բնակչության գլխավոր ուժը եվրոպայում... Կ. Պոլսի և մի քանի ուրիշ քաղաքների խուժանն է: Նա առավելապես թուրքական ծագում ունի և, շնայած որ նրան աշխատանք տվողները գլխավորապես քրիստոնյա կապիտալիստներն են, նա այնուամենայնիվ համառորեն պաշտպանում է իր երևակայական առավելությունը և տրադիցիոն արտոնությունը՝ անպատիժ էքսցեսներ կատարել քրիստոնյաների նկատմամբ: Այդ այն խուժանն է, որին պետական ամեն մի հեղաշրջման դեպքում անհրաժեշտ է վաշտառելու և շողոքորթելու միջոցով իր կողմը գրավել: Հենց նա էլ կազմում է թուրք բնակչության գլխավոր զանգվածը եվրոպայում: Եվ վաղ թե ուշ բացարձակ անհրաժեշտություն կզգացվի մեր մայրցամաքի ամենահիասքանչ մասերից մեկը ազատել խուժանի տիրապետությունից, խուժան, որի հետ համեմատած հոմանիստական կայսրության ժամանակների խուժանը իմաստունների և հերոսների հավաքածու էր հանդիսանում»¹:

Մենք վերևում հատկապես նշեցինք այն իրողությունը, որ թուրքական կառավարությունը, որպեսզի հիմնավորի իր ոճրագործությունները հայ ժողովրդի նկատմամբ, ամեն միջոց ձեռք էր առնում եվրոպական դիվանագիտությանը համոզելու, որ ձեռնարկումներն ուղղված են ոչ թե հայ ժողովրդի, այլ նրա մեջ բուն դրած հեղափոխական և ապստամբական շարժումների դեմ: Նա աշխատում էր գործը այնպես պատկերել, որ իբր թե հայ ժողովուրդը գլխովին զինված ու կազմակերպված է հեղափոխական ապստամբության համար, նպատակ ունենալով ստեղծել մի անկախ «Մեծ Հայաստան», որը կազմված պետք է լիներ Թուրքիայի, Ռուսաստանի և Պարսկաստանի հայաբնակ շրջաններից:

Մենք աշխատեցինք ցույց տալ, որ թուրքիայում տեղի

¹ К. Маркс и Ф. Энгельс, Сочинения, т. IX, стр. 374—375.

ունեցած կոտորածները ոչ մի անշուքյուն չունենին այդպիսի քաղաքական նպատակների հետ:

Ամփոփելով մեր տրամադրության տակ եղած ինչպես տպագիր, այնպես էլ արխիվային փաստաթղթերը, մենք գալիս ենք այն եզրակացության, որ 1894—96 թվականներին Քուրֆայում կատարված հայկական կոտորածների կազմակերպողը բուրժուական պետությունն էր, որին ամեն գնով պաշտպանում էին իմպերիալիստական պետությունները՝ status quo-ն պահպանելու նպատակով: Միակ ապստամբությունը, որ այդ ժամանակ տեղի էր ունեցել հայկական վիլայեթներում, դա Սասունի ապստամբությունն էր: Բայր կոտորածների մեջ հիմնական դերը կատարել է բուրժուական կառավարության պրովոկացիան, որի նպատակն է եղել հայկական վիլայեթներում վերացնել հայ բնակչությունը, որպեսզի վերանա Բեռլինի տրակտատով նախատեսված ռեֆորմների անհրաժեշտությունը:

Հ Ի ն գ Ե ր ո ղ Գ յ ու ի խ

ԱՆԳԼԻԱՅԻ ԵՎ ՅԱՐԱԿԱՆ ՌՈՒՍԱՍՏԱՆԻ ՀԱԿԱՍՈՒԹՅՈՒՆՆԵՐԻ ԱՆԴՐԱԴԱՐՁՈՒՄԸ ՀԱՅԿԱԿԱՆ ԿՈՏՈՐԱԾՆԵՐԻ ՎՐԱ

Հայկական կոտորածներն արգարացնելու նպատակով անգլո-ռուսական հակասությունների օգտագործումը Քուրֆայի կողմից:— Գնդապետ Պուտյատայի գործուղումն Անատոլիա:— Հայերի դանգատների անհիմն լինելը և հայկական շարժման «բնական-տնտեսական» պատճառների բացակայությունն ըստ Պուտյատայի:— Հայկական շարժումների մասին Քուրֆայի ստահոգ հերյուրանքները և դրանց որդեգրումը ցարական բյուրոկրատիայի կողմից:— Հայկական թագավորությունն ստեղծելու միտումների մասին հեքիաթը:— Հեղափոխական ելույթների նյութական հնարավորության բացակայությունը հայերի համար:— Հայկական հարցը որպես պահեստի հարց Քուրֆայի գործերին միջամտելու:— Հայկական հարցի և նեղուցների հարցի կապը:— Հայկական հարցում սանկցիայի բացակայությունը որպես անգլիական քաղաքականության արդյունք:— Կիպրոսի վերաբերյալ անգլո-թուրքական կոնվենցիան որպես Քուրֆայի ոճրագործությունների պաշտպանելու երաշխիք:— Անգլիայի արևելյան քաղաքականությունը որպես «հայերի համար դժոխքից դուրս գալու ելքի փակում»:— Հայկական հարցի ազգային և միջազգային բնույթը ըստ ցարական դիվանագիտության:— Անգլո-ռուսական հակամարտությունն Արևելքում և դրա անդրադարձումը հայկական կոտորածներում:— Հայկական արտոնյալ պրովինցիա՝ հասկացության հորինումը:— Կրանանի օրգանական ստատուտը և հայկական ռեֆորմների հարցը:— Հայկական հարցի լուծման վերաբերյալ գեներալ Ջեյկոնի դեղատոմսը որպես հայերի բնաշնչման միջոց:— Հայկական վի-

լայնեցողութեան քաղաքական քաղաքականութեան մեջ հայերի տեսակարար կշիռն ին-
քազարարութեամբ թուրքական կառավարութեան կողմից:—Թուր-
քական կեղծ «վիճակագրութեան» որոնքումը ցարական դի-
վանագրութեան կողմից՝ հայկական հարցն ըստ ցարիզմի
հեռանկարների օգտագործելու համար: Նստակայաց և քոչվոր
քրդերի հարցը ռեֆորմների տեսակետից:— Ռուսական առա-
ջադեմ հրապարակախոսութիւնը որպէս հակադրութիւն ցա-
րիզմի հայահայած քաղաքականութեան:

Ինչպէս հայտնի է, սկսած XIX դարի վերջին քառորդից
իմպերիալիստական պետութիւնների հակասութիւնները գա-
ղութատիրական հարցի շուրջը ավելի ու ավելի էին սրվում:
1882 թվականին եռյակ դաշնակցութեան կազմվելը (Գերմա-
նիա, Ավստրիա, Իտալիա), իսկ 1891—1893 թվականների
Ֆրանս-ռուսական ռազմական կոնվենցիան, ինչպէս և Անգ-
լիայի կողմից որդեգրված «փայլուն մեկուսութեան» քաղա-
քականութիւնը¹, իրենց անդրադարձումն էին ունենում նաև
թուրքական գործերում: Հատկապէս դրանք չէին կարող շար-
տահայտվել 90-ական թվականներին Արևմտյան Հայաստա-
նում կատարվող արյունալի իրադարձութիւնների վրա: Այդ
ժամանակ Արևելյան հարցի վերաբերյալ առանձնապէս սուր
բնույթ էին ստացել անգլո-ռուսական հակասութիւնները:
Թուրքիան, բազմաթիւ ինքնուրույն ինչպէս իմպերիալիստական
պետութիւնների ընդհանուր հակասութիւններին, այնպէս էլ
անգլո-ռուսական հակամարտութեանը, ամեն կերպ ջանում
էր օգտագործել դրանք իր կոնկրետ նպատակների համար,
որոնց մեջ իր տեղն էր գրավում նաև Հայաստանը հայերից
մաքրելու քաղաքականութիւնը:

Սասունի կոտորածները մեծ հուզում էին առաջացրել ամ-
բողջ քաղաքակիրթ աշխարհում: Սուլթան Աբդուլ Համիդը ի

¹ Անգլիայի «փայլուն մեկուսութեան» քաղաքականութեան էությունը
տարբեր պետութիւնների միջև հակասութիւնների սրելը և դրանից Անգ-
լիայի համար օգուտ բաղելն էր, որ առանձնապէս համառորեն կիրառում
էր Սուլթանին XIX դարի 90-ական թվականներին: Այդ քաղաքականու-
թեան էությունը այսպէս է ձևակերպել Պալմերստոնը. «Մենք մշտական
թշնամի և մշտական բարեկամ չունենք: Մենք մշտական, հավիտենական
շահեր ունենք, որոնց միշտ պետք է հետամուտ լինենք»:

լուր աշխարհի հայտարարել էր, որ թուրքական կառավարու-
թիւնը հարկադրված է եղել այդ «խիստ» միջոցառումներին
դիմելու ինքնապաշտպանութեան նպատակով՝ ընդհանուր
հայկական հեղափոխութիւնը կասեցնելու համար: Որպէսզի
անգլո-ռուսական հակասութիւնները դրական արտահայտու-
թիւն գտնեն հայկական շարդերն արդարացնելու գործում,
Աբդուլ Համիդը իր հատուկ ներկայացուցչին ուղարկում է
ռուսական դեսպանի մոտ և առաջին հայացքից մի շատ
տարօրինակ առաջարկ է անում, որի մասին այնպիսի փորձ-
ված դիվանագետ, ինչպիսին Նելիդովն էր, գրում է՝ «Աբդուլ
Համիդի մտադրութիւնն ինձ համար պարզ չէ»: Բանից դուրս
է գալիս, որ Աբդուլ Համիդը ցարական կառավարութեա-
նը առաջարկում է ծպտյալ կերպով հատուկ քարձրատտի-
ճան սպա ուղարկել Թուրքիա՝ դիտելու փորձասիական վի-
լայեթները, այսինքն՝ ինքը կամովին հնարավորութիւն է
ստեղծում ռազմական տեսակետից ուսումնասիրելու Ռուսաս-
տանի սահմանամերձ վիլայեթները: Ահա իսկ, այս էր, որ
տարակուսանք էր առաջացնում ցարական դիվանագետի
մեջ: Նելիդովն իր հույժ գաղտնի գրութեան մեջ գրում է ար-
տաքին գործերի մինիստրին. «Ես չեմ կասկածում, երբ մեզ
մոտ որոշվի մեկին ուղարկել, սուլթանի մեջ նորից կասկած-
ներ կառաջանան, բայց եթէ պատասխանը շուտ հետևի և
ճանապարհորդութեան մանրամասնութիւնների մասին ան-
միջապէս բանակցութիւններ սկսվեն, ապա, կարծում եմ,
որ ամեն մի խոշընդոտ կարելի կլինի վերացնել»¹:

Եթէ Նելիդովի համար տարակուսանք էր առաջանում
հարցը ռազմական տեսակետից ուսումնասիրելու հնարավո-
րութեան վերաբերյալ, ապա, մյուս կողմից, նա համոզված
էր, որ քաղաքական իրադրութիւնն այնպիսին է, որ Թուր-
քիան հարկադրված էր այդ քայլին դիմելու՝ հայկական կո-
տորածների խնդրում ցարիզմի համակրութեանն իր կողմն
ունենալու համար: Նելիդովի ասելով, թուրքական կառավա-
րութիւնը ցանկանում էր ուսմանը տեղնուտեղը ցույց տալ
այն «ինտրիգները», որ ստեղծում են անգլո-ամերիկյան ա-

¹ АВПР. ф. Политархив, д. № 3439, лл. 4—6.

գեներները և դրանով հիմնավորել հայկական կոտորածների շուրջն ստեղծված աղմուկը: «Ինձ արված այդ հաղորդմանը, թվում է, առիթ են ծառայել,— գրում է Նելիդովը,— գավառից ստացված զեկուցագրերը օտարերկրյա պրոպագանդիստական գործունեության ուժեղանալու մասին, որով հայերին, հույներին, ասորիներին և ուրիշներին անջատում են տեղական կրոններից, նրանց ենթարկում են օտար հոգևորականությանը, իսկ այնուհետև օտարերկրյա կառավարության հովանավորությանը: Հայկական հարցում շատ նկատելի մասնակցություն են ունենում անգլիական և ամերիկյան քարոզիչները, և սուլթանը ցանկանում է նրանց գործունեությունը սահմանափակելու համար ստանալ մեր երաշխավորությունը...»: Ի միջի այլոց Նելիդովն իր զեկուցագրում ընդգծում է՝ սուլթանի նպատակն է, որ ցարական կառավարությունը հենց տեղում համոզվի, թե «ինչքան ուժեղ են այնտեղ օտարազավան և օտարերկրյա ինտրիգները, թե ինչքան ճշուղավորված է հայկական հեղափոխական շարժումը և ինչպես փորվում է իր օրինական իշխանության հիմքերը... Ռուսաստանը չի կարող անտարբեր վերաբերվել իր սահմաններին մոտիկ օտարերկրյա և օտարազավան ազդեցություն հաստատվելու վրա, — ասաց ինձ Աբդուլ Համիդի ներկայացուցիչը...»:

Այդ հանգամանքը ցարական կառավարության համար փառահեղ առիթ էր. օգտագործելով հայկական հարցը, ռազմական տեսակետից հետախուզելու երկրի ներսը: Նելիդովը գրում է՝ «Գիտենալով, թե մեր գերագույն շտաբի սպաների համար ինչպիսի դժվարությունների հետ է կապված Ասիական թուրքիայում ճանապարհորդելը, որ այնքան կարևոր է ռազմական տեսակետից, մինչդեռ դրանով հնարավորություն կստեղծվի բոլոր ուղղություններով ճանապարհորդություն կատարել, ես մեծապես իմ պարտքը համարեցի այդ մասին հաղորդել ձերդ պայծառափայլությանը»:

Ցարական Ռուսաստանի արտաքին գրծերի մինիստրությունը, շտապ կերպով համաձայնության գալով ռազմական մինիստրության հետ, Անատոլիա է գործուղում գերագույն շտաբի գնդապետ Պուտյատային՝ ֆիզիկական աշխարհագրության դասախոս Վասիլևի անվամբ կեղծ փաստաթղթե-

րով: Չնայած այն բոլոր ջանքերին, որ աշխատում էին աշխարհագետ Վասիլևի անձնավորության իսկույթունը հայտնի չդառնա, այնուամենայնիվ հենց Պուտյատայի խոստովանությունամբ նրա ով լինելը հայտնի էր թուրքական բարձր իշխանություններին և հատկապես Ջեթի փաշային, որոնցից էլ նա տեղեկություններ էր քաղում իր քաղաքական միսիայի համար:

Ուշագրավ է, որ չնայած Պուտյատան բույսեր հավաքելու պատրվակով շրջում է ամբողջ Անատոլիան, որտեղ հետախուզում է իրեն հետաքրքրող ռազմական նշանակություն ունեցող տվյալները, թուրքական իշխանությունները նրան հնարավորություն չեն տալիս ծանոթանալու միայն մի կազայի հետ, այն է՝ Սասունի, որտեղ տեղի էին ունեցել կոտորածները և նրա քաղաքական միսիայի համար հիմնական վայրն էր հանդիսանում: «Մուշ քաղաքում,— գրում է նա,— Սասուն մտնելու իմ մտադրությունը ձախողվեց, պատրվակ բերվելով, որ այնտեղ տարվա ուշ ժամանակի պատճառով բույսեր հավաքելու համար նպաստավոր չէ... Ես չպնդեցի, բայց մուտեսարիֆի խոսքերում նկատեցի, որ թուրքական կառավարության համար անցանկալի է թողնել ինձ Սասուն մտնել, և որ նա, իհարկե, այդ առումով հատուկ հրահանգ ունի: Մնացած մյուս շրջաններում թուրքական իշխանություններն ինձ լիակատար աջակցություն էին ցույց տալիս»¹:

Պետք է նկատի ունենալ, որ Պուտյատայի ճանապարհորդությունը կատարվում էր 1895 թվականի ամռանը, այսինքն՝ Սասունի կոտորածներից հետո և մնացած շրջանների ջարդերից առաջ: Եվ, չնայած թուրքական իշխանությունների կողմից նրան ցույց տված «լիակատար աջակցությանը», նա որևէ շոշափելի տեղեկություններ չի կարողանում քաղել հայերի ոչ դավանափոխության, ոչ էլ հեղափոխական շարժման մեծ ծավալ ընդունած լինելու մասին: Մինչդեռ, ինչպես վերևում տեսանք, հենց այդ նպատակով էր Աբդուլ Համիդը դիմել ցարական իշխանություններին բարձրաստիճան

¹ АВПР. ф. Политархив, д. № 3439, лл. 30—37.

սպա գործուղելու համար: Նրա երեք զեկուցագրերում այդ առումով միայն մի շնչին փաստ կա, որից անում է ճիշտ այնպիսի ահեղադրող եզրակացություն, ինչպիսին ի լուր աշխարհի հայտարարում էին թուրքական իշխանությունները: «Սասունի ինցիդենտը կրկնվելու փորձ ձեռնարկվել է այս դարնանը,— գրում է Պուտյատան:— Պարսկաստանի կողմից Վանի վիլայեթն է մտել 15 հոգուց կազմված մի հրոսակախումբ, իրեն անգլիացի ձեռնառնող մի անձնավորության առաջնորդությամբ: Փորձը չի հաջողվել, հրոսակախումբը ձերբակալվել է Վանի շրջակայքում և նրա առաջնորդն ուղարկվել է Կ. Պոլիս: Մեզ բացատրեցին (անկասկած թուրքական իշխանությունները.—Ս. Մ.), որ նա անգլիացի: չի եղել, այլ Հովհաննիսյան ազգանունով ախալցխացի մի հայ, որը տիրապետում էր ինը լեզվի: Հայաստանում նրա հանդես գալու նպատակն այն է եղել, որ թուրքերի կողմից առաջացնի նոր ռեպրեսիաներ, հույս տածելով եվրոպական տերությունների պաշտպանության վրա»:

Ուշագրավ է, որ այդ զավեշտական մեկնաբանությունը, որ անտարակույս բխում էր սուլթանական աղբյուրներից, նա տալիս է նաև Սասունի կոտորածներին: «Սասունի պատմության մեջ իր վրա ուշադրություն է գրավում այն փաստը, որ խոտվությունների (իմա՝ կոտորածների.—Ս. Մ.) պատճառ են ծառայել,— գրում է Պուտյատան,—ինչպես այդ դրականորեն պարզվել է (ընդգծ. մերն է.—Ս. Մ.), հայ ազիտատորները, որոնք իրենց կազմակերպված հրոսակախմբերով քուրդ բնակչությանը հարկադրել են անկարգության դիմել, այն հաշվով, որ ինչպես վերջինները, այնպես էլ թուրքական իշխանությունները դիմեն դաժան միջոցների և դրանով իսկ գրավեն եվրոպական տերությունների ուշադրությունը, որոնք հանդես կգան պաշտպանելու հայերին»:

Որ այս բացատրությունը նույնն էր, ինչ որ մամուլում հրապարակել էր սուլթանական կառավարությունը, այդ մասին հազիվ թե երկու կարծիք լինի: Մինչդեռ մի այլ ցարական բարձր աստիճանավոր՝ Ժաղովսկին, որը հիանալի տեղյակ էր իրերի դրությունը իբրև թուրքիայում գործող հավատարմատար, իր զեկուցագրերից մեկում, անդրադառնալով

այդ հարցին, գրում է՝ «Հայերի դեմ գործադրված վրդովեցուցիչ ռազմական միջոցառումների մանրամասնությունները թափանցեցին եվրոպական մամուլի մեջ և ամենուրեք մերկացնող հողավածների փոթորիկ բարձրացրին Հայաստանի բրիտանյա բնակչության նկատմամբ թուրքերի գազանային արարքների դեմ: Այդ պախարակումների անամոթ և ստահող հերքումը, որ մոտ օրերս սուլթանի անձնական հրամանով հեռագրով ուղարկվել է արտասահմանի թուրքական ներկայացուցիչներին հրապարակելու համար, չկարողացավ ցանկալի տպավորություն թողնել Եվրոպայի հասարակական կարծիքի վրա և կանգնեցնել մեղադրանքների ու մերկացումների տարափը, որը վերջին օրերս Բ. Գուանն ստիպեց արգելելու օտարերկրյա գրեթե բոլոր լրագրերի մուտքը թուրքիա»:

Այն, ինչ որ ասում էր Ժաղովսկին, դա մի անհատի կարծիք չէր: Ինչպես մենք տեսանք, այդ նույն բանը վկայում էին անխտիր բոլոր պաշտոնական և անպաշտոն, մասնավոր տեղեկությունները: Վերջապես, այդ նույն բանը արձանագրում էին եվրոպական պետությունների դիտորդ-դեղեզատները, որոնք անհերքելիորեն ցույց տվին, որ կոտորածներն իրականում կանխամտածված էին և դրանց համար առիթ էին ծառայել հարկերի անասելի ծանրությունը և կառավարական պրովոկացիան: Հետևաբար, այն, ինչ որ ցարական գնդապետը «դրականորեն պարզված» է համարում, այդ «անամոթ և ստահող» հերյուրանքն էր, որ ստեղծվել էր Յելդ-Քյոշքում և Պուտյատային մատակարարել էին Ձեքի փաշան ու նրա արքայականները:

Այժմ դառնանք ցարական բարձրաստիճան սպայի մի այլ դիտողությանը, որը նույնպես հույժ կարևոր է պարզելու, թե ինչպես կարելի է ակնառու փաստերից միանգամայն հակառակ ու անտրամաբանական եզրակացության հանգել:

«Ամբողջ անցած երկիրը արտաքուստ հանգիստ է թվում, բայց ինչպես քուրդ, այնպես էլ հայ բնակչությունը գտնվում է գրգռված վիճակում... Ընդհանրապես այն տպավորությունն է ստացվում, որ Սասունի կոտորածների կրկնումը

այժմ ևս հնարավոր է», ընդ որում, Պուտյատայի կարծիքով, դրան պատճառ են ծառայում հենց իրենք՝ հայերը: Այնուհանդերձ նա հարկադրված է արձանագրել, որ հայերի մոտ «ճիշտ է, զենք շատ քիչ կա»: Այսպիսով, երկրում կատարած իր դիտումներից նա եզրակացնում էր, որ շնայած հայերը զենք շատ քիչ ունեին, իսկ քրդերը գլխովին զինված էին, այնուամենայնիվ հայ բնակչությունն առիթ էր որոնում ապստամբելու, որպեսզի թուրքական կառավարության գործերը և զինված քրդերը իրենց կոտորեն, դրանով իսկ եվրոպական տերություններին հարկադրեն, որ զբաղվեն հայերի ազատագրության հարցով:

Չնայած այս եզրակացության արտառոց և հրեշավոր լինելուն, այնուամենայնիվ ամեն մի քիչ թե շատ բանիմաց մարդու համար պարզ պետք է լինի, որ որևէ ժողովուրդ ազգովին ինքնասպանության այդպիսի քայլի դիմել կարող է միայն այն դեպքում, եթե քաղաքական ու տնտեսական վիճակը նրան ծայրահեղ հուսահատության է հասցնում:

«Ամենուրեք, — գրում է զեկուցագրի հեղինակը, — ես աշխատում էի պարզել, թե ի՞նչը կարող է հարգելի պատճառ համարվել հայկական դժգոհությունների... Ինձ հաջողվեց այդ ուղղությամբ հավաքել զգալի նյութ, որից ես ինձ թույլ եմ տալիս բերել մի քանի խոսք: Հայերն իրենց գանգատներում սովորաբար մատնանշում են հարկերի գանձման արատավորությունը, արտակարգ հարկերը և զուգումները, դատավարության արատները և քրդերի ասպատակությունները: Երկրում լինելու հենց առաջին օրից ակներև է դառնում, որ այդ գանգատները որոշ վայրերում լիակատար հիմք ունեն...»: Այնուհետև նա արձանագրում է, որ «ավելորդ և հավելյալ հարկերը, կաշառակերությունը, որ գործադրում են տեղական վարչությունները, գրեթե սովորական երևույթ են, բացառյալ որոշ մասնավոր դեպքերից, դրանք գանգատի նյութ չէին կարող ծառայել, եթե հայերն իրենց հայրենասիրական նպատակների համար հոգ չտանեին մանրակրկիտ կերպով հավաքել այնպիսի փաստեր, որոնք արդարացնեին նրանց կողմից անկախության ձգտումը: Իսկ եթե հարցը դրվի, թե երկրի միջոցները և բնակչության ունևորությունը

նր թույլ է տալիս արդյո՞ք բավարարելու ոչ միայն պետական գանձարանի պահանջները, այլև տեղական վարչությունների գուգումները, ապա պատասխանը վլինի ի վնաս հայերի»:

Այնուհետև նա շարունակում է. «Եթե հարց ծագի երկրի բուն միջոցների մասին, ապա ինձ թույլ եմ տալիս համոզված կերպով ասելու, որ երկրի ռեսուրսները հնարավորություն են տալիս այստեղ տասն անգամ ավելի մեծ բնակչություն ունենալու, բայց դրա համար միայն վարչական ռեֆորմները բավական չեն: Իմ այցելած ամբողջ գոտում (այսինքն՝ Հայաստանում. — Ս. Մ.) արդյունաբերությունը սահմանափակվում է ձեռքի տնայնագործական աշխատանքով... Այստեղ նույնիսկ լուցիկին վիեննայի կամ վենետիկի պիտակն ունի»: «Իսկ եթե զարկ տրվի արդյունաբերությանը, հանքային հարստությունների շահագործմանը, ապա բնակչության բարեկեցությունը և կյանքի հարմարությունները բաղմապատիկ կբարձրանան: Բայց դրա առաջին քայլը պետք է լինի հաղորդակցության միջոցների զարգացումը, հեռագրական և փոստային հաղորդակցությունները: Եթե ճանապարհներին կամուրջներ կամ աղբյուրներ են հանդիպում, ապա դրանց մեծագույն մասը պատկանում են անդրջրհեղեղյան ժամանակներին, իսկ վերջին ժամանակները գրեթե ոչինչ չի արված հաղորդակցության զարգացման համար, այստեղ հաղորդակցությանը նշանակություն տվող չկա: Այդ կողմից թուրքական կառավարությունն ամենաանհերքելի անտարբերություն է ցուցաբերում»:

Ձեկուցագրի հեղինակը, արձանագրելով այս բոլորը, եզրակացնում է. «Այս հարցերին ես պատիվ կունենամ անդրադառնալու ավելի մանրամասնորեն, իսկ առայժմ ինձ թույլ եմ տալիս նկատել, որ հայկական շարժումը չի առաջացել բնական-տնտեսական պատճառներից, ոչ էլ կրոնական ու ցեղային տարբերություններից, այլ դա հանդիսանում է արհեստականորեն ասպարեզ բերված շարժում (հայերի կողմից. — Ս. Մ.), որին, իհարկե, նպաստել են թուրքական վարչությունների անհերքելի գանցառությունները, իսկ վերջին

ժամանակները Սասունի ապստամբությունը ճնշելու գործում ձեռնարկած մի շարք անտակտությունները...»¹:

Բնականաբար հարց է առաջանում, եթե հայերի կյանքը, գույքը և պատիվը օրենքով ապահովված չէր, եթե զինված քրդերը անպատիժ կերպով կարող էին կողոպտել ու սպանել հայերին, եթե հարկազանձման գործը այնպես էր կազմակերպված, որ հայ աշխատավորությունը, պետությունը բավարարելուց դատ, պետք է միջոցներ հայթայթեր թուրք աստիճանավորների և քուրդ աշիրեթապետների հարստացման համար, եթե գոյություն ուներ աշխատավորական դանդաղաների պաշտոնական և անպաշտոն կեղեքում, եթե Հայաստանում եղած կամուրջներն ու աղբյուրները անհիշելի ժամանակներից էին, եթե հնարավորություններ չէին տրվում երկրի հարստությունները շահագործելու և եթե թուրքական կառավարությունն այդ ամենին վերաբերվում էր «ամենասանձերելի անտարբերությամբ», ապա էլ ինչ «բնական-տնտեսական» պատճառներ էին հարկավոր հայերի գանգատների ու դժգոհության համար: Մի՞թե այդ բոլորը ինչ-որ, ճիշտ է, խիստ մեղմացրած տոնով, նկարագրում է հենց ինքը՝ Պուտյատան, ամենապարզ ապացույց չէր այն բանի, որ Հայաստանում իշխում էր, Մարքսի բառերով ասած, ամենաբարբարոս ֆեոդալական ճնշում, որից ազատվելը ամեն մի առաջադեմ ժողովրդի համար կյանքի ու մահվան նշանակություն ուներ: Մնում է զարմանալ, որ ցարական գնդապետը, որին այդպիսի կարևոր ու բարդ միսիա էր հանձնարարված, չէր հասկանում կամ, ավելի ճիշտ, ելնելով ցարիզմի հեռանկարներից, ձեացնում էր, թե չի հասկանում, որ հայերի ձգտումն այդ ժամանակ հենց իր կողմից հիշատակված «անկարգությունների» վերացումն էր, որ հորջորջվում էր հայկական ռեֆորմներ անունով:

Բայց Յելզգ-Քյոշքից բխած աղբյուրները Ձեքի փաշայի ու նրա ազենտների միջոցով այլ բանում էին համոզել Պուտյատային: Նրա կարծիքով, թուրքահայ ժողովուրդը, որի հետ նա հանդիպել էր Հայաստանում իր կատարած կարճատև

շրջագայության ընթացքում, նպատակ է ունեցել հայկական թագավորություն ստեղծել, այն էլ եվրոպացի թագավորության հանրահայտ է, որ այս հերյուրանքը ևս թուրքական իշխանությունների հորինածն էր, իրենց ոճրագործությունները եվրոպական պետությունների առաջ հիմնավորելու համար:

Հարկավ, ամեն մի ժողովրդի բաղձանքը իր քաղաքական ազատությունն է: Հակաբնական կլիներ ասել, որ հայերի մեջ չկար այդ բաղձանքը: Բայց մի բան է ժողովրդի իդեալը, մի այլ բան է կոնկրետ իրականության մեջ հարաբերականորեն տանելի կյանքը: Հարցն այն է, թե այդ ժամանակ թուրքահայ հասարակությանն զբաղեցնողը հարցի որ կողմն էր: Բոլոր աղբյուրները և բոլոր տվյալները, բացառյալ թուրքական կառավարությունը, միաբերան վկայում են՝ ռեֆորմներ թուրքական պետականության սահմաններում, հայերի իրավական դրության հավասարեցում իր հարևան քրդերի և թուրքերի հետ: Այդ այն կոնկրետ պահանջն էր, որ թուրքիայում ապրող հայությունը առաջադրում էր որպես ազգություն: Նա չէր ուզում ասիմիլյացիայի ենթարկվել, կուլ գնալ քուրդ կամ թուրք տարրերին, չէր ուզում հրաժարվել իր դարավոր կուլտուրայից: Այդ էր նրա ընթացիկ քաղաքականությունը: Հարց կարող է առաջանալ, թե հայերը, իբրև թուրքիայի հպատակներ, հետապնդում էին արդյո՞ք նաև այլ քաղաքական նպատակներ: Իհարկե հետապնդում էին: Հայերի մեջ էլ, ինչպես թուրքիայում ապրող տարբեր ազգությունների մեջ, ներառյալ հենց թուրքերին, իհարկե, կային՝ սկսած հեղափոխական տարրերից, որոնք ձգտում էին տապալել սուլթանական ռեժիմը, մինչև ամենառեակցիոն տարրեր: Բայց այստեղ հարցը ազգային խնդիրը չէր, այլ ընդհանուր, պետական-քաղաքական: Թուրքերի մեջ էլ կային և հեղափոխականներ, և ռեֆորմիստներ, բայց դրա համար ազգային հատուկ կոտորածներ չէին կազմակերպվում: Այդպիսի դեպքերում սուլթանական պետությունը, իբրև ժայռահեղ ռեակցիայի կազմակերպված բռնուցք, ճնշում էր հեղափոխականների և ռեֆորմիստների ամեն մի ելույթը իր տրամադրության տակ եղած բոլոր միջոցներով, սկսած բանտերից մինչև կախաղան: Եվ ահա թուրքական կառավարությունը, հայերին

¹ АВПР. ф. Политархив, д. № 3435, лл. 30—37.

մերժելով «կյանքի, գույքի և պատվի» տարրական իրավունք՝ պետության մահմեդական բնակչության իրավունքների սահմաններում, հարցը խեղաթյուրում և հայկական ուժերի մեծամասնության պահանջը դիտում էր որպես հեղափոխություն:

Եթե Թուրքիայում հայտնաբերվում էր որևէ թուրքական հակակառավարական կազմակերպություն, ապա նրա անպատեհները ենթարկվում էին համապատասխան պատասխանատվության՝ գոյություն ունեցող օրենքների համաձայն: Իսկ եթե հայտնաբերվում էր հայկական հակակառավարական թեկնոզ ամենաանշան կազմակերպություն՝ օրենքից դուրս էին հայտարարվում տեղական բալուռ հայերը, և այդ հանգամանքը բավական էր հայկական կոտորածներ առաջացնելու համար:

Պուտյատան և նրա նման ցարական աստիճանավորները, որդեգրելով թուրքական իշխանությունների կողմից ստեղծված այդ խեղաթյուրումը, գտնում էին, որ հայերը նպատակ են դրել անկախ թագավորություն ստեղծել և հենց դրանով իսկ արդարացնում էին հայկական կոտորածները: Այլ կերպ չի կարելի հասկանալ ցարական բարձր աստիճանավոր Գրոյազնովի հետևյալ դատողությունները՝ «Սասունի անկարգությունները հանկարծակի շոռաջացան, այլ հասունացան վերջին մի քանի տարվա ընթացքում, երբ, մի կողմից, թուրքերի ու քրդերի, իսկ մյուս կողմից՝ հայերի միջև, դրսի ագիտացիայի ազդեցության տակ, հարաբերությունները սխտեմատիկաբար սրվում և վատթարանում էին... Հայկական գաղտնի ընկերություններն իրենց ագիտատորների և ագենտների ամբողջ ցանցով հեղեղել են բոլոր հավատների պրովինցիաները: Այդ ամենը, իհարկե, հայտնի է թուրքերին և չի կարող չզգուշանալ նրանց: Իսկ երբ վերջին ժամանակները էրզրումի և Վանի վիլայեթներում սկսեցին երևալ հայերի կազմակերպված հրոսակախմբեր, ապա լիովին հասկանալի է, որ քրդերի և թուրքերի մեջ գրգռվածության զգացմունքն սկսեց ավելի ուժեղ և ավելի բացահայտ արտահայտվել...»

Հարցի ճշմարտությունը, համենայն դեպս, այն է, որ ինչ էլ անեն, ինչ էլ ձեռնարկեն Թուրքիան ու թուրքերը, նրանք

այնուամենայնիվ բոլորին բավարարել չեն կարող: Հայերը միշտ կձգտեն վերականգնել այն, ինչ որ անցյալում ունեցել են և իրենց ազգային առանձնահատկության պատճառով հենց իրենք էլ կորցրել են...»: «Թուրքերի և քրդերի գրգռվածությունը հայերի դեմ ստեղծել են հենց իրենք՝ հայերը...»: «Ընդհանուր առմամբ բարեհոգի թուրքերի մեջ արտահայտվում է նախատրամադրվածություն հայերի դեմ ոչ թե որպես ընդհանրապես քրիստոնյաների դեմ, այլ հատկապես հայերի: Հայերի նկատմամբ քրդերի և թուրքերի անբարյացակամությունը նման է հրեաների նկատմամբ ռուս գյուղացու զգացմունքին: Եթե դրությունը չփոխվի, Անդրկովկասի հայերը նույն զգացմունքներին և վերաբերմունքին կարժանանան նաև ռուս քրիստոնյայի՝ այդ հազվագյուտ և բարեհոգի էակի կողմից»¹:

Որ ցարական բյուրոկրատիայի շարքերում հայերի նկատմամբ նման սեհարյուրակային տրամադրություններով բարձր աստիճանավորներ շատ կային, որոնք հայկական կոտորածների վերաբերյալ արտահայտում էին ցարիզմի քաղաքականությունը, մենք կանգ կառնենք մի կոլեկտիվ նամակի վրա, որ ուղարկվել էր արտաքին գործերի մինիստրությանը:

«15—16 տարի սրանից առաջ արտասահմանյան լրագրերի էջերում սկսեցին տպագրվել հոդվածներ, որոնք ամենամոռյալ գույներով նկարագրում էին հայերի կյանքը Թուրքիայում, պրետենցիոզ կերպով դրա պատճառը վերագրելով «մուսուլմանական ֆանատիզմին», «քրիստոնեության նկատմամբ ատելությունը» և այլ նման հերյուրանքների, որոնց նշանակությունն ու գինը Ռուսաստանը հրաշալի կերպով ըմբռնեց նույնպիսի հաղորդումների հետևանքով իր վերջին պատերազմում՝ բուլղարների համար, որոնք, ինչպես մերոնք համոզվեցին հենց տեղում, այնքան նյութական նպաստավոր պայմաններում էին գտնվում, ինչպիսի պայմաններում իր գյուղում երբեք չի եղել մեր զինվորը՝ բուլղարների ազա-

¹ АВПР. ф. Политархив, д. № 3448, Армянский вопрос, лл. 56—70.

տարարը, և հազիվ թե իրենք՝ թուրքերը այդպիսի նպաստավոր պայմաններում էին թուրքիայում»: «... Հայերը, եվրոպական և արևելյան լրագրերին, ինչպես և հեռագրական գործակալություններին կաշառելով, մամուլը հեղեղում են թուրքերի «գազանությունների», «քրիստոնյաներին և եկեղեցիները ոչնչացնելու» մասին հերյուրանքներով, ջանալով դրանով հուզել հասարակական կարծիքը և այդ դարձնել հօգուտ հայերի և ի վնաս թուրքերի...»: «...Կաշառված լրագրերն արդեն երկու տարի է, որ «քրիստոնյաների ջարդերի» (այսինքն՝ հայերի), «նրանց մահմեդականացնելու», «վանքերն ավերելու» և ճշմարտությունը խեղաթյուրող այլ զգայական միտումներ են հրամցնում հասարակությանը, նպատակ ունենալով հասարակական կարծիքը և մեր կառավարությանը դրդել պատերազմի, նման այն պատերազմին, որ տեղի ունեցավ բուլղարների համար, որի հետևանքով մենք կմնանք ջարդված կողերով, դատարկված դանձարանով և իբրև հավելում, նաև մեր թիկունքում միացյալ Հայաստանով...»:

Մեզ զարմացնում է ինչպես մեր այն հրապարակախոսների ստորությունը, որոնք թուրքերի «գազանությունների» և «բռնությունների» մասին դանազան հերյուրանքներով, ինչպես և արտասահմանյան լրագրերի հողվածներից, որ գրել են հենց իրենք՝ հայերը կամ հայերից հսկայական հոնորարներ ստացած ժուռնալիստները, ցիտատներ բերելով, պղտորում են մեր հասարակական կարծիքը, այնպես էլ մեզ զարմացնում է, որ իշխանությունը, որը վաղուց կարող էր վերջ տալ այդ լրագրական ագիտացիային, թույլ է տալիս, որ նա ավելի ու ավելի զարգանա, հուզի և խայտառակ կերպով խաբի Ռուսաստանի հասարակական կարծիքը: Բավական է աչքի անցկացնել «Новости», «Биржевые ведомости», «С-Петербургские ведомости» լրագրերի բորբոքիչ հողվածները, որոնց հեղինակները, հանձինս հրապարակախոսների Կոտովիչի, Վլադ. Գոլստրեմի, Գամմայի և ուրիշների, հասարակությանը գրգռում են «թուրքական գազանությունների մասին» դանազան հերյուրանքներով (որոնք այնուհետև պաշտոնապես հերքվում են): Լրագրերի էջերում

հիշյալ անձնավորությունների ագիտացիա թույլ տալը հասարակության առավել զարգացած և գործին տեղյակ մարդկանց մեջ առաջ է բերում վրդովմունքի և զարմանքի զգացմունք»¹:

Այս փաստաթղթերը (ինչպես և շատ ուրիշները, որոնք մենք չենք բերում) անառարկելի ապացույց են ծառայում, որ ցարական բյուրոկրատիան անտեսում է իր սեփական պաշտոնական ներկայացուցիչների հաղորդումները և, ելնելով իր քաղաքական նպատակներից, հենվում էր հենց թուրքական կառավարության կողմից ստեղծված ստահոգ հերյուրանքների վրա:

Ահավասիկ, Պուտյատան էլ, հրահանգված լինելով այդ ուղղությամբ և իսկություն համարելով Զեքի փաշայի հաղորդումները, որոնք հար և նման էին ցարական բարձր բյուրոկրատիայից ստացված հրահանգներին, իր զեկուցագրերում անց է կացնում այն տենդենցը, որ Սասունի կոտորածների պատճառը հայերն են եղել իրենց համար առանձին թագավորություն ունենալու միտումների պատճառով: Բայց թե հայկական բարձր շրջաններում այդ ուղղությամբ ինչ տրամադրություններ էին իշխում, այդ մասին մենք իմանում ենք նրա զեկուցագրերից մեկից, որը պարունակում է նրա գրույցը էրզրումի առաջնորդ արքեպիսկոպոս Շիշմանյանի հետ, որին համարում է եվրոպական իմաստով լիովին զարգացած, ֆրանսերեն ազատ արտահայտվող անձնավորություն: Հասկանալի է, որ Շիշմանյանին բոլորովին անհայտ էր, որ աշխարհագրագետ Վասիլևի անվան տակ թաքնված էր ցարական գերագույն շտաբի գնդապետ Պուտյատան: Երբ ծպտյալ աշխարհագրագետը կշտամբում է Շիշմանյանին, ասելով, որ «դուք ցանկանում եք հայոց թագը դնել իշխանազուն Թեկի գլխի»: ցանկանում եմ հաջողություն, բայց դրանում Ռուսաստանը ձեզ օգնել չի կարող»: «Ըիշտ չէ,—ընդհատեց արքեպիսկոպոսը,— իշխանազուն Թեկին կարող են առաջ բաշել գոնկոնմենները և բողոքականները, բայց հայը երբեք

¹ АВПР. ф. Политархив, д. № 3449. Общее дело об армянах. Беспорядки в Константинополе, лл. 271—272.

բողոքական չի դառնա: Իսկ մենք այժմյան մեր դրութեան մեջ մնալ չենք կարող. մեզ հարկավոր են ռեֆորմներ:

— Սակայն ինձ ամենուրեք ասել են, որ բնակչությանը ռեֆորմները չեն բավարարում, որ ժողովուրդը թագավորութուն է ուզում:

— Այդ այժմյան հարց չէ. մենք այժմ անկախության համար պատրաստ չենք. մեզ հարկավոր են միայն այնպիսի իրավունքներ, որոնցից օգտվում են Անդրկովկասի հայերը և մենք խնդրում ենք ձեր (այսինքն՝ Ռուսաստանի.—Ս. Մ.) միջամտությունը¹:

Իսկ Եր Անդրկովկասի հայերը, ինչպես և ռուսական կայսրության մեջ ապրող բոլոր ժողովուրդները, զուրկ էին ամեն մի քաղաքական իրավունքից, այդ հանրահայտ փաստ էր և հազիվ թե այդ հայտնի շիշմանյանին: Ուրեմն թուրքահայ ղեկավար շրջանների պահանջը սահմանափակվում էր «կյանքի, գույքի և պատվի» ապահովության ամենատարական իրավահավասարությունը:

Վ. Ի. Լենինը 1912 թվականին «Աերբ-բուլղարական հաղթությունների սոցիալական նշանակությունը» հոդվածում, խոսելով Մակեդոնիայի մասին, գրում է՝ «...Իսկ ի՞նչ պատմական պատճառներ առաջացրին այն, որ հարցը վճռվում էր պատերազմով և ոչ թե հեղափոխությամբ: Դրա գլխավոր պատմական պատճառը բալկանյան բոլոր երկրների գյուղացիական մասսաների թուլությունը, տրոհվածությունը, անզարգացածությունը, տգիտությունն է...»²:

Մեր հիշատակած զեկուցագրում Պուտյատան հարևանցիորեն անդրադառնում է նաև այդ հարցին: Նա գրում է՝ «Մյուս եզրակացությունը, որին հանգում ես այստեղ, տեղում, այն է, որ մեր կողմից հայկական հարցի լուծման նախաձեռնությունը վերցնելը կարող է ֆաղափական մեծ օգուտներ բերել և մեր դրությունն ապահովել Դարդանելում և Միջերկրական ծովում...» (ընդգծ. մերն է.—Ս. Մ.): Մի այլ զեկուցագրում այդ միտքը ավելի է զարգացնում: «Հայկական

շարժումը,— գրում է նա,— իր հետագա զարգացման համար հող գտալ թուրքական տեղական վարչության, գլխավորապես թուրք աստիճանավորների անձնակազմի թերությունների մեջ: Մահմեդականներն ու քրիստոնյաները, որոնք այժմ միմյանց դեմ ծայրահեղ գրգռվածության են հասցվել, հազիվ թե ի վիճակի լինեն մոտ ապագայում կարգավորել իրենց հարաբերությունները... Ուստի պետք է կարծել, որ այսուհետև հայկական հարցը Արևելքի միջազգային քաղաքականության համար դժվարությունների մշտական աղբյուր կծառայի և եվրոպական տերություններին կստիպի պատրաստ լինել լուծելու այն, երբ Թուրքիայի ներքին քայքայման առաջն առնելն անհնարին լինի»: Ուրեմն, հայկական հարցը դիտվում էր որպես մի պահեստի հարց, որը պետք է երևան բերվեր այն ժամանակ, երբ անհնարին կլիներ պահպանել Թուրքիայի status quo-ն: «Թուրքիան այժմյան իր վիճակում,— գրում է զեկուցագրի հեղինակը,— երբ մոտ է իր ներքին քայքայմանը, տառապելով դրամական խրոնիկական կարիքից, Ռուսաստանի համար ոչ միայն վտանգավոր հարևան չէ, այլ ինքնին չի կարող արգելք ծառայել Սև ծովի իր ձեռքում գտնվող ելքին ու մուտքին: Բայց հենց այդ թուլությունը և քայքայման ակնբախ սիմպտոմները, կապված երկրում օրավուր ուժեղացող օտարերկրյա տնտեսական և նույնիսկ վարչական ազդեցության հետ, մտահոգություն են առաջացնում մեր դիրքերն ապահովելու Սև ծովում, որը քաղաքական բարդությունների դեպքում կարող է բաց լինել մեր թշնամիների համար... Ուստի, Սև ծովի ափերին որևէ տեղ, ինչքան կարելի է Բոսֆորին մոտիկ, կանգնելու տեղ ունենալը, որպեսզի հնարավոր լինի դրանից ամեն անգամ օգտվել, երբ անգլիական միջերկրականյան էսկադրան խաբիսի գցի Դարդանելին հարևան ջրերում, թվում է այժմ առաջնակարգ կարևորություն ունեցող հարցն է»¹:

Հայկական ռեֆորմների հարցը, ահավասիկ, պետք է խալաս դրվեր այդ «առաջնակարգ կարևորություն ունեցող» հարցին, երբ հանգամանքներն այդ կթելադրեին: Մեր կար-

1 АВПР. ф. Политархив, д. № 3439, лл. 39—46.

2 В. И. Ленин, Сочинения, т. XVI, стр. 187.

1 АВПР. ф. Политархив, д. № 3439, лл. 48—49.

ծիքով, հենց այս էր Բեռլինի տրակտատով ընդունված հայկական հարցի միջազգային նշանակությունը և ոչ թե թուրքահայության «կյանքի, գույքի և պատվի» ապահովումը, ինչպես աշխատում էին ցույց տալ իմպերիալիստական պետությունների դիվանագետները, և միամտորեն դրան հավատում էին օտարերկրացի և հայ մի շարք հրապարակախոսներ:

Սան-Ստեֆանոյի և Բեռլինի տրակտատների հայերին վերաբերող հոդվածների մասին բուրժուական հրապարակախոսության և իրավագիտության մեջ սովորաբար տարածված է այն մեկնաբանությունը, որ տվել է բելգիացի հռչակավոր իրավագետ Ռոլեն-ժեկմենը: «Ծն իմ աշխատության I մասում,— գրում է նա— մատնանշել եմ 61-րդ հոդվածի ծագման ու ճշգրիտ նշանակության մասին: Դա Սան-Ստեֆանոյի տրակտատի նույն 16-րդ հոդվածն է, միայն ավելի ծավալուն և ճշգրիտ որոշված: Այն ժամանակ, երբ Սան-Ստեֆանոյի տրակտատով Թուրքիան պարտավորվում էր միայն Ռուսաստանի առաջ, Բեռլինի տրակտատի պարտավորությամբ նա իրեն կապում էր բոլոր մեծ տերությունների հետ՝ առանց հետագա հապաղման կենսագործելու այն բոլոր բարելավումներն ու ռեֆորմները, որ պահանջում են հայերով բնակեցված պրովինցիաների տեղական կարիքները և ապահովելու նրանց անվտանգությունը քրդերից ու շերքեզներից: Բացի այդ, հատուկ բնորոշ կետ էր, որ չկար Սան-Ստեֆանոյի տրակտատում և լորդ Սոլսբերիի առաջարկով մտցվեց Բեռլինի տրակտատի մեջ, որով «Թուրքիան պարբերաբար պետք է տերություններին հաղորդի իր կողմից այդ ուղղությամբ ձեռնարկված միջոցառումների մասին, որոնց կենսագործմանը հետևելու են տերությունները»: Այսպիսով, հայկական հարցը դադարում է միայն Օսմանյան կայսրությանը վերաբերող ներքին հարց լինելուց, այլ դառնում է միջազգային, որի լուծման գործում պատասխանատու են Բեռլինի տրակտատն ստորագրող բոլոր տերությունները»¹:

¹ М. Г. Ролэн-Жекмен, Армения, армяне и трактаты. Сб. «Положение армян в Турции», 1896, стр. 45.

Այդ, եթե հարցին մոտենալու լինենք իմպերիալիստական պետությունների և Թուրքիայի միջև փոխհարաբերության տեսանկյունից, ապա պետք է կարծել, որ այդ մեկնաբանությունը բավական հիմնավորված է: Բայց հայ ժողովրդի կյանքը տանելի դարձնելու տեսակետից հայկական հարցը պետք է վերաբերեր հայ ժողովրդի և թուրքական պետության հարաբերությանը: Այս վերջին առումով Ռոլեն-ժեկմենի վերոհիշյալ մեկնաբանության երեք հիմնական կետերից երկուսը, մեր կարծիքով, խիստ առարկելի են:

1) Բեռլինի տրակտատի 61-րդ հոդվածի բովանդակությունը Սան-Ստեֆանոյի տրակտատի 16-րդ հոդվածի ոչ միայն «ավելի ծավալուն և ավելի ճշգրիտ» տարբերակը չէր, այլ նրա խեղաթյուրումն էր ի վնաս հայ ժողովրդի: Անգլիական դիվանագիտությունը կիպրոսի վերաբերյալ կոնվենցիայով իր վրա վերցրած պարտականությամբ փրկեց իր հովանավորյալ Թուրքիային: Եվ իրոք, Սան-Ստեֆանոյի տրակտատում ասված է՝ «Քանի որ ռուսական զորքերի զուրս գալը Հայաստանի գրաված վայրերից, որոնք պետք է վերադարձվեն Թուրքիային, կարող է առիթ ծառայել բախումների ու բարդությունների, որոնց հետևանքով կարող են վատանալ երկու պետությունների լավ հարաբերությունները, և Դուռը պարտավորվում է առանց հետագա հապաղման կենսագործել այն բոլոր բարելավումներն ու ռեֆորմները, որոնք պահանջում են հայերով բնակեցված պրովինցիաների տեղական կարիքները և ապահովել նրանց անվտանգությունը քրդերից ու շերքեզներից»: Այդ հոդվածում նախատեսված էր և՛ պարտավորություն, և՛ սանկցիա: Հոդվածի երկրորդ, շրջագծված մասը Թուրքիայի պարտավորությունն է, իսկ առաջին, ընդգծված մասը՝ սանկցիան, որի ուժի համաձայն Թուրքիան շահագրգռված էր անհապաղ կատարել իր ստանձնած պարտավորությունը և, գոհացում տալով Ռուսաստանին, նրան ստիպեր վերադարձնել գրաված պրովինցիաները: Դրանով միանգամայն որոշակի է «առանց հետագա հապաղման» ձևակերպման բովանդակությունը, որ վերաբերում է տրակտատն ստորագրող երկու կողմերին: Եթե Թուրքիան չկատարեր իր պարտավորությունը, ապա ռուսական զորքերը չէին

հեռանա գրաված վայրերից. եթե Թուրքիան հապաղեր ու-
ֆորմաները կենսագործել, ապա ուսական զորքերը կմնային
գրաված վայրերում այնքան ժամանակ, մինչև որ Թուրքիան
կատարեր իր ստանձնած պարտավորությունը և Ռուսաստա-
նը համաձայնե՞ր, որ ուֆորմաները իսկապես համապատաս-
խանում են այդ պրովինցիաների տեղական կարիքներին:

Բեռլինի կոնգրեսում անգլիական դիվանագիտության
ճնշման տակ, ի պաշտպանություն Թուրքիայի, հանվեց հող-
վածի առաջին, մեր կողմից ընդգծված մասը, այսինքն՝ վե-
րացվեց սանկցիան և մնաց միայն դատարկ պարտավորու-
թյունը: Այդ կոնտեքստում միանգամայն հեղհեղուկ է դառ-
նում «առանց հետագա հապաղման» ձևակերպումը: Ի՞նչ էր
այդ նշանակում՝ ամիսնե՞ր, տարինե՞ր, թե՞ տասնյակ տա-
րիներ: Այդ հիմնական հարցը թողնվում էր Թուրքիայի հա-
յեցողությանը և նա կարող էր ձգձգել անսահման ժամանակ:
Եվ իզուր չէ Բեռլինի կոնգրեսի 12-րդ արձանագրության մեջ
արձանագրված կոմս Շովալովի այն երկյուղը, որ ուֆորմ-
աներ մտցնելուց առաջ ուսական զորքերի այդ պրովինցիա-
ներից դուրս գալը կարող է լուրջ բարդություններ առաջաց-
նել:

2) Բեռլինի տրակտատի 61-րդ հոդվածում Անգլիայի պա-
հանջով ավելացրած այն մասը, որտեղ խոսվում է Թուրքիա-
յի կողմից տերություններին պարբերաբար հաղորդելու իր
ձեռնարկած միջոցառումների մասին, նույնպես նպատակ էր
հետապնդում Թուրքիային հնարավորություն տալ թոթափելու
իր ստանձնած պարտավորությունները կատարելուց: Ինքնին
հասկանալի է, որ եթե Թուրքիան իր ձեռք առած միջոցա-
ռումների մասին պետք է հաղորդեր պարբերաբար, այդ
նշանակում էր, որ հենց միջոցառումները պետք է կատար-
վեին պարբերաբար, այսինքն՝ անորոշ ժամանակի ընթաց-
քում, երբ ինքը տեղին ու ժամանակին կհամարեր այդ: Այս-
տեղ ևս հոդվածում շեշտվող «առանց հետագա հապաղման»
ձևակերպումը, որ վերցված էր Սան-Ստեֆանոյի տրակտա-
տից, դառնում է միանգամայն անխմաստ ու անբովանդակ,
քանի որ ուֆորմաների պարբերաբար իրագործումը պարզա-
պես ժխտումն է անհապաղ իրագործման:

Մյուս կողմից, միանգամայն իրավացի է Ռուս-ժեկմանը,
երբ ընդգծում է, որ Բեռլինի տրակտատով հայկական հարցն
ընդունում է միջազգային բնույթ, այսինքն՝ վեց մեծ տերու-
թյուններն իրավասու են դառնում Թուրքիայից պահանջելու
իրագործել իր խոստացած ուֆորմաները, որոնց բովանդակու-
թյունը հենց Անգլիան ինքը դիտավորյալ խավարի մեջ էր
թողել: Օրինակ, 1879 թվականին էրզրումի գերագույն հյու-
պատուս մայր Տրոտտերը հետևյալ հարցմունքն է անում
անգլիական կառավարությանը՝ «Արդյոք որևէ իրավունք
ունե՞մ պաշտպանելու Բ. Դոան քրիստոնյա հպատակների
շահերը, և, եթե այո, որտեղի՞ց է բխում այդ իրավունքը:
Թերևս ես սխալվում եմ, բայց ինձ թվում է, շնայած փաշան
քաղաքավարությունից դրդված պարտավոր է պատասխանել
իմ հաղորդումներին, սակայն, ըստ իրավունքի, նա կարող է
հրաժարվել լսել իմ խորհուրդները և նույնիսկ կարող է վի-
ճարկել իմ նախաձեռնության իրավունքը որևէ գործողության
նկատմամբ, բացի նրանցից, որոնց նպատակը անգլիական
հպատակների շահերը պաշտպանելն է: Իսկ հայտնի օրենք-
ներում ես որևէ ակնարկ չեմ գտնում ավելի լայն միջամտու-
թյան իրավունքի վերաբերյալ»:

Կորդ Սուլսբերին, վկայակոչելով Բեռլինի տրակտատը և
Կիպրոսի վերաբերյալ կրնվենցիան, պարզաբանում է Տրոտ-
տերի հարցմունքը. «Այդ դաշնագրերի ուժով սովթանը պար-
տավոր է ոչ միայն նոր և ավելի լավ օրենքներ հրապարակել,
այլև փաստորեն իրագործել մայր Տրոտտերի հսկողության
ներքո գտնվող պրովինցիաների վարչական ուֆորմաները:
Այդ դաշնագրերի ոգուն շհամապատասխանող ամեն մի գոր-
ծողություն կարող է առիթ ծառայել բողոքի համար՝ առաջին
անգամ հյուպատոսի կողմից, իսկ այնուհետև, անհաջողու-
թյան դեպքում, դեսպանի կողմից»¹:

Այսպիսով, Սուլսբերին 1879 թվականին պնդում էր, որ
Բեռլինի տրակտատի ուժով անգլիական դիվանագետներն
իրավունք ունեն միջամտելու և պաշտպանելու հայ քնակչու-
թյան շահերը, իսկ Թուրքիան պարտավոր է իրագործել այդ

¹ «Положение армян в Турции», 1896, стр. 55.

պրովինցիաների վարչական ռեֆորմները: Մինչդեռ 10 տարի անց, երբ թուրքական իշխանությունները այդ հարցի վերաբերյալ բացարձակապես ոչինչ չէին արել, և Անգլիայի շահերը չէին պահանջում միջամտել այդ հարցին, տրամագծորեն հակառակ պատասխան է տալիս. 1889 թվականի հունիսի 28-ին մարքիզ Սոլսբերին, պատասխանելով լորդ Քառնորվանի հարցապնդմանը, ժխտում էր, որ Անգլիան իր վրա որևէ հատուկ պարտավորություն է վերցրել Փոքր Ասիայի բնակչության վերաբերյալ: Նրա կարծիքով՝ «Անգլիան Թուրքիայի հովանավորը չէ և չի կարող նրա նկատմամբ խնամակալի իրավունք գործադրել»¹:

1878 թվականի հունիսի 4-ի Կիպրոսի վերաբերյալ կոնվենցիայով Անգլիան իր վրա պարտավորություն էր վերցրել Թուրքիային, հատկապես հայկական վիլայեթների սահմաններում, Ռուսաստանի դեմ պաշտպանել ռազմական միջոցներով: Այլ կերպ ասած, երբ մի օր Ռուսաստանը, ելնելով իր արևելյան քաղաքականության շահերից և պատրվակ բռնելով հայկական ռեֆորմների հարցը, պատերազմ հայտարարեր Թուրքիային, Անգլիան այդ կոնվենցիայի համաձայն պետք է հանդես գար որպես Թուրքիայի դաշնակից. բայց որպեսզի իր երկրի հասարակական կարծիքի առաջ նա հանդես չգա, որպես հայկական ռեֆորմների հակառակորդ, կոնվենցիայում նախատեսված էր, որ հայկական վիլայեթներում պետք է կատարվեին ռեֆորմներ, որոնց բովանդակությունը պետք է համաձայնեցվեր Անգլիայի հետ: Անգլիական հրապարակախոս Մալքոլմ-Մաքոլն այդ առթիվ գրում է՝ «Հայերի նկատմամբ մեր պարտավորությունների համար հաջորդ հիմքը 1878 թվականի անգլո-թուրքական կոնվենցիան է, որով Անգլիան իր վրա կրկնակի պարտավորություն է վերցրել՝ ռազմական, ըստ որի նա պարտավորվում է հայկական սահմանը պաշտպանել Ռուսաստանից, և քաղաքական, որը նրան իրավունք է տալիս և պարտավորեցնում է հետևելու այդ պրովինցիայի կառավարման գործում կատարվելիք ռեֆորմներին: Առաջին հոգևածի համաձայն, այդ ռեֆորմները պետք

է Անգլիայի և Թուրքիայի միջև համաձայնության առարկա դառնան»: Այս հիշեցումից հետո անգլիացի հրապարակախոսն անում է մի ուրիշ կարևոր հիշեցում՝ «Համայնքների պալատում, — գրում է նա, — ես իմ սեփական ականջներով լսել եմ, թե ինչպես գաղութային գործերի գծով պետական քարտուղարի օգնական լորդ Սանդոնը ներբողական տոնով մեկնաբանում էր այն բարիքները, որ Անգլիան, որպես առատության եղջյուրից, պետք է տեղար հայերի վրա: Անգլո-թուրքական կոնվենցիայի շնորհիվ, որով Անգլիան հնարավորություն էր ստանում Փոքր Ասիայում բարերար պրոտեկտորատ դրսևորել, վայրենի երկիրը իբր թե պետք է վարդի պես ծաղկեր և քրդական հրացանների պայթյունները պետք է փոխարինվեին շոգեգոյթանի սուլոցով, որ Անգլիայի հովանավորության ազդեցության տակ այդ երկրների հարստություններն այնպես պետք է զարգանային, որ անգլիական ապրանքների համար նոր և շահավետ շուկաներ պետք է բացվեին»:

Նման սին հավաստիացումների հիման վրա էր, որ ներսես վարժապետյան պատրիարքը կոչ էր անում համայն հայությանը՝ «Գնանք Հայաստան, այնտեղ ուղարկենք ամբողջ ընդունակ, կրթված և ազգին նվիրված հոգևորականությունը: Թող զանգվածներով այնտեղ գնան մեր ուսուցիչները՝ ոգևորությամբ լեցուն այդ երիտաքարդությունը, մեր արհեստավորները, վաճառականները: Թող վերադառնան այն դժբախտները, որոնց դժբախտություններն ու հալածանքները կտրել են ընտանի օջախից: Այժմ Հայաստանում պետք է վերանան հալածանքները, սովն ու ժանտախտը: Զի լինելու այսուհետև գուշքի, կյանքի և պատվի բռնություն. վերջ անարգ լծին: Այժմյանից Հայաստանում պետք է լինեն ճանապարհներ, ջրանցքներ, գործարանների քանակը օրավոր պետք է մեծանա: Անգլիական կապիտալները այնտեղ գործադրում կգտնեն. թող մեր կապիտալիստները ուղևորվեն այնտեղ, թող հենց այժմյանից ընկերություններ կազմեն: Մենք ևս միանանք, որպեսզի համատեղ ամեն քաղաքում, ամեն մի գյուղում դպրոցներ բացենք, միանանք, որպեսզի ընդլայնենք մեր առևտուրը, զարգացնենք մեր արդյունաբե-

¹ Նույն տեղում, էջ 46:

րությունը: Թող Հնդկաստանի, Հայաստանի, Անգլիայի, Թուրքիայի, Ռուսաստանի, Ավստրիայի, Պրուսիայի բոլոր հայերը միմյանց ձեռք մեկնեն և միավորվեն հանուն առաջադիմության այդ գործի»:

Եթե երազանքներով տարված վարժապետյանների համար այդ էր նշանակում Անգլիայի քաղաքական հեռանկարները, ապա ռեալ քաղաքագետների համար, հենց սկզբից, պարզ էր այդ քաղաքականութան էությունը՝ «Հանգուցյալ լորդ Շերբրուկը 1878 թվականին Քրոյդոնում արտասանած իր ձառում հայտարարից, որ անգլիական քաղաքականությունը Թուրքիայի քրիստոնյաների համար «փակեց դժոխքից դուրս գալու ելքը»»¹:

Սկսած այդ թվականից, Հայաստանում կատարված դեպքերը ամենայն հստակությամբ ապացուցեցին Շերբրուկի կանխատեսության ճշտությունը: Մալքում-Մաքուլը, նկատի առնելով Թուրքիայի բազմաթիվ խոստումները և իր տված խոստումները չկատարելը, եզրակացնում է, որ նույնիսկ ամենահամառ թուրքոֆիլ անգլիացիները «այժմ տեսնում են, որ Բ. Դոան անմիջական նախաձեռնությամբ ու վերահսկողությամբ որևէ ռեֆորմ միանգամայն անհնարին է: Անգլիայի բոլոր կուսակցությունները այդ գործում արհամարհում են իրենց պարտականությունները: Եթե անգլո-թուրքական կոնվենցիան և Բեռլինի տրակտատը պահպանողական կուսակցության գործն էին, ապա հաջորդող չիբերալ կուսակցությունը համաձայնեց դրանց հետ և ոչինչ չարավ իր խոստումները և ամբողջ ազգին տված և իր վրա վերցրած պարտավորությունները իրագործելու համար: Ոչ մի կուսակցություն իրավունք չունի քար նետելու մյուսի վրա: Մենք բոլորս մեղավոր ենք»²:

Այս ամենից ամենայն պարզությամբ հետևում է, որ մարքիզ Սոլսբերին գիտակցաբար ստում էր, երբ լորդերի պալատում, աշխատելով իր վրայից թոթափել Հայաստանում կատարվող ռեֆորմությունների մեղադրանքը,

հայտարարում էր, թե «Անգլիան Թուրքիայի հովանավորը չէ և չի կարող նրա նկատմամբ խնամատարական իրավունքներ ստանձնել»: Միանգամայն իրավացի էր Ռոլեն-Փեկմենը, երբ ընդգծում էր, որ անհնարին է վերացնել հետևյալ դիման՝ «Եվրոպական մեծ տերությունները, այդ թվում Անգլիան, կամ որևէ իրավունք չունեն խառնվելու Օսմանյան կայսրության ներքին գործերին, և այդ դեպքում Կիպրոս կղզուն վերաբերող տրակտատի 8-րդ հոդվածը և Բեռլինի տրակտատի մեծ մասը, ներառյալ Հայաստանին վերաբերող 61-րդ հոդվածը, այլ բան չեն, քան զուր հույսեր առաջացնող կեղծիք և դատարկ բառերի հավաքածու, կամ, եթե այդ այդպես չէ, ապա եվրոպական տերությունների կողմից յուրացված միջամտության, հսկողության և համատեղ գործողության իրավունքով՝ նրանց վրա խիստ պարտավորություն է ընկնում հարկավոր դեպքում պնդել խոստացած ռեֆորմները կենսագործելու...»³

Մեզ կարող են առարկել, որ հատկապես անգլիական դիվանագիտությունը մի քանի անգամ առաջ է քաշել այդ հարցը, օրինակ՝ 1880 և 1895 թվականներին: Նման առարկություններ առնվազն հարցին անտեղյակության արդյունք է: Բանն այն է, որ ո՛չ Անգլիան և ո՛չ էլ որևէ պետություն հայկական հարցն իբրև այդպիսին լրջությամբ միջազգային հարաբերությունների հրապարակին չի հանել, այլ հայ ժողովրդի «կյանքի, գույքի և պատվի» հարցը պատռվակ է ծառայեցրել իր մերձարևելյան քաղաքականության նպատակներով: Չնայած Ռոլեն-Փեկմենը իրավացիորեն պնդում է, որ «այն փաստական դրության հետազոտումը, որի մեջ սկսած 1878 թվականից գտնվում է Հայաստանը, ըստ էության պատկանում է միջազգային իրավունքի բնագավառին»², սակայն մի բան է միջազգային իրավունքը, այլ բան չեն միջազգային հարաբերությունները: Միջազգային հարաբերությունների տեսակետից հայկական հարցի էությունն այն էր, թե իմպերիալիստական որ պետության շահերին նա պետք է ծառայեր: Հարկավ, շարիքներից փոքրագույնը այն կլիներ, որ

1 Նույն տեղում, էջ 196:

2 Նույն տեղում, էջ 198:

1 «Положение армян в Турции», 1896, стр. 47.

2 Նույն տեղում:

արևմտահայ ժողովուրդը լինելու արևմտահայ իմպերիալիստական պետության, կոնկրետ դեպքում Անգլիայի կամ Ռուսաստանի՝ պրոտեկտորատի տակ, չնայած այդ դեպքում ևս նա կմնար բացարձակապես իրավազուրկ և կեղեքման ենթարկված, բայց այն անագորույն ոճրագործությունները, որոնք տանում էին դեպի հայ տարրի իսպառ բնաջնջումը իր հայրենիքում՝ այդ գոնե այս կամ այն շափով, տեղի չէր ունենա: Անգլիայի համար մի ամբողջ ժողովրդի ֆիզիկական գոյության հարցում (որում անգլիական դիվանագետները բոլորովին չէին կասկածում), առանց զուգորդելու անգլիական իմպերիալիզմի նյութական շահերի հետ, լուկ դատարկ աբսուտրակցիա էր: Իսկ անգլիական իմպերիալիզմի շահերը Հայկական բարձրավանդակում հակադրվում էին ցարական Ռուսաստանի շահերին:

Վերևում մենք տեսանք, որ անգլիացի հրապարակախոս Մալքոլմ-Մաքոլը անգլիական բոլոր քաղաքական կուսակցություններին հանցավոր էր համարում հայկական կոտորածների գործում: Անգլիական կառավարությունը իր մեղքը քաղելու համար, պրոտ է նա, «պետք է հետևի կիբանանի պրեցեդենտին: Հայերի համար սահմանադրություն պետք է կազմի այնպիսի մեկը, որը գործի գործին միջամտող մեծ տերություններին անուհից: Որպես minimum այդ սահմանադրությունը պետք է պնդի Հայաստանում քրիստոնյա նահանգապետ նշանակելու վրա, որը կարգը պաշտպանելու համար օժտված լինի որոշ ուժով. նահանգապետը պետք է նշանակվի կամ անմիջականորեն տերությունների կողմից, կամ նրանց հավանությանը, նա չպետք է փոխվի առանց նրանց համաձայնության: Սրանից պակասը կլինի միայն կոմեդիա: Եթե Անգլիան չի ցանկանում այդքան հեռու գնալ, ապա, ավելի լավ է, որ նա ձեռքերը լվանա և անկեղծությամբ հրաժարվի այն դաշնագրային պարտավորություններից, որոնք չի կարող կենսագործել»¹:

Եթե հարցը վերաբերելիս լինելու հայերին ֆիզիկական բնաջնջումից փրկելուն, փնչպես կարծում էր այդ հրապարա-

կախուր, ապա նրա առաջարկը շատ տրամաբանական է թվում: Բայց հարցը շատ ավելի բարդ էր, քան կարծում էին այդպես մտածողները: Եվ Անգլիան չէր կարող «հրաժարվել իր դաշնագրային պարտավորություններից» ոչ թե նրա համար, որ «չէր կարող կենսագործել», այլ այն պատճառով, որ ցանկանում էր կենսագործել իր նպատակներին ծառայեցնելու համար:

Այդ ժամանակ Արևելքում ցարական Ռուսաստանի և Անգլիայի միջև գնում էր մի համառ պայքար: Իմպերիալիստական Անգլիան իր թաթը դրել էր Արևելքի վիթխարի երկրների վրա, արդեն լիովին ապահովել էր մայր երկրի և գաղութների միջև ծովային հաղորդակցությունը և վամպիրի պես ծծում էր այդ երկրների կենսական հյուսթերը: Կապիտալիստորեն նոր զարգացող Ռուսաստանը նույն ուղիով էր ընթանում: Պամիրում նա արդեն մոտենում էր անգլիական գաղութների սահմաններին: Միջին Ասիայում ցարական Ռուսաստանի շահերը Աֆղանստանի միջոցով բախվում էին Հնդկական գաղութի հետ, Պարսկաստանը Միջին Ասիայի և Անդրկովկասի կողմից շրջապատված էր և այդտեղից դուր էր բացվում դեպի Հնդկական օվկիանոսը, Սև ծովում իրեն արդեն զգացնել էր տալիս ռուսական նավատորմից: Այսպիսի բարդ մրցակցության պայմաններում Հայկական բարձրավանդակը Անգլիայի համար դառնում էր ստրատեգիական առաջնակարգ կետ՝ Ռուսաստանի դեմ գործելու համար: Այդ պատճառով էլ ցարիզմը ձգտում էր, որ հայկական հարցը մեծ որպես սուկ Թուրքիայի ներքին հարց, առանց Անգլիայի կամ որևէ այլ պետության պրոտեկտորատի, որպեսզի կարողանա իր տնտեսական էքսպանսիան ծավալել դեպի Մերձավոր Արևելք: Այդ առավել ևս կարևոր էր Ռուսաստանի համար, քանի որ Բալկաններում նա իր ոտքի տակի հողը փաստորեն կորցրել էր: Այդ է պատճառը, որ նեյլիդովը թուրքական կառավարությանը հայտնում է՝ «Հայաստանի անկախության մասին երազում են միայն Անգլիայում ապրող վտարանդի-

¹ Кан. Мэлькольм-Макколь, Ответственность Англии перед Арменией. Сб. «Положение армян в Турции», 1896, стр. 199.

¹ Մենք այստեղ չենք խոսում եռյակ դաշնակցության և եռյակ համաձայնության միջև գնացող պայքարի մասին, որի արդյունքները հայերի նկատմամբ երևան կկան այստեղ մեզ զբաղեցնող ժամանակից հետո:

ները, իսկ Ռուսաստանը չի կարող լուրջ վերաբերվել նման զառանցանքներին: Նա չի ընդունում միջազգային հայկական հարց և բոլորովին մտադիր չէ այդպիսին ստեղծել» (Ընդգծ. մերն է. — Ս. Մ.):

Եթե ցարական դիվանագիտութունը ժխտում էր հայկական հարցի միջազգային բնույթը, ապա ի՞նչ էր նշանակում նրա կարծիքով Բեռլինի տրակտատի 61-րդ հոդվածը և ինչու էր այն մտցվել միջազգային այդ ակտի մեջ: Այս հարցին ջանում է պատասխան տալ Կ. Պոլսի ցարական դեսպանութան նախկին գլխավոր կցորդ գեներալ-լեյտենանտ Զելենոյը, որը համարվում էր Թուրքիայի գործերին ամենատեղյակ անձնավորություններից մեկը: Հայկական հարցի վերաբերյալ նրա բավական ընդարձակ զեկուցագիրը արտաքին գործերի մինիստրութունն ուղարկում է Նելիդովին հայկական ռեֆորմների նախագիծը կազմելիս դրանով ղեկավարվելու համար: Այդպիսով, Զելենոյի զեկուցագիրը հույժ կարևոր փաստաթուղթ է ցարական դիվանագիտության դիրքը պարզելու գործում՝ 1895 թվականի, հայկական ռեֆորմների, այսպես կոչված, մայիսյան նախագիծը կազմելու համար:

«Հարկ չկա ապացուցելու, — գրում է Զելենոյը, — որ մարդասիրության և կարգուկանոնի բարձր սկզբունքների հովանավորումը չէ, ոչ էլ հայերի նկատմամբ սերը, որոնցով տվյալ դեպքում ղեկավարվում է Անգլիան, այլ մեր սեծովյան նավատորմի վերածնվելը և Միջին Ասիայում Աֆղանըստանի ու Հնդկաստանի սահմաններին մեր մոտենալը նրան ներշնչում են զինվել: Դրա հետևանքով Մեծ Բրիտանիան ամեն կերպ ցանկանում է խափանել վերջին պատերազմից հետո ստեղծված մեր լավ հարաբերությունները Թուրքիայի հետ. դրա համար նա ձգտում է Անդրկովկասի ստրատեգիական և կարևոր սահմանագլխին ստեղծել հայկական Բուլղարիա»: Այդ է պատճառը, որ «Անգլիան և հայերի որոշ մասը աշխատում են, հենվելով Բեռլինի տրակտատի 61-րդ հոդվածի վրա, այդ բարձր սկզբունքների քողարկման տակ, հայկական հարցը զուտ մարդասիրության և Ասիական Թուրքիայում վարչական բարելավումների հարցից վերածել զուտ քաղաքական հարցի, այդպիսով, ստեղծելով Թուրքիայի տե-

րիտորիայի վրա և Ռուսաստանի անդրկովկասյան սահմանագլխին հայերով բնակեցված արտոնյալ պրովինցիա՝ ակներեվորեն ի վնաս նշված պետությունների քաղաքական շահերի»:

Իսկ թե ինչու հայկական ռեֆորմները հակասում են ցարիզմի քաղաքական շահերին, այդ բանը գեներալ Զելենոյը հիմնավորում է նրանով, որ «1) Անգլիան նպատակ է հետապնդում Հնդկաստանից քաղաքական դիվերսիա կատարել դեպի Միջին Ասիա և 2) միաժամանակ կասեցնել մեր քաղաքական ու տնտեսական օրինական ազդեցությունը Եվրոպայի հատուկ միջամտությունից ազատ Ասիական Թուրքիայում, ինչպես այդ արդեն տեղի ունի Եվրոպական Թուրքիայում: Դրա համար գործիք է ծառայում նրա այդ շահերի տեսակետից մեկնաբանվող հայկական հարցը, որը քողարկվում է մարդասիրության և կարգուկանոնի դրոշով, իսկ այդ հարվածը մեզ հասցնելու համար միջոց է ծառայում Ասիական Թուրքիայի որևէ ստրատեգիական կետում, Անդրկովկասի սահմաններին մոտիկ, *conditione qua non* (որպես անխուսափելի պայման) ստեղծել թեկուզ ամենափոքր տարածության վրա, թեկուզ ամենաթույլ, ամբողջ Եվրոպայի կողմից երաշխավորյալ և հայերով բնակեցված պրովինցիա: Ընդ որում Անգլիան ու նրա վիթխարի միջոցները, Եվրոպայի քողի տակ, աննկատելիորեն ու անպատասխանատու և վճռական ուղղություն տվող դեր պետք է խաղան մերթ մեր, մերթ Թուրքիայի դեմ: Այս վարպետ, թեպետև վատ քողարկված, հարվածը մեզ և Թուրքիային Անգլիան հույս ունի հասցնել ոչ միայն մեր համաձայնությունը, այլև մեր օժանդակությունը...»:

«Թուրքիայի պետական սահմանագլխին հայկական այդպիսի արտոնյալ պրովինցիայի աշխարհագրական դիրքն այնպիսին է, որ կարող է Անգլիայի շահերի քաղաքական և ռազմական քաղիս հանդիսանալ դեպի իր շրջապատող երկրները, մյուսների թվում նաև դեպի Քրդստանի կիսանկախ լեռները և Միջագետքի տափաստանները... Առավել ևս վրտանգավոր է, որ անգլիական շահերը այդ սահմանամերձ պրովինցիաներից կուղղվեն դեպի Անդրկովկաս և Պարսկաստան, դրանով կարող է բախում առաջանալ Ռուսաստանի և

Թուրքիայի միջև, երբ այդ ձեռնտու կլինի ներորդ կողմին, իսկ այդպիսի բախման հետևանքը, ինչպես ցույց է տվել պատմությունը, Թուրքիայի համար կլինի իր պրովինցիաներից զրկվելը: Այսպիսով, հայկական արտոնյալ պրովինցիա ստեղծելու մեջ երևում է Թուրքիայի ասիական պրովինցիաների բաժան-բաժան լինելու սաղմը»:

Ըստ զեկուցագրի այդ կետի, որին լիովին համակարծիք էր ցարական կառավարությունը, Թուրքիայի և Ռուսաստանի շահերը համընկնում էին և ցարական դիվանագիտությունն ամեն կերպ պետք է խոչընդոտ հանդիսանար հայկական «արտոնյալ պրովինցիա» ստեղծելու նախագծին:

Քայց ի՞նչ էր հասկանում ցարական դիվանագիտությունը «հայկական արտոնյալ պրովինցիա» հասկացողության տակ, որ նրա կարծիքով հակասում էր միջազգային տրակտատների բովանդակությանը և իբր թե հորինել էին հայերն ու անգլիական դիվանագիտությունը:

Գեներալ Զելենոյը այդ պրովինցիայի էությունը բացատրելու համար գրում է՝ «Անգլո-հայկական ասոցիացիայի պատգամավորությունը նույն 1895 թվականի մարտին հայկական հարցի վերաբերյալ, լոնդոնում ներկայանալով լորդ Քեմբեռլեյին, հայտարարել է, որ նախատեսվող հայկական ռեֆորմների թվում հայկական պրովինցիաների նահանգապետը գտնվի եվրոպական հսկողության տակ, որ քոչվոր քրդերը դիսցիպլինայի ենթարկվեն որոշ տոկոս եվրոպական սպաների միջոցով և որ դատական սխտեմը վերակառուցվի Եգիպտոսի սկզբունքներով»: Այնուհետև դրան իբրև հավելում բերում է Կ. Պոլսի պատրիարքարանի կողմից տերություններին ուղղած դիմումից հետևյալ տողերը՝ «Ռեֆորմների գործադրումը խաբուսիկ կլինի, եթե (հայկական պրովինցիայի) կառավարիչը մշտապես անսպասելի հեռացման վտանգի ենթարկված լինի: Ուստի այդ կառավարիչը պետք է ապահովված լինի իր ֆունկցիաները պահպանելու 6—7 տարվա ընթացքում և ընտրված լինի նույն պայմաններով, ինչ որ կիրանանում: Կառավարիչը պետք է օժտված լինի ռեֆորմներն իրագործելու իր պատասխանատվությամբ»:

Ահավասիկ, այս էր այդ շարաբաստիկ «արտոնյալ պրո-

վինցիայի» բովանդակությունը, որը ցարական դիվանագիտությունը համարում էր ավտոնոմիայի հավակնություն և Ռուսաստանի համար միանգամայն անընդունելի:

Դառնանք այդ հարցին կետ առ կետ:

1. Նահանգապետի եվրոպական հսկողության տակ լինելը հայերի շահերի տեսակետից այլ բան չէր կարող նշանակել, քան այն, որ նրա գործունեությունն ընթանա ոչ այն անարխիայի, կաշառակերության, գափումների մթնոլորտում, որ իշխում էր հայկական վիլայեթներում: Այդ նշանակում էր վերահսկել, որ հայերի վրա դրվող արտակարգ հարկերը տեղի չունենային, իսկ սովորական հարկերը իրենց մահմեդական հարևանների համեմատությամբ եռակի ու քառակի չլինեին, որ այդ պրովինցիայի հայ բնակչությունը բացի պետական հարկերից, հարկատու չլինի նաև քուրդ աշիրեթապետներին, մի խոսքով, որ հայերը իբրև թուրքահայատակներ իրենց իրավունքներով ու պարտականություններով դրվեն նույն պայմաններում, ինչ որ երկրի մահմեդական հպատակները:

Ին՞չ էր արդյոք ցարական դիվանագիտությունը, այդ թվում հենց ինքը՝ զեկուցագրի հեղինակը, թուրքահայության այդ իրավունքները և հակասում էին արդյոք դրանք տրակտատների ոգուն: Այդ առթիվ Զելենոյը գրում է՝ «Տրակտատը նկատի է ունեցել Ասիական Թուրքիայի ամբողջ հայ բնակչությանը դնել օսմանյան բարելավված վարչության կառավարման ներքո և մահմեդականներին հավասար հատկացնել պատվի, կյանքի և զույթի ապահովության բնական, մարդկային իրավունքներ, քանի որ բնակչության ամենաաննշան փոքրամասնությունն անգամ, հնարավորություն չունենալով ավտոնոմիա կամ առանձին քաղաքական կազմակերպություն ձևեր բերել, այնուամենայնիվ իրավունք ունի օգտվել նույն բնական սկզբունքներից, ինչ որ ամենաճնշող մեծամասնությունը»:

Ամենատարրական տրամաբանությունն անգամ հուշում է, որ բավական չէր մշակել այդ «բնական սկզբունքները», հարկավոր էր նաև կիրառել: Սկսած Բեռլինի տրակտատով Թուրքիայի ստանձնած միջազգային պարտավորություններից

մինչև Զելենոյի զեկուցագիրն անցել էր գրեթե երկու տասնամյակ: Հարց է առաջանում, թե այդ տարիների ընթացքում թուրքական կառավարությունն իր ստանձնած պարտականությունը կատարելու գործում դիմե՞լ էր որևէ ռեալ քայլի, որը գոնե մոտավոր երաշխիք ծառայեր, թե նա կյանքում կկիրառի այդ «բնական սկզբունքները»: Ոչ թե Կ. Պոլսի պատրիարքարանի, ոչ էլ անգլո-հայկական կոմիտեի գրություններում, այլ ցարական դեսպան Նելիդովի 1895 թվականի փետրվարի 23-ի գրությանը կցված արքունական խորհրդական Սմիռնովի ամփոփագրում հաղորդվում է՝ «Զնայած տերությունների եռանդուն պահանջներին, դեռ ոչ մի ռեֆորմ չի ձեռնարկված: Հայ բնակչության ունեցվածքը, նրա աշխատասիրության արդյունքը առաջվա պես կողոպտում են հարևան քրդերն ու չերքեզները, որոնց կամայականությունից են կախված հայ գյուղացիների և՛ հավաքած բերքը, և՛ անասունները, և՛ գույքը, և՛ հենց կյանքը»¹: Ուշագրավ է, որ հենց ինքը՝ գեներալ Զելենոյը կասկածում է, որ թուրքիան կկատարի նոր նախագծով նախատեսվող ռեֆորմները: «Եվրոպական երաշխավորությունը, որը կարող է զուգորդվել հայկական արտոնյալ նոր պրովինցիայի հետ, Ռուսաստանի համար անհամեմատ ավելի մեծ պարտավորություն կստեղծի, քան եվրոպական բոլոր պետությունների համար միասին վերցրած: Աշխարհագրական իր դիրքով Անդրկովկասի կողմից սահմանակից Ռուսաստանը եվրոպական արեոպագոսի որոշումները կենսագործողը պետք է հանդիսանա, եթե թուրքիան չպահպանի այդ նոր պարտավորությունները» (ընդգծ. մերն է.—Ս. Մ.): Ուրեմն, նույնիսկ եվրոպական երաշխավորության դեպքում թուրքիան կարող էր չպահպանել իր պարտավորությունը: Իսկ եթե այդ երաշխավորությունը բացակայում էր, ապա առավել ևս հավանական էր, որ թուրքիան չէր պահպանի իր պարտավորությունը: Այս դեպքում, իհարկե, Ռուսաստանը պարտավոր չէր լինի կենսագործել որևէ որոշում և փչացնել իր «լավ հարաբերությունները թուրքիայի հետ»: Այնուամենայնիվ այդ պայմաններում

ցարական դիվանագիտությունը հայերի «կյանքը, գույքը և պատիվը» ապահովելու միջոց համարում է այն, որ «ռեֆորմների իրագործումը թուրքիայի ներքին գործն է», իսկ եթե թուրքիան «չպահպանի այդ նոր պարտավորությունները», ինչպես մինչ այդ եղել էր, այդ այլ բան չէր նշանակում, քան այն, որ լուռ կերպով սանկցիա տալ հայերի բնաջնջմանը: Հետևաբար, հայերի «կյանքի, գույքի և պատվի» ապահովության վերաբերյալ փքուն բառերը լոկ դիվանագիտական դատարկ շաղակրատություններից այն կողմը չէին անցնում, ճիշտ այնպես, ինչպես Անգլիայի քաղաքականության վերաբերյալ ասում է Մալքոլմ-Մաքոլը՝ «Եվ այդ խաղը տարեցտարի ձգձգվում է. բրիտանական հյուպատոսներն ու փոխհյուպատոսները կրկնում են քրիստոնյա անգլիկանական բնակչության նկատմամբ մուսուլմանների կողմից կատարվող անասելի սարսափների մասին միևնույն մոնոտոն պատմությունը, ընդ որում սուլթանի աստիճանավորները միշտ աչքի են ընկնում իրենց դաժանություններով, իսկ բրիտանական դեսպաններն ու արտաքին գործերի մինիստրները բավարարվում են դատարկ ձևականությամբ՝ «Հույս հայտնելով, որ Բ. Դուռը անհայադ պատասխանատվության կենթարկի շարագործներին», երկարատև փորձի հիման վրա լավ գիտենալով, որ Բ. Դուռը այդպիսի բան չի անի»¹: Որ ինչպես Անգլիան, այնպես էլ ցարիզմը միանգամայն համոզված էին, թե «Բ. Դուռն այդպիսի բան չի անի», հետևում է նաև ցարական արտաքին գործերի մինիստրության հույժ գաղտնի հրահանգից, որ տվել էր Նելիդովին: «Մենք հեռու ենք այն մտքից, որ Բեռլինի դաշնագրի համաձայն թուրքական կառավարության խոստացած վարչական ռեֆորմները Հայաստանում կարող են բարերար հետևանքներ ունենալ նույնիսկ Բ. Դուռն հավաստիացումների անկեղծության դեպքում»²:

2. «Արտոնյալ պրովինցիա» ստեղծելու ցուցանիշ ցարական դիվանագիտությունը համարում էր պատրիարքարանի

¹ АВПР. ф. Политархив, д. № 3447, л. 56.

¹ «Полѡженіе армян в Турціи», 1896, стр. 150.

² АВПР, ф. Политархив, д. № 3435. Сасунские дела 1894—95 гг., лл. 10—15.

վերոհիշյալ մեջբերումը, և գեներալ Զելենոյն այդ մեջբերումից հետո անում է հետևյալ ամփոփումը. «Այդ առումով սրբազանը (պատրիարքը) գտնում է, որ այդ ռեֆորմների հաջողութեան առաջին անհրաժեշտ պայմանը հայ գեներալ-նահանգապետ նշանակելն է», որը այլ բան չի նշանակում, քան հայերի կողմից «ավտոնոմիա կամ առանձին քաղաքական կազմակերպություն ձեռք բերելու միտում»: Մինչդեռ հենց իր կողմից բերված ցիտատում հայազգի գեներալ-նահանգապետի մասին խոսք չկա: Այնտեղ միայն ասվում է, որ «կառավարիչը պետք է ընտրված լինի նույն պայմաններով, ինչ որ կիբանանում»: Բայց մի րոպե ենթադրենք, թե այդպիսի միտում իրոք գոյություն ունի: Մի՞թե այդ հակասում էր Բեռլինի և Սան-Ստեֆանոյի տրակտատներին, ինչպես աշխատում է պատճառաբանել Զելենոյը: Հարկավ, այդ տրակտատների համապատասխան հոդվածներում այդ առթիվ ոչ մի ուղղակի նշում չկա: Բայց չէ որ տրակտատները ռեֆորմների ծրագիր չեն, այլ ընդհանուր սկզբունքներ, որոնք միայն հիմք պետք է կազմեն ծրագրի համար: Այլ կերպ ասած, այդ միտումը բխում էր արդյոք տրակտատների համապատասխան հոդվածների ընդհանուր ոգուց: Ահավասիկ հարցը միայն այս կերպով կարելի է դնել: Մինչդեռ Զելենոյը պատճառաբանում է՝ «Ամբողջ Եվրոպայի երաշխավորութեամբ այդպիսի հայկական արտոնյալ պրովինցիա կազմելու վերաբերյալ, թեկուզ կիբանանի ստատուտով, Թուրքիայի համար ուղղակի պարտավորություն չկա ո՛չ Սան-Ստեֆանոյի պայմանագրում, ո՛չ էլ Բեռլինի տրակտատում: Այդ առավելապես լոկ Անգլիայի և Կ. Պոլսի պատրիարքարանի ցանկությունն է»: Իսկ արտաքին գործերի մինիստրությունը Կ. Պոլսի իր դեսպանին հրահանգում է. «Իմ պարտքն եմ համարում ձեր ուշադրությունը հրավիրել գեներալ-լեյտենանտ Զելենոյի կողմից Բեռլինի տրակտատի 61-րդ հոդվածի միանգամայն ճիշտ մեկնաբանության վրա: Այդ հոդվածը բոլորովին նպատակ չունի գերակշռող հայ բնակչությանը արտոնյալ պրովինցիա ստեղծելու և դրանով իսկ Օսմանյան կայսրությունը թուլացնելու: Վերոհիշյալ հոդվածը իսկապես իր մեջ չի պարունակում այդպիսի պարտավորություն և այդ-

տեղ հիշատակված ռեֆորմների բուն էությունը չի որոշվում այդ տրակտատով, որը Եվրոպային իրավունք է տալիս լոկ դիտելու Բ. Դուան կողմից ընտրված այս կամ այն միջոցառումը կիրառելուն» (ընդգծ. մերն է.—Ս. Մ.):

Նախքան հարցը ըստ էության քննության առնելը, մենք անհրաժեշտ ենք համարում երկու ձևական առարկություն անել.

ա) Ինքը՝ զեկուցագրի հեղինակը ընդգծում է, որ «այդ առավելապես Անգլիայի ցանկությունն է» և դրա համար որևէ իրավական հիմք չկա: Բայց չէ որ, ինչպես Զելենոյին քաջ հայտնի էր, Անգլիայի և Թուրքիայի միջև կնքված էր 1878 թվականի ապրիլի 4-ի կոնվենցիան, որով Անգլիան իր վրա էր վերցրել Ռուսաստանի դեմ հայկական վիլայեթների սահմանների պաշտպանությունը, իսկ Թուրքիան պարտավորվել էր այդտեղ անցկացնել «լավագույն» վարչական ռեֆորմներ, որոնք հետագայում ճշգրիտ կերպով պետք է որոշվեին երկու պետությունների կողմից: Հետևաբար, այդ ռեֆորմների բովանդակությունը վերաբերում էր նաև Անգլիային: Այստեղից բխում է, որ Անգլիայի «ցանկությունը» (եթե այդպիսին գոյություն ունենալիս լիներ) իրավական հիմք ունի:

բ) Եթե «արտոնյալ պրովինցիա» ստեղծելու հարցը չէր բխում տրակտատների բովանդակությունից, հապա ինչպե՞ս բացատրել, որ 1880 թվականի սեպտեմբերի 11-ի կոնկետիվ նոտայի տակ ստորագրել էր նաև ցարական կառավարության ներկայացուցիչ Նովիկովը, մինչդեռ այդ նոտայում արձանագրված է. «Շատ հավանական է, որ տեղական բոլոր պահանջմունքները բավարարելու համար անհրաժեշտ կլինի վերանայել զանազան վիլայեթների ներկայիս աշխարհագրական սահմանները», հետևաբար, այդ նոտայով և հատկապես այդ կետով ընդգծվում էր, որ տարբեր վիլայեթները կարող են վերակառուցվել այնպես, որ ռեֆորմների ենթակա շրջաններում հայկական հոծ բնակչություն կազմվի: Արդ՝ ինչո՞վ բացատրել, որ այդ հանգամանքը 1880 թվականին համարվում է տրակտատներից բխող, իսկ 1895 թվականին՝ տրակտատներին հակասող և համարվում էր «արտոնյալ պրովինցիա»: Ինչո՞ւ այդ ժամանակ դա նաև Ռուսաստանի ցան-

կուսությունն էր, իսկ հետո՝ միայն Անգլիայի և Կ. Պոլսի պատրիարքարանի:

Սակայն դառնանք բուն հարցին և տեսնենք, թե քրիստոնյա (կամ հայազգի) կառավարչի վերաբերյալ պահանջը բխում էր արդյոք Բեռլինի տրակտատի գուցե, թե դա լոկ մի երևակայություն էր:

Զգիտես ինչու, ինչպես Զելենոյի նման բյուրոկրատները, այնպես էլ որոշ հետազոտողներ, հայկական հարցի վերաբերյալ խոսելով Բեռլինի տրակտատի մասին, նկատի են առնում միայն 61-րդ հոդվածը: Մինչդեռ այդ տրակտատի, օրինակ, 62-րդ հոդվածը թուրքահայատակ մյուս քրիստոնյաների հետ միասին վերաբերում էր նաև հայերին. այդ հոդվածում մենք կարդում ենք՝ «Որովհետև Բ. Դուռը ցանկություն է հայտնում ամենալայն շահերով կրոնական ազատություն պաշտպանել, ուստի տրակտատն ստորագրող տերություններին նա տեղեկացնում է իր այդ հոժարակամ որոշման մասին: Օսմանյան կայսրության ոչ մի մասում կրոնական տարբերությունը ոչ ոքի խոչընդոտ չպետք է ծառայի քաղաքացիական և քաղաքական իրավունքներից օգտվելուն, պետական և պատվավոր պաշտոններ զբաղվելուն, զանազան պրոֆեսիաներով և գործունեությամբ զբաղվելուն» (ընդգծ. մերն է.— Ս. Մ.): Մեր կողմից արդեն հիշատակված արքունական խորհրդական Սմիռնովի ամփոփագրում ասված է՝ «Սուլթանի հավատարմատարը ամեն կերպ հավատացնում էր, որ հայերը սուլթանի մյուս հպատակների հետ օգտվում են լիակատար իրավահավասարությամբ, հիշատակում էր, որ ամենահարուստ բանկիրները և շատ բարձր աստիճանավորներ հայեր են» (ընդգծ. մերն է.— Ս. Մ.):

Եթե «Օսմանյան կայսրության ոչ մի մասում հայ լինելու հանգամանքը չէր կարող խոչընդոտ ծառայել պետական և պատվավոր պաշտոններ զբաղվելուն», եթե «շատ բարձր աստիճանավորներ կարող էին լինել հայեր», ապա այդ շատ ծանրակշիռ հանգամանք է ընդունելու, որ հայկական նահանգների կառավարիչը կարող էր լինել հայ և այդ չէր հակասի ո՛չ մեր հիշատակած հոդվածի բովանդակությանը, ո՛չ էլ սուլթանական իշխանության պրեստիժին, քանի որ այդ

կառավարիչը հանդիսանալու էր քուրֆական պաշտոնյա և կենսագործելու էր այն ունեցողները, որ հրապարակելու էր սուլթանական կառավարությունը: Հարցը միայն նպատակահարմարության խնդիրն է: Պատրիարքարանի և անգլո-հայկական կոմիտեի կարծիքով, հայազգի կառավարիչը ավելի լավ կապահովեր թուրքական կառավարության կողմից օրինադրական ճանապարհով ընդունված ունեցողների հաշտությունը, կամ եթե ասելու լինենք հենց գեներալ Զելենոյի բառերով՝ հայերի կյանքի, գույքի և պատվի ապահովությունը: Հարկավ, կարելի է դրա հետ չհամաձայնել, օրինակ, առարկել, որ այդ դեպքում կնստմանան քրդերի իրավունքները: Այդ այլ հարց է: Բայց որ այդ «միտումը» (եթե իրոք դա գոյություն ունի) ոչնչով չէր հակասում Բեռլինի տրակտատին, ոչ էլ շոշափում էր սուլթանի պրեստիժը, ինչպես հավատացնում էր Զելենոյը, այդ մասին հագիվ թե կասկածելիս լինեն նույնիսկ ցարական դիվանագետները: Այդ նրանց համար պատրվակ էր, այն էլ վատ շղարշված պատրվակ: Ցարիզմին հետաքրքրողը այդ չէր, այլ այն, ինչպես խոստովանում է Զելենոյը, որ «Ռուսաստանը չի կարող անտարբեր վերաբերվել իր Անդրկովկասի սահմանագլխին մոտիկ այնպիսի քաղաքական և ռազմական բազիս ստեղծելուն, որը նրան զրկեր Ասիական Թուրքիայի մեր սահմանակից պրովինցիաներում օրինական գերակշռող ազդեցությունից»: Հասկանալի է, որ «ազդեցության օրինական գերակշռության» համար բացարձակապես ոչ մի նշանակություն չէր կարող ունենալ, թե այդ պրովինցիայի կառավարիչը ինչ ազդեցության էր պատկանում: Հետևաբար, այդ լոկ պատրվակ կարող էր ծառայել այն իմպերիալիստական գոտեմարտի համար, որ գոյություն ուներ ցարական Ռուսաստանի և Անգլիայի միջև Արևելքում ընդհանրապես և Մերձավոր Արևելքում հատկապես:

3. Համիդի գնդերի գոյության փաստը, հարկավ, մահացու հարված էր թուրքահայ բնակչության համար, բայց մյուս կողմից դա մի ռազմական քաղաքականություն էր՝ ուղղված ռուսական կայսրության դեմ: Ինչպես հայերի, այնպես էլ Ռուսաստանի շահերի տեսակետից, իհարկե, լավագույնն այն կլիներ, որ այդ գնդերը իսպառ վերանային: Բայց

զեկուցագրի հեղինակն ինքը ևս քաջ գիտակցում էր, որ Թուրքիան ոչ մի դեպքում չի համաձայնի այդ քայլն անել: Հետևաբար, այդ գնդերի գոյության փաստը մի շարիք էր, որ եթե հնարավոր չէր վերացնել, ապա պետք էր վտանգը գոնե նվազագույն շահերի հասցնել: Ահա այս էր պատճառը, որ անգլո-հայկական կոմիտեն իբրև վտանգազերծման միջոց առաջարկում էր եվրոպական սպաների միջոցով ուղղութուն տալ նրանց գործունեությանը, որ դրանք ծառայեն իրենց անմիջական ղինվորական նպատակներին և պատուհաս չլինեն բուն խաղաղ ժողովրդի զլխին: Իսկ այդ միջոցառումը հակասում էր Ռուսաստանի հեռանկարներին, քանի որ այդ դեպքում համիդիե գնդերը փաստորեն կընկնեին Անգլիայի ազդեցության տակ և հրաշալի ուժ կծառայեին Անգլիայի էքսպանսիոն քաղաքականության համար: «Այդ միջոցառումը,— գրում է Ջելենոյը,— հազիվ թե ընդունելի լինի թուրքական կառավարության համար, որովհետև չպետք է մոռանալ, որ այդ գնդերը ցեղային են և իրենցից ներկայացնում են քրդական ցեղեր, որոնք այնքան էլ հավատարիմ չեն կառավարությանը և այդ պատճառով հեշտութեամբ կարող են օտարերկրյա սպաների միջոցով վերածվել օտար շահերի պրոպագանդայի գործիքի ամբողջ Քրդստանում»: Բայց ցարիզմի համար էականը նաև մի ուրիշ հարց էր, որը նրան այդ հարցում ևս կողմնակից էր դարձնում. Թուրքիային, այն է հանդուրժել համիդիե գնդերի գոյության փաստը այնպես, ինչպես կային, առանց որևէ փոփոխության: «Եվրոպական սպաների և դրամի միջոցով բազմաթիվ ընշաքաղց, բայց միջոցների բացակայության պատճառով անկազմակերպ քուրդ հեծյալ հրոսակախմբերի կազմակերպումը չի կարող ժպտալ Ռուսաստանին, քանի որ դրանք, Անդրկովկասի համար այժմ նվազ վտանգ ներկայացնելով, կազմակերպվելու և հեծելազորի մասսայի ռազմական նշանակություն ստանալու դեպքում Անդրկովկասի համար իրոք որ իսկական վտանգ կներկայացնեն»: Ուրեմն ցարիզմի հեռանկարների տեսակետից համիդիե գնդերի այնպես մնալը, ինչպես կային, շարիքների փոքրագույնն էր համարվում, ուստի ցարական դիվանագիտությունը այդ հարցում ևս պաշտպան էր

կանգնում Թուրքիային, չնայած այդ դեպքում Ռուսաստանի սահմանամերձ վիլայեթներում հայերի բնաջնջումն անխուսափելի էր դառնում:

Որ այդ բանում համոզված էր ցարական դիվանագիտությունը, պարզ երևում է մեր կողմից հիշատակված գաղտնի հրահանգից, որտեղ ասված է՝ «Տեղանքի պայմանները և թշնամի ու վայրենի ցեղերով շրջապատված հայ բնակչության կյանքը, երկրում սանձարձակ քրդական զորքերի ներկայությունը — այս բոլորը շատ լուրջ խոչընդոտներ են ծառայում Փոքր Ասիայի հյուսիս-արևելյան ծայրամասում հաստատուն և հանգիստ իրադրություն հաստատելու համար»:

4. «Հայկական արտոնյալ պրովինցիա» ստեղծելու իբր թե գոյություն ունեցող միտումը գեներալ Ջելենոյը հիմնավորում էր նրանով, որ այդ ժամանակ շատերը, այդ թվում նաև Կ. Պոլսի պատրիարքարանը, հայկական վիլայեթների ռեֆորմների համար իբրև օրինակ մատնացույց էին անում «Լիբանանի օրգանական ստատուտը»: Ահա այս էր այն հիմնական կետը, որը ցարական դիվանագիտության աչքին երեւում էր որպես «հայկական արտոնյալ պրովինցիա», որի դեմ ծառու էին լինում ցարիզմի դիվանագետները:

Ինչ 1880 թվականի հոկտեմբերի 18-ին Անատոլիայի անգլիական գերագույն հյուպատոս Վիլսոնը մի զեկուցագիր է ներկայացնում Կ. Պոլսի անգլիական դեսպան Գոշենին, որտեղ առաջարկվում է, որ տերությունների ներկայացուցիչները բնութեան առնեն, թե կազմակերպական ինչ ձև են ընդունելու հայկական ռեֆորմները: Վիլսոնն իր կողմից նպատակահարմար է համարում որպես օրինակ ընդունել «Լիբանանի օրգանական ստատուտը»: Նա գտնում է, եթե տերությունները մտադիր չեն պնդելու, որ Բ. Գուլը ռեֆորմների որոշակի ծրագիր ընդունի, ապա ինքը ոչ մի հույս չունի, թե որևէ ռեֆորմ կկատարվի և երկիրը կփրկվի գոյություն ունեցող անարխիայից:

Այդ «օրգանական ստատուտի» հիմնական հարցերը հետևյալներն էին: Օսմանյան կառավարության կողմից նշա-

նակվում է մեկ նահանգապետ, որի թեկնածուները համա-
ձայնեցվում է տերութունների հետ: Նահանգապետը օժտված
է գործադիր լիազորություններով, նշանակում է վարչական և
դատական պաշտոնյաներին, հետևում է և վերահսկում է
հարկազանձմանը, պետական եկամուտներին ու տեղական
ծախսերին: Տեղական ժողովուրդներից յուրաքանչյուրից ըն-
տրվում են մեկական ներկայացուցիչ, որոնք հանդիսանում
են նահանգապետի օգնականները հատկապես իրենց ազգա-
յին գործերի գծով: Կիբանանը բաժանվում էր մարզերի այն-
պես, որ յուրաքանչյուր մարզում ապահովված լինի ազգային
մեծամասնություն: Կարգն ապահովելու համար կազմակերպ-
վում է ներքին ոստիկանություն տեղական բնակչությունից
ազգային ցուցանիշով՝ 1000 բնակչին 7 հոգի: Նահանգապե-
տը հարկավոր դեպքում կարող էր պահանջել կանոնավոր
զորքի օժանդակություն:

Վիլսոնի կարծիքով, այդ սկզբունքով պետք է կազմվի
հայկական վիլայեթների ռեֆորմների ծրագիրը: Սակայն,
նկատի ունենալով, որ առանց տերութունների հսկողության
այդ ծրագիրը լոկ անվանական կլինի, Վիլսոնն առաջարկում
է, որ ֆինանսների կառավարիչը և գլխավոր ոստիկանապետը
լինեն եվրոպացիներ, իհարկե, ենթակա լինելով նահանգա-
պետին:

Այդ տեսակետից ուշագրավ է էրզրումի անգլիական
հյուպատոս Տրոտտերի մոտեցումը, մի մարդու, որին ինքը՝
Ջեյկնոյը համարում է գործին միանգամայն տեղյակ, անա-
շառ և տաղանդավոր գործիչ:

Տրոտտերը իր 1880 թվականի սեպտեմբերի 27-ի գեկու-
ցագրում, մանրամասն կանգ առնելով հայ-քրդական հարցի
վրա, գրում է, որ էականը այն չէ, թե այդ ժողովուրդներից
որն է իր թիվ գերակշռում, այլ այն, որ ապահովված լինի
այդ վիլայեթների ամբողջ բնակչության կյանքի և գույքի ան-
վտանգությունը: Որովհետև գոյություն ունեցող վարչական
սիստեմի ամենագլխավոր արատը գործադիր վարչության մեջ
հայերի իսպառ բացակայությունն է, ուստի միանգամից այդ
փոխելը կարող է բարդություններ առաջացնել տեղական ազ-
գաբնակչության հարաբերությունների մեջ: Այդ պատճառով

մինչև ռեֆորմները լիովին կիրառելը հարկավոր է որոշ ժա-
մանակամիջոց (մոտավորապես 10 տարի), որպեսզի տեղա-
ցիներից վարչական գործիչներ պատրաստվեն: Ահա այդ ժա-
մանակամիջոցում վարչական բարձրագույն պաշտոնները
պետք է վարեն եվրոպացիները: Անդրադառնալով հատկա-
պես քրդերի հարցին, նա գտնում է, որ դժվար է հայկական
հարցը լուծել անկախ քրդական հարցից: Այս տեսակետից
քրդական հարցը նա բաժանում է երկու մասի: Ինչ վերաբե-
րում է նստակյաց քրդերին, որոնք հիմնականում նույնպես
զբաղվում են խաշնարածությամբ, բայց միաժամանակ կապ-
ված են նաև հողագործության հետ, նա գտնում է, որ նըս-
տակյաց քրդերի մեծամասնությունը նույնպես տառապում է
թուրքական վարչության արատավոր սիստեմից: Ուստի նըս-
տակյաց մահմեդականները (քրդերը և թուրքերը) պետք է
առնվեն ռեֆորմների ոլորտի մեջ, քանի որ հիմք չկա, որ-
պեսզի նստակյաց քրդերի և թուրքերի վրա շտարածվեն այն
օրենքներն ու հաստատությունները, որոնք նախատեսվելու են
հայերի համար:

Նստակյաց բնակչության ապահովությունը մեծապես
կախված է նրանից, թե ինչ կազմակերպական ձև կհաղորդվի
քրդական ֆոշվոր աշխրեթների սիստեմին: Նա գտնում է, որ
գոյություն ունեցող ցեղական կազմակերպության սիստեմը
վերացնել այժմ անհնարին է: Առայժմ աշխրեթապետների
վրայից պետք է վերցնել աշխրեթների և թուրքական կառա-
վարության միջև միջնորդ ծառայելու ֆունկցիաները և դրանք
հանձնել հատուկ բարձրաստիճան պաշտոնյաների: Բո-
լոր աշխրեթները մեկ վարչության սիստեմով միավորելու
նպատակով նշանակել մեկ «ամիրաթ մեմուր» (ցեղերի կա-
ռավարիչ) և նպատակահարմար կլինի այդ պաշտոնին նշա-
նակել եվրոպացի: Նա պետք է ունենա օգնականներ և բա-
վարար քանակով, բայց ոչ մեծ պահակախումբ, որի հետ
բարձրաստիճան պաշտոնյաները պետք է շրջեն մեկ ցե-
ղից մյուսի մոտ և կատարեն վարչական ֆունկցիաներ, որոնց
մեջ պետք է մտնի ավագակներին և օրինազանցներին ձեր-
բակալելը և տեղնուտեղը պատժելը: «Ամիրեթ մեմուր»-ը
գործելու է նահանգապետի հսկողության տակ:

Այս ամենից տեսնել «Հայկական արտոնյալ պրովինցիա», որի էությունը այլ բան չէ, քան «հայկական ավտոնոմիա կամ քաղաքական անկախություն» և որի մասին «գառանցում են», ինչպես գրում էին ցարիզմի դիվանագետները, առնվազն անբարեխղճություն է: Եվ իրոք, ըստ այդ կարծիքների, նահանգապետը նշանակվելու էր օսմանյան կառավարության կողմից, հետևաբար, նա այդ կայսրության պաշտոնյա պետք է հանդիսանար, իսկ որ նրա թեկնածությանը հավանություն պետք է տալին տերությունները, այդ նրա անձնական հատկությունների նկատմամբ, որ կարող է բարեխղճորեն կատարել իր ստանձնած պարտականությունները, լոկ վստահության խնդիր է: Իսկ եթե նկատի ունենանք, որ պրովինցիայի յուրաքանչյուր ազգություն ունի իր ներկայացուցիչը, և մարզերը կազմվում են ըստ ազգային մեծամասնության, իսկ պաշտոնները նշանակվում են ազգությունների քանակին համեմատական՝ ըստ բնակչության թվի, որ նստակյաց հայ, թուրք և քուրդ ժողովուրդները օգտվում են նույն իրավունքներով և վարչականորեն կառավարվում են միևնույն վարչություններով, տարօրինակ կլինի այդ ամենի մեջ հայերի համար տեսնել արտոնյալ վիճակ: Այդպիսի եզրակացությունն առավել ևս անհեթեթ է դառնում, երբ Զելենոյը, Գրյազնովը և մյուսները, հետևելով թուրքական կառավարության տվյալներին, գտնում են, որ հայերը այդ վիլայեթներում կազմում էին բնակչության 14—16%—ը: Եթե այդ այդպես էր և իրենք դրանում համոզված էին, ապա հայերի մասնակցությունը վարչության մեջ, ըստ վերոհիշյալ նախագծի, որը արտահայտությունն է «Լիբանանի օրգանական ստատուտի», պետք է արտահայտվեր իրենց թվի համեմատությամբ, այսինքն՝ 14—16%—ով: Այլ բան է, որ այդ տոկոսային արտահայտությունը իրական դրության խեղաթյուրման արդյունք էր: Այդ հարցին մենք կանդրադառնանք ստորև: Բայց մի կողմից, ելակետ ունենալ այդ տվյալները, իսկ մյուս կողմից, հայտարարել, որ այդպիսի ռեֆորմներն այլ բան չեն, քան «Հայկական արտոնյալ պրովինցիա», այդ նշանակում է կորցնել ամեն մի բանական դատողության ընդունակություն, քանի որ մեր բերած բոլոր տվյալներում, որ քաղում ենք

հենց Զելենոյի ղեկուցագրերից, հայերի «արտոնությունը» լոկ այն է, որ նրանք իրավունքով հավասարեցվում են հարևան թուրքերին և նստակյաց քրդերին:

Բայց իրականում, ինչպես Անգլիայի, այնպես էլ ցարիզմի համար այդ, այսպես կոչված, «մարդասիրության սկզբունքները» լոկ շղարշ էին քողարկելու այն նպատակը, որ նրանք հետապնդում էին: Անգլիան ջանում էր, պատրվակ դարձնելով հայկական հարցը, իր համար հենակետ ստեղծել Վանա լճի ափերը և այդտեղից իր էքսպանսիան տարածել նրա շրջակայքից շատ հեռու: Ցարական Ռուսաստանը շատ լավ տեսնում էր նրա այդ հեռանկարները, Մերձավոր Արևելքը համարելով իր բաժինը և իր քաղաքական ու տնտեսական ազդեցության ոլորտը, ամեն կերպ աշխատում էր ընդդիմանալ Անգլիային: Եվ հայ ժողովրդի դժբախտությունն այն էր, որ հայերին «հովանավորելու» պատրվակով հանդես էին եկել տարամերժ շահերով երկու ռիսերիմ ախոյան: Զելենոյը իբրև իմպերիալիստական հմուտ գործիչ նախազգուշացնում էր ցարական դիվանագիտությանը՝ «Հայկական արտոնյալ պրովինցիան, գտնվելով կիսաանկախ Քրդստանի սահմաններում և Ռուսաստանի ու Պարսկաստանի սահմանների մոտ, ստրատեգիորեն սպառնալով մեր Երևանյան ռազմաճակատին, անգլիացիների համար հին Հայաստանի պատմական այդ օրրանը քաղաքական և մասամբ էլ ռազմական բազիս կժառանգի այդտեղից ազդելու Անդրկովկասի, Պարսկաստանի և թուրքական վիլայեթների սահմանակից հայ բնակչության վրա: Վանի և Մուշի սանջակներում, ինչքան էլ դրանք աննշան լինեն, անգլիացիները, եթե թույլ տան Թուրքիան և Ռուսաստանը, կգտնեն իրենց արքիմեդյան հենակետը»:

Բարի: Իսկ «հայկական հարցը»: Իսկ ամեն պատեհ առիթով տեղին ու անտեղի կրկնվող «մարդասիրական իրավունքները»: Այդ մասին գեներալ Զելենոյը գրում է՝ «Իմ գործը չէ և իմ գիտելիքները թույլ չեն տալիս քննարկել այն միջոցառումները, որոնք առավել նպատակահարմար կլինեն հայկական հարցում ընդունել մարդասիրության, Ռուսաստանի և Թուրքիայի ընդհանուր շահերի համար: Բայց եթե ինձ թույլ:

տրվի թվել այդ ընդհանուր նպատակի համար միայն ընդհանուր սկզբունքները, ապա դրանք, իմ կարծիքով, հետևյալներն են.

1. Մասնակցել ոչ թե որոշ տերիտորիայի վրա ապրող թուրքահայերի, այլ բոլոր 9 վիլայեթների թուրքահայերի, անկախ նրանց մեծամասնություն կամ փոքրամասնություն լինելուց, մասնեղականների հետ պատվի, կյանքի և գույքի մարդկային հավասար իրավունքների ապահովման գործին, ինչպես այդ պահանջում է Բեռլինի տրակտատը, շնամացնելով Բ. Դոան գերագույն իրավունքները»:

Որ այս կետը բացի դատարկ շաղակրատությունից, թուրքահայության համար որե՛տ իրական բարիք չէր պարունակում՝ բխում է նրա մեջ պարունակվող հակասություններից: Նախ՝ գեներալ Զելենոյը դիտավորյալ կերպով իր աչքերը փակում է այն իրողության առաջ, որ թուրքական պետականության հիմքում ընկած էին Ղուրանի դոգմաները, որոնցով ուղղահավատների և գյավուրների միջև ժխտվում էր մարդկային իրավունքների հավասարությունը, ուստի հայերին՝ իբրև քրիստոնյաների մասնեղականների հետ համահավասար իրավունքներ հատկացնելը հակասում էր Թուրքիայի պետական սկզբունքին, հետևաբար, այդ նշանակում էր Բ. Դոան գերագույն իրավունքների նսեմացում: Երկրորդ՝ եթե ցարական դիվանագիտությունը մյուս տերությունների ներկայացուցիչների հետ միջամտելու էր թուրքահայտակ հայերի հարցին, այսինքն՝ սուլերեն պետության և նրա հպատակների հարաբերությանը, այդ ինքնին նշանակում է, որ միջամտում էր այդ պետության ներքին գործերին, հետևաբար, նսեմացնում էր այդ իրավունքը, ապա հայերի «կյանքի, գույքի և պատվի ապահովությունը» մնում էր որպես Թուրքիայի սուլերենությունից բխող հարց և միջամտությունը լոկ դատարկ շաղակրատություն էր:

«2. Մասնակցել նույն մարդկային իրավունքների ապահովման գործին նաև Ասիական Թուրքիայի մասնեղական մեծամասնության համար, նույն պայմաններով՝ շրջափելով Բ. Դոան գերագույն իրավունքները»:

Այս կետը իրոք որ զավեշտական է: Եթե գեներալ Զելե-

նոյը իր «ընդհանուր սկզբունքների» առաջին կետով գտնում էր, որ թուրքահայերն իրենց իրավունքներով պետք է հավասարվեն մասնեղականներին, ապա 2-րդ կետով նա գտնում է, որ մասնեղականների իրավունքները պետք է ապահովել, բայց ումնի՞ց պետք է ապահովել...

Վերջապես, եթե հայերի գործին ցարական դիվանագիտությունը միջամտելու էր ելնելով Բեռլինի տրակտատից, հարց է առաջանում, միջազգային իրավունքի այդ ո՞ր սկզբունքի հիման վրա էր, որ այդ դիվանագիտությունը ցանկանում էր «հանուն արդարության» զբաղվել թուրքահայտակ մասնեղականների գործով և այդ արվելու էր «շրջափելով Բ. Դոան գերագույն իրավունքները»:

Եթե Զելենոյի «ընդհանուր սկզբունքների» այդ երկու կետերը հակասական ու անիմաստ բառերի կույտ էին, ապա նրա այդ «սկզբունքների» մյուս երկու կետերը գլխովին զբսևորում էին ցարական դիվանագիտության միտումները:

«3. Ոչ մի դեպքում չհամաձայնել ոչ միայն 9 կամ ավելի պակաս վիլայեթներից, այլև 2 սանջակից, նույնիսկ այդ սանջակների մեկ կազայից կազմված հայկական արտոնյալ պրովինցիա ստեղծելու հետ, ինչքան էլ այդ կազակում հայերի թիվը գերազանցելիս լինի, քանի որ՝ ա) այդ պարտադիր չէ ըստ Բեռլինի տրակտատի, բ) բացարձակապես անարդարացի է, գ) քաղաքականապես վտանգավոր է Ռուսաստանի և Թուրքիայի շահերի համար»:

Ինչպես մենք տեսանք, զեկուցագրի հեղինակը, ցարական ամբողջ դիվանագիտության հետ միասին, այդ վտանգը տեսնում էր նրանում, որ այդ պրովինցիայի ղեկավարությունը կանցնի Անգլիային: Հարց է առաջանում. մի բույն ենթադրենք, որ Ռուսաստանին առաջարկվում էր Անգլիայի հետ հավասար մասնակցություն ունենալ այդ պրովինցիայի կանոնավորման գործում, այլ կերպ ասած, կասեցնել Անգլիայի կողմից սպառնացող վտանգը. այդ դեպքում ցարական դիվանագիտության կարծիքով կարելի էր արդյոք թույլ տալ, որ այդ նախագիծն իրագործվի:

Այդ հարցի պատասխանը մենք գտնում ենք Զելենոյի «ընդհանուր սկզբունքների» 4-րդ կետում:

«4. Առաջնորդվելով տրակտատներով, ընդհանուր մարդասիրության և Բ. Դոան գերագույն իրավունքները, ինչպես և Ռուսաստանի քաղաքական շահերը պահպանելու սկզբունքներով, 3-րդ կետը թույլ չտալ, նույնիսկ եթե մեզ հրավիրեն մասնակցելու արտոնյալ պրովինցիայի կառավարմանը, քանի որ այդ առաջարկը Անդրկովկասի և Ռուսաստանի շահերի համար հղի է բազմաթիվ վտանգներով»¹:

Այս բոլորից այլ բան չէր հետևում, քան այն, որ Բեռլինի տրակտատով նախատեսված հայկական հարցը չէին կարող լուծել տրակտատն ստորագրող տերությունները, որոնք, և բանով-Ռուստովսկու կարծիքով, «իրավունք ունեին լուրջ հետևելու Բ. Դոան կողմից ընտրված այս կամ այն միջոցառումների կիրառմանը»: Իսկ Թուրքիան՝ Անգլիայի և ցարական Ռուսաստանի դիվանագիտության համաձայնությամբ, իր հասկացած ձևով սկսեց լուծել հայկական հարցը, այն է՝ կառավարության կողմից կազմակերպված շարժերի և կոտորածների միջոցով:

Ինչպես բոլոր կառավարությունները, այնպես էլ, իհարկե, ցարական կառավարությունը հարկադրված էր այս կամ այն շափով հաշվի առնել ինչպես միջազգային, այնպես էլ ռուսական հասարակական կարծիքը: Ուստի նա հարկադրված էր մասնակցել հայկական կոտորածների շուրջն ստեղծված հանձնաժողովներին, նպատակ ունենալով սուլթանիզմը փրկել մեղադրանքների տարափից: Բայց հայտարարելով, որ «հայկական արտոնյալ պրովինցիա» ստեղծելը չի բխում Բեռլինի տրակտատի սկզբունքներից, կամ այդ չի համապատասխանում Թուրքիայի և Ռուսաստանի շահերին, դրանով ուժեղացրեց հարցը ձախողել դժվար էր, քանի որ Թուրքիան, ինչ էլ աներ, այնուամենայնիվ իր վրա այդ առումով միջազգային պարտավորություն էր վերցրել: Հայկական ուժեղացումները ձախողելու համար հարկավոր էին ավելի ծանրակշիռ պատճառաբանություններ: Եվ այդ պատճառաբանու-

¹ Գեներալ Ջեկոնտից բերված բոլոր մեջբերումները քաղված են նրա 1895 թ. մայիսի 8-ի զեկուցագրից: Տես АВПР, ф. Политархив, д. № 3440, лл. 5—23.

թյունը գտնվեց: Ցարական դիվանագիտությունն իր նպատակները իրագործելու համար կյանքի կոչեց դեռևս 1880 թվականին Աբդուլհի փաշայի հորինած «վիճակագրությունը», որն իր ժամանակին մյուս տերությունների հետ միասին ցարական դիվանագիտությունը ևս անարժանահավատ և միտումնավոր էր համարում, իսկ 1895 թվականին այդ նույն տվյալները ցարիզմի աչքում դարձել էին անկասկածելի:

Արքունական խորհրդական Գրյազնովը իր հատուկ «Թըղթում» («Записка») այդ առթիվ գրում է՝ «Հայերը Ասիական Թուրքիայում ոչ միայն գերակշռող մեծամասնություն չեն կազմում, այլ նրանք ուղղակի կորչում են մահմեդականների զանգվածի մեջ, ինչպես այդ երևում է կցված աղյուսակներից, որոնք ես կազմել եմ Քյուլինի աշխատության հիման վրա: Քյուլինի տվյալները, իհարկե, չի կարելի բացարձակապես ճիշտ համարել, որ լիովին հասկանալի է այն միանգամայն բացառիկ պայմանների շնորհիվ, որոնց մեջ շարունակում է ապրել Թուրքիան... Բայց մի բան անպայման ճիշտ է, որ հայերը Ասիական Թուրքիայի մյուս, առավելապես մահմեդական, բնակչության կազմում ակներև փոքրամասնություն են՝ 9 վիլայեթների 5 947 785 բնակչության ընդհանուր թվից հայերը կազմում են 847 041 մարդ, կամ բնակչության ընդհանուր թվի 14%-ը... Թուրքական կայսրության բնակչության այդ փոքրամասնության ճակատագրի վրա այժմ կենտրոնացած է ամբողջ քաղաքակիրթ աշխարհի ուշադրությունը, որը, ի դեպ ասած, գրեթե չփոփոխել է նաև Թուրքահայերը և հայերն ընդհանրապես, և Թուրքիայի դրություն մասին դատում է բացառապես նրանով, ինչ կարելի է կարդալ կամ լսել Եվրոպայում, հետևաբար, աստված գիտե թե որերորդ և ինչպիսի ձևերից... Ինչպես հայտնի է, շնորհիվ այն միանգամայն բացառիկ ուժի, որի մեջ ապրում են Թուրքիայի ասիական պրովինցիաները, հավասարապես նաև շնորհիվ այդ պրովինցիաների և արտաքին աշխարհի միջև հաղորդակցության լիովին բացակայության, ինչպես տեղում դիտումները, այնպես էլ դրանց արդյունքների մասին Եվրոպա հաղորդելը անկարելիության շափ դժվար է... Ավելի կանոնավոր աղբյուր հայերից ստացվող տեղեկությունները

են, բայց հայկական աղքատները համենայն դեպս լիակատար վստահության արժանի չեն, որովհետև հայերը շահագրգռված կողմ են...»¹:

Այդ դեպքում բնականորեն հարց է առաջանում, եթե եվրոպացիների համար տեղում դիտումներն անկարելիության շափ դժվար էին, իսկ հայկական աղքատներն անվստահելի, ապա Քյուսիենն ինչպես է կարողացել ինը վիլայեթների մասին այդպիսի վիճակագրական տվյալներ հավաքել, որոնց վրա հենվելով Գոյազնովը ահեղազորոգ եզրակացություն է անում: «Թղթի» հեղինակն այդ մասին լուծում է, բայց հարցին ամեն մի ծանոթ մարդ, ելնելով բերված թվանշաններից, անմիջապես կկուսահի, որ դրանք Աբիդին փաշայի հորինած այն տվյալներն են, որոնք 1880 թվականին կոլեկտիվ նոտայի հեղինակները արատավոր ու կեղծ էին համարում և որոնք հետո գետեղվել էին թուրքական «սալնամեններում»: Այսպիսով, եթե 1880 թվականին թուրքական տվյալները անվստահելի, իսկ հայկական աղքատներից բխողները (Կ. Պոլսի պատրիարքարանի) համեմատաբար ավելի վստահելի էին համարվում, ապա 1895 թ. տրամագծորեն հակառակ պատկերն էր ստացվում: Դրա պատճառը ոչ թե երկու աղքատներից բերվող թվանշանների հակասությունն էր, այլ այդ տարբեր ժամանակներում փոփոխված քաղաքական կուրսը:

Որ «սալնամեններում» գետեղված վիճակագրական տվյալները երկրի բնակչության իրական պատկերի հետ որևէ առնչություն չունեին՝ բխում է այն հանրահայտ փրոպոզիցիանից, որ ոչ միայն 80-ական թվականներին, այլև 1913 թվականին հայկական վիլայեթներում ոչ մի ստույգ մարդահամար չէր եղել: Օրինակ, ամբողջ Բիթլիսի վիլայեթի վերաբերյալ ռուսական հյուպատոսարանի խորհրդական Լեյկոն 1913 թվականին իր գրած հոդվածում, որ լույս է տեսել արտաքին գործերի մինիստրության պաշտոնական օրգանում, գրում է՝ «Բիթլիսի վիլայեթի բնակչությունը, որը դեռ XIX դարի կեսերից անվանապես թուրքական էր համարվում, անփույթ ցուցակագրությունների, ցուցակագրություններից բնակչու-

թյան խուսափելու և քրդական ամբողջ ցեղեր ցուցակագրելու անհնարին լինելու պատճառով, այդտեղի բնակչությունը ճիշտ որոշել չի կարելի»¹:

Ուշագրավ է, որ տվյալները, որոնք Գոյազնովն օգտագործում է ինը վիլայեթի համար, Զելենոյը օգտագործում է 6 վիլայեթի համար, բնականաբար, համապատասխանորեն պակաս թվանշաններով, որոնք, ինչպես հաղորդում է ինքը, վերցրել է էրզրումի անգրիական հյուպատոս Տրոտտերի գեկուցագրից: Մինչդեռ Տրոտտերի գեկուցագրում, ինչպես հաղորդում է Զելենոյը, հենց Աբիդին փաշայի հորինած տվյալներն էին: Ուրեմն այստեղ ևս հանդես են գալիս նույն միտումնավոր թվանշանները:

Զելենոյը համեմատության մեջ է դնում Կ. Պոլսի պատրիարքարանի և Տրոտտերի (ավելի ճիշտ՝ թուրքական) տրվյալները և ստանում է հետևյալ պատկերը՝

Պատրիարքարանի տվյալներով ընդհանուր թիվը 1 831 200, որոնցից մահմեդական՝ 776 500, հայ՝ 780 250, մյուս քրիստոնյաներ՝ 274 000:

Տրոտտերի տվյալներով՝ ընդամենը՝ 4 247 000, մահմեդական՝ 3 252 750, հայ՝ 805 750, մյուս քրիստոնյաներ՝ 186 500:

«Հայերի թիվը,— գրում է Զելենոյը,— որն ավելի լավ էր հայտնի պատրիարքարանին, մտտենում է Տրոտտերի բերած թուրքական պաշտոնական տվյալներին, իսկ մահմեդականների թիվը Տրոտտերի բերած թուրքական տվյալների համեմատությամբ ավելի քան շորս անգամ պակասեցված է»:

Այս երկու տվյալների միջև գոյություն ունեցող հսկայական տարբերությունը գեներալ Զելենոյը բացատրում է հետևյալ դատողությամբ՝ «Պատճառ չունենալով հայկական պատրիարքարանին մեղադրելու մահմեդականների թիվը դիտավորյալ խեղաթյուրելու մեջ, պարզ է, որ նրա աղյուսակներում բերված են միայն այն նստակյաց մահմեդականները, որոնք ապրում էին հայերի հետ նույն գյուղերում և որոնց

¹ АВПР, ф. Политархив, д. № 3448. Армянский вопрос, лл. 56—70.

¹ Известия Министерства иностранных дел, 1913, кн. II, стр. 117.

մասին պատրիարքարանը կարող էր որևէ չափով մոտավոր տեղեկություններ հավաքել, և բաց է թողնված բացառապես մահմեդական գյուղերում բնակվող մահմեդական մեծամասնությունը»¹:

Այժմ աշխատենք վերլուծել այդ տվյալները:

Ամենից առաջ պատրիարքարանի և թուրքական տվյալները տարբերվում են իրենց սկզբունքային մոտեցմամբ, որը շատ կարևոր հանգամանք է: Թուրքական տվյալներում հայերի համար հիմք է ծառայել ազգային ցուցանիշը՝ իսկ թուրքերի և քրդերի համար՝ կրոնական: Պատրիարքարանի տրվյալներում բոլորի համար հիմք է ծառայում նույն ազգային ցուցանիշը: Զեյլենոյը վերցրել և պատրիարքարանի տվյալները վերախմբավորել է թուրքական սկզբունքով, քրդերին և թուրքերին միավորելով միևնույն ռուբրիկայի տակ: Մինչդեռ թուրքական աղբյուրներն այդ սկզբունքը կիրառում էին դիտավորյալ՝ թուրք տարրի տեսակարար կշռի պատկերը թաքցնելու նպատակով: Բազմաթիվ անաշտ վկայություններ մեզ ասում են, որ այդ վիլայեթներում թուրք տարրը շատ աննշան տոկոս էր կազմում: Օրինակ, մենք իր տեղում տեսանք, որ էրզրումի ռուսական հյուպատոսը վկայում էր, որ Բայազետի ամբողջ սանջակում, բացի քաղաքից, թուրք բնակչություն գրեթե չկար: Վերոհիշյալ խորհրդական Լեյկոն Բիթլիսի ամբողջ վիլայեթի վերաբերյալ գրում է՝ «Երկրի տերերը՝ թուրքերը, շատ փոքրաթիվ են, ամբողջ բնակչության հազիվ թե 3—4%-ը կազմելիս լինեն»:

Մի բոլոր նկատի շունենանք պատրիարքարանի տվյալներով թուրքերի բացարձակ թիվը, այլ նկատի ունենանք սոսկ տոկոսային հարաբերությունը: Ըստ այդ տվյալների, թուրքերը կազմում էին բնակչության 15%-ը: Հազիվ թե որևէ տվյալ գտնվի, որով թուրքերի տեսակարար կշիռը այդ վիլայեթներում որոշելիս լինի այդ տոկոսից ավելի: Ընդունենք նաև, որ թուրքական տվյալներն ամբողջ ազգաբնակչության վերաբերյալ համապատասխանում են իրականությանը, այսինքն՝

¹ նույն տեղում:

այդ վիլայեթների ամբողջ բնակչությունը ենթադրենք կազմում էր 4 247 000 մարդ, հետևաբար, թուրքերի բացարձակ թիվը կկազմեր մոտավորապես 600 000 մարդ (հարկավ, ըստ հաշիվների և ոչ թե իրականում): Քանի որ ըստ թուրքական տվյալների ամբողջ մահմեդական բնակչությունը կազմում էր 3 250 000 մարդուց ավելի, բնականաբար, քրդերի ընդհանուր թիվը պետք է լիներ շուրջ 2¹/₂ միլիոն (ինչպես քրիստոնյա, այնպես էլ մահմեդական մանր ազգությունները նկատի չենք առնում):

Մյուս կողմից՝ գեներալ Զեյլենոյը մեզ հաղորդում է՝ «Թուրքիայի և Պարսկաստանի քրդերի ընդհանուր թիվը տարբեր աղբյուրներ հաշվում են շուրջ 2 500 000 (ավելի ճիշտ՝ 2—3 միլիոն)»: Եթե նկատի ունենանք, որ ըստ Տրոտտերի հավաստիացման, քրդերի 1/3-ը ապրում էր Պարսկաստանում, իսկ 2/3-ը՝ Թուրքիայում, ապա կստացվի, որ ամբողջ Թուրքիայում հաշվվում էր շուրջ 1 600 000 քուրդ ազգաբնակչություն, որից 1/3-ից ավելին ապրում էր Հայաստանի սահմաններից դուրս, հետևաբար, այդ տարբեր աղբյուրների տվյալների հիման վրա պետք է եզրակացնել, որ Հայաստանում քրդությունը կազմում էր շուրջ 1 000 000 մարդ: Մինչդեռ թուրքական «սալնամեններում» այդ վիլայեթներում այնքան քուրդ է ցույց տված, ինչքան կային այդ վիլայեթներում, Պարսկաստանում, Իրաքում, Սիրիայում և թուրքական պետության մնացած մարզերում միասին վերցրած:

Բրոկհաուզ և Էֆրոն փոքր հանրագիտարանում (հրատարակ. 1900 թ.) քրդերի ընդհանուր թիվը նույնպես հաշվվում էր 2¹/₂ միլ., որի «կեսից ավելին ապրում է Թուրքիայի սահմաններում»¹:

Տրեդ. Դեյվ. Գրին իր «Հայկական ճգնաժամը և թուրքերի տիրապետությունը» աշխատության մեջ քրդերի քանակի վերաբերյալ բերում է Encyc. Britannica-ի «Kurdistan»-ից հետևյալ տեղեկությունը. «Թուրքիայի քրդերի թիվը հասնում է 1¹/₂ միլիոնի, որոնցից 600 000 ապրում է էրզրումի, Վանի և Բիթլիսի վիլայեթներում, իսկ մնացածը՝ Խարբերդի, Գիար-

¹ Малый энциклопедический словарь, 1900, II, стр. 1332.

բեքիրի, Մոսուլի, Բաղդադի: Ենթադրվում է, որ մինչև 750 000 բուրդ էլ ապրում է Պարսկաստանում»¹:

Զելենոյը նույն Տրոտտերի մի այլ զեկուցագրից բերում է աշխարհագրագետ Թեյլորի (էրզրումի նախկին հյուպատոս) տվյալները, ըստ որոնց հայկական վիլայեթների ամբողջ ազգաբնակչությունը հաշվվում էր շուրջ 2 250 000 մարդ, որոնցից հայեր՝ մոտավորապես 800 000: Այդ հիման վրա Զելենոյը եզրակացնում է՝ «Այս տվյալներով ևս մասնաճակատները քրիստոնյաներին գերազանցում են 2¹/₂ անգամ»: Մինչդեռ, եթե հարցին մոտենանք ազգային ցուցանիշներով, ինչպես այդ արել է Թեյլորը, ապա տվյալների պատկերը հետևյալն է՝

	ըստ Թեյլորի	ըստ պատրիարքարանի
Քրդեր	— 1 000 000	350 000
Հայեր	— 700 000	780 000
Թուրքեր և մյուս. մահմեդակ.	— 500 000	460 000
Ասորիներ	— 100 000	251 000
Եզդիներ	— 20 000	25 000
Հույներ	— 5 000	50 000

Այս տվյալների համեմատությունից մեզ հետաքրքրող հարցի կապակցությամբ ուշադրավ է երկու եզրակացություն. նախ՝ հայերի և թուրքերի վերաբերյալ երկու տվյալները շատ մոտ են միմյանց, երկրորդ՝ պատրիարքարանի տվյալներում քրդերի թիվը նրանց փաստական քանակից շատ ավելի փոքր է արտահայտված: Մյուս կողմից՝ հանրահայտ փաստ էր, որ այդ վիլայեթներում քրդերի քանակը շատ ավելի մեծ էր, քան թուրքերինը, մի հանգամանք, որ չէր կարող հայտնի չլինել պատրիարքարանին: Հարց է առաջանում՝ ինչո՞վ բացատրել այդ հակասությունը: Կարծել, որ պատրիարքարանը այդ արել էր դիտավորյալ կերպով, որ-

պեսզի շփոթության մեջ գցի տերությունների ներկայացուցիչներին, միամտություն կլինի, քանի որ այդքան ակնառու կեղծիք անհնար է երևակայել, երբ բոլոր վիլայեթներում կային այդ պետությունների հյուպատոսարաններ: Ինքը՝ Զելենոյը, ինչպես տեսանք, այդ բացատրում է նրանով, որ պատրիարքարանի տվյալներում արտահայտություն են գտել միայն հայ գյուղերում խառը բնակվող քրդերը: Մինչդեռ հարցին տեղյակ ամեն մեկը կկոահի, թե ինչու՞մն է բանը:

Բնակչության թվական հարաբերության հարցն առաջացել է 1880 թվականին, հայկական ռեֆորմների նախագծի կապակցությամբ, և այդ ժամանակ էլ Կ. Պոլսի պատրիարքարանը տերություններին ներկայացրել է վերոհիշյալ տրվյալները: Հասկանալի է, որ պատրիարքարանի տվյալները պետք է համապատասխան լինեին պետությունների կողմից նախատեսվող սկզբունքներին, որոնք անպայման հայտնի էին պատրիարքարանին:

Ինչպես տեսանք վերևում, Տրոտտերն իր զեկուցագրերից մեկում, խոսելով ռեֆորմների բովանդակության մասին, ասում է, որ ռեֆորմների ոլորտի մեջ պետք է առնել միայն նստակյաց բնակչությանը, այդ թվում նաև նստակյաց քրդերին, իսկ քոչվոր քրդերի համար պետք է ստեղծել նրանց կենցաղին հատուկ վարչական կազմակերպություն: Դեռ 1880 թվականի կոչեկտիվ նոտայում տերությունների ներկայացուցիչները թուրքական կառավարությանը հայտնել էին, որ անհնարին է միևնույն վարչական կազմակերպության մեջ միավորել քոչվոր և նստակյաց բնակչությանը: 1895 թվականին պետությունների ներկայացուցիչների կողմից կազմված ռեֆորմների օրինատիր նախագծի 24-րդ հոդվածն ամբողջությամբ վերաբերում է քրդերի վրա վերահսկողության հարցին. այդ հոդվածը վերջանում է հետևյալ տողերով՝ «Նահիբի խորհրդի մեջ ընտրելու և ընտրվելու իրավունքը չի տարածվում այն անձանց վրա, որոնք նստակյաց կյանք չեն վարում կամ վերջնականապես հաստատված չեն նահիբի երկրամասի վրա»: Այս երկու փաստաթղթերի տակ ստորագրել էր նաև ցարական կառավարության ներկայացուցիչը: Ուրեմն քոչվորի կողմից (բացի թուրքական կառավարությունից) ճա-

1 Шко Положение армян в Турции, 1896, стр. 254.

նաշված ակզբունք էր, որ հայերի «կյանքի, գույքի և պատվի» ապահովութեան հարցը մեծ շափով կապված էր քոչվոր տարրը վարչականորեն առանձնացնելու հետ: Հետևաբար, հայկական ռեֆորմների առնչութեամբ Թուրքիայի կողմից ձեռք առնվելիք միջոցառումները պետք է վերաբերեին սոսկ նստակյաց բնակչութեանը, այսինքն՝ հայերին, մյուս քրիստոնյաներին, թուրքերին և նստակյաց քրդերին: Այստեղից միանգամայն հասկանալի է, որ պատրիարքարանի տվյալները չէին կարող ընդգրկել քոչվոր քրդերին, քանի որ նրանք նահիեում հաստատված բնակչութուն չէին համարվում: Իսկ հանրահայտ փաստ էր, որի դեմ չէին կարող առարկել նույնիսկ Գրյազնովն ու Զելենոյը, որ 80-ական թվականներին քրդերի մեծագույն մասը վրանաբնակ քոչվորներ էին:

Հարկավ, չի կարելի վստահորեն պնդել, թե պատրիարքարանի վիճակագրական տվյալները լիովին ճիշտ էին: Այդ, ինչպես վկայում էին հենց իրենք՝ ցարական դիվանագետները, «անկարելիութեան շափ դժվար էր»: Բայց որ այդ տվյալները ավելի էին համապատասխանում իրականութեանը, քան թուրքական կառավարութեան կողմից դիտավորյալ խեղաթյուրված տվյալները, այդ բանում կասկածել կարող էին կամ գործին անտեղյակ, կամ թուրքական քաղաքականութեանը համախոհ մարդիկ:

Որ ինչպես թուրքական տվյալները, այնպես էլ պատրիարքարանի 1880 թ. տվյալները, բնակչության իրական թվի հետ կապ չունենին, և ըստ ամենայնի արատավոր էին և երկու դեպքումն էլ ի վնաս հայ բնակչության, այդ պարզ կերպով հանդես եկավ 1913—1914 թթ. այսպես կոչված հայկական ռեֆորմների կապակցութեամբ: Այն ժամանակ, երբ 1894—96 թվականների կոտորածների և դրանից հետո հրակայական շափերով գաղթումների հետևանքով հայ տարրի տեսակարար կշիռը զգալիորեն իջել էր, մյուս կողմից՝ ռեֆորմներին ենթակա տերիտորիայի մեջ Գերմանիայի և Թուրքիայի պահանջով մտցվել էր նաև Տրապիզոնի վիլայեթը, որտեղ մահմեդականութունը հոծ մեծամասնութուն էր կազմում և վերջապես քոչվոր և նստակյաց քրդերի անջատման հարցը նկատի չէր առնվել, այդ պայմաններով հանդերձ հաշ-

կական տարրի տեսակարար կշիռը, հենց Գերմանիայի և Թուրքիայի համաձայնութեամբ, որոշվեց 38%⁰։ ընդ որում, վանի և Բիթլիսի վիլայեթներում հայկական տարրի տոկոսային հարաբերությունը 50%⁰-ից անցնում էր, Դիարբեքի, Սվազի, Խարբերդի վիլայեթներում հասնում էր 25—32%, վիճելի էր մնացել միայն էրզրումի վիլայեթի հարցը, որը պարզվելու էր առաջիկա վիճակագրութեամբ:

Հետևաբար, եթե պատրիարքարանի տվյալները բացարձակ թվանշաններով արատավոր էին, այն էլ ի վնաս հայերի, ապա 1913—14 թվականի տվյալները հաստատեցին, որ պատրիարքարանի 1880 թվականի տվյալները ազգաբնակչության տոկոսային հարաբերության տեսակետից մոտենում էին իրականութեանը, իսկ թուրքական կառավարական տրվյալները բացարձակապես մտացածին էին:

Յարական բարձրաստիճան բյուրոկրատիայի շարքում քիչ չէին թուրքոֆիլ և հայատյաց տրամադրություններով տոգորված անձինք: Դրանց շարքին էր պատկանում նաև արքունական խորհրդական Գրյազնովը: Այդ սևհարյուրակային բյուրոկրատի զեկուցագրերից մեկում խտացած կերպով, նույնիսկ լայիրջության հասած ձևով, արտահայտություն է գտել ցարիզմի այդ կարգի բարձր աստիճանավորների տրամադրությունները: Այդ զեկուցագրից բերենք մի քանի քաղվածքներ:

«Թուրքահայերը Օսմանյան կայսրության մեջ քաղաքական տեսակետից, իհարկե, տիրապետող դիրք չեն գրավում, բայց դրա համար նրանք որևէ իրավունք չունեն»: «Թուրքահայ գյուղացիության դրությունը ծանր է համարվում նրանով, որ նրանք լինելով ավելի գործունյա, ավելի ծուլ թուրքերին և առավելապես լեռնաբնակ քոչվոր քրդերին պետք է հատուկ տուրք վճարեն: Այդուհանդերձ, շնորհիվ հողի արգավանդությանը և ավելի մեծ շափով հողեր օգտագործելուն, հայերն ընդհանրապես զանգվածորեն կարող են և՛ ոչ-աղքատ կանգնել, և՛ բավարարել քրդերի ծայրաստիճան սահմանափակ պահանջները: Այս վերջին հանգամանքը, այսինքն՝

քրդերի անպահանջկոտուծությունը և անպահանջությունը թուրքահայերի կյանքում արտակարգորեն նպաստավոր հանգամանք է, որովհետև հատկապես դրա շնորհիվ կարող են և՛ իրենց գոյությունը պահպանել, և՛ սակավապես քրդերի կենսական պահանջմունքները բավարարել: «Հայերի նկատմամբ թուրքերի և քրդերի թշնամանքն անկասկած արժանի է ուշադրության: Եթե առաջ քուրդը հայից վերցնում էր ավելորդը, ապա այժմ նա նրան կողոպտում և հետապնդում է»: «Հայերի դեմ թուրքերի և քրդերի գրգռվածության պատճառ են հանդիսանում հենց իրենք՝ հայերը... Ընդհանուր առմամբ բարեգույն թուրքերի մեջ այժմ հայերի դեմ կանխակալ վերաբերմունք է արտահայտվում ոչ թե որպես ընդհանրապես քրիստոնյաների դեմ, այլ առանձնապես որպես հայերի. քրդերի և թուրքերի այդ առանձնակի ատելությունը նման է հրեաների նկատմամբ ոռու գյուղացու զգացմունքին: Այդ նույն զգացմունքը հայերի նկատմամբ կարելի է դիտել Կովկասի մահմեդականների մոտ, վերջապես, եթե դրությունը չփոխվի, հայերը նույն զգացմունքին և նույն վերաբերմունքին կարժանանան քրիստոնյա ոռուսի՝ այդ հազվագյուտ և ամենաբարեհոգի էակի կողմից»: Մի կետում, հատկապես ցանկանալով արդարացնել Սասունում կատարված գազանությունները, Գրյազնովը գրում է՝ «Սասունի հայերը մինչև վերջին ժամանակները միայն անվանապես էին ենթարկվում թուրքական իշխանություններին, իսկ իրականում կախման մեջ էին Սասունի քրդերից, որոնց հետ, սակայն, ապրում էին կողք-կողքի, խաղաղ, նրանց հետ միասին մարտնչում էին թուրքական իշխանությունների դեմ, երբ վերջինները փորձում էին թափանցել Սասունի շրջանի անառիկ անկյունները: Թուրքական կառավարության միանգամայն բնական ցանկությունը՝ վերջ տալու Սասունի և այդ շրջանի հայերի այդպիսի աննորմալ դրությունը, մասնավորապես չի կարող ուշադրության չառնվել որպես Սասունի անկարգությունների պատճառ: Սասունի անառիկ լեռները թափանցելու փորձերը ետ մղվեցին քրդերի և հայերի կողմից համատեղ, և անկարգությունների հետագա զարգացման ժամանակ լիովին հասկանալի է, որ մահմեդականների ֆանատիզմն ուղղվեց հայե-

րի դեմ... Դժվար է, իհարկե, վիճարկել, որ թուրքական կառավարության գործողությունների և միջոցառումների մեջ հաճախ արտահայտվում է դաժանություն, բայց արդարության սկզբունքը հարկադրում է ընդունել, որ այդ դաժանությունների դրսևորումը առաջացել է թուրքերի միանգամայն հասկանալի գրգռվածությունից...»:

Մենք կարծում ենք նման դատողությունների անհեթեթությունն ու միտումնավորությունը այնքան ցցուն է, որ դրավրա կանգ առնելու հարկ չկա: Միայն պետք է ընդգծել, որ այդպես կարող էին դատել քուրդ աշիրեթապետները, թուրք փաշաները և ցարական արքունական խորհրդականները: Հատկապես վերջինների մտահոգության առարկաներից մեկն էլ այն էր, որ թուրքահայկական ռեֆորմները կարող են գոնե ավելի քան իրենց անդրադարձումն ունենալ կովկասյան հայերի վրա: «Իհարկե, հայկական շարժման զարգացումը կարելի է հեշտությամբ կասեցնել,— գրում է Գրյազնովը,— բայց միայն թե կարևոր է իրականության աչքերին ուղիղ նայել, որպեսզի Կովկասում, թեկուզ հեռավոր ապագայում, հարկադրված չլինենք հաշվի նստել հայերի հետ, ինչպես Մերձբալթիկայի գերմանացիների, լեհերի և ուրիշների հետ»¹:

Մեր բերած փաստերից շատեր է եզրակացնել, որ ոռու ժողովուրդը և հատկապես ոռուական առաջադիմական հասարակական կարծիքը բաժանում էր ցարիզմի ղեկավար կառակն, նույնիսկ մարդիկ, որոնք ցարիզմի տենդենցիոզ քրդերը գրավող բյուրոկրատիայի դատողությունները: Ընդհանրապես, նույնիսկ մարդիկ, որոնք ցարիզմի տենդենցիոզ քրդերը գրավող բյուրոկրատիայի դատողությունները համապարտապահանդաշի ազդեցություն տակ հայկական հարցը համարում էին Անգլիայի և հայերի կողմից դիտավորյալ ստեղծված գործ՝ ի վնաս Ռուսաստանի կենսական շահերի, ծանուցանալով իրերի փաստական դրության հետ, հարկադրված եղան տրամագծորեն փոխել իրենց կարծիքը և մերկացնել եղան տրամագծորեն փոխել իրենց կարծիքը և մերկացնել ցարական դիվանագիտության, ըստ էության, ոճրագործ քաղաքականությունը: Այդպիսիներից արժե հիշատակել հրա-

¹ АВПР. ф. Политархив, д. № 3448. Армянский вопрос, лл. 56—70.

պարակախոս Վ. Ա. Գոլստրեմին: Նա իր մերկացնող ընդար-
ձակ հոգվածներից մեկում գրում է՝

«Ռուս ընթերցող, ես կրկնում եմ, Ձեր ձայնը անհրաժեշտ
է, քանի որ մեր բոլորի ձայները կազմում են հասարակա-
կան կարծիք՝ Ռուսաստանի ձայնը, որը պետք է անկեղծ լինի:
Ձեր օժանդակությունը հարկավոր է ոչ միայն հայերին օգ-
նություն ցույց տալու համար, այլև Ռուսաստանի հասա-
րակական կարծիքը կեղծ ճանապարհից ճշմարիտ ուղու վրա
դնելու համար: Այդ կողմից մեր հայրենիքում մեղավորներ
շատ կան, իսկ դրանցից առաջինը ես եմ:

«Դուք հանդգնում եք հրապարակորեն հանդես գալ պար-
սավելու հասարակական կարծիքը, որն այնքան անսխալ
կերպով հասկացել և զնահատել է հայկական խոռվություն-
ները,—հայտարարել է ինձ մի անանուն հեղինակ իր անգրա-
գետ գրությամբ:—Սրբ հասարակական կարծիքը սահմանա-
փակվում է հոտառությամբ, նրան միշտ ուղղություն են տա-
լիս շարանենգ մարդիկ: Հասարակական կարծիքը կարող է
հավակնություն ունենալ տեղ բռնելու հասարակական գի-
տակցության մեջ, կամ դառնալ գիտակցված, միայն այն
դեպքում, եթե հենվում է փաստերի ամուր հողի վրա: Այդ
նպատակով յուրաքանչյուրին, ով իրեն իրավունք է համար-
ում ղեկավարելու հասարակական կարծիքը, և ով ցանկա-
նում է ինքն իր համար կարծիք կազմել, ես հանձնարարում
եմ կարգալ վերոհիշյալ գիրքը և Դիլոնի հոգվածը պարունա-
կող բրոշյուրը: Մանթագեք փաստերին, թեկուզ նրա համար,
որպեսզի հերքեք դրանք,—չնայած այդ ձեր ուժերից վեր կլինի:

Եթե մարդկայնությունը և արդարությունը ձեզ համար
թանկ են, կարգացեք, թե ինչպես է իդանդացի Դիլոնը խայ-
տառակության սյունին գամում իր հայրենակից անգլիացի-
ներին:

Եթե դուք կարծում եք, որ Ռուսաստանի շահերից է բխում
laissez faire քաղաքականությունը («թողեք անեն», այ-
սինքն՝ չմիջամտելու քաղաքականությունը.—Ս. Մ.), կարդա-
ցեք Դիլոնի հոգվածը և իմացեք, որ հայերի բնաջնջումն
ուղղված է բացառապես Ռուսաստանի դեմ, որի դիվանա-

գետներն ու հրապարակախոսները անըմբռնելի կուրուքյամբ
մինչև այժմ միայն ձգձգում են այն օղակը, որ Թուրքիան
պատրաստել է մեզ համար:

— Իսկ անգլիացի՞ք,— կասեք դուք:—Մի՞թե նրանք չէին,
որ ուզում էին մեր կողքին հեղափոխական պրոպագանդայի
օջախ ստեղծել:

— Անգլիացիք,— կպատասխանի ձեզ Դիլոնը,— միայն
ջանում էին կանխել ռուսներին. նրանք իրենց նպատակների
համար օգտագործեցին հայերից կազմված դյուրավառ նյու-
թը, որից դարսվում էր հատուկ խարույկ և հրդեհվեց թուրքե-
րի կողմից. անգլիացիներն այդ արին, որպեսզի, պաշտպա-
նելով հայերին, որոնց հենց իրենք, Սան-Ստեֆանոյի դաշ-
նագիրը ոչնչացնելով, հանձնեցին թուրքերի ձեռքը, նրանց
երախտագիտությանն արժանանան և՛ միանգամից երկու նա-
պատակ որսան, և՛ պահպանեն մարդասիրության փառքի
պսակը, և՛ լավ դասավորեն իրենց գործերը, կանգնեցնելով
մեր առաջարժույթը դեպի հարավ: Անգլիացիները, կեղտոտ
ձեռքերով և կեղտոտ նպատակներով իրենց ձեռքն առնելով
օգնության սուրբ գործը, հայերին մատնեցին դառնագույն
դժբախտության և Եվրոպայի աչքում կեղտոտեցին այդ ազգի
մաքուր գործը...»:

Ես ոչ արդարացնում և ոչ էլ մեղադրում եմ դիվանա-
գետներին. ես տեսնում եմ, թե ինչն էր մեզ խանգարում, և
գիտեմ, որ մեր ամեն մի մարդկային քայլը հաշվի կառնվի
Անգլիայի կողմից ճօգուտ իրեն և առավելագույն շարժվի ի
վնաս մեզ: Բայց այդ չի ազատում Եվրոպային, այդ թվում
և մեզ, անգործության համար կշտամբանքից:

Այժմ ևս գործել և հայերին ի վիճակի է փաստորեն պաշտ-
պանել միայն Ռուսաստանը... Այժմ երբ Անգլիան սկսել է
մեղմանալ, երբ արևելյան հարցի վերաբերյալ բոլոր տերու-
թյունների վերաբերմունքը պարզվել է, իսկ գլխավորը, երբ
խայտառակության ծանրության տակ ժողովուրդների խիղճն
արթնացել է, այժմ մենք, ռուսներս, պարտավոր ենք հայ-
կական սուրբ գործը առանձնացնել Անգլիայի կեղտոտ նապա-
տակներից, պետք է օգնության մասին այդ ճիշին արձագան-

քնք, պետք է մեր պաշտպանութեան տակ առնենք մեր տա-
ռապալ եղբայրներին...»¹։

Այսպիսով, Գոլյստրեմի (և շատ ուրիշների) բերանով ու-
սական հասարակական կարծիքը հակադրվում էր ցարական
դիվանագիտութեանը։

Մի այլ ականավոր ուսուցող՝ պրոֆ. Լ. Ա. Կոմարով-
սկին, նույնպես խայտառակութեան սյունին էր գամում ցարա-
կան դիվանագիտութեանը։ «Անկախ Թուրքիայում ենթադր-
վող ռեֆորմների սկզբունքից ու ծավալից,—գրում է նա,—
բնականաբար հարց է ծագում՝ հնարավո՞ր է արդյոք այստեղ
անցկացնել այս կամ այն ռեֆորմները։ Բարձրագույն Գոան
բարեկամների կողմից հանձնարարվող բարենորոգություն-
ներ արդյոք չե՞ն լինի սառույցի վրա գրված այն պարզ
պատճառով, որ դրանք կյանքում կիրառելու համար բացա-
կայում են ամեն ունի հնարավորություններ։ Այդ մասին
վկայում են բոլոր նրանք, ովքեր հնարավորություն են ունե-
ցել մոտիկից դիտելու թուրքական կարգերը, և միայն դիվա-
նագետները, որոնք համառորեն իրենց աչքերը փակում են
թուրքական երևույթների նկատմամբ, ընդունակ են՝ հանուն
հնամուտության և իրենց անիրաժ նախապաշարումների՝ դրա-
նում դեռևս կասկածել»²։

Այնուամենայնիվ ցարական դիվանագիտությունը (ինչ-
պես և անգլիական դիվանագիտությունը) ջանում էր ուսա-
կան հասարակական կարծիքին համոզել, որ Թուրքիայի կող-
մից նախատեսվող ռեֆորմները փրկութեան դուռ են բացում
հայ ժողովրդի համար։ Իսկ ուսական հասարակական կար-
ծիքը Գոլյստրեմի, Կոմարովսկու, Գամմայի, Կոտովիչի և
շատ ուրիշների բերանով հայտարարում էր, որ չի հավա-
տում ցարիզմի հավաստիացմանը։

«Ասում են, որ պետք է հավատալ ռեֆորմների հաջողու-
թյանը, դրանք մշակված են տարբեր երկրների միացյալ դի-

վանատներում։ Պատրաստ եմ հավատալ։ Credo, quæ
absurdum (Հավատում եմ, որովհետև անհեթեթություն է)։

Բայց բանականությունս ինձ ասում է, որ այդ ամենն
ավելի կորրեքի վառելանյութը։ Գործի վերաբերյալ այդպի-
սի հայացք ունենալով, ես կիսնդրեի ուսական հասարակու-
թյանը դեն նետել հայկական հարցի մասին իր վզին փա-
թաթած (հարկավ, ցարիզմի կողմից.—Ս. Մ.) և մեծ շափով
խեղաթյուրված կարծիքը, որը սահմանադրվում է բնագրա-
կան սնանկատության հետ և, ծանոթանալով փաստերին,
իր վերջնական կարծիքը դրանցով հիմնավորել և ոչ թե հո-
տառությունը»¹։

Իսկ թե ինչու ուսական հասարակական կարծիքը չէր
վստահում ցարիզմի հավաստիացմանը, Գոլյստրեմն ասում է.

«Հայկական վիլայեթների համար թուրքերի հետ հավա-
սար քրիստոնյաների ներկայացուցչության ռեֆորմները ինձ
թվում են միևնույնությունների դիվանատներից ելած լիա-
կատար nonsens (խմաստագուրկ), ինչպես թուրքական, այն-
պես էլ մեր առողջ բանականության տեսակետից։ Քրիստոն-
յա «ոռայան», որի վկայությունը չի ընդունվում, որը դուրս է
ոչ միայն մարդկային, այլև բնական օրենքներից, որովհետև
անզեն է և չի համարձակվում պաշտպանվել, երբ նրան
սպանում են,—այդ իրավազուրկ և անարգված «ոռայան»
թուրքի հետ պետք է մասնակցի նիստերի և նրա հետ բաժա-
նի իշխանությունը...»²։

«Թուրքերը, իրենց կայսրության մեջ ձեռնարկելով հայե-
րի սիստեմատիկ, կազմակերպված, մասսայական շարժեր՝
նպատակ ունենալով նոսրացնել քրիստոնյա բնակչությունը,
իրենց տեսակետով, այսպես ասած, ամրացնում են Ռուսաս-
տանի հարևան սահմաններն ընդդեմ դեպի հարավ մեր շարժ-
մանը։ Եթե նրանք ֆինանսական միջոցներ ունենային ամ-
բողջներ կկառուցեին, բերդերի մի ամբողջ գոտի կստեղծեին,
գործերի սպառազինումը կհասցնեին կատարելագործության
և գործերը կկենտրոնացնեին իրենց սահմանազուլաներին,

¹ В. А. Гольцстрем, Братья армяне. «Братская помощь армянам», 1897, стр. V—XIV.

² Л. А. Комаровский, О реформах в Турции. «Братская помощь армянам», II, стр. 3.

¹ Նույն տեղում, էջ XIII։

² Նույն տեղում, էջ IX։

վայսրութեան քրիստոնյա բնակչութեանը պահելով մոսուլմաններին նկատմամբ հարգանքի մեջ: Բայց թուրքերը փող չունեն և, որպեսզի մնան դրութեան տերեր, նրանք գործադրում են իրենց միջոցառումները»:

Այսպիսով, եթե հայկական վիլայեթների ռեֆորմների հարցը թուրքիայի ներքին գործն էր, ինչպես մեկնաբանում էր ցարական դիվանագիտութունը, իսկ ցարիզմի նպատակն էր «Ասիական թուրքիայի այդ պրովինցիաների վրա քաղաքական ազդեցութիւնն իր ձեռքում պահելը», ինչպես ասում էր գեներալ Զելենոյը, ապա ռուսական հասարակական կարծիքի մեկնաբանութեամբ, այդ այլ բան չէր նշանակում, քան հայերի բնաջնջում, որի մեջ առաջնակարգ դեր էր խաղում քինչպես Անգլիայի, այնպես էլ ցարիզմի քաղաքականութիւնը:

ԱՆՎԱՆԱՑԱՆԿ

Ա

- Աբդուլլա—112
- Աբդուլլա—189
- Աբիդին—156—158, 160, 162, 319
- Ա-Դո—85, 103
- Ազիզ Աբդուլա—62, 63
- Ալի—99
- Ալի-Քեմալ—107
- Ալիմով—12, 18
- Այվազովսկի Հովհ.—133
- Անիզ—247—249
- Աշրգյան Խորեն—173, 176
- Ավանի—112
- Արարո—195, 204
- Արմատրոզ—40

Բ

- Բահրի—240
- Բերար Վիկտոր—155, 266, 268
- Բեքիր—156, 157
- Բիլիոսի—89, 124, 133, 143
- Քիչուկ Իզաբելլա—135, 136, 199

Գ

- Գարիդուլին Խ. Զ.—8, 18, 19, 28, 56, 70, 74, 77

- Գամմա—284—330
- Գասրմ—22
- Գասիր—167, 168
- Գյուլիբեկյան Հայկ—3
- Գոլոբորոզկո Ի. Ի.—10, 11—16, 17, 24—26, 40—44, 53, 66, 85, 95, 119, 131, 132, 138
- Գոլստրեմ Վ.—284, 328, 330, 331
- Գոշեն—164, 309
- Գորեմիկին—245, 247
- Գրանվիլ—164, 165
- Գրեյվս Բ. Վ.—215
- Գրին Յ. Դ.—128, 134, 135, 200—202, 214, 321
- Գրյազնով—119, 130, 131, 135, 136, 282, 312, 317—319, 324—327
- Գրբո—198
- Գուրկո-Կրյաժին—79

Դ

- Դելի-Մեհմեդ—263
- Դերվիշ—177
- Դիլոն էմիլ—129, 130, 136, 160, 166, 180, 181, 186, 187, 328, 329

Զ

Զեյնեոյ—182, 271, 298—302, 304—310, 312—316, 319—324, 332
Զեքի—197, 202, 206, 275, 277, 280, 285
Զիւս—66

Է

Էլիոտ—65, 91
Էյուր—129
Էնգելս Ֆրիդրիխ—8, 14, 21, 32, 33, 37, 42, 47, 49, 52, 55—58, 62, 65, 74, 141, 269
Էնվեր—262
Էվերստ—93, 144

Ք

Քահսին Հասան—209
Քամո—104, 105
Քեյլոր—322
Քերանեքլի-օլլու—76
Քումայան Կ.—52, 54

Ժ

Ժադովսկի—216, 220, 221, 276, 277

Ի

Իբլ-օլլու-Իբրահիմ—187
Իբրահիմ—76
Իգնատե—106
Իզմիրլյան—238
Իսմայիլ—104, 105
Իսմայիլ—114
Իսմեթ—42
Իվանով—98, 101

Լ

Լահութի—103
Լաուել—200, 204
Լեյկո—318, 320
Լենին վ. Ի.—286
Լեո—14, 15, 23, 55, 65, 66, 70, 71, 79, 80, 83, 87, 89, 172, 175, 177, 178, 191, 192, 196, 197, 236, 239, 259
Լլոյդ Կլիֆորդ—133, 152, 168, 169
Լորանով-Ռոստովսկի—316

Խ

Խազո—104, 105
Խալիլ—105
Խանազատ Ռուբեն—175
Խաչիկյան Կարապետ—91, 94
Խաչո—113
Խրիմյան Մկրտիչ—22, 132, 172, 243, 247
Խուրշուր—128

Մ

Մերենց—22, 23

Կ

Կամբոն—217, 222, 230, 231, 235, 241
Կայդանովա Օ.—155, 264, 266
Կարա-Օսման—77
Կարախանյան Ներսես—195
Կետչենեներ—124
Կլեյտոն—158, 161
Կոմարովսկի Լ. Ա.—67, 96, 330
Կոտովիչ—284, 330
Կուռո—102

Հ

Հարսրուզներ—37
Համիդ Աբդուլ—8, 41, 46, 58, 59, 64, 66, 67, 115, 116, 248, 260, 272—275

Համիդ Ահմեդ—240
Համպտոն—111, 114, 149, 169, 183
Հաշի—100, 101
Հասան—253
Հելլիք-օլլու—76
Հովորդ—154, 204, 209, 214, 215, 218
Հովհաննիսյան—276
Հուսեին—63
Հուսեին—150
Հուսեին Մուսան-օլլի—102, 111—115, 185

Ճ

Ճանկուլյան—176

Մ

Մալքոլմ-Մաքուլ—136, 146, 199, 200, 292, 294, 295, 303
Մահմուդ—101, 106
Մանուկ—114
Մաքսիմով—259, 260
Մար-Շիմոն—171
Մարգարիտի Ջորջիո—66
Մարքս Կարլ—8, 14, 19—21, 32, 33, 35—37, 41, 42, 47, 49, 52—53, 55—58, 62, 65, 73, 74, 77, 78, 85, 86, 139, 144, 269, 280
Մելհամե—43
Մելքոն—253
Մելրիե—247, 248, 250
Մեջիդ Աբդուլ—53, 63
Մուհամմեդ—45, 141
Մուհամմեդ (աշիրեթապետ)—75, 100
Մուհամմեդ (դատական քենիչ)—90, 91
Մուհամմեդ (մուրաշիր)—91

Մուհամմեդ-էմին Ալի—49, 68, 129
Մուհամմեդ-Ռաշիդ—91, 92, 99
Մուհամմեդ-Փեյլուլ—107—109
Մուսա—115—117, 185, 195, 212
Մուստաֆա—184, 185
Մուրադ—191
Մուրադ III—74
Մուրադ V—63, 64

Յ

Յուսուֆ—129

Ն

Նայտ—13
Նեյրով—194, 228, 235, 240, 241, 243, 245—247, 250, 258, 261, 273, 274, 297, 298, 302, 303
Նեյբի Մահմուդ—62, 128
Ներսիսյան Մ. Գ.—214
Նիզամ-ալ-Մուլթի—141
Նովիկով—305
Նուրի—112

Շ

Շախովսկոյ—155, 261
Շաքիր—96, 248
Շերբուկ—294
Շիշմանյան—285, 286
Շովալով—290

Չ

Չերմասյո—124, 219, 223
Չորան-օլլու—77

Պալմերսոն—172
Պալմոլի Մ.—28, 29
Պարոնյան Հ.—22
Պոլաշյան Համբարձում—198
Պրժևալսկի—230
Պուտյատա (Վասիլև)—15, 271,
274—278, 280, 282, 285, 286

Ջ

Ջոն Ստ.—122
Ջեադ—179

Ռ

Ռահիմ—187
Ռահմի—43
Ռայտ—147
Ռաշիդ—167, 168
Ռեդկլիֆ Ստրատֆորդ—47
Ռեսսամ—139
Ռեֆիկ—8
Ռզզո—129
Ռոզերբրգ—227
Ռոզեն—17, 18, 77
Ռոլեն-ժեկմեն—44, 45, 97, 121,
125—129, 133, 143, 157, 165,
283, 289, 291, 295

Ս

Սաիդ—220
Սալիհ—198
Սանդոն—293
Սարգսյան լևոն—9
Սելիմ—100
Սեֆեր—52, 64
Սկինտ—139
Սմիռնով—154, 194—199, 302,
306

Սուրբերի—114, 272, 288, 292,
294

Սոկոլով Ի.—72, 73, 80, 82

Սոկոլսկի Ն.—28
Սուլեյման—99, 101
Ստեվարտ—121, 126

Վ

Վարդանյան Գևորգ—186
Վարժապետյան Ներսես—293,
294
Վասիլև-տես Պուտյատա
Վենցենտ—260
Վիլբեր—229—231
Վիլսոն—142, 309, 310
Վիկտորիա—114

Տ

Տամատյան Միհրան—195, 196,
204
Տոմիլով—250, 252
Տրոտտեր—124, 291, 310, 319,
321—323

Ր

Րաֆֆի—172, 190

Փ

Փազվան-օղլու—76
Փելլով—75
Փիլիպոս—91

Ք

Քանիդ—83
Քանկե—256

Քանորվան—292
Քեմբրեյ—182, 224—226, 300
Քեյլան Բյուզանդ—83
Քլերի Ֆիլիպ—219, 237
Քյամիլ—45
Քյարիմով Ֆ.—19
Քոկս—148

Օ

Օբուանո—259, 260
Օսման—99

Յ

Յեհմի—267
Յեբրի—126
Յուադ—54, 58

ԲՈՎԱՆԻԱԿՈՒԹՅՈՒՆ

Առաջաբան	7
Առաջին գլուխ Թուրքիան XIX դարի երկրորդ կեսին	7
Երկրորդ գլուխ Հողային հարաբերությունը Թուրքիայում և հայ գյուղացիության տնտեսական վիճակը	69
Երրորդ գլուխ Հայերի իրավազուրկ վիճակը Թուրքիայում	119
Չորրորդ գլուխ Հայկական կոտորածները	154
Հինգերորդ գլուխ Անգլիայի և ցարական Ռուսաստանի հակասությունների անդրադարձումը հայկական կոտորածների վրա	271
Անվանացանկ	333

Մարկոսյան Սուրեն Սիսակի

Արևմտահայության վիճակը XIX դարի վերջերին

Խմբագիր՝

Ե. Ղ. ՍԱՐԳՍՅԱՆ

Նկարիչ՝

Գ. Ս. ԽՈՒԴԻԿՅԱՆ

Տեխ. խմբագիր՝

Վ. Տ. ԴԱՔԵՍՅԱՆ

Վերատուգող սրբագրիչ՝

Ա. Հ. ՄԱՆՎԵԼՅԱՆ

Հանձնված է արտադրության 10/III 1967 թ.:

Ստորագրված է տպագրության 12/VI 1968 թ.:

Թուղթ՝ տպագրակ. № 2, 84 × 108¹/₃₂: Տպագր. 21,25 մամ. = 17,85

պայմ. մամ., հրատ. 15,1 մամ.: Գինը՝ 1 ո. 11 կոպ.:

ՎՋ 08444: Պատվեր 821: Տիրած 25000:

«Հայաստան» հրատարակչություն, Երևան—9, Տերյան 91:

Հայկական ՍՍՀ Մինիստրների սովետի մամուլի պետական կոմիտեի
պոլիգրաֆարդյունաբերության գլխավոր վարչության № 6 տպարան,
Երևան, Թումանյան փ. № 51: